

通志堂集

纳兰性德

文硕阁

wenshuoge.com

目录

关于我们	3
提要	5
序	6
成容若遗稿序	7
卷一 赋	8
卷二 五言古诗	12
卷三 五、七言古诗	33
卷四 五、七言律诗	57
卷五 五、七言绝句	78
卷六 词一	105
卷七 词二	119
卷八 词三	131
卷九 词四	142
卷十 经解序一	154
卷十一 经解序二	162
卷十二 经解序三	171
卷十三 序、记、书	180
卷十四 杂文	186
卷十五 淶水亭杂识一	195
卷十六 淶水亭杂识二	201
卷十七 淶水亭杂识三	212
卷十八 淶水亭杂识四	218
卷十九 附录上	227
卷二十 附录下	245

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

《通志堂集》十八卷，《附录》二卷，国朝纳喇性德撰。

性德有《合订删补大易集义粹言》，已著录。

性德生长华阀，勤于学问。乡试出徐乾学之门，遂受业焉。《九经解》即其所刻，而徐乾学延顾湄校正之，以书成於性德歿后，版藏徐氏，世遂称《徐氏九经解》，并《通志堂》而移之徐氏，实相传之误也。

是编为乾学所裒辑，凡诗五卷，词四卷，文五卷，《淶水亭杂识》四卷，又附录碑志、哀輓之作，为二卷。

【四库提要·别集类存目】

序

往者，容若病且殆，邀余诀别，泣而言曰：“性德承先生之教，思钻研古人文字以有成就，今已矣。生平诗文本不多，随手挥写，辄复散佚，不甚存录。辱先生不鄙弃，执经左右十有四年。先生语以读书之要及经史诸子百家源流，如行者之得路。然性喜作诗余，禁之难止。今方欲从事古文，不幸进遭疾短命，长负明诲，殁有余恨。”余闻其言而痛之。

自始卒以及殓殓，临其丧，哭之必恸。其葬也，余既为之志，又铭其隧道之石，余甚悲。

容若以豪迈挺特之才，勤勤学问；生长华阀，澹于荣利。自癸丑五月始，逢三、六、九日黎明骑马过余邸舍，讲论书史，日暮乃去，至入为侍卫而止。

其识见高卓，思致英敏，天假之年，所建树必远且大。而甫及三十，奄忽辞世，使千古而下，与颜子渊、贾太傅并称，岂惟忝长一日者有祝予之悲？海内士大夫无不闻而流涕，何其酷也！

余里居杜门，检其诗词、古文遗稿，太傅公所手授者，及友人秦对岩、顾梁汾所藏，并经解小序，合而梓之，以存梗概，为《通志堂集》。碑志、哀挽之作，附于卷后。

呜呼！容若之遗文止此，其必传于后无疑矣。记其撒瑟之言，宛如昨日，为和泪书而序之。

重光协洽之岁，昆山友人健庵徐乾学书

成容若遗稿序

始余与成子容若定交，成子年未二十。见其才思敏异，世未有过之者也。使成子得中寿，且迟为天子贵近臣，而举其所得之岁月，肆力于六经诸史百家之言，久之，浩瀚磅礴以发为诗歌古文词，吾不知所诣极矣。

今也不然，追溯前游，十余年耳。而此十余年之中，始则有事廷对，所习者规摹先进，为殿陛敷陈之言。及官侍从，值上巡幸，时时在钩陈、豹尾之间。无事则平旦而入，日晡未退以为常。且观其意，惴惴有临履之忧，视凡为近臣者有甚焉。盖其得从容于学问之日，固已少矣。吾不知成子何以能成就其才若此。抑尝计之，夫成子虽处贵盛，闲庭萧寂，外之无扫门望尘之谒，内之无裙屐丝管呼卢秉烛之游，每夙夜寒暑、休沐定省片晷之暇，游情艺林而又能撷其英华，匠心独至，宜其无所不工也。

至于乐府小词，以为近骚人之遗，尤尝好为之。故当其合作飘忽要眇，虽列之《花间》《草堂》，左清真而右屯田，亦足以自名其家矣。嗟乎！天之生才而或夺之年，如贾傅之奇气卓识，度越今古，无论其次。文章之士，若唐王勃之流，藻艳飙驰，一往辄尽，故裴行俭之论，有以卜其所止。

今成子之作，非无长才，而蕴藉流逸，根乎情性，所谓人所应有，己不必有，人所应无，己不必无，虽使益充其所至，犹疑非世之所共识赏，而造物厄之，何耶？虽然修短天也，夫士亦欲其言之传耳。今健庵先生已缀辑其遗文而刻之，盖不徒笃死生之谊也，后世必更有知成子者矣。独是余与成子周旋久，于先生之命序是编，其能不泫然而废读乎！

康熙三十年秋九月，无锡严绳孙题

卷一 赋

◇金山赋

奥艮兑之涵峙，黠覆载之殊观。矧金山之灵秀，矗砥柱于波澜。踞南徐之京口，对瓜步之江干。焦屿东浮，则抹微云而似髻；石帆西漾，则罨轻霭而如鬟尔。其为山也，形惟特立，势若凌空。岩巘砌云而磊砢，洞穴漱浪而玲珑，珍卉含葩而笑露，虬枝接叶而吟风。芝英翕，兰芷青葱。仙杏敷霞以弄色，江梅吐玉以舒容。青鸟扬音于修竹，天鸡耀羽于芳丛。上栖鸛鹤之危巢，下潜髻鬣之幽宫。其中则有紺宇栉比，丹楼鳞集，高台崔巍而孤耸，虚亭弘广而双立。登殿则绚烂丹青，瞻像则辉煌金碧。周廓庑于山根，俯檐楹于水侧。镂璫石以为阑，饰椒泥而成壁，亘宇宙之古今，历乾坤之阖辟。阳侯荡之而不动，蜚廉鼓之而不仄。还而望之，疑蜃气之结银楼；近而即之，恍蛟人之开绡室。时而烟霏雾凝，则水天杳冥，不辨灵仙之宅，惟闻钟磬之声；时而云开日霁，则景色澄丽，两岸之间，可晰鳌峰之毫发，百里之外，能窥贝阙之参差。或当秋月如练，金波潋潋，则山阁晶莹，若冰壶之濯桂殿也；或当雪密寒江，林峦玉装，则浮图倒景，若玻璃之涌宝幢也。

曾闻韵士至此相羊，亦有名流于焉寄赏。苏子瞻留玉带于山门，滕元发乘扁舟而破浪。贤如鸿渐，漫云洌井在盘涡；智若景纯，何事栖神于浩荡？以山僻在东南，孤悬沆漭，故为轩驾之所弗游，虞巡之所未上。

今皇帝膺宝篆，揽乾纲，轶羲农，跨陶唐，武功诞著，文德丕彰，兼总六合，并包八荒，勋高乎千古，道冠乎百王。赐粟帛于庶老，蠲田赋于万邦。河海清宴，中外乐康。以岳镇为苑囿，以溟渤为池隍。爰稽自古巡狩之典，諏吉上元，甲子之辰，命屏翳先驱而洒道，使箕伯挥扇而清尘，肃天驷王良之万骑，戒羽林列宿之千屯，飙驰玉，雷动金根。旌旗蔽云日，鼓吹咽山林。天子乃升泰岱，越徐扬，逾淮泗，渡长江，泛楼船于中流，遂登兹山，驻蹕而骋望焉。于是南眺江路，百川争赴，始汗漫于巴梁，恣汪洋于荆楚；北眷海门，万壑竞奔，吐潮汐而不息，注扶桑而无垠。乃眷西顾，泮涣邗沟，实京坻于天庾，亘漕运之咽喉；左睇丹徒，襟江带湖，鹜百奥之商贾，辏三吴之舳舻。是日也，皇情既畅，天颜有喜，爰亲展宸翰，麾毫陟厘，星流电激，龙翔凤翥，笑汉帝章草之弗工，陋唐宗飞白之无势。聿题以江天一览，永宠光于山寺。时某以小臣幸得备虎贲之执戟，隶宿卫于钩陈，虽不敢追踪于风后，力牧陪游襄城、姑射之盛，庶窃比迹于相如、扬雄扈从上林、甘泉之伦也。因逡巡匍匐于帐殿之下，谨再拜手稽首而献颂曰：

圣德备矣巡万方，鸾旗羽葆纷蔽江。

蛟龙为驾鼉鼉梁，陟彼金山瞰大荒。

朝宗碧海波不扬，雕题穷发尽来王。

带砺江山历服长，南巡游豫岁为常，

忆万斯年乐未央。

◇五色蝴蝶赋

夫惟昆虫之羽化兮，俨离俗而登仙。矧彩翼之有斐兮，备文章之自然。伊蝴蝶之微物兮，久托兴于曩篇。陋唐人短赋之未工兮，余因感激外之有五色者，乃为之抽茧绪于毫端。肆考载籍所记，则产自丹青之树；流观博物之编，则生于橘柚之园。膩软纤腰，若荆艳临风而婵婉；参差舞翼，似阳阿长袖之翩翻尔。其啄芳尘于芷里，饮玉露于花间，弱比收香之么凤，清同翳叶之寒蝉。柳院儿童，解惜轻须除细网；兰闺窈窕，最怜新粉扑齐纨。双飞款款，并戏娟娟。所由荡子之妻，见悠扬而兴惋；怀春之女，对夹拍而含酸者也。又尝旁搜《尔雅》之书，泛览方輿之记，曾闻栖香鹤蔓者，则帟帐牵情；绚彩罗浮者，则车轮比翅。既小大之形殊，亦元黄之色异。

说者谓南方朱鸟之乡，位属离明之地，故其山川卉木，悉炫菁华；鸟兽虫鱼，咸彰绮丽。曩余奉使出塞，吉日脂车，晓背阳乌而轆轳，宵瞻元武而驰驱，经途万里之远，径陟大荒之隅。诘知绝漠固阴之藪，太蒙沍寒之区，葱菁乔陵，匪乘春而燠若；逶迤深谷，不吹律而阳舒。其中乃有同心并蒂之葩，含英而翕；四照九衢之萼，吐秀而扶疏。遥而睇之，初疑百阵文禽之翔集；迫而观之，乃识千群锦蝶之飞。尔时忽覩斯蝶，目夺志丧，玩其藻绩，非常斑斓诡状，几为延伫而流连，几为凝神而仿像。或元如阆风之鹤，或赤若炎洲之雀；或黄如金衣公子，或缟若雪衣慧女；或彪炳如长离之羽，或错落如孔爵之尾；或黑若隃麋之墨，或黝若秋螭之翼；或青如木难之珍，或红如守宫之殷；或绿若雉头之毳，或晃如鹦鹉之背；或攄似珊瑚，或纹成玳瑁；或缥碧如八蚕之绵，或绀翠若螺子之黛；或蔚若天台建霞，或鲜如螭螭垂华。或褐若伊蒲之色，或缝比鸡人之帨；或炯炯如银睛，或辉辉若金星；或紫似河庭之贝，或蓝同琼岛之瑛；或烂熳若析支氍毹，或璀璨如大秦琉璃。于斯益信宇宙之广大，造化之绸缪。地何生而非美物，何处而无尤？假有绘于紫茸云气之帐者，必谓赵后香魂之变化；若有绣于冰绡雾縠之裙者，必非汉宫赤凤所能留。是岂止唐家芍药，阑前仅有玉屑金之熠熠；南氏桂椒，厨内但诧离红脰白之脩脩而已哉！

意惟是域也，远接昆仑之丘，遥连星宿之海。元圃群玉之恒储，碧水九芝之常茂。女床鸾鸟之攸栖，丹穴凤皇之是萃。故为珍族所诞生，而有此文螭之可爱者欤！爰是遂命从者麾箠，仆夫张罗，剪取组羽，全生修柯。曜灵时未匿，停骖聊复歌。歌曰：翩翩者蝶，颺彩幽墟。与蜂为侣，作凤之车。偷得嫦娥月华帔，裁为蛾女五云裾。诗人遇物能成赋，那羡滕王《蛺蝶图》。歌毕就枕，倦游华胥，不觉梦为蝴蝶。

而栩栩，寤同庄叟而蘧蘧也。噫异矣！

◇自鸣钟赋

缅昔二仪肇判，三辰初曦，轩辕制器，尚象伊祁治历明时，岐伯铸钟而调嶰竹，挈壶司漏以协璇玑，用能揆合昏旦之盈缩，平章度数之精微。是以仲叔、羲和守之百世而勿失，天官、太史用之亿代而靡违者也。

丕惟圣祖龙兴，造邦中宇，聪明时宪，风云应，改革制度，厘定规矩，历授西洋，法依古里。厥初爰有自鸣之钟，创于利马豆氏，虽形体之大小多所殊，而循环于亥子初无异。至其后人之传教，推步益臻于神妙。帝乃命以钦天纪官司于凤鸟，易刻漏以兹钟，建灵台于云表，显列众辰之图，深藏运机之奥，抉宣夜之渊弘，殚《周髀》之浩渺尔。其外之可见者，加尺茎于图上，俨窥天之玉衡，譬夸父之逐日，莫之推而勇行。辰标上下四刻之初正，刻着一十四分之奇赢。尺每交于一辰之疆界，则内钟之不可睹者，若为考击而闻声。始则宫商间发，继则剡戕齐鸣，榼榼丁丁，鏦鏦铮铮，随烟高下，从风飘零。既犹伦夔之和律吕，渐若襄旷之奏韶箛。逾半咎而稍歇，遇中正而愈辘。盖如龙吟寂而虎啸旋起，猿啼息而鸡号迭兴。实动仪苍昊健行之无息，而一准朱轮飞辔之均平。赐谷虞渊，蚤暮不差于累黍；昆吾蒙汜，昼宵罔忒于权衡。故其为声也，不假鲸鱼之象，非由乐人之撞。四序流音于汉殿，奚关铜岫之颓；终年叶韵于丰山，岂尽繁霜之降。于以范围，岁月统章而无乖；消息寒暑，晦朔□□而勿爽。此其造历之密，不徒与太初、麟德为颉颃；制作之精，非仅同弘度、承天相揖让。知自此枫庭蓂莢可勿生阶，彤陛鸡人无烦戴绛。总由一机轴所自舒卷，若有群鬼神为之鼓荡。于是深宫听之，不失九重之宵旰；在位闻之，毋愆百职之居诸。纵令雨晦风潇，而惜阴之士自识晨昏而运璧；即使终霾且噎，而刺绣之姬应知中昃而添丝。或处深山幽谷之中，若聆音而起，当弗昧于茅索之候；或居修竹长林之内，若辨响而兴，亦勿迷弋鳧与雁之期矣。

余为转辗思维，末由悟其蕴；低徊俯仰，惟有叹其神。则知为是钟者，诚默夺造化之工巧，潜移二气之屈伸，洵足媲铜仪玉箫，垂为典则而难改；且可配大挠章亥，祀之奕世而常新。迨将黜公输而禡子野，夫何《周礼》鳧氏之足云。

◇雨霁赋

宿雾开，阴霾豁，纸窗明，檐溜寂，柱础润收，鸟啼音悦。爰启户以驰眸，快晴光之朗澈；瞻暖日以渐高，觉逆暍之顿绝尔。乃风帷开卷，云绮舒张。鹊刷羽以出树，日穿漏而逗光。远山皎兮如沐，流水奔兮若狂。园林被濯以呈彩，草砌迎薰而异香。密筱摇烟而挺翠，幽兰含露而腾芳。鱼喁喁以噉水，蝶款款以轻飏。炉烟直而缭绕，琴韵调而铿锵。此则积雨初晴之候，诚不禁其惊异而徜徉也。

至若涂泥静淥，平原旷邈，油衣乍脱，轻轩载道，足轻蜡屐，颇掀雨帽，乘盈潦而行舟，曳晴丝以垂钓，落彩虹于天半，挂朱霞于木杪，叹万象之俱新，美两仪之信好，回思风雨如晦，鸡鸣不已之时，魂消夜暗，梦断晨曦。谁知天漏忽补，毕宿差池，谁炼女娲之石，长曳醉酒之旗？是则有往必有复，有戚必有怡。观初晴于积雨，乐天命而奚疑。更有霭霭浮云，去若飘蓬；恢恢碧宇，独露苍穹。目无纤翳，皎魄当空，天君安泰，清明在躬，摄伏群阴以成大工。万汇昭苏，其乐融融不？又以悟改过迁善之业，与惩忿窒欲之功也哉！于是瞻眺庭除，中心豁如；静坐晴轩，乐志琴书。观我生之消息，任天运以卷舒。知显晦之维命，而又何所用其健美与！

◇灵岩山赋

神仙堂奥，阊阖屏藩。万峰环拱，百渚横奔。问吴宫之故址，伤越国之兵屯。楼台非昔，川谷犹存。惟南斗之星分，实咸池之稟气。山势天平，湖光日沸。路羊肠以南趋，水龙池而东溉。倚孤塔之凌霄，俯姑苏之丛卉。北枕支硎，西瞻邓尉。接穹窿以为宗，镇乍以为纬。东带横山，五坞前瞰。胥溪一市，万顷苍茫。四时馥馥，既采掇乎芳菲，亦顾盼以雄毅。思夫三让之高风，使荆蛮之俗同。及两国之仇始，乃吴都之更雄。凭高论守，隔水谋攻。石室羁人，囚栋梁之策士；苕萝娇女，备洒扫于后宫。既开四域，渐薄侯封。酒已倾而连醉，歌益妙而未终。山川际盛，草木向荣。既安逸乐，遂广游踪。春泾采香，溪花如倩。扁舟驾风，锦帆似箭。泛越女于溪中，馆吴娃于天半。步廊响屐，离宫酣宴。妆台秋镜，万六千顷之波；黛点春螺，七十二峰之变。坐峨石以鸣琴，临平池而洗砚。浓淡俱鲜，阴晴各善。亦有豨巷鸡陂，鹿洲鸭苑。洞庭消夏之湾，浮玉可盘之甸。岂若云岫参差，林岚隐见。台阁玲珑，烟霞舒卷。雪积磷磷，晴开面面。东吴胜游，兹实其选也。夫何阊阖晨开，不废长洲之猎；鲦鯉夕至，遂径酿酒之城。有目空悬，无心效顰。虎丘谁踞，鹤市多惊。惟兹岩石巍然不倾，乃至辘轳断，双井犹清。罗绮烟销，百花常发。松杉古路，反为竹杖盘桓；兰桂深坞，惟是棋枰暂歇。彼老人之枯坐，石不点头；乃艳女之经游，迹余深窟。无生国里，高阁涵空；有色天中，讲堂喻筏。亦人事之更新，非天道之若阙。龟望水而能化兮，鱼听讲而不没。信斯岩之有灵兮，亦何异乎林屋之终塞。

卷二 五言古诗

◇五言古诗一

◇杂诗七首

举世觅仲连，乃在海中岛。

往问齐赵事，默然望林表。

灌园于陵中，绝食太枯槁。

神龙亦见首，不然同腐草。

虚言托泉石，蒲轮恨不早。

登朝表宿誉，食肉以终老。

◇又

李白谪夜郎，杜甫困庸蜀。

纷纷蜮志辈，昏塞饱粱肉。

造物岂无意，与角去其足。

末俗谀高位，文成贵珠玉。

纵云咸池奏，我愚不能读。

一言欲赠君，焚砚削简牍。

此事属穷人，君其享百禄。

◇又

雅颂十九首，议者死三尺。

曹刘始宏放，颜谢颇雕饰。

亦有射洪子，变风厉逸翮。

希古惜已勤，形合理则隔。

泉明自澹荡，尽变待甫白。

轻举游五城，冥研破八极。

咿咿奏皇华，末俗自不识。

我诚拙文词，四顾复不适。

异士今何在，山川故如昔。

幼时颇脑满，芜秽期荡涤。

兹事亦大难，中年飞扬息。

砚有前岁尘，书惟稚龄迹。

述作非吾愿，一杯永今夕。

◇又

逸骥千里足，君行日一舍。

休暇岂不欣，何以塞高价？

鹤鸣引双雏，欲集高堂下。

见君养鳧鸥，矫翮复悲吒。

◇又

重衣少不胜，跃马今逾险。

落景望戈留，孤云迎阵敛。

元戎爱仲宣，荒碛同帷簟。

军前笳鼓沸，幕后琴书澹。
清尊侍华灯，谈宴不知疲。
一言合壮志，磨盾记其词。
悲吟击龙泉，涕下如纆縻。
不悲弃家远，不惜封侯迟。
所伤国未报，久戍嗟六师。
激烈感微生，请赋从军诗。

◇又

卮酒洒荒郊，缟衣泣少妇。
金屏方宛转，一夕向长暮。
狐兔呼凄飐，鸺鹠啸宿雾。
忆子伴刺绣，赧颜慙君语。
邻人起踟躅，哀响凋芳树。
不知吹箫人，离魂渺何处？
我生不能闻，猿哭与嫠诉。
三声断肠迟，不如妇一词。

◇又

药误求仙人，禄湛患失客。
文章獭貉啖，勋名过眼息。
西方有至人，莲花护金碧。

滟滟池水中，列圣坐相覩。

风声宣上法，鸟韵开迷魄。

称名弹指到，百劫慈云侧。

捐兹宇宙乐，从彼金仙迹。

◇山中

微月翳高岭，松风起群壑。

近山无术阡，高下森华薄。

涉涧愁窈窕，顾步眩冥莫。

高树暗如山，倾崖石欲落。

羈离悲夜猿，险峭伤病鹤。

缅怀万物情，此时欣有托。

山中一声磬，禅灯破寥廓。

◇效江醴陵杂拟古体诗二十首

◇班婕妤《怨歌》

团团望舒月，皓皓冰蚕绢。

欲却炎天暑，比月裁成扇。

望舒圆易缺，金风换炎节。

风凉秋气寒，匣扇复谁看。

扇弃何足道，感妾伤怀抱。

对月泪如丝，君恩异旧时。

◇王仲宣《从军》

中原嗟丧乱，志士奋从军。

所从智勇宰，仗钺渡漳滨。

龙旗飞壁垒，豹尾肃勾陈。

戈铤耀晴日，甲冑炫屯云。

孙吴萃猛将，管乐聚谋臣。

予时备七校，秉羽介犀鳞。

一麾服荆扬，再举靖巴黔。

东征西载怨，泽洽威自振。

箠壶夹道路，筐筐馈玄纁。

文皮裹干戚，奏凯邳城闐。

功名垂钟鼎，丹青图麒麟。

◇刘公干《公宴》

曜灵下濛汜，素魄复徘徊。

浹日盛娱游，清夜还追陪。

华池俯高馆，波光映丹楹。

锦茵藉丰席，绮宴罗金杯。

舞袖空中扬，歌声清且哀。

儵鳞跃文藻，六马仰刍茭。

灵囿鹿麋々，灵台鹤皤皤。

燕喜时未央，福履恒厥绥。
明明衮衣宰，济济薪爇才。
何幸厕文学，得尽朽钝材。
愿赋振鹭诗，常歌醉言归。

◇曹子建《七哀》

东园桃李姿，是妾嫁君时。
燕婉为夫妇，相爱不相离。
良人忽远征，妾独守空帷。
忧来恒自叹，冀死魂追随。
又念妾死时，谁制万里衣？
幸有双鲤鱼，拟为寄君辞。
终日不成章，含泪自封题。
君若得鲤鱼，剖鱼开素书。
但看书中字，一一与泪俱。

◇左太冲《咏史》

吾闻赵公子，好客埒三君。
能令千载后，买丝绣其真。
讵如燕昭王，金台筑嶙峋。
迎骏既隆礼，师郭亦殊伦。
奕世储壮士，殉义忘厥身。

荆轲去不返，渐离踵入秦。

至今易水上，歌筑声犹新。

何代无奇人，台荒蔓荆榛。

◇陆士衡《赠弟》

我形子洛城，子影只华亭。

仰看鸿雁翔，能不念平生？

昔为同根树，今若叶辞枝。

凉风起闾阖，各自东西飞。

鸬原日以远，棣萼日以晚。

终当复旋归，勉子加餐饭。

◇嵇叔夜《言志》

杨朱泣路岐，墨翟悲素丝。

灵蔡甘曳尾，郊牛憚为牺。

处则尚其志，出则颠其颐。

子云自投阁，董生常下帷。

琅玕啄凤鸾，腐鼠吓鸱鸢。

寒蝉饮清露，苍蝇集腥膻。

予生实懒慢，傲物性使然。

涉世违世用，矫俗迁俗欢。

金羈非鹿饰，丰草意所安。

琴弹《广陵散》，啸上苏门巔。

采术服黄精，终期学长年。

◇阮嗣宗《咏怀》

凉燠递推迁，今古迭朝暮。

出岫无还云，落花宁上树。

朱颜瞬息改，鬢发须臾素。

浮生匪金石，焉得常贞固？

途穷行辙返，恸哭畏迷误。

青眼予何好，白眼予何恶。

诞矣鲁阳戈，荒哉夸父步！

长啸复衔杯，松乔安可睹。

◇许玄度《寓居》

巢父逊箕颍，善卷遁淮甸。

家世本高阳，于越爱葱蒨。

云兴秀岩壑，霞蔚美金箭。

镜水碧芙蕖，铜溪红菡萏。

石匱屡冥搜，丹梯愜凌缅。

漾舟樵风湾，筑室兰渚岸。

涧清纓斯濯，莼滑羹可荐。

玄从王子谈，理同谢公辨。

欲祛义常胜，内朗胸无战。

风月偶行游，萍踪何足羨。

◇郭景纯《游仙》

蒙庄主养生，苦李贵道德。

为善无近名，知白守其黑。

梦蝶岂寓言，犹龙信难测。

漆园春秋久，柱下商《周易》。

大道生之根，背福即罹极。

昔人求神仙，嗜欲戕其直。

浩乎鲲鹏飞，去矣六月息。

无为自清静，葆光常不匿。

何必从山腹，餐霞服琼液！

◇陶渊明《田家》

结庐柴桑村，避喧非避人。

当春务东作，植杖躬耕耘。

秋场登早秫，酒熟漉葛巾。

采罢东篱菊，还坐弹鸣琴。

罄折辱我志，形役悲我心。

归华托陈荻，倦鸟栖故林。

壶觞取自酌，吟啸披予襟。

◇鲍明远《玩月》

娟娟秋月辉，皎皎明镜飞。
清如积水光，莹若凝冰霜。
窈窕女墙东，徘徊绮户中。
晃惊梁上燕，微见网中虫。
天香生桂树，玉露泣芙蓉。
佳人坐空房，金波映高张。
乌啼既含怨，嫋娥更怀伤。
牛女隔银渚，终岁犹相望。
自妾嫁征夫，关山路何长。
安得为清影，夜夜在君旁？

◇谢康乐《游山》

会稽东南美，淳渊环峙岳。
绣嶂郁盘纡，金峰耸崭削。
非由巨灵劈，无假五丁凿。
芙蓉扬秀萼，列壁展丹雘。
虬松偃苍盖，蟠藤森翠幕。
鲜葩耀阳崖，芳兰媚幽薄。
披榛出风磴，援葛度烟壑。
见叱初平羊，看飞道林鹤。

弦歌禽鸟哢，琴筑涧泉落。

云霞灿锦綵，薇蕨傲珍错。

世慕簪组贵，宁知考盘乐。

永怀园绮踪，将寻晨肇药。

◇颜延年《侍宴》

枫陛叶紫微，桂宫御黄屋。

阁道驰凤辇，芳苑骋鸾毂。

乘阳布春令，税驾钟山麓。

卿云冠绝巘，复旦光浚谷。

风飏绵羽嘒，烟梁萸丝绿。

依阜列琼筵，临湖张黼幄。

宫悬金奏阕，鼓吹笳箫续。

圣德弘诞被，皇情畅遐瞩。

江清冯夷俯，海静阳侯伏。

潮随献琛舫，汐送输赆舶。

宝气蜃楼幻，冰轮灏珠浴。

龙璚和睿容，羽爵醉揆牧。

方聆燕镐咏，旋听横汾曲。

拜手进赓扬，微才惭朴樕。

◇谢惠连《捣衣》

火正辞炎轡，金行御商鑣。
撼撼风惊叶，湛湛露盈条。
月迟素砧冷，霜早青林凋。
蟋蟀怨空墀，鸿雁哀层霄。
秋容脆纤葛，雪色嫌轻绡。
深闺怀槁砧，万里边城遥。
罗帷怯凉飈，况乃朔地飙？
柔荑运双杵，清响发严宵。
金釭焰稀微，珠斗横寂寥。
捣此八蚕绮，将为御寒袍。
量以金粟尺，裁用并州刀。
长短记君身，肥瘦昧君腰。
同心绾绣带，合欢藏翠翘。
带表相思切，翘明企望劳。
应知着衣时，泪点当未消。

◇卢子谅《时兴》

代谢感时序，迭微叹日月。
憇彼鸚鵡鸣，忍此众芳歇。
林园无鲜蕊，原野飞陨叶。
王孙伤岁暮，志士励穷节。

劲莛矗惊飙，贞松翠霜雪。
昂昂泽中雉，矫矫韞上鹖。
物性不可渝，人宁不如物。
努力崇明义，岂为威武屈！

◇谢玄晖《观雨》

冉冉敬亭云，泠泠北崎风。
仰见城西隅，崇朝躋蛸蛸。
惧霖散帷幔，霏微入帘栊。
讼庭滋草碧，铃阁泫花红。
之子期未至，琴尊谁与同？
登楼一以望，山城如画中。
青笠岩际叟，绿蓑溪上翁。
白鸟讵有营，飞飞西复东。
嗟予徇微禄，润物惭无功。

◇沈休文《东园》

暮出石城东，青郊行迢迢。
纵横阡陌，村舍炊烟起。
落日隐远峰，霞雯蔚成绮。
骀骀骤归骑，林鸦鸣未已。
折柳旧樊圃，蔬药种藿靡。

荆扉临曲埼，淮水绿弥弥。

萝径足幽寻，茅亭可延伫。

清风为我客，皓月为我主。

信宿即吾庐，乾坤皆逆旅。

◇范彦龙《古意》

左掖繆补袞，西清翊垂旒。

祥风玉墀度，丽日金掌浮。

簠羽鸛鹭序，接迹夔龙俦。

岱畎有威凤，千秋瑞虞周。

舜文正当阳，池上复来游。

雍喈叶笙磬，黼黻宣皇猷。

文章贵纶紵，佩玉锵琳球。

珠露饮帝梧，琅霜啄昆丘。

饮啄得所止，砥志无外求。

嗤彼随阳雁，但为稻粱谋。

◇张景阳《忆友》

浓阴晦郊墅，重云结岩岫。

匣瑟鸣鸛弦，林花浥绮绣。

适适响径泉，淙淙泻檐溜。

兔隐失弦望，乌潜昧昏昼。

原田秣黍浸，陇阪苞稂莠。

求友息嚶鸣，摧俦寡猿狖。

茅斋久岑寂，离索常在疚。

郁陶王贡冠，绵邈萧朱绶。

一日为三秋，盍簪何时又？

◇和友人饮酒

君有饮酒诗，足继柴桑翁。

言得此中理，一醉等洪濛。

我性虽不饮，劝客愁尊空。

遇我高阳徒，酣适颇能同。

自君贻此编，浩如沃心胸。

岂知古达者，半藉曲蘖功。

学道与识字，苦心终见穷。

未老习便宜，趋事舍劳躬。

愿君多酿黍，暇日来相从。

◇又

我生如飞蓬，飘然落天际。

太虚浩漠漠，生理偶然契。

神明本无方，耳目有拘系。

循想起形迹，蕴积为身世。

穷神知化源，外物敢为厉？

我欲尽世人，梦梦遇一切。

惟有饮者心，庶几得所憩。

◇又

秦皇作长桥，驾海跨烟雨。

三山苦相招，石重不可举。

我不梦蝴蝶，醉后亦栩栩。

遐哉勾漏令，丹砂未堪许。

不如营一尊，迟我山中侣。

◇茅斋

我家凤城北，林塘似田野。

蘧庐四五楹，花竹颇闲雅。

客俗鸡能谈，忧来酒堪把。

容膝岂在宽，惬意自潇洒。

静中生虚白，念虑寂然寡。

忽悟形与器，万物尽虚假。

窗中见斗牛，门前骤车马。

试问此间阎，当时住谁者？

因之叹尘世，我心聊以写。

◇又

闲庭照白日，一室罗古今。
偶焉此栖迟，抱膝悠然吟。
吟罢有余适，散瞩复披襟。
时开玉杯卷，或弹珠柱琴。
檐树吐新花，枝头语珍禽。
花发饶冶色，禽鸣多姣音。
色冶眩春日，音姣伤春心。
夕阳下虞渊，寂莫还空林。
清光复相照，片月西山岑。

◇题画寄友人

梁燕忽已去，飒然秋在堂。
澹澹东篱姿，疏花不成行。
闲窗展缣素，丹青破微茫。
咫尺烟雾生，隐映枫林苍。
屈注天河水，倒挂千尺梁。
岩壑竞喷薄，倏令心骨凉。
山川似剡中，扁舟兴难忘。
因之寄远道，矫首飞鸿翔。

◇高楼望月

戚戚复戚戚，高楼月如雪。

二八正婵娟，月明翡翠钿。
由来工织锦，生小倚朱弦。
朱弦岂解愁，素手似云浮。
一声落天上，闻者皆泪流。
别郎已经年，望郎出楼前。
青天入海水，碧月如珠圆。
月圆已复缺，不见长安客。
古道白于霜，沙灭行人迹。
月出光在天，月高光在地。
何当同心人，两两不相弃？

◇效齐梁乐府十首

◇朱鹭

整翮辞炎服，乘春向帝畿。
沈浮茄下食，容与藻中依。
瑞日明丹羽，恩波浣赤衣。
醉颂于胥乐，鸣珂蹋月归。

◇巫山高

江声送客帆，巫峡望巉岩。
秋夜猿啼树，霜朝鹤唳岩。
花红神女颊，草绿美人衫。

阳台不可见，风雨暗松杉。

◇芳树

连理无分影，同心岂独芳。

傍檐巢翡翠，临水宿鸳鸯。

叶叶含春思，枝枝向画廊。

君情若比树，妾意复何伤。

◇有所思

雁帛音尘绝，河桥草色青。

愁凝远山黛，梦断隔花铃。

并语红襟燕，双移碧汉星。

夫君在何处，顾影惜娉婷。

◇折杨柳

陌上谁攀折，闺中思忽侵。

眼凝清露重，眉敛翠烟深。

羌笛临风曲，悲笳出塞音。

纵垂千万缕，那系别离心。

◇梅花落

春色凤城来，寒梅逼岁开。

条风初入树，飘雪渐侵苔。

粉逐莺衣散，香粘蝶翅回。

陇头人未返，急管莫频催。

◇洛阳道

九重开帝阙，八达控天街。

金马蛾眉柳，铜驼兔目槐。

歌钟传甲第，桀戟列台阶。

何事扬雄宅，春风草径埋。

◇长安道

井干通帝座，太液起蓬莱。

衔壁金釭列，悬藜甲帐开。

仙盘承晓露，凤辇殷春雷。

偏令路旁客，日暮走黄埃。

◇雨雪朔

朔地寒威至，征人未寄衣。

龙城风早劲，葱岭雪初飞。

已听谣黄竹，复闻歌《采薇》。

那禁望乡泪，不及雁南归。

◇王昭君

椒庭充选后，玉辇未曾迎。

图画君偏弃，和亲妾请行。

不辞边徼远，祇受汉恩轻。

颜色黄尘老，空留青冢名。

卷三五、七言古诗

◇五言古诗二

◇拟古四十首

煌煌古京洛，昭代盛文治。

曰予餐霞人，簪绂忽如寄。

微尚竟莫宣，修名期自致。

荣华及三春，常恐秋节至。

学仙既蹉跎，风雅亦吾事。

◇又

相彼东田麦，春风吹裊裊。

过时若不治，瓜蔓同枯槁。

天道本杳冥，人谋苦不早。

荒庐日旰坐，百虑依春草。

四顾何茫然，凝思失昏晓。

◇又

乘险叹王阳，叱驭来王尊。

委身置岐路，忠孝难并论。

有客赍黄金，误投关西门。

凛然四知言，清白贻子孙。

◇又

客从东方来，叩之非常流。

白云发扶桑，期到海西头。

白日当中天，浩荡三山秋。

回风忽不见，去逐灵光游。

烛龙莫掩照，使我心中愁。

◇又

天门荡荡，翕罗星躔。

白日瞩微躬，假翼令飞骞。

平生紫霞心，翻然向凌烟。

双吹凤笙歇，宛转辞群仙。

越影籀浮云，横出天驷前。

玉绳耿中夜，斗杓何时旋？

◇又

旷然成独立，片月相古今。

眷兹西北楼，斜晖明玉琴。

清影忽以去，怅惘予何心。

◇又

竹生本孤高，翛然自植立。

矫矫云中鹤，翱翔何所集。

丈夫故豁达，身世何汲汲。

外物信非意，潦倒翻成泣。

瞻彼岭头云，扶疏被原隰。

延伫当重阴，西风吹衣急。

◇又

寒沙连云起，遥空白雁落。

之子方从军，深闺竟寂莫。

天远岂知返，路阻长河络。

北风吹瘦马，铁衣不堪著。

从军日未久，朱颜镜中削。

悠悠复悠悠，人生胡不乐。

◇又

妾如三春花，君如二月风。

澹澹从东来，吹作夭桃红。

一朝从军行，令人叹飞蓬。

何似云间月，清辉千里同？

◇又

天地忽如寄，人生多苦辛。

何如但饮酒，邈然怀古人。

南山有闲田，不治委荆榛。

今年适种豆，枝叶何莘莘。

豆实既可采，豆秸亦可薪。

◇又

宇宙何荡荡，彼苍亦安知。

屈平放江潭，子胥乃鸱夷。

升沈本偶然，遇合宁有时。

千古恨如此，徒为吊者悲。

微生一何幸，勗哉邁昌期！

◇又

三月燕已来，清阴杏子落。

春风在青草，吹我度城郭。

道逢贵公子，银鞍紫丝络。

藉草展华茵，相邀共杯酌。

为言相见欢，殷勤费酬酢。

久之语渐洽，礼数少脱略。

初夸身手好，漫叙及勋爵。

惜哉君卿才，何事失宦学？

予笑但饮酒，日暮风沙恶。

走马东西别，归路烟漠漠。

◇又

予生未三十，忧愁居其半。

心事如落花，春风吹已断。

行当适远道，作计殊汗漫。

寒食青草多，薄暮烟冥冥。

山桃一夜雨，茵箔随飘零。

愿餐玉红草，一醉不复醒。

◇又

松生知何年，崎崿倚天碧。

其上无女萝，其下远荆棘。

何用托孤根，苍崖多白石。

亦有青兰花，吐芬在其侧。

◇又

美人临残月，无言若有思。

含颦但斜睇，吁嗟怜者谁。

予本多情人，寸心聊自持。

浩歌幽兰曲，援琴终不怡。

私恨托远梦，初日照帘帷。

◇又

安石负盛名，乃在衡门初。

名僧既接席，妙伎亦同车。

仕进良偶然，年已四十余。

军国事方棘，围棋看捷书。
所以丝竹欢，陶写待桑榆。
晚造泛海装，始志终不渝。
马策西州门，想像生存居。
君看早达者，怀抱竟何如？

◇又

凉风飒然至，秋雨满空阶。
室有积忧人，所思在天涯。
蟋蟀鸣北牖，蛛丝落高槐。
明发出门望，爽气正西来。
西山有涧阿，肥遁以为怀。

◇又

生本蒲柳姿，回飙任西东。
心如秋潭水，夕阳照已空。
落花委波文，天地如飘蓬。
忽佩双金鱼，予心何梦梦。
不如葺茅屋，种竹栽梧桐。
贵贱本自我，荣辱随飞鸿。
何哉阮步兵，慷慨泣途穷？

◇又

客遗缙绮琴，言是雷霄璟。
能啼空山猿，亦飞秋涧瀑。
援之发古调，三奏不成曲。
朱弦澹无味，予亦聊免俗。

◇又

白云本无心，卷舒南山巅。
遥峰如梦中，孤影相与还。
忽然间高霞，霏霏欲成烟。
风花落不已，流辉转可怜。
皎洁自多愁，况复对下弦？
高楼夜已半，惜此不成眠。

◇又

岁星不在天，大隐金马门。
微言亦高论，一一感至尊。
文园苦愁疾，凌云气萧瑟。
乘传威始伸，谏猎情亦切。
所为一卷书，乃在身后出。

◇又

西汉有贾生，卓犖真奇士。
赍志终未达，盛年身竟死。

为文吊屈平，可怜湘江水。

愤俗谢勋贵，轻生答知己。

临风忽搔首，吾亦从逝矣。

◇又

凤翔几千仞，羽仪在寥廓。

结巢梧桐顶，层云覆阿阁。

非无青琅玕，不寄西飞鹤。

一鹤正西飞，翩翩长苦饥。

玉潭照清影，独自刷毛衣。

生得谢虞罗，光彩非所希。

◇又

初日澹杨柳，对之何所言。

东风几千里，吹入十二门。

天地忽如寤，青草招迷魂。

堂堂复堂堂，春去将谁论？

◇又

世运倏代谢，风节弃已久。

磬折投朱门，高谈尽畎亩。

言行清浊间，术工乃逾丑。

人生若草露，营营苦奔走。

为问身后名，何如一杯酒？

行当向酒泉，竹林呼某某。

时有西风来，吹香满罌缶。

不问今何时，仰天但搔首。

◇又

宛马精权奇，歟从西极来。

蹴蹋不动尘，但见烟云开。

天闲十万匹，对此皆凡材。

倾都看龙种，选日登燕台。

却瞻横门道，心与浮云灰。

但受伏枥恩，何以异驽骀。

◇又

落日忽西下，长风自东来。

天地果何意，逝水去不回。

世事看奕棋，劫尽昆池灰。

长安罗冠盖，浮名良可哀。

不如巢居子，遁迹从蒿莱。

◇又

行行重行行，分手向河梁。

持杯欲劝君，离思激中肠。

努力饮此酒，无为居者伤。

◇又

长安游侠子，黄金视如土。

结交及屠博，安知重圭组。

一朝列华筵，羞与朱履伍。

惜哉意气尽，委身逐倾吐。

时俗尚唯阿，至人亦伛偻。

惟昔有赠言，深藏乃良贾。

◇又

闭关谢西域，汉文何优柔。

圣泽余亥步，遐荒如甸侯。

旅獒既充贡，越雉亦见收。

蜒族进珊瑚，不烦使者求。

昭回云汉章，烛及海外州。

人生睹盛事，岂羨乘槎游。

◇又

圣主重文学，清时无隐沦。

遂令拂衣者，还为弃繻人。

适意聊复尔，去来若无因。

昔采西山薇，今忆淞江莼。

◇又

结庐依深谷，花落长闭关。

日出众鸟去，良久孤云还。

回风送疏雨，微芬扇幽兰。

白日但静坐，坐对门前山。

生世多苦辛，何如日闲闲。

◇又

与君昔相逢，乃在苧萝村。

相逢即相别，后期安可论。

扬蛾启玉齿，声发已复吞。

诟绝赏音者，其如一顾恩。

◇又

信陵敬爱客，举世称其贤。

执轡过市中，为寿监门前。

邯郸解围日，籥矢引道边。

救赵适自危，故国从弃捐。

功成失去就，始觉心茫然。

再胜却秦军，遭谗竟谁怜。

趣归不善后，作计非万全。

博徒卖浆者，名字亦不传。

惜哉所从游，中讷无神仙？

饮酒虽达生，辟谷乃长年。

◇又

积雪在房枕，新月光欲凝。

照地若无迹，娟娟破初暝。

明灯迟我友，揽裘坐开径。

人生何茫茫，即事偶成兴。

南飞有乌鹄，绕树栖不定。

持杯欲问之，东风吹酒醒。

◇又

魏阙有浮云，荫兹白日暮。

返景下铜台，歌声发纨素。

流辉如有情，千载照长路。

漳河不西还，百川尽东赴。

时哉不可失，说言思所悟。

雨后望西陵，蔓草萦古墓。

安得为飘风，永吹连枝树？

◇又

春风解河冰，戚里多欢娱。

置酒坐相招，鼓瑟复吹竽。

而我出郭门，望远心烦纡。

垂鞭信所历，旧垒啼饥乌。

吁嗟献纳者，谁上《流民图》？

一骑红尘来，传有双羽书。

慷慨欲请缨，沈吟且踟蹰。

终为孤鸣鹤，奋翥凌云衢。

◇又

彩虹亘东方，照耀不知晚。

川长组练明，关塞若在眼。

我友昔从征，三岁胡不返。

边马鸣萧萧，落日照沙苑。

封侯固有时，寄语加餐饭。

◇又

朔风吹古柳，时序忽代续。

庭草萎已尽，顾视白日速。

吾本落拓人，无为自拘束。

倜傥寄天地，樊笼非所欲。

嗟哉华亭鹤，荣名反以辱。

有客叹二毛，操觚序金谷。

酒空人尽去，聚散何局促。

揽衣起长歌，明月皎如玉。

◇又

吾怜赵松雪，身是帝王裔。

神采照殿廷，至尊叹失丽。

少年疏远臣，侃侃持正议。

才高兴转逸，敏妙擅一切。

旁通佛老言，穷探音律细。

鉴古定谁作，真伪不容谛。

亦有同心人，闺中金兰契。

书画掩文章，文章掩经济。

得此良已足，风流渺谁继！

◇圣驾临江恭赋

黄幄临大江，山川借颜色。

鲸鲵久已尽，不待天弧射。

按图识要汛，怀古讨遗迹。

帆樯擒虎渡，营垒佛狸壁。

时清非恃险，何事限南北。

却上妙高台，悠悠天水碧。

◇虎阜

孤峰一片石，却疑谁家园。

烟林晚逾密，草花冬尚繁。

人因警蹕静，地从歌吹喧。

一泓剑池水，可以清心魂。

金虎既销灭，玉燕亦飞翻。

美人与死士，中夜相为言。

◇江行

木落江已空，清辉澹鸥鹭。

不见系缆石，寒潮没瓜步。

帆移青枫林，人归白沙渡。

似有山猿啼，窈然潇湘暮。

◇平原过汉樊侯墓

云龙会影响，驾馭从豁达。

樊侯鼓刀人，时来遂挥喝。

一撞重瞳营，再排隆准阨。

良平信美好，对此气应夺。

斯人在层泉，犹胜懦夫活。

◇桑榆墅同梁汾夜望

朝市竞初日，幽栖闲夕阳。

登楼一纵目，远近青茫茫。

众鸟归已尽，烟中下牛羊。

不知何年寺，钟梵相低昂。
无月见村火，有时闻天香。
一花露中坠，始觉单衣裳。
置酒当前檐，酒若清露凉。
百忧兹暂豁，与子各尽觞。
丝竹在东山，怀哉讵能忘？

◇为王阮亭题戴务旃画

心与西山清，坐对西山雪。
山空多幽响，芳草久云歇。
白云如沧洲，缥缈不可越。
丹青意何长，宛此山径折。
卧游失所见，空林一片月。

◇暮春别严四荪友

高云媚春日，坐觉鱼鸟亲。
可怜暮春候，病中别故人。
莺啼花乱落，风吹成锦茵。
君去一何速，到家垂柳新。
芙蓉湖上月，照君垂长纶。

◇送施尊师归穹窿

突兀穹窿山，丸丸多松柏。

造化钟灵秀，真人爱此宅。

真人号铁竹，鹤发长生客。

天风吹羽轮，长安驻云舄。

偶然怀故山，独鹤去无迹。

地偏宜古服，世远忘朝夕。

空坛松子落，小洞野花积。

苍崖采紫芝，丹灶煮白石。

檐前一片云，卷舒何自适。

他日再相见，我鬓应垂白。

愿此受丹经，冥心炼金液。

◇寄朱锡鬯

萍梗忽南北，相聚复相离。

去年一相见，正值落花时。

秋风苦催归，转眼岁已期。

淅淅秋叶落，绵绵秋夜迟。

开户见残月，道远有所思。

丈夫故慷慨，此别何凄其！

明发揽尘镜，新寒生鬓丝。

◇早春雪后同姜西溟作

西山雪易积，北风吹更多。

欲寻高士去，层冰郁嵯峨。
琉璃一万片，映彻桑干河。
耳目故以清，苦寒其如何。
朝鸦背城来，晴旭满岩阿。
春泥冻尚合，九衢交鸣珂。
忽睹新岁华，履端布阳和。
不知题柱客，谁和《郢中歌》？

◇送梁汾

西窗凉雨过，一灯乍明灭。
沈忧从中来，绵绵不可绝。
如何此际心，更当与君别？
南北三千里，同心不得说。
秋风吹蓼花，清泪忽成血。

◇题李空诗卷，和王黄湄韵

李侯卓犖人，骨体本不媚。
貂珥焰屡触，全生偶然遂。
昌言勸友朋，赠答不无谓。
想其诗成时，良亦自矜贵。
果得身后名，讥谗复何畏！

◇唆龙与经岩叔夜话

绝域当长宵，欲言冰在齿。
生不赴边庭，苦寒宁识此？
草白霜气空，沙黄月色死。
哀鸿失其群，冻翮飞不起。
谁持《花间集》，一灯毡帐里？

◇宿龙泉山寺

招提偶然到，再宿离喧杂。
列岫霁始开，双扉晚初阖。
禅心投钵龙，梵响下檐鸽。
既闲陵阙望，亦谢主宾答。
遥夜一灯深，石炉烧艾蕲。

◇挽刘富川

人生非金石，胡为年岁忧？
有如我早死，谁复为沈浮。
我生二十年，四海息戈矛。
逆节忽萌生，斩木起炎州。
穷荒苦焚掠，野哭声啾啾。
墟落断炊烟，津梁绝行舟。
片纸入西粤，连营倏相投。
长吏或奔窜，城郭等废丘。

背恩宁有忌，降贼竟无羞。

余闻空太息，嗟彼巾幗俦。

黯澹金台望，苍茫桂林愁。

卓哉刘先生，浩气凌斗牛。

投躯赴清川，喷薄万古流。

谁过汨罗水，作赋从君游？

白云如君心，苍梧远悠悠。

◇野鹤吟（赠友）

鹤生本自野，终岁不见人。

朝饮碧溪水，暮宿沧江滨。

忽然被缯缴，矫首盼青云。

仆亦本狂士，富贵鸿毛轻。

欲隐道无由，幡然逐华缨。

动止类循墙，戢身避高名。

怜君是知己，习俗苦不更。

安得从君去，心同流水清。

◇七言古诗

◇填词

诗亡词乃盛，比兴此焉托。

往往欢娱工，不如忧患作。

冬郎一生极憔悴，判与三间共醒醉。
美人香草可怜春，凤蜡红巾无限泪。
芒鞋心事杜陵知，只今惟赏杜陵诗。
古人且失风人旨，何怪俗眼轻填词。
词源远过诗律近，拟古乐府特加润。
不见句读参差《三百篇》，已自换头兼转韵？

◇送马云翎归江南

侧身宇宙间，长啸久独立。
之子我友人，南归事蓑笠。
交情如谷风，澹澹复习习。
吹君度江去，片帆春雨湿。
弃捐世所悲，予独为君喜。
君归葺屋南山里，燕麦青青才覆雉。
新莺啼过眠未起，笑看我辈红尘死。

◇题赵松雪画《鹊华秋色》卷

历下亭边两拳石，不似江南好山色。
乍看落日照来黄，浑疑劫火烧将黑。
更无枫橘点清秋，惟见萧萧白杨白。
君为此山令山好，空翠俄从楮间滴。
知君着意在明湖，掩映山光若有无。

曲折似还通冻口，苍茫定不属城隅。

鲤鱼风高网罟集，仿佛渔唱来菰蒲。

一竿我欲随风去，不信扁舟是画图。

◇新晴

新晴暖风吹柔荑，绿烟如剪稻苗齐。

夕阳一片照长堤，隔林残雨犹凄凄。

柳外如闻骢马嘶，柳丝带雨拂深闺。

谁家少妇最高梯，凝情空怨锦江西。

◇又赠马云翎

峇峤最高山，山气蒸为云。

物本相感生，相感乃相亲。

吁嗟人生不可拟，君南我北三千里。

一朝倾盖便相欢，两人心事如江水。

君身似是秋风客，身轻欲奋凌霄翮。

语君无限伤心事，终古长江江月白。

世事纷纷等飞絮，我今潦倒随所寓。

惟愿饮酒读君诗，花前醉卧梦君去。

◇长安行赠叶切庵庶子

长安旧是帝王宅，万户千门丽金碧。

歌钟甲第尽王侯，绣幃雕鞍照长陌。

纷纷入眼竞繁华，春日春光好谁惜。
春风初吹上林草，一夜雪深山尽老。
雪花飞来大如席，化作新泥遍周道。
角声呜呜破早烟，惊鸦飞去未明天。
青楼绮阁不卷帘，玉河冻合层冰坚。
祇疑此际行人绝，宁知槐柳森成列。
经过借问此为谁，云是东南贵游客。
嗟哉人生何不齐，清者如云浊者泥。
忽忆昆山叶夫子，磊磊落落随所栖。
羡君著书穷岁月，羡君意气凌云霓。
世无伯乐谁相识，骅骝日暮空长嘶。
我亦忧时人，志欲吞鲸鲵。
请君勿复言，此道弃如遗。
闻道西山有瑶草，何不同君一采之。

◇送荪友

人生何如不相识，君老江南我燕北。
何如相逢不相合，更无别恨横胸臆。
留君不住我心苦，横门骊歌泪如雨。
君行四月草萋萋，柳花桃花半委泥。
江流浩淼江月堕，此时君亦应思我。

我今落拓何所止，一事无成已如此。
平生纵有英雄血，无由一溅荆江水。
荆江日落阵云低，横戈跃马今何时？
忽忆去年风雨夜，与君展卷论王霸。
君今偃仰九龙间，吾欲从兹事耕稼。
芙蓉湖上芙蓉花，秋风未落如朝霞。
君如载酒须尽醉，醉来不复思天涯。

◇柳条边（边墙也，以柳为之，在塞外。）

是处垣篱防绝塞，角端西来画疆界。
汉使今行虎落中，秦城合筑龙荒外。
龙荒虎落两依然，护得当时饮马泉。
若使春风知别苦，不应吹到柳条边。

◇春晓曲（效金荃体）

铜龙水尽霞光小，细雾纤纤织幽草。
烟锁绿纱春色深，帘钩燕蹋呢喃早。
海棠咽露胭脂重，花底嫩寒吹鸟梦。
娇眠绣被起来迟，一枕香云坠金凤。
芙蓉泪湿鸳鸯绮，郎骑嘶风蹴花去。
游丝不解系相思，半萦愁绪横塘路。

卷四 五、七言律诗

◇五言律诗

◇扈从圣驾祀东岳礼成恭纪

岱宗柴望处，仙跸迴云霄。

礼乐犹三代，诸侯协肆朝。

东封金牒字，南指玉衡杓。

阙里应相近，回銮亦不遥。（时传旨南巡回日祀曲阜圣庙）

◇塞外示同行者

西风千万骑，飒遯向阴山。

为问传书雁，孤飞几日还？

负霜怜戍卒，乘月望乡关。

王事兼程促，休嗟客鬓斑。

◇金陵

胜绝江南望，依然图画中。

六朝几兴废，灭没但归鸿。

王气倏云尽，霸图谁复雄？

尚疑钟隐在，回首月明空。

◇寄梁汾并葺茅屋以招之

三年此离别，作客滞何方？

随意一尊酒，殷勤看夕阳。

世谁容皎洁，天特任疏狂。

聚首羨麋鹿，为君构草堂。

◇题苏文忠黄州寒食诗卷

古今诚落落，何意得斯人。

紫禁称才子，黄州忆逐臣。

风流如可接，翰墨不无神。

展卷逢寒食，标题想后尘。

◇郊园即事

胜侣招频懒，幽寻度石梁。

地应邻射圃，花不碍球场。

解带晴丝弱，披襟露叶凉。

此间萧散绝，随意倒壶觞。

◇沈进士尔燬归吴兴诗以送之

成名方得意，几日问归舟。

独有离居者，萧然感素秋。

一筇黄叶寺，孤棹白蘋洲。

无限江湖兴，因君寄虎头。（时梁汾客茗上）

◇岁晚感旧

时序忽云暮，离居倍悄然。

谁将仙掌露，换却日高眠？

短梦分今古，长愁减岁年。

平生无限泪，一洒烛花前。

◇送张见阳令江华

楚国连烽火，深知作吏难。

吾怜张仲蔚，临别劝加餐。

避俗诗能寄，趋时术恐殫。

好名无不可，聊欲砥狂澜。

◇雄县观鱼

渔师临广泽，侍从俯清澜。

瑞入王舟好，仁知圣网宽。

拨鳞飞白雪，行鲙缕金盘。

在藻同周宴，时容万姓看。

◇驾幸五台恭纪

杳杳丹梯上，迢迢翠辇回。

慈云笼户牖，佛日现楼台。

珠树参天合，金莲布地开（金莲花惟山中有此种）。

共传天子孝，亲侍两宫来。

◇入直西苑

望里蓬瀛近，行来阆苑齐。

晴霞开碧沼，落月隐金堤。

叶密莺先觉，花繁径不迷。

笙歌回辇处，长在凤城西。

◇景山

雪里瑶华岛，云端白玉京。

削成千仞势，高出九重城。

绣陌回环绕，红楼宛转迎。

近天多雨露，草木每先荣。

◇蕉

园见说斋坛，前朝大乙祠。

莺边花树树，燕外柳丝丝。

宫籞人稀到，词臣例许窥。

今朝陪豹尾，新长万年枝。

◇松花江

宛宛经城下，泱泱接海东。

烟光浮鸭绿，日气射鳞红。

胜擅佳名外，传讹旧志中。（即混同江也。《金史》有宋瓦江，旧志遂以混同、松花为二江，误矣。）

花时春涨暖，吾欲问渔翁。

◇盛京

拔地蛟龙宅，当关虎豹城。

山连长白秀，江入混同清。

庙社灵风肃，豪强右族更。

明明开创业，休拟作陪京。

◇与经生夜话

率意元无咎，经心始自疑。

昔人犹有恨，今我竟何期？

客与齐书帙，人来问画师。

若无心赏在，愁绝更从谁。

◇咏笼莺

何处金衣客，栖栖翠幕中。

有心惊晓梦，无计啖春风。

漫逐梁间燕，谁巢井上桐。

空将云路翼，絨恨在雕笼。

◇夜合花

阶前双夜合，枝叶敷华荣。

疏密共晴雨，卷舒因晦明。

影随筠箔乱，香杂水沉生。

对此能消忿，旋移近小楹。

◇丁香

芳谱称佳客，仙株也姓丁。

鹤翎风细细，鸡舌气冥冥。

紫胜心中结，银榼耳上星。

深闺多韵事，名爱借余馨。

◇桂

丛树淮南茂，秋林峤外芳。

碧珊天女佩，金缕月娥象。

露铸鸾钗色，风薰鹫岭香。

酿花新醕熟，味美胜椒浆。

◇荷

鱼戏叶田田，鳧飞唱采莲。

白裁肪玉瓣，红剪彩霞笺。

出浴亭亭媚，凌波步步妍。

美人怜并蒂，常绣枕函边。

◇又

华藏分千界，凭阑每独看。

不离明月鉴，常在水晶盘。

卷雾舒红幕，停风静绿纨。

应知香海窄，祇似液池宽。

◇鱼子兰

石家金谷里，三斛买名姬。

绿比琅玕嫩，圆应木难移。

若兰芳竞体，当暑粟生肌。

身向楼前堕，遗香泪满枝。

◇茉莉

南国素婵娟，春深别瘴烟。

镂冰含麝气，刻玉散龙涎。

最是黄昏后，偏宜绿鬓边。

上林声价重，不忆旧花田。

◇七言律诗

◇拟冬日景忠山应制

峩峩铁凤锁琳宫，亲侍銮舆度碧空。

圣主岂因崇象教，宸游直自接鸿蒙。

远山雪有一峰白，别浦枫余几树红。

天意不教常肃杀，伫看宇宙遍春风。

◇汤泉应制四首

清时礼乐萃朝端，次第郊原引玉銮。

河岳千年归带砺，寝园三月拜衣冠。

便从畿甸亲民隐，更启神泉示从官。

非独炎灵钟坎德，恩波深处不知寒。

◇又

六龙初驻浴兰天，碧瓦朱旗共一川。
润逼仙桃红自舞，醉酣人柳绿犹眠。
吹成暖律回燕谷，散作薰风入舜弦。
最是垂衣深圣德，不须词笔颂甘泉。

◇又

鱼鳞雁齿镜中开，溅沫为霖遍九垓。
不用劫灰求仿佛，便从天汉象昭回。
桑坛法驾乘春转，鹤禁仙鑪问寝来。
遥祝海隅同帝泽，年年长听属车雷。

◇又

身向咸池傍末光，三危露暖不成霜。
金铺照日初涵影，玉辇生烟别作香。
地接蓬莱通御气，波翻豆蔻散朝凉。
微臣幸属赓歌日，愿借如川献寿觞。

◇秋日送徐健庵座主归江南四首

江枫千里送浮颿，玉佩朝天此暂辞？
黄菊承杯频自覆，青林系马试教骑。
朝端事业留他日，天下文章重往时。
闻道至尊还侧席，柏梁高宴待题诗。

◇又

玉殿西头落暗飏，回波宁作望恩辞？

蛾眉自是从相妒，骏骨由来岂任骑。

白首尽为酬遇日，青山真奈送归时。

严装欲发频相顾，四始重拈教咏诗。

◇又

不同纨扇怨凉飏，咫尺重华好荐辞。

衡岳雁排回日字，葛陂龙待化来骑。

斑斓正好称觴暇，丝竹谁从著屐时？

弱植敢忘春雨润，一生长诵角弓诗。

◇又

惆怅离筵拂面飏，几人鸾禁有宏辞。

鱼因尺素殷勤剖，马为鄣泥郑重骑。

定省暂应纾远望，行藏端不负清时。

春风好待鸣驺入，不用凄凉录别诗。

◇即日又赋

商飙猎猎帝城西，极目平沙草色齐。

一夜霜清林叶下，五原秋迥塞鸿低。

相将绿酒浮萸菊，莫向黄云听鼓鼙。

此日登高兼送远，欲归还听玉骢嘶。

◇再送施尊师归穹窿

紫府追随结愿深，日归行色乍骎骎。

秋风落叶吹飞舄，夜月横江照鼓琴。

历劫飞沈宁有意，孤云去住亦何心。

贞元朝士谁相待，桃观重来试一寻。

◇题《竹炉新咏》卷（并序）

{惠山听松庵竹茶炉，岁久损坏。甲子秋，梁汾仿旧制复为之，置积书岩中，诸名士作诗以纪其事。是冬余适得一卷，题曰《竹炉新咏》，则明时王舍人孟端、李相国西涯诗画并在，实听松故物也，喜以归梁汾，即名其岩居曰新咏堂，因次原韵。
}

炉成卷得事天然，乞与幽居置坐边。

恰映芙蓉亭下月，重披斑竹岭头烟。

画如董巨真高士，诗在成弘极盛年。

相约过君同展看，淡交终始似山泉。

◇赋得月下听泉得阳字

阴森松桧敞虚堂，月白泉清入户凉。

半岭清晖涵水木，断崖风雨溅衣裳。

蒙蒙碧草侵阶合，噉々惊乌出岫长。

兴熟祇应来往惯，明朝携酒待斜阳。

◇通志堂成

茂先也住浑河北，车载图书事最佳。

薄有缥緗添邺架，更依衡泌建萧斋。

何时散帙容闲坐，假日消忧未放怀。

有客但能来问字，清尊宁惜酒如淮。

◇病中过锡山

润州山尽路漫漫，天入蓉湖漾碧澜。

彩干风樯连塔影，飞鸿云阵度峰峦。

泉烹绿茗徐蠲渴，酒泛青瓷渐却寒。

久爱虎头三绝誉，今来仍向画中看。

◇又

棹女红妆映茜衣，吴歌清切傍斜晖。

林花刺眼篷窗入，药裹关心蜡屐违。

藕荡波光思澹永，碧山岚气望霏微。

细莎斜竹吟还倦，绣岭停云有梦依。

◇春柳

苑外银塘乍泮冰，柳眠初起鬓鬅髻。

谢娘微黛轻难学，楚女纤腰弱不胜。

裊雾萦烟枝濯濯，欹风困雨浪层层。

絮飞时节青春晚，绿锁长门半夜灯。

◇垂丝海棠

天孙剪绮系撚丝，似睡微醒困不支。

晓露冷匀新茜靥，春烟晴晕淡胭脂。

樱桃对面羞酣态，棠棣相窥妒艳姿。

惟有粉垣斜日色，爱扶红影弄参差。

◇杏花

不是心伤艳蕊梢，依稀扶醉过花朝。

枕函宿粉匀无迹，病颊微红淡欲消。

羯鼓催开春艳艳，早莺啼破雨飘飘。

竹篱村店年时会，想得当垆尔许娇。

◇又

马上墙头往往迎，一枝低亚帽檐横。

画桥压浦知何处，红袖招人绰有情。

深巷月斜留蝶宿，小池烟晓拂奁轻。

秋千索下春才半，暗数流光到卖饧。

◇又

吹罢江梅才几日，一枝闲淡又斜晖。

寒禁花信愆期易，病减春游好事稀。

池面留脂娇独绝，楼头听雨梦相违。

社钱掠得茅庵去，也胜前村买醉归。

◇又

婷婷谁伴度春宵，点染疏枝浅色娇。

丁字帘前香梦断，粉光亭外薄寒消。

移来片月如梅影，从此东风到柳条。

花似去年人忆别，卖花消息绝无寥。

◇又

一段柔情百媚生，妒他流水去无声。

凝妆似解登垣望，薄怒何当破笑迎。

绣户红云烘壁带，画梁残照泊檐旌。

曲江好在花千树，憔悴谁知浪得生？

◇上巳清明

怅望天涯令节同，酒怀诗思两匆匆。

流杯亭榭鸣鸠雨，近水人家插柳风。

芳草何心长自绿，桃花无赖只能红。

踏青祓禊相将去，牢记归途此日逢。

◇绿阴

春雨春风洗故枝，残红落尽碧参差。

烟光薄处蜂犹觅，日影添来马不知。

匝地重阴迷别径，卷帘浓翠润枯棋。

乱蝉转眼柴门路，又见先生坦腹时。

◇雨后

宿雨芦村暑乍清，归云天外一峰晴。

蝉嘶柳陌多相应，燕踏琴弦别作声。

白日旋消高枕过，秋风又向乱砧生。
伤心咫尺江千路，拟著渔蓑计未成。

◇秋夜

庾亮南楼发兴同，稍闻疏响起梧桐。
蘋风凉晕初弦月，草露秋归满院虫。
灯火有情添夜课，文章无效悔前功。
相思此际江边客，夹岸蒹葭听不穷。

◇中元前一夕枕上偶成

酒醒池亭耿不眠，帐纹漠漠隔轻烟。
溪风到竹初疑雨，秋月如弓渐满弦。
残梦远经吹角戍，明河长亘捣衣天。
哀蛩钱晓浑多事，也似严更古驿边。

◇南海子

相风微动九门开，南陌离宫万柳栽。
草色横粘下马泊，水光平占晾鹰台。
锦鞞欲射波间去，玉辇疑从岛上回。
自是软红惊十丈，天教到此洗尘埃。

◇净业寺

红楼高耸碧池深，荷芰生凉豁远襟。
湖色静涵孤刹影，花香暗入定僧心。

经翻佛藏研朱荚，地赐朝家布紫金。

下马长堤一吟望，梵钟杂送海潮音。

◇扈跸霸州

霸山重镇奠神京，鸾辂春游淑景明。

万流银涛冲古岸，四围玉甃护严城。

花承暖日迎来骑，柳带新膏绾去旌。

八砦雄图今更固，行随赏乐胜蓬瀛。

◇幸举礼闱，以病未与廷试

晓榻茶烟揽鬓丝，万春园里误春期。

谁知江上题名日，虚拟兰成射策时。

紫陌无游非隔面，玉阶有梦镇愁眉。

漳滨强对新红杏，一夜东风感旧知。

◇喜吴汉槎归自关外，次座主徐先生韵

才人今喜入榆关，回首秋笳冰雪闲。

玄菟漫闻多白雁，黄尘空自老朱颜。

星沉渤海无人见，枫落吴江有梦还。

不信归来真半百，虎头每语泪潺湲。

◇山海关

雄关阻塞戴灵鳌，控制卢龙胜百牢。

山界万重横翠黛，海当三面涌银涛。

哀笳带月传声切，早雁迎秋度影高。

旧是六师开险处，待陪巡幸扈星旄。

◇兴京陪祭福陵

龙盘凤翥气佳哉，东指斋宫御辇来。

影入松楸仙仗远，香升俎豆晓云开。

盛仪备处千官肃，神贶承时万马回。

豹尾叨陪须献颂，小臣惭愧展微才。

◇泰山

灵符作镇敞天门，群岳称宗秩望尊。

三观峰高擎日月，五株松偃老乾坤。

雕甍贝阙神宫壮，碧藓苍崖古碣存。

远眺齐州烟九点，不知身在白云根。

◇曲阜

万骑新过五父衢，玉銮停御璧池初。

弦歌疑尚闻兴阙，荆棘还看自剪除。

秘笈琳琅怀里玉，宝光腾跃壁中书。

小臣久已瞻麟角，何幸趋承俎豆余？

◇扈驾西山

凤翥龙蟠势作环，浮青不断太行山。

九重殿阁葱茏里，一气风云吐纳间。

熊虎自当驰道伏，蛟螭长捧御书闲。

黄图此日论形胜，惭愧频叨侍从班。

◇古北口

乱山如戟拥孤城，一线人争鸟道行。

地险东西分障塞，云开南北望神京。

新图已入三关志，往事休论十路兵。

都护近来长不调，年年烽火报升平。

◇五言排律

◇扈驾马兰峪赐观温泉，恭纪十韵

御天来凤辇，浴日启龙池。

野迴纡皇览，春浓值圣时。

落花紫彩仗，初柳拂朱旗。

行漏三辰拥，停銮万象随。

瑞征泉是醴，喜溢沼生芝。

特许观灵液，相将陟禁墀。

气凝浆五色，味结露三危。

仙跸程遥度，慈闱驾近移。

倍隆长乐养，兼采广微诗。

扈从诚多幸，重华赏荐辞。

◇和唐李昌谷《恼公》诗原韵

洞户层层碧，雕阑处处红。
屏山开孔雀，绮石缀芳丛。
麝馥安黄小，蛾眉点黛浓。
纤腰欺柳带，慧思展蕉筒。
粉盒调湘芷，瓷瓶插水荇。
宿枝寻晓蝶，书叶爱春虫。
被浪翻灵粟，帷云飏紫茸。
昼眠妆复整，晚浴汗初融。
罗袜宜乘雾，仙裾可趁风。
寄诗拈芍药，擘纸研芙蓉。
砚拂琉璃匣，香熏翡翠笼。
媚花簪蔓鹤，心果剥荷蜂。
乍见波先注，佯羞意若蒙。
投梭嗤北里，抱布炫南甯。
华烛然青凤，文茵藉绿熊。
柔携荑样手，笑映月如弓。
诂信为行雨，还疑化彩虹。
梦中游洛浦，意外到崆峒。
只合巫山住，何须石笋封。
但期常比翼，即似骤乘龙。

续续更催箭，丁丁漏尽铜。

誓要长久约，密订往来踪。

汉渚明星隐，咸池旭日烘。

霞光生绮縠，树色辨青葱。

喜气胶投漆，离情泪染枫。

王昌联井舍，宋玉隔墙墉。

露浥桃初绽，风披李正秾。

异香专寄寿，射鸟莫过冯。

鸾影昏秦镜，鹄弦解蜀桐。

白头吟早就，黄耳信无从。

苔满斜纹砌，尘凝刻琐栊。

暗添瑶瑟怨，渐减雪肌丰。

郎性翩秋蒂，依操励晚菘。

选歌嗔傅婢，买卜倩骑僮。

水面窥金鲤，楼头望玉骢。

自怜江柳态，谁忆海棠容？

尽日怀将仲，无时见子充。

赠遗传陌上，期送说桑中。

四叶裁新袖，三花剪细髭。

笑言知宴宴，弃置叹邛邛。

鸚鵡聲猶喚，鴛鴦夢少通。
夜將愁共永，春與意俱融。
寫恨盈千疊，思君不再逢。
挑燈增懊惱，依枕即惺忪。
鏡听何曾吉，瓢占并是凶。
淒涼怜永夜，寂寞類深宮。
獨寤悲青女，燒香問碧翁。
合歡虛旧綉，連理悔重縫。
薄命嗟秋扇，傷心泣曙鐘。
代題閨里怨，未覺錦囊空。

◇玉泉十二韻

地涌西山脉，名標禁御泉。
百層飛作雨，萬頃匯成淵。
潤下終歸海，源高却自天。
縈烟來樹杪，帶雪落雲邊。
隱見瑤光曳，琤苾佩响傳。
紅欄橋宛轉，烏榜棹洄沿。
星漢隨灣沔，樓台倒影鮮。
蛟龍蟠翠島，雁鷺起瑯田。
鏡面晶瑩合，珠痕蕩漾圓。

翠流初放荇，娇拥半开莲。

睿赏悬孤鉴，余波溢九璇。

那居真有庆，鱼藻在诗篇。

卷五 五、七言绝句

◇五言绝句

◇雪中和友

哀雁兼邻杵，共君寒夜心。

窗前吹宿火，朔雪满空林。

◇又

竹坞寂无人，雪深山路涩。

涧底响层冰，居人自朝汲。

◇又

白屋无人事，况逢春雪余？

山中问梅芷，频寄一行书。

◇秋意

苑云衔日去，疏雨欲来时。

忽见小庭中，草花三两枝。

◇又

凉风昨夜至，枕簟已瑟瑟。

小女笑吹灯，床头捉蟋蟀。

◇又

雨声池馆秋，漠漠横塘水。

水鸟故窥人，飞入荷花里。

◇题赵松雪《水村图》

北苑古神品，斯图得其秀。

为问鸥波亭，烟水无恙否。

◇题胡瑰《射雁图》

人马一时静，祇听哀雁音。

塞垣无事日，聊欲耗雄心。

◇七言绝句

◇西苑杂咏和荪友韵

宫花半落雨初停，早是新炎撤画屏。

何必醴泉堪避暑，藕丝风好水西亭。

◇又

离宫近绕绿蘋洲，冰簟银床到处幽。

好是万綏清暇日，亲持玉勒奉宸游。

◇又

太液东头散直迟，一双水鸟掠杨枝。

从臣献罢平滇颂，坐听中涓报午时。

◇又

进来瓜果每承恩，豹尾前头拜至尊。

正是日斜花雨散，传呼声在望春门。

◇又

幔展轻罗一色裁，巢窗深映拂云槐。

重帘那得微风入，叶叶荷声急雨来。

◇又

黄幄临池白鸟飞，金盘初进鲙鱼肥。

太平时节多欢赏，丝络雕鞍半醉归。

◇又

射生才罢晚开筵，十部笙笳动暝烟。

月上南湖波似练，几星灯火是龙船。

◇又

青丝蜀锦护银塘，谁许延秋报早凉？

缥缈蓬山应似此，不知何处白云乡。

◇又

才翻急雨暗金河，曲罢催呈杂技多。

一自花竿身手绝，那将妙舞说阳阿。

◇又

玉映窗扉静不开，藕花深处绝尘埃。

三更露坐清无暑，共待蕉园彩干回。

◇又

香引轻飏散玉除，下帘声彻退朝初。

马曹此日承恩数，也逐清班许钓鱼。

◇又

烟柳千行宿鸟多，虹梁曲曲水萤过。
新凉却爱中元节，万点荷灯散玉河。

◇又

夜深帘幕卷银泥，十二楼高望欲迷。
莲漏滴残闻动锁，一钩斜月碧河西。

◇又

轻云欲傍最高楼，重露看垂白玉旒。
处处红芳零落尽，众香国里不曾秋。

◇又

时攀御柳拂华簪，水槛行开玉一函。
几日乌龙江上去，回看北斗是天南。

◇又

玲珑朱阁拟三山，上驷门依御柳间。
倦听月中歌吹杳，晨晡秣罢夜分还。

◇又

制胜由来仗德威，夜郎何物敢轻违？
河清欲颂惭才尽，空羡儒臣赐宴归。

◇又

讲帷迟日记花砖，下直归来一惘然。

有梦不离香案侧，侍臣那得日高眠。

◇又

不须惆怅忆江湖，身入金门待漏图。

中使擎来仙掌露，莼羹风味得如无？

◇又

花映初阳覆绮寮，玉珂双引望中遥。

凭君莫作烟波梦，曾是烟波梦早朝。

◇咏史

千秋名分绝君臣，司马编年继获麟。

莫倚区区周鼎在，已教俱酒作家人。

◇又

一死难酬国士知，漆身吞炭祇增悲。

英雄定有全身策，狙击君看博浪椎。

◇又

章武谁修季汉书，建兴名号亦模糊。

笑他典午标凡例，不遣青龙混赤乌。

◇又

诸葛垂名各古今，三分鼎足势浸淫。

蜀龙吴虎真无愧，谁解公休事魏心？

◇又

汉江高接蜀江流，霖雨漂沈版筑休。

可惜不教樊口下，襄阳仍属魏荆州。

◇又

痛哭难为入庙身，谯周本意劝称臣。

市桥旗帜咸阳战，不及成家尚有人。

◇又

卷甲空回丁奉军，陵江官号已更新。

若将唇齿论吴蜀，可有宫门拜表人？

◇又

劳苦西南事可哀，也知刘禅本庸才。

永安遗命分明在，谁禁先生自取来？

◇又

名士何曾忘义熙，故将山水托游嬉。

韩亡秦帝浑闲事，谁续临川内史诗？

◇又

宝鞘金貂别有才，蹋围鸣鼓日千回。

老兵不少俞灵韵，亲向营门逐马来。

◇又

零落金莲贴地灰，练儿顾盼自雄才。

三千宫女同时出，也爱潘妃国色来。

◇又

注籍纷纷定价余，市曹行雁待铨除。

后来又变停年格，请命谁收薛叔书。

◇又

上使空持白虎幡，谁教博议采袁翻？

高车劲敌婆罗在，特与凉州作外藩。

◇又

金龙玉凤埒高阳，富贵从夸章武王。

王谢风流君不见，世家原自重文章。

◇又

朝政神龟已可知，羽林旁午辱张彝。

洛阳大有平城使，正是倾赀结客时。

◇又

中允功名洗马才，旧僚陪送有谁哀？

临湖殿里弯弓客，却向宜秋洒涕回。

◇又

羽衣木鹤想前身，不到升仙到奉宸。

自是平章曾入奏，在廷何限赋诗人。

◇又

军职新加吕用之，神仙楼殿极参差。

那知论谪浑无赖，曾傍江阳后土祠。

◇又

博学今无沈晦伦，宣和名论一时新。

众中大有摇头客，莫便轻欺下坐人。

◇又

都监声名敌指挥，隔河降表最先驰。

赤岗事与滹沱异，勿问中朝没字碑。

◇上元即事

翠眊银鞍南陌回，凤城箫鼓殷如雷。

分明太乙峰头过，一片金莲火里开。

◇咏柳偕梁汾赋

烟水频年瘦不支，相看余得许多丝。

灵和旧事今如梦，却到人间管别离。

◇又

弱絮残莺一半休，万条千缕不胜愁。

祇应天上张星伴，莫向青门系紫骝。

◇秣陵怀古

山色江声共寂寥，十三陵树晚萧萧。

中原事业如江左，芳草何须怨六朝？

◇题虞美人蝴蝶画扇

写得春风分外娇，粉痕零落晕红潮。

曲终梦醒浑无那，同向斜阳恨寂寥。

◇有感

帐中人去影澄澄，重对年时芳苡灯。

惆怅月斜香骑散，人间何处觅韩冯。

◇四时无题诗

一树红梅傍镜台，含英次第晓风催。

深将锦幄重重护，为怕花残却怕开。

◇又

金鸭香轻护绮栊，春衫一色飏蜻蜓。

偶因失睡娇无力，斜倚熏笼看画屏。

◇又

手撚红丝凭绣床，曲阑亭午柳花香。

十三时节春偏好，不似而今惹恨长。

◇又

青杏园林试越罗，映妆残月晓风和。

春山自爱天然妙，虚费筠奁十斛螺。

◇又

绿槐阴转小阑干，八尺龙须玉簟寒。

自把红窗开一扇，放他明月枕边看。

◇又

水榭同携唤莫愁，一天凉雨晚来收。

戏将莲药抛池里，种出花枝是并头。

◇又

小睡醒来近夕阳，铅华洗尽淡梳妆。

纱厨此日偏惆怅，剪取巫云做晚凉。

◇又

追凉池上晚偏宜，菱角鸡头散绿漪。

偏是玉人怜雪藕，为他心里一丝丝。

◇又

却对菱花泪暗流，谁将风月印绸缪？

生来悔识相思字，判与齐纨共早秋。

◇又

解尽余酲爇尽香，雨声虫语两凄凉。

如何刚报新秋节，便觉清宵分外长？

◇又

璇玑好谱断肠图，却为思君碧作朱。

几夜西风消瘦尽，问侬还似旧时无？

◇又

菊香细细扑重帘，日压雕檐起未忺。

端的为花憔悴损，一枝还向胆瓶添。

◇又

凝阴容易近黄昏，兽锦还余昨夜温。

最是恼人风弄雪，睡醒无事总关门。

◇又

玉指吴盐待剖橙，忽听楼外马蹄声。

问郎今日天寒甚，却是何人抵暮行？

◇又

漫学吹笙苦未调，娇痴且自阅焚椒。

博山香尽残灰冷，零落霜华带月飘。

◇又

漫爇甜香漫煮茶，桃符换却已闻鸦。

宿妆总待侵晨换，留取鬟心柏子花。

◇记征人语

列幕平沙夜寂寥，楚云燕月两迢迢。

征人自是无归梦，却枕兜鍪卧听潮。

◇又

横江烽火未曾收，何处危樯系客舟？

一片潮声飞石燕，斜风细雨岳阳楼。

◇又

楼船昨过洞庭湖，芦荻萧萧宿雁呼。
一夜寒砧霜外急，书来知有寄衣无？

◇又

旌旗历历射波明，洲渚宵来画角声。
啼遍鹧鸪春草绿，一时南北望乡情。

◇又

青磷点点欲黄昏，折铁难消战血痕。
犀甲玉袍看绣涩，《九歌》原自近《招魂》。

◇又

战垒临江少落花，空城白日尽饥鸦。
最怜陌上青青草，一种春风直到家。

◇又

阵云黯黯接江云，江上都无雁鹜群。
正是不堪回首夜，谁吹玉笛吊湘君？

◇又

边月无端照别离，故园何处寄相思？
西风不解征人苦，一夕萧萧满大旗。

◇又

移军日夜近南天，蓟北云山益渺然。
不是啼乌衔纸过，那知寒食又今年。

◇又

鬓影萧萧夜枕戈，隔江清泪断猿多。

霜寒画角吹无力，归梦秦川奈尔何。

◇又

一曲金笳客泪垂，铁衣闲却卧斜晖。

衡阳十月南来雁，不待征人尽北归。

◇又

才歇征鼙夜泊舟，荻花枫叶共飕飕。

醉中不解双卧，梦过红桥访旧游。

◇又

去年亲串此从军，挥手城南日未曛。

我亦无端双袖湿，西风原上看离群。

◇上元月食

夹道香尘拥狭斜，金波无影暗千家。

姮娥应是羞分镜，故倩轻云掩素华。

◇東西溟

廿载疏狂世未容，重来依旧寺门钟。

晓衾何处还家梦，惟有凉飙起古松。

◇偕梁汾过西郊别墅

迟日三眠伴夕阳，一湾流水梦魂凉。

制成天海风涛曲，弹向东风总断肠。

◇为友人赋

不将才思唱临春，爱着荷衣狎隐沦。

分付芙蓉湖上月，好留清影待归人。

◇又

梦里谁曾与画眉，别来几度燕相窥。

小楼日暮愁无那，折取藤花寄所思。

◇又

往事惊心玉镜台，分香庭院长莓苔。

百花深护桃源犬，不许潜吟起夜来。

◇又

长安北望杳茫茫，泣向薰笼忆旧香。

惆怅玉环空寄与，紫薇郎是薄情郎。

◇又

珍重娇莺啄柳芽，清狂曾赋压墙花。

皑皑自许人如雪，何必丁宁系臂纱？

◇又

朝衣欲脱换轻衫，无恙西风旧布帆。

秋入玉潭新月冷，休因索莫怨崔咸。

◇书鲍让侯诗后

多少才情艳绮霞，羡君能赋上林花。

如余砚北浑无事，祇傍红窗枕木瓜。

◇赋得柳毅传书图次陈其年韵

黄陵祠庙白蘋洲，尺幅图成万古愁。

一自牧羊泾水上，至今云物不胜秋。

◇又

花愁雨泣总无伦，憔悴红颜画里真。

试看劈天金锁去，雷霆原恼薄情人。

◇又

晶帘碧砌玉玲珑，酒滴珍珠日未中。

忽报美人天上落，宝箏筵里尽春风。

◇又

凝碧宫寒覆羽觞，洞庭歌罢意茫茫。

玉颜寂寞今依旧，雨鬓风鬟枉断肠。

◇别荪友口占

离亭人去落花空，潦倒怜君类转蓬。

便是重来寻旧处，萧萧日暮白杨风。

◇又

半生余恨楚山孤，今夜送君君去吴。

君去明年今夜月，清光犹照故人无？

◇题照

画出东风别一般，绿窗人静独凭阑。

就中真色图难就，最是春山两笔难。

◇塞垣却寄

绝塞山高次第登，阴崖时见隔年冰。

还将妙写簪花手，却向雕鞍试臂鹰。

◇又

千重烟水路茫茫，不许征人不望乡。

况是月明无睡夜，尽将前事细思量。

◇又

碎虫零叶共秋声，诉出龙沙万里情。

遥想碧窗红烛畔，玉纤时为数归程。

◇又

枕函斜月不分明，梦欲成时那得成？

一派西风连角起，寒鸡已到第三声。

◇别意

晶帘低映美人蕉，雨歇芳丛点未消。

应是玉鞭归较晚，故从花底坐无聊。

◇又

浓香如雾恍难寻，执烛樱桃伴夜深。

惭愧十郎归未得，空题红泪寄焦琴。

◇又

独拥余香冷不胜，残更数尽思腾腾。

今宵便有随风梦，知在红楼第几层？

◇又

芭蕉阴暗玉绳斜，风送微凉透碧纱。

记得夜深人未寝，枕边狼藉一堆花。

◇又

银屏对影自生怜，正是看花中酒天。

剪却合欢双带子，一般牵恨又今年。

◇又

茗碗香炉事事幽，每当相对便无愁。

金笼自结双栖愿，那得齐纨怨早秋？

◇暮春见红梅作（简梁汾）

杏花庭院月如弓，又见江梅一瓣红。

知是东皇深着意，教他终始领春风。

◇咏絮

落尽深红绿叶稠，旋看轻絮扑帘钩。

怜他借得东风力，飞去为萍入御沟。

◇初夏月偕仲弟作

云母窗扉夜不扃，露华和月满中庭。

可怜春去无多日，已怯微暄敞画屏。

◇龙泉寺书经岩叔扇

雨歇香台散晚霞，玉轮轻碾一泓沙。

来春合向龙泉寺，方便风前检较花。

◇又

绣幡风定昼愔愔，证取莲花不染心。

佛法自来空色相，当年何事苦吞针？

◇柳枝词

一枝春色又藏鸦，白石清溪望不赊。

自是多情便多絮，随风直到谢娘家。

◇又

春到江南春草生，乍惊摇曳扑帘旌。

黄鹂无语昏鸦起，深闭重门待月明。

◇又

七香车过殷轻雷，十里红楼照水开。

遥指玉鞭鞭白马，柳阴阴下是郎来。

◇又

水亭无事对斜阳，宛地轻阴却过墙。

休折长条惹轻絮，春风何处不回肠？

◇又

何处纤腰不可怜，缠头抛与沈郎钱。

女儿睡觉推窗看，忽忆欢迎旧系船。

◇又

永丰坊里谢啼鹃，移植红泥曲槛边。

凉月一帘思往事，是他曾与伴无眠。

◇又

人去楼空属阿谁，月明惟见影垂垂。

寻常已是堪愁绝，何况春来赠别离？

◇又

何事凭阑怨月明，乍晴楼阁倍晶莹。

相思一夕溪流涨，倒影丝丝拂水平。

◇又

绿到长干第几桥，晚晴帘幕隔吹箫？

前身自是轻狂甚，嫁得东风带水飘。

◇又

辛夷开罢絮纷纷，青粉墙头日未曛。

记得个人春病起，是他紫惹绿罗裙。

◇又

手绾长条倚水楼，困人风日懒梳头。

濛濛一抹催花雨，半系斑骓半系舟。

◇又

软风吹雪带微香，曾向珠楼扫钿床。

塘上鸳鸯三十六，只今何处月茫茫？

◇又

风过游丝卷落花，又随飞絮上檐牙。

东邻为约清明后，陌上轻衫共采茶。

◇又

一水萦回雁齿桥，红泥亭搭绿丝绦。

浔阳纵有麻姑信，春雨春风自寂寥。

◇又

细细萍吹水面风，百花飞尽绿阴同。

别离管尽人如昨，罗袖长垂玉筋红。

◇又

休栽杨柳只栽桐，待凤藏鸦好尽空。

不见胥台明月夜，一池黄叶但西风。

◇上元竹枝词

碧落箫声转玉壶，踏灯随处笑相呼。

相逢若个能相赏，消得金霞照夜珠。

◇又

舞散应怜化彩云，尽收红紫付东君。

长安一片团圆月，只有秧歌彻晓闻。

◇又

天上朱轮绣幃车，几看春色到梅花？

而今却畏春寒甚，独掩重门自试茶。

◇又

半落银灯爆麝煤，似闻秣李踏歌回。

上清更有新翻曲，不许琼签傍晓催。

◇又（柳枝词）

长条短叶漾东风，寒食青郊处处同。

不待含烟兼带雨，春山一半绿纱中。

◇又

马卿苦忆红泥阁，我亦伤心碧树村。

病骨沉绵词客死，更谁攀折与招魂。（“绿杨天半红泥阁，朱槿风前翠袖人”，亡友马孝廉云翎《柳枝词》。）

◇又

池上闲房碧树围，帘文如縠上斜晖。

生憎飞絮吹难定，一出红窗便不归。

◇又

翠袖寒轻立画桥，江讴越吹激山椒。

看来都未关情绪，别向东风弄柳条。

◇又

只恐随风化彩云，梦回酒醒怨斜曛。

陌头自领行人意，可奈闲来便见君。

◇又

三春何处系人情，惟有垂杨傍户明。

月到帘栊遮不断，雨来池馆听无声。

◇又

萧条齐映白蘋洲，宛转青蛾恨未休。

梅雨过时憔悴了，年年无绪到清秋。

◇又

密护轩窗障小楼，从今不作少年游。

一生几许心闲日，不见相思见又愁。

◇杂题

岩扉日日望城闉，近水谁家背市尘？

白板窗齐乌柏树，红衫飘曳上楼人。

◇又

碧嶂夫容不可攀，闲听客话钓台间。

惟应短棹迎潮去，雷殷空江看雪山。

◇又

亦有闲园临水裔，行来棋响渐丁丁。

新阴四面无穷竹，一径中通白石亭。

◇又

碧城西去面山椒，细路缘堤未觉遥。

日上丽谯看浴马，千章高柳赤阑桥。

◇从军曲

细柳门开部曲闲，元戎亲送六飞还。

预陈辟谷他年志，许赐华阳十里山。

◇又

锦衾千里惜余香，独宿天山五月凉。

梦断荒城天欲晓，李陵祠下月如霜。

◇艳歌

红烛迎人翠袖垂，相逢长在二更时。

情深不向横陈尽，见面消魂去后思。

◇又

欢近三更短梦休，一宵才得半风流。

霜浓月落开帘去，暗触玎玲碧玉钩。

◇又

细语回延似属丝，月明书院可相思。

墙头无限新开桂，不为儿家折一枝？

◇又

洛神风格丽娟肌，不见卢郎年少时。

无限深情为郎尽，一身才易数篇诗。

◇缙山曲

刘郎西阁阮郎东，羸女吹箫别故宫。

嫁尽仙姬春寂寞，独留鸡犬护花丛。

◇又

人间曾见杜兰香，乱点明珰压绣裳。

今日素衣翻贝叶，一灯风雨拜空王。

◇又

齐州客去九烟青，送别蓬山第二亭。

浅酌劝君休尽醉，人间百岁酒初醒。

◇又

紫诰题衔敕众灵，明朝同谒翠华亭。

垂鬟小女司铜漏，误报晨签落曙星。

◇又

智琼携手阿环随，同侍瑶阶看舞姬。

玉茗主人新换职，大罗宫里教填词。

◇又

绿蒲经雨叶初齐，箫鼓楼船下碧溪。

风散满衣红蜡泪，五更同化杜鹃啼。

◇又

鹤俸分田过海隅，碧窗鹦鹉记呼卢。

唐家空有王摩诘，不识《瑶池雪后图》。

◇又

校书香案石函开，楚庙残碑绣紫苔。

一纸黄封呼宋玉，好携《天问》礼瑶台。

◇又

侍女开笼放白云，两天晴雨一山分。

上元不喜方壶住，借与苏家玉局君。

◇和元微之《杂忆》诗

卸头才罢晚风回，茉莉吹香过曲阶。

忆得水晶帘畔立，泥人花底拾金钗。

◇又

春葱背痒不禁爬，十指掺掺剥嫩芽。

忆得染将红爪甲，夜深偷捣凤仙花。

◇又

花灯小盏聚流萤，光走琉璃贮不成。

忆得纱幮和影睡，暂回身处妒分明。

◇题歌儿诗册

分明雪面转金铃，红烛娇歌倚画屏。
作使座中诸狎客，泥他沉醉唤他醒。

◇淶水亭

野色湖光两不分，碧云万顷变黄云。
分明一幅江村画，著个闲亭挂夕曛。

◇玉泉

芙蓉殿俯御河寒，残月西风并马看。
十里松杉清绝处，不知晓雪在西山。

◇松花江

弥天塞草望逶迤，万里黄云四盖垂。
最是松花江上月，五更曾照断肠时。

◇平山堂

竹西歌吹忆扬州，一上虚堂万象收。
欲问六朝佳丽地，此间占绝广陵秋。

◇江南杂诗

紫盖黄旗异昔年，乌衣朱雀总荒烟。
谁怜建业风流地，燕子归来二月天？

◇又

九龙一带晚连霞，十里湖堤半酒家。
何处清凉堪沁骨，惠山泉试虎丘茶。

◇又

邓尉溪村万树梅，霜残月白半春开。
金台游客时相忆，那得年年看一回？

◇又

妙高云级试孤攀，一片长江去不还。
最是销魂难别处，扬州风月润州山。

◇密云

白檀山水声秋，地踞潮河最上流。
日暮行人寻堠馆，凉砧一片古檀州。

◇南海子

分弓列戟四门开，游豫长陪万乘来。
七十二桥天汉上，彩虹飞下晾鹰台。

◇又

红桥夹岸柳平分，雉兔年年不掩群。
飞放何须烦海户，郊南新置羽林军。

卷六 词一

◇梦江南

江南好，建业旧长安。紫盖忽临双干渡，翠华争拥六龙看，雄丽却高寒。

◇又

江南好，城阙尚嵯峨。故物陵前惟石马，遗踪陌上有铜驼，《玉树》夜深歌。

◇又

江南好，怀古意谁传。燕子矶头红蓼月，乌衣巷口绿杨烟，风景忆当年。

◇又

江南好，虎阜晚秋天。山水总归诗格秀，笙箫恰称语音圆，谁在木兰船？

◇又

江南好，真个到梁溪。一幅云林高士画，数行泉石故人题，还似梦游非。

◇又

江南好，水是二泉清。味永出山那得浊，名高有锡更谁争，何必让中泠！

◇又

江南好，佳丽数维扬。自是琼花偏得月，那应金粉不兼香，谁与话清凉！

◇又

江南好，铁瓮古南徐。立马江山千里目，射蛟风雨百灵趋，北顾更踟躇。

◇又

江南好，一片妙高云。砚北峰峦米外史，屏间楼阁李将军，金碧矗斜曛。

◇又

江南好，何处异京华？香散翠帘多在水，绿残红叶胜于花，无事避风沙。

◇又

昏鸦尽，小立恨因谁？急雪乍翻香阁絮，轻风吹到胆瓶梅，心字已成灰。

◇又

新来好，唱得虎头词。一片冷香惟有梦，十分清瘦更无诗，标格早梅知。

◇江城子（咏史）

湿云全压数峰低。影凄迷，望中疑。非雾非烟，神女欲来时。若问生涯原是梦，除梦里，没人知。

◇如梦令

正是辘轳金井，满砌落花红冷。蓦地一相逢，心事眼波难定。谁省？谁省？从此簾纹灯影。

◇又

黄叶青苔归路，粉衣香何处。消息竟沈沈，今夜相思几许。秋雨，秋雨，一半因风吹去。

◇又

纤月黄昏庭院，语密翻教醉浅。知否那人心，旧恨新欢相半。谁见？谁见？珊枕泪痕红泫。

◇采桑子

彤霞久绝飞琼字，人在谁边。人在谁边，今夜玉清眠不眠？

香消被冷残灯灭，静数秋天。静数秋天，又误心期到下弦。

◇又

谁翻乐府凄凉曲，风也萧萧，雨也萧萧，瘦尽灯花又一宵。

不知何事萦怀抱，醒也无聊，醉也无聊，梦也何曾到谢桥。

◇又

严霜拥絮频惊起，扑面霜空，斜汉朦胧，冷逼毡帷火不红。

香篝翠被浑闲事，回首西风，何处疏钟，一镫灯花似梦中。

◇又

那能寂寞芳菲节，欲话生平，夜已三更，一阕悲歌泪暗零。

须知秋叶春花促，点鬓星星，遇酒须倾，莫问千秋万岁名。

◇又

冷香萦遍红桥梦，梦觉城笳，月上桃花，雨歇春寒燕子家。

箜篌别后谁能鼓，肠断天涯，暗损韶华，一缕茶烟透碧纱。

◇又（九日）

深秋绝塞谁相忆，木叶萧萧，乡路迢迢，六曲屏山和梦遥。

佳时倍惜风光别，不为登高，祇觉魂销，南雁归时更寂寥。

◇又（咏春雨）

嫩烟分染鹅儿柳，一样风丝，似整如欹，才著春寒瘦不支。

凉侵晓梦轻蝉腻，约略红肥，不惜葳蕤，碾取名香作地衣。

◇又（塞上咏雪花）

非关癖爱轻模样，冷处偏佳，别有根芽，不是人间富贵花。

谢娘别后谁能惜，飘泊天涯，寒月悲笳，万里西风瀚海沙。

◇又

桃花羞作无情死，感激东风，吹落娇红，飞入闲窗伴懊侬。
谁怜辛苦东阳瘦，也为春慵，不及芙蓉，一片幽情冷处浓。

◇又

海天谁放冰轮满，惆怅离情。莫说离情，但值凉宵总泪零。
祇应碧落重相见，那是今生。可奈今生，刚作愁时又忆卿。

◇又

明月多情应笑我，笑我如今，辜负春心，独自闲行独自吟。
近来怕说当时事，结遍兰襟，月浅灯深，梦里云归何处寻。

◇又

拨灯书尽红笺也，依旧无聊。玉漏迢迢，梦里寒花隔玉箫。
几竿修竹三更雨，叶叶萧萧。分付秋潮，莫误双鱼到谢桥。

◇又

凉生露气湘弦润，暗滴花梢，帘影谁摇，燕蹴风丝上柳条。
舞面镜匣开频掩，檀粉慵调，朝泪如潮，昨夜香衾觉梦遥。

◇又

土花曾染湘娥黛，铅泪难消。清韵谁敲，不是犀椎是凤翘。
祇应长伴端溪紫，割取秋潮。鹦鹉偷教，方响前头见玉箫。

◇又

白衣裳凭朱阑立，凉月趑西，点鬓霜微，岁晏知君归不归？
残更目断传书雁，尺素还稀，一味相思，准拟相看似旧时。

◇又

谢家庭院残更立，燕宿雕梁，月度银墙，不辨花丛那辨香。

此情已自成追忆，零落鸳鸯，雨歇微凉，十一年前梦一场。

◇又

而今才道当时错，心绪凄迷，红泪偷垂，满眼春风百事非。

情知此后来无计，强说欢期，一别如斯，落尽梨花月又西。

◇台城路（洗妆台怀古）

六宫佳丽谁曾见，层台尚临芳渚。露脚斜飞，虹腰欲断，荷叶未收残雨。添妆何处。试问取雕笼，雪衣分付。一镜空濛，鸳鸯拂破白蘋去。

相传内家结束，有帕装孤稳，靴缝女古。冷艳全消，苍苔玉匣，翻出十眉遗谱。人间朝暮。看胭粉亭西，几堆尘土。祇有花铃，绾风深夜语。

◇又（上元）

阑珊火树鱼龙舞，望中宝钗楼远。靺鞨余红，琉璃剩碧，待嘱花归缓缓。寒轻漏浅。正乍敛烟霏，陨星如箭。旧事惊心，一双莲影藕丝断。

莫恨流年逝水。恨销残蝶粉，韶光忒贱。细语吹香，暗尘笼鬓，都逐晓风零乱。阑干敲遍。问帘底纤纤，甚时重见？不解相思，月华今夜满。

◇又（塞外七夕）

白狼河北秋偏早，星桥又迎河鼓。清漏频移，微云欲湿，正是金风玉露。两眉愁聚。待归踏榆花，那时才诉。祇恐重逢，明明相视更无语。

人间别离无数。向瓜果筵前，碧天凝伫。连理千花，相思一叶，毕竟随风何处。羁栖良苦。算未抵空房，冷香啼曙。今夜天孙，笑人愁似许。

◇玉连环影

何处？几叶萧萧雨，湿尽檐花，花底人无语。掩屏山，玉炉寒，谁见两眉愁聚倚阑

干。

◇洛阳春（雪）

密洒征鞍无数，冥迷远树。乱山重叠杳难分，似五里濛濛雾。

惆怅琐窗深处，湿花轻絮。当时悠飏得人怜，也都是浓香助。

◇谒金门

风丝袅，水浸碧天清晓。一镜湿云青未了，雨晴春草草。

梦里轻螺谁扫，帘外落花红小。独睡起来情悄悄，寄愁何处好。

◇四和香

麦浪翻晴风蟢柳，已过伤春候。因甚为他成僝僽，毕竟是春迤逗。

红药阑边携素手，暖语浓于酒。盼到园花铺似绣，却更比春前瘦。

◇海棠月（瓶梅）

重檐淡月浑如水，浸寒香，一片小窗里。双鱼冻合，似曾伴个人无寐。横眸处，索笑而今已矣。

与谁更拥灯前髻，乍横斜，疏影疑飞坠。铜瓶小注，休教近麝炉烟气。酬伊也，几点夜深清泪。

◇金菊对芙蓉（上元）

金鸭消香，银虬泻水，谁家夜笛飞声？正上林雪霁，鸳甃晶莹，鱼龙舞罢香车杳，剩尊前袖掩吴绫，狂游似梦。而今空记，密约烧灯。

追念往事难凭，叹火树星桥，回首飘零。但九逵烟月，依旧笼明。楚天一带惊烽火，问今宵可照江城？小窗残酒，阑珊灯炮，别自关情。

◇点绛唇

一种蛾眉，下弦不似初弦好。庾郎未老，何事伤心早？

素壁斜辉，竹影横窗扫。空房悄，乌啼欲晓，又下西楼了。

◇又（咏风兰）

别样幽芬，更无浓艳催开处。凌波欲去，且为东风住。

忒煞萧疏，争奈秋如许。还留取，冷香半缕，第一湘江雨。

◇又（寄南海梁药亭）

一帽征尘，留君不住从君去。片帆何处，南浦沈香雨。

回首风流，紫竹村边住。孤鸿语，三生定许，可是梁鸿侣。

◇又（黄花城早望）

五夜光寒，照来积雪平于栈。西风何限，自起披衣看。

对此茫茫，不觉成长叹。何时旦，晓星欲散，飞起平沙雁。

◇又

小院新凉，晚来顿觉罗衫薄。不成孤酌，形影空酬酢。

萧寺怜君，别绪应萧索。西风恶，夕阳吹角，一阵槐花落。

◇浣溪沙

消息谁传到拒霜，两行斜雁碧天长，晚秋风景倍凄凉。

银蒜押帘人寂寂，玉钗敲竹信茫茫，黄花开也近重阳。

◇又

雨歇梧桐泪乍收，遣怀翻自忆从头，摘花销恨旧风流。

帘影碧桃人已去，屣痕苍藓径空留，两眉何处月如钩。

◇又

欲问江梅瘦几分，祇看愁损翠罗裙，麝篝衾冷惜余熏。
可耐暮寒长倚竹，便教春好不开门，枇杷花底校书人。

◇又

泪浥红笺第几行，唤人娇鸟怕开窗，那能闲过好时光。
屏障厌看金碧画，罗衣不奈水沈香，遍翻眉谱祇寻常。

◇又

残雪凝辉冷画屏，落梅横笛已三更，更无人处月胧明。
我是人间惆怅客，知君何事泪纵横，断肠声里忆平生。

◇又

睡起惺惚强自支，绿倾蝉鬓下帘时，夜来愁损小腰肢。
远信不归空伫望，幽期细数却参差，更兼何事耐寻思。

◇又

十里湖光载酒游，青帘低映白蘋洲，西风听彻采菱讴。
沙岸有时双袖拥，画船何处一竿收？归来无语晚妆楼。

◇又

脂粉塘空遍绿苔，掠泥营垒燕相催，妒他飞去却飞回。
一骑近从梅里过，片帆遥自藕溪来，博山香炉未全灰。

◇又

五月江南麦已稀，黄梅时节雨霏微，闲看燕子教雏飞。
一水浓阴如罨画，数峰无恙又晴晖，溅裙谁独上渔矶？

◇又

谁道飘零不可怜，旧游时节好花天，断肠人去自今年。
一片晕红才著雨，几丝柔绿乍和烟，倩魂销尽夕阳前。

◇又（咏五更和湘真韵）

微晕娇花湿欲流，簾纹灯影一生愁，梦回疑在远山楼。
残月暗窥金屈戌，软风徐荡玉帘钩，待听邻女唤梳头。

◇又

伏雨朝寒愁不胜，那能还傍杏花行，去年高摘斗轻盈。
漫惹炉烟双袖紫，空将酒晕一衫青，人间何处问多情。

◇又

五字诗中目乍成，尽教残福折书生，手挼裙带那时情。
别后心期和梦杳，年来憔悴与愁并，夕阳依旧小窗明。

◇又

欲寄愁心朔雁边，西风浊酒惨离颜，黄花时节碧云天。
古戍烽烟迷斥堠，夕阳村落解鞍鞯，不知征战几人还？

◇又

记绾长条欲别难，盈盈自此隔银湾，便无风雪也摧残。
青雀几时裁锦字，玉虫连夜剪春幡，不禁辛苦况相关。

◇又

谁念西风独自凉，萧萧黄叶闭疏窗，沈思往事立残阳。

被酒莫惊春睡重，赌书消得泼茶香，当时祇道是寻常。

◇又

十八年来堕世间，吹花嚼蕊弄冰弦，多情情寄阿谁边。

紫玉钗斜灯影背，红绵粉冷枕函偏，相看好处却无言。

◇又

莲漏三声烛半条，杏花微雨湿红绡，那将红豆记无聊？

春色已看浓似酒，归期安得信如潮，离魂入夜倩谁招。

◇又

身向云山那畔行，北风吹断马嘶声，深秋远塞若为情。

一抹晚烟荒戍垒，半竿斜日旧关城，古今幽恨几时平。

◇又（大觉寺）

燕垒空梁画壁寒，诸天花雨散幽关，篆香清梵有无间。

蛱蝶乍从帘影度，樱桃半是鸟衔残，此时相对一忘言。

◇又（古北口）

杨柳千条送马蹄，北来征雁旧南飞，客中谁与换春衣。

终古闲情归落照，一春幽梦逐游丝，信回刚道别多时。

◇又

凤髻抛残秋草生，高梧湿月冷无声，当时七夕记深盟。

信得羽衣传钿合，悔教罗袜葬倾城，人间空唱雨淋铃。

◇又

败叶填溪水已冰，夕阳犹照短长亭，何年废寺失题名？

倚马客临碑上字，斗鸡人拨佛前灯，净消尘土礼金经。

◇又（庾申除夜）

收取闲心冷处浓，舞裙犹忆柘枝红，谁家刻烛待春风？

竹叶樽空翻彩燕，九枝灯焰颤金虫，风流端合倚天公。

◇又

万里阴山万里沙，谁将绿鬓斗霜华，年来强半在天涯。

魂梦不离金屈戌，画图亲展玉鸦叉，生怜瘦减一分花。

◇又

肠断班骓去未还，绣屏深锁凤箫寒，一春幽梦有无间。

逗雨疏花浓淡改，关心芳字浅深难，不成风月转摧残。

◇又

容易浓香近画屏，繁枝影著半窗横，风波狭路倍怜卿。

未接语言犹怅望，才通商略已瞢腾，祇嫌今夜月偏明。

◇又

抛却无端恨转长，慈云稽首返生香，妙莲花说试推详。

但是有情皆满愿，更从何处著思量，篆烟残烛并回肠。

◇又（小兀喇）

桦屋鱼衣柳作城，蛟龙鳞动浪花腥，飞扬应逐海东青。

犹记当年军垒迹，不知何处梵钟声，莫将兴废话分明。

◇又（姜女祠）

海色残阳影断霓，寒涛日夜女郎祠，翠钿尘网上蛛丝。

澄海楼高空极目，望夫石在且留题，六王如梦祖龙非。

◇又

旋拂轻容写洛神，须知浅笑是深颦，十分天与可怜春。

掩抑薄寒施软障，抱持纤影藉芳茵，未能无意下香尘。

◇又

十二红帘褰地深，才移划袜又沈吟，晚晴天气惜轻阴。

珠玑佩囊三合字，宝钗拢髻两分心，定绿何事湿兰襟？

◇又（红桥怀古和王阮亭韵）

无恙年年汴水流，一声水调短亭秋，旧时明月照扬州。

曾是长堤牵锦缆，绿杨清瘦至今愁，玉钩斜路近迷楼。

◇风流子（秋郊即事）

平原草枯矣，重阳后，黄叶树骚骚，记玉勒青丝，落花时节，曾逢拾翠，忽听吹箫。
。今来是，烧痕残碧尽，霜影乱红凋。秋水映空，寒烟如织，皂雕飞处，天惨云高。

人生须行乐，君知否？容易两鬓萧萧。自与东君作别，划地无聊。算功名何许，此身博得短衣射虎，沽酒西郊。便向夕阳影里，倚马挥毫。

◇画堂春

一生一代一双人，争教两处销魂。相思相望不相亲，天为谁春？

浆向蓝桥易乞，药成碧海难奔。若容相访饮牛津，相对忘贫。

◇蝶恋花

辛苦最怜天上月。一昔如环，昔昔都成玦。若似月轮终皎洁，不辞冰雪为卿热。
无那尘缘容易绝。燕子依然，软踏帘钩说。唱罢秋坟愁未歇，春丛认取双栖蝶。

◇又

眼底风光留不住。和暖和香，又上雕鞍去。欲倩烟丝遮别路，垂杨那是相思树。
惆怅玉颜成闲阻。何事东风，不作繁华主。断带依然留乞句，斑骓一系无寻处。

◇又（散花楼送客）

城上清笳城下杵。秋尽离人，此际心偏苦。刀尺又催天又暮，一声吹冷蒹葭浦。
把酒留君君不住。莫被寒云，遮断君行处。行宿黄茅山店路，夕阳村社迎神鼓。

◇又

准拟春来消寂寞。愁雨愁风，翻把春担阁。不为伤春情绪恶，为怜镜里颜非昨。
毕竟春光谁领略。九陌缁尘，抵死遮云壑。若得寻春终遂约。不成长负东君诺。

◇又

又到绿杨曾折处。不语垂鞭，踏遍清秋路。衰草连天无意绪。雁声远向萧关去。
不恨天涯行役苦。只恨西风，吹梦成今古。明日客程还几许。沾衣况是新寒雨。

◇又

萧瑟兰成看老去。为怕多情，不作怜花句。阁泪倚花愁不语。暗香飘尽知何处。
重到旧时明月路。袖口香寒，心比秋莲苦。休说生生花里住。惜花人去花无主。

◇又

露下庭柯蝉响歇。纱碧如烟，烟里玲珑月。并著香肩无可说。樱桃暗解丁香结。

笑卷轻衫鱼子缬。试扑流萤，惊起双栖蝶。瘦断玉腰沾粉叶。人生那不相思绝。

◇出塞

今古河山无定据。画角声中，牧马频来去。满目荒凉谁可语。西风吹老丹枫树。
从前幽怨应无数。铁马金戈，青冢黄昏路。一往情深深几许。深山夕照深秋雨。

◇又（十月望日与经岩叔别）

尽日惊风吹木叶。极目嵯峨，一丈天山雪。去去丁零愁不绝。那堪客里还伤别。
若道客愁容易辍。除是朱颜，不共春销歇。一纸乡书和泪折。红闺此夜团圞月。

◇河传（春暮）

春残，红怨，掩双环。微雨花间昼闲。无言暗将红泪弹。阑珊。香销轻梦还。
斜倚画屏思往事。皆不是。空作相思字。记当时。垂柳丝。花枝。满庭胡蝶儿。

◇河渚神

凉月转雕阑，萧萧木叶声干。银灯飘落琐窗闲。枕屏几叠秋山。
朔风吹透青缣被。药炉火暖初沸。清漏沈沈无寐。为伊判得憔悴。

◇又

风紧雁行高。无边落木萧萧。楚天魂梦与香消。青山暮暮朝朝。
断续凉云来一缕。飘堕几丝灵雨。今夜冷红浦溆。鸳鸯栖向何处。

◇落花时

夕阳谁唤下楼梯。一握香萸。回头忍笑阶前立，总无语、也依依。
笺书直恁无凭据，休说相思。劝伊好向红窗醉，须莫及、落花时。

卷七 词二

◇金缕曲（赠梁汾）

德也狂生耳。偶然间、缁尘京国，乌衣门第。有酒惟浇赵州土，谁会成生此意？不信道、遂成知己。青眼高歌俱未老，向樽前拭尽英雄泪。君不见，月如水。

共君此夜须沈醉。且由他、蛾眉谣诼，古今同忌。身世悠悠何足问，冷笑置之而已。寻思起、从头翻悔。一日心期千劫在，后身缘恐结他生里。然诺重，君须记。

◇又（姜西溟言别赋此赠之）

谁复留君住。叹人生、几番离合，便成迟暮。最忆西窗同剪烛，却话家山夜雨。不道只、暂时相聚。袞袞长江萧萧木，送遥天白雁哀鸣去。黄叶下，秋如许。

曰归因甚添愁绪？料强似、冷烟寒月，栖迟梵宇。一事伤心君落魄，两鬓飘萧未遇。有解忆、长安儿女。袞敝入门空太息，信古来才命真相负。身世恨，共谁语？

◇又（简梁汾）

洒尽无端泪。莫因他、琼楼寂寞，误来人世。信道痴儿多厚福，谁遣偏生明慧。莫更著、浮名相累。仕宦何妨如断梗，祇那将声影供群吠。天欲问，且休矣。

情深我自判憔悴。转丁宁、香怜易爇，玉怜轻碎。羨杀软红尘里客，一味醉生梦死。歌与哭、任猜何意。绝塞生还吴季子，算眼前此外皆闲事。知我者，梁汾耳。

◇又（寄梁汾）

木落吴江矣。正萧条、西风南雁，碧云千里。落魄江湖还载酒，一种悲凉滋味。重回首、莫弹酸泪。不是天公教弃置，是南华误却方城尉。飘泊处、谁相慰？别来我亦伤孤寄。更那堪、冰霜摧折，壮怀都废。天远难穷劳望眼，欲上高楼还已。君莫恨、埋愁无地。秋雨秋花关塞冷，且殷勤好作加餐计。人岂得，长无谓！

◇又（再赠梁汾用秋水轩旧韵）

酒涴青衫卷。尽从前、风流京兆，闲情未遣。江左知名今廿载，枯树泪痕休泫。摇落尽、玉蛾金茧。多少殷勤红叶句，御沟深不似天河浅。空省识，画图展。

高才自古难通显。枉教他、堵墙落笔，凌云书扁。入洛游梁重到处，骇看村庄吠犬。

。独憔悴、斯人不免。袞袞门前题凤客，竟居然润色朝家典。凭触忌、舌难剪。

◇又

生怕芳樽满。到更深、迷离醉影，残灯相伴。依旧回廊新月在，不定竹声撩乱。问愁与、春宵长短。人比疏花还寂寞，任红蕤落尽应难管。向梦里，闻低唤。

此情拟倩东风浣。奈吹来、余香病酒，旋添一半。惜别江郎浑易瘦，更著轻寒轻暖。忆絮语、纵横茗碗。滴滴西窗红蜡泪，那时肠早为而今断。任枕角、欹孤馆。

◇又（慰西溟）

何事添凄咽？但由他、天公簸弄，莫教磨涅。失意每多如意少，终古几人称屈。须知道、福因才折。独卧藜床看北斗，背高城玉笛吹成血。听谯鼓，二更彻。

丈夫未肯因人热。且乘闲、五湖料理，扁舟一叶。泪似秋霖挥不尽，洒向野田黄蝶。须不羡、承明班列。马迹车尘忙未了，任西风吹冷长安月。又萧寺、花如雪。

◇又（亡妇忌日有感）

此恨何时已。滴空阶、寒更雨歇，葬花天气。三载悠悠魂梦杳，是梦久应醒矣。料也觉、人间无味。不及夜台尘土隔，冷清清一片埋愁地。钗钿约，竟抛弃。

重泉若有双鱼寄。好知他、年来苦乐，与谁相倚？我自终宵成转侧，忍听湘弦重理。待结个、他生知己。还怕两人俱薄命，再缘慳剩月零风里。清泪尽、纸灰起。

◇又

疏影临书卷。带霜华、高高下下，粉脂都遣。别是幽情嫌妩媚，红烛啼痕休浣。趁皓月、光浮冰茧。恰与花神供写照，任泼来淡墨无深浅。持素障，夜中展。

残缸掩过看逾显。相对处、芙蓉玉绽，鹤翎银扁。但得白衣时慰藉，一任浮云苍犬。尘土隔、软红偷免。帘幕西风人不寐，恁清光肯惜骀裘典。休便把、落英剪。

◇踏莎美人（清明）

拾翠归迟，踏青期近，香笺小叠邻姬讯。樱桃花谢已清明，何事绿鬟斜宝钗横？

浅黛双弯，柔肠几寸，不堪更惹其他恨。晓窗窥梦有流莺，也觉个依憔悴可怜生。

◇红窗月

燕归花谢，早因循，又过清明。是一般风景，两样心情。犹记碧桃影里，誓三生。
乌丝阑纸，娇红篆，历历春星。道休孤密约，鉴取深盟。语罢一丝香露，湿银屏。

◇南歌子

翠袖凝寒薄，帘衣入夜空。病容扶起月明中，惹得一丝残篆旧薰笼。
暗觉欢期过，遥知别恨同。疏花已是不禁风，那更夜深清露湿愁红。

◇又

暖护樱桃蕊，寒翻蛱蝶翎。东风吹绿渐冥冥，不信一生憔悴伴啼莺。
素影飘残月，香丝拂绮棂。百花迢递玉钗声，索向绿窗寻梦寄余生。

◇又（古戍）

古戍饥乌集，荒城野雉飞。何年劫火剩残灰？试看英雄碧血满龙堆。
玉帐空分垒，金笳已罢吹。东风回首尽成非，不道兴亡命也岂人为！

◇一络索

过尽遥山如画。短衣匹马，萧萧落木不胜秋。莫回首，斜阳下。
别是柔肠萦挂。待归才罢，却愁拥髻向灯前，说不尽，离人话。

◇又

野火拂云微绿。西风夜哭，苍茫雁翅列秋空，忆写向，屏山曲。
山海几经翻覆。女墙斜矗，看来费尽祖龙心，毕竟为谁家筑？

◇赤枣子

惊晓漏，护春眠。格外娇慵祇自怜。寄语酿花风日好，绿窗来与上琴弦。

◇眼儿媚

林下闺房世罕俦，偕隐足风流。今来忍见，鹤孤华表，人远罗浮。
中年定不禁哀乐，其奈忆曾游？浣花微雨，采菱斜日，欲去还留。

◇又（咏红姑娘）

骚屑西风弄晚寒，翠袖倚阑干。霞绡裹处，樱唇微绽，靺鞨红殷。
故宫事往凭谁问，无恙是朱颜。玉墀争采，玉钗争插，至正年间。

◇又（中元夜有感）

手写香台金字经，惟愿结来生。莲花漏转，杨枝露滴，想鉴微诚。
欲知奉倩神伤，极凭诉与秋擎。西风不管，一池萍水，几点荷灯。

◇又（咏梅）

莫把琼花比澹妆，谁似白霓裳？别样清幽，自然标格，莫近东墙。
冰肌玉骨天分付，兼付与凄凉。可怜遥夜，冷烟和月，疏影横窗。

◇又

独倚春寒掩夕扉，清露泣铢衣。玉箫吹梦，金钗划影，悔不同携。
刻残红烛曾相待，旧事总依稀。料应遗恨，月中教去，花底催归。

◇又

重见星娥碧海槎，忍笑却盘鸦。寻常多少，月明风细，今夜偏佳。
休笼彩笔闲书字，街鼓已三挝。烟丝欲袅，露光微泫，春在桃花。

◇荷叶杯

帘卷落花如雪，烟月，谁在小红亭。玉钗敲竹乍闻声，风影略分明。

化作彩云飞去，何处？不隔枕函边。一声将息晓寒天，肠断又今年。

◇又

知己一人谁是？已矣，赢得误他生。有情终古似无情，别语悔分明。

莫道芳时易度，朝暮，珍重好花天。为伊指点再来缘，疏雨洗遗钿。

◇梅梢雪（元夜月蚀）

星球映彻，一痕微褪梅梢雪，紫姑待话经年别。窃药心灰，慵把菱花揭。

踏歌才起清钲歇，扇纨仍似秋期洁。天公毕竟风流绝，教看蛾眉，特放些时缺。

◇木兰花令（拟古决绝词）

人生若祇如初见，何事秋风悲画扇？

等闲变却故人心，却道故心人易变。

骊山雨罢清宵半，泪雨零铃终不怨。

何如薄幸锦衣郎，比翼连枝当日愿？

◇长相思

山一程，水一程。身向榆关那畔行，夜深千帐灯。

风一更，雪一更，聒碎乡心梦不成，故园无此声。

◇朝中措

蜀弦秦柱不关情，尽日掩云屏。已惜轻翎退粉，更嫌弱絮为萍。

东风多事，余寒吹散，烘暖微醒。看尽一帘红雨，为谁亲系花铃？

◇寻芳草（萧寺记梦）

客夜怎生过，梦相伴。绮窗吟和，薄嗔伴。笑道若不是恁凄凉，肯来么？

来去苦匆匆，准拟待、晓钟敲破。乍偎人，一闪灯花堕，却对着琉火。

◇遐方怨

欹角枕，掩红窗。梦到江南，伊家博山沉水香。浣裙归晚坐思量。轻烟笼浅黛，月茫茫。

◇秋千索（绿水亭春望）

垆边唤酒双鬟亚。春已到，卖花帘下。一道香尘碎绿蘋，看白袷亲调马。
烟丝宛宛愁萦挂，剩几笔、晚晴图画。半枕芙蓉压浪眠，教费尽莺儿话。

◇又

药阑携手销魂侣。争不记，看承人处。除向东风诉此情，奈竟日春无语。
悠扬扑尽风前絮，又百五、韶光难住。满地梨花似去年，却多了廉纤雨。

◇又

游丝断续东风弱。浑无语，半垂帘幕。茜袖谁招曲槛边，弄一缕秋千索？
惜花人共残春薄，春欲尽、纤腰如削。新月才堪照独愁，却又照梨花落。

◇茶瓶儿

杨花糝径樱桃落。绿阴下、晴波燕掠，好景成担阁。秋千背倚，风态宛如昨。
可惜春来总萧索。人瘦损、纸鸢风恶。多少芳笺约。青鸾去也，谁与劝孤酌。

◇好事近

帘外五更风，消受晓寒时节。刚剩秋衾一半，拥透帘残月。
争教清泪不成冰，好处便轻别？拟把伤离情绪，待晓寒重说。

◇又

何路向家园？历历残山剩水。都把一春冷淡，到麦秋天气。

料应重发隔年花，莫问花前事。纵使东风依旧，怕红颜不似。

◇又

马首望青山，零落繁华如此。再向断烟衰草，认藓碑题字。

休寻折戟话当年，祇洒悲秋泪。斜日十三陵下，过新丰猎骑。

◇太常引（自题小照）

西风乍起峭寒生，惊雁避移营。千里暮云平，休回首、长亭短亭。

无穷山色，无边往事，一例冷清清。试倩玉箫声，唤千古、英雄梦醒。

◇又

晚来风起撼花铃，人在碧山亭。愁里不堪听，那更杂、泉声雨声。

无凭踪迹，无聊心绪，谁说与多情？梦也不分明，又何必、催教梦醒。

◇转应曲

明月明月，曾照个人离别。玉壶红泪相偎，还似当年夜来。来夜来夜，肯把清辉重借？

◇山花子

林下荒苔道韞家，生怜玉骨委尘沙。愁向风前无处说，数归鸦。

半世浮萍随逝水，一宵冷雨葬名花。魂似柳绵吹欲碎，绕天涯。

◇又

昨夜浓香分外宜，天将妍暖护双栖。桦烛影微红玉软，燕钗垂。

几为愁多翻自笑，那逢欢极却含啼。央及莲花清漏滴，莫相催。

◇又

风絮飘残已化萍，泥莲刚倩藕丝萦。珍重别拈香一瓣，记前生。

人到情多情转薄，而今真个悔多情。又到断肠回首处，泪偷零。

◇又

欲话心情梦已阑，镜中依约见春山。方悔从前真草草，等闲看。

环佩祇应归月下，钿钗何意寄人间。多少滴残红蜡泪，几时干？

◇又

小立红桥柳半垂，越罗裙飏缕金衣。采得石榴双叶子，欲贻谁？

便是有情当落日，祇应无伴送斜晖。寄语东风休着力，不禁吹。

◇菩萨蛮

窗前桃蕊娇如卷，东风泪洗胭脂面。人在小红楼，离情唱石州。

夜来双燕宿，灯背屏腰绿。香尽雨阑珊，薄衾寒不寒。

◇又

朔风吹散三更雪，倩魂犹恋桃花月。梦好莫催醒，由他好处行。

无端听画角，枕畔红冰薄。塞马一声嘶，残星拂大旗。

◇又

问君何事轻离别，一年能几团圆月？杨柳乍如丝，故园春尽时。

春归归不得，两桨松花隔。旧事逐寒潮，啼鹃恨未消。

◇又（为陈其年题照）

乌丝曲倩红儿谱，萧然半壁惊秋雨。曲罢髻鬟偏，风姿真可怜。

须髯浑似戟，时作簪花剧。背立讶卿卿，知卿无那情。

◇又（宿滦河）

玉绳斜转疑清晓，凄凄月白渔阳道。星影漾寒沙，微茫织浪花。

金笳鸣故垒，唤起人难睡。无数紫鸳鸯，共嫌今夜凉。

◇又

荒鸡再咽天难晓，星榆落尽秋将老。毡幕绕牛羊，敲冰饮酪浆。

山程兼水宿，漏点清钲续。正是梦回时，拥衾无限思。

◇又

新寒中酒敲窗雨，残香细袅秋情绪。才道莫伤神，青衫湿一痕。

无聊成独卧，弹指韶光过。记得别伊时，桃花柳万丝。

◇又

白日惊飙冬已半，解鞍正值昏鸦乱。冰合大河流，茫茫一片愁。

烧痕空极望，鼓角高城上。明日近长安，客心愁未阑。

◇又

萧萧几叶风兼雨，离人偏识长更苦。欹枕数秋天，蟾蜍早下弦。

夜寒惊被薄，泪与灯花落。无处不伤心，轻尘在玉琴。

◇又（回文）

雾窗寒对遥天暮，暮天遥对寒窗雾。花落正啼鸦，鸦啼正落花。

袖罗垂影瘦，瘦影垂罗袖。风剪一丝红，红丝一剪风。

◇又

催花未歇花奴鼓，酒醒已见残红舞。不忍覆余觞，临风泪数行。

粉香看又别，空剩当时月。月也异当时，凄清照鬓丝。

◇又

惜春春去惊新燠，粉融轻汗红绵扑。妆罢祇思眠，江南四月天。

绿阴帘半揭，此景清幽绝。行度竹林风，单衫杏子红。

◇又

榛荆满眼山城路，征鸿不为愁人住。何处是长安，湿云吹雨寒？

丝丝心欲碎，应是悲秋泪。泪向客中多，归时又奈何。

◇又

春云吹散湘帘雨，絮粘蝴蝶飞还住。人在玉楼中，楼高四面风。

柳烟丝一把，暝色笼鸳瓦。休近小阑干，夕阳无限山。

◇又

晓寒瘦著西南月，丁丁漏箭余香咽。春已十分宜，东风无是非。

蜀魂羞顾影。玉照斜红冷。谁唱后庭花。新年忆旧家。

◇又

为春憔悴留春住。那禁半霎催归雨。深巷卖樱桃。雨余红更娇。

黄昏清泪阁。忍便花飘泊。消得一声莺。东风三月情。

◇又

隔花才歇廉纤雨。一声弹指浑无语。梁燕自双归。长条脉脉垂。

小屏山色远。妆薄铅华浅。独自立瑶阶。透寒金缕鞋。

◇又

黄云紫塞三千里。女墙西畔啼乌起。落日万山寒。萧萧猎马还。

笳声听不得。入夜空城黑。秋梦不归家。残灯落碎花。

◇又

飘蓬只逐惊飙转。行人过尽烟光远。立马认河流。茂陵风雨秋。

寂寥行殿锁。梵呗琉璃火。塞雁与宫鸦，山深日易斜。

◇又

晶帘一片伤心白。云鬓香雾成遥隔。无语问添衣。桐阴月已西。

西风鸣络纬。不许愁人睡。只是去年秋。如何泪欲流。

◇又（寄梁汾荅中）

知君此际情萧索。黄芦苦竹孤舟泊。烟白酒旗青。水村鱼市晴。

柁楼今夕梦。脉脉春寒送。直过面眉桥。钱塘江上潮。

◇又（回文）

客中愁损催寒夕。夕寒催损愁中客。门掩月黄昏。昏黄月掩门。

翠衾孤拥醉。醉拥孤衾翠。醒莫更多情。情多更莫醒。

◇又（回文）

砑笺银粉残煤画。画煤残粉银笺砑。清夜一灯明。明灯一夜清。

片花惊宿燕。燕宿惊花片。亲自梦归人。人归梦自亲。

◇又

乌丝画作回纹纸。香煤暗蚀藏头字。箏雁十三双。输他作一行。

相看仍似客。但道休相忆。索性不还家。落残红杏花。

◇又

阑风伏雨催寒食。樱桃一夜花狼藉。刚与病相宜。锁窗薰绣衣。

画眉烦女伴。央及流莺唤。半饷试开奁。娇多直自嫌。

◇醉桃源

斜风细雨正霏霏。画帘拖地垂。屏山几曲篆香微。闲庭柳絮飞。

新绿密，乱红稀。乳莺残日啼。余寒欲透缕金衣。落花郎未归。

◇昭君怨

深禁好春谁惜。薄暮瑶阶伫立。别院管弦声。不分明。

又是梨花欲谢。绣被春寒今夜。寂寂锁朱门。梦承恩。

卷八 词三

◇琵琶仙（中秋）

碧海年年，试问取冰轮，为谁圆缺？吹到一片秋香，清辉了如雪。愁中看好天良夜，知道尽成悲咽。只影而今，那堪重对，旧时明月。

花径里戏捉迷藏，曾惹下萧萧井梧叶。记否轻纨小扇，又几番凉热？祇落得填膺百感总茫茫，不关离别。一任紫玉无情，夜寒吹裂。

◇清平乐

凄凄切切，惨淡黄花节。梦里砧声浑未歇，那更乱蛩悲咽？

尘生燕子空楼，抛残弦索床头。一样晓风残月，而今触绪添愁。

◇又（上元月蚀）

瑶华映阙，烘散蓂墀雪。比似寻常清景别，第一团圆时节。

影娥忽泛初弦，分辉借与宫莲。七宝修成合璧，重轮岁岁中天。

◇又

烟轻雨小，望里青难了。一缕断虹垂树杪，又是乱山残照。

凭高目断征途，暮云千里平芜。日夜河流东下，锦书应托双鱼。

◇又

孤花片叶，断送清秋节。寂寂绣屏香篆灭，暗里朱颜消歇。

谁怜散髻吹笙，天涯芳草关情。懊恼隔帘幽梦，半床花月纵横。

◇又

麝烟深漾，人拥绡笙氅。新恨暗随新月长，不辨眉尖心上。

六花斜扑疏帘，地衣红锦轻沾。记取暖香如梦，耐他一晌寒岩。

◇又

将愁不去，秋色行难住。六曲屏山深院宇，日日风风雨雨。

雨晴篱菊初香，人言此日重阳。回首凉云暮叶，黄昏无限思量。

◇又

青陵蝶梦，倒挂怜么凤。退粉收香情一种，栖傍玉钗偷共。

恹恹镜阁飞蛾，谁传锦字秋河？莲子依然隐雾，菱花暗惜横波。

◇又

风鬟雨鬓，偏是来无准。倦倚玉兰看月晕，容易语低香近。

软风吹遍窗纱，心期便隔天涯。从此伤春伤别，黄昏祇对梨花。

◇又（弹琴峡题壁）

泠泠彻夜，谁是知音者？如梦前朝何处也，一曲边愁难写。

极天关塞云中，人随落雁西风。唤取红襟翠袖，莫教泪洒英雄。

◇又（忆梁汾）

才听夜雨，便觉秋如许。绕砌蛩人不语，有梦转愁无据。

乱山千叠横江，忆君游倦何方？知否小窗红烛，照人此夜凄凉。

◇又

塞鸿去矣，锦字何时寄？记得灯前佯忍泪，却问明朝行未。

别来几度如圭，飘零落叶成堆。一种晓寒残梦，凄凉毕竟因谁！

◇一丛花（咏并蒂莲）

阑珊玉佩罢霓裳，相对绾红妆。藕丝风送凌波去，又低头软语商量。一种情深，十

分心苦，脉脉背斜阳。色香空尽转生香，明月小银塘。桃根桃叶终相守，伴殷勤双宿鸳鸯。菰米漂残，沉云乍黑，同梦寄潇湘。

◇菊花新（用韵送张见阳令江华）

愁绝行人天易暮，行向鹧鸪声里住。渺渺洞庭波，木叶下楚天何处？

折残杨柳应无数，趁离亭笛声吹度。有几个征鸿相伴也，送君南去。

◇澹黄柳（咏柳）

三眠未歇，乍到秋时节。一树斜阳蝉更咽，曾绾灞陵离别。絮已为萍风卷叶，空凄切。长条莫轻折，苏小恨倩他说。尽飘零，游冶章台客。红版桥空，溅裙人去，依旧晓风残月。

◇满宫花

盼天涯芳讯绝，莫是故情全歇？朦胧寒月影微黄，情更薄于寒月。

麝烟销兰，烬灭多少怨眉愁睫。芙蓉莲子待分明。莫向暗中磨折。

◇洞仙歌（咏黄葵）

铅华不御，看道家妆就。问取旁人入时否？为孤情澹韵，判不宜春，矜标格，开向晚秋时候。

无端轻薄雨，滴损檀心。小叠宫罗镇长皱。何必诉凄清？为爱秋光，被几日、西风吹瘦。便零落蜂黄也休嫌，且对倚斜阳，胜偎红袖。

◇唐多令（雨夜）

丝雨织红茵，苔阶压绣纹。是年年、肠断黄昏。到眼芳菲都惹恨，那更说，塞垣春。

萧飒不堪闻，残妆拥夜分。为梨花、深掩重门。梦向金微山下去，才识路，又移军。

◇秋水（听雨）

谁道破愁须仗酒？酒醒后，心翻醉。正香销翠被，隔帘惊听，那又是点点丝丝。和泪忆，剪烛幽窗小憩。娇梦垂成，频唤觉，一眶秋水。

依旧乱蛩声里，短檠明灭，怎教人睡？想几年踪迹，过头风浪，祇消受一段横波花底。向拥髻灯前提起，甚日还来同领略，夜雨空阶滋味。

◇虞美人

峰高独石当头起，影落双溪水。马嘶人语各西东，行到断崖无路小桥通。

朔鸿过尽归期杳，人向征鞍老。又将丝泪湿斜阳，回首十三陵树暮云黄。

◇又

黄昏又听城头角，病起心情恶。药炉初沸短檠青，无那残香半缕恼多情。

多情自古原多病，清镜怜清影。一声弹指泪如丝，央及东风休遣玉人知。

◇又（为梁汾赋）

凭君料理花间课，莫负当初我。眼看鸡犬上天梯，黄九自招秦七共泥犁。

瘦狂那似痴肥好，判任痴肥笑。笑他多病与长贫，不及诸公衮衮向风尘。

◇又

绿阴帘外梧桐影，玉虎牵金井。怕听啼鴂出帘迟，恰到年年今日两相思。

凄凉满地红心草，此恨谁知道？待将幽忆寄新词，分付芭蕉风定月斜时。

◇又

风灭炉烟残燄冷，相伴惟孤影。判教狼藉醉清尊，为问世间醒眼是何人？

难逢易散花间酒，饮罢空搔首。闲愁总付醉来眠，祇恐醒时依旧到尊前。

◇又

春情祇到梨花薄，片片催零落。夕阳何事近黄昏？不道人间犹有未招魂。

银笺别梦当时句，密绡同心苣。为伊判作梦中人，长向画图清夜唤真真。

◇又

曲阑深处重相见，匀泪偎人颤。凄凉别后两应同，最是不胜清怨月明中。

半生已分孤眠过，山枕檀痕浣。忆来何事最销魂，第一折枝花样画罗裙。

◇又

彩云易向秋空散，燕子怜长叹。几番离合总无因，赢得一回僝僽一回亲。

归鸿旧约霜前至，可寄香笺字。不如前事不思量，且枕红蕤欹侧看斜阳。

◇又

银床淅沥青梧老，屣粉秋蛩扫。采香行处蹙连钱，拾得翠翘何恨不能言。

回廊一寸相思地，落月成孤倚。背灯和月就花阴，已是十年踪迹十年心。

◇潇湘雨（送西溟归慈溪）

长安一夜雨，便添了几分秋色。奈此际萧条无端，又听渭城风笛。咫尺层城留不住，久相忘，到此偏相忆。依依白露丹枫，渐行渐远，天涯南北。

凄寂黔娄当日事，总名士如何消得？祇皂帽蹇驴，西风残照，倦游踪迹。廿载江南犹落拓，叹一人知己终难觅。君须爱酒能诗，鉴湖无恙，一蓑一笠。

◇雨中花（送徐艺初归昆山）

天外孤帆云外树，看又是、春随人去。水驿灯昏，关城月落，不算凄凉处。

计程应惜天涯暮，打叠起、伤心无数。中坐波涛，眼前冷暖，多少人难语。

◇临江仙

丝雨如尘云著水，嫣香碎拾吴宫。百花冷暖避东风。酷怜娇易散，燕子学偎红。

人说病宜随月减，恹恹却与春同。可能留蝶抱花丛。不成双梦影，翻笑杏梁空。

◇又

长记碧纱窗外语，秋风吹送归鸦。片帆从此寄天涯。一灯新睡觉，思梦月初斜。
便是欲归归未得，不如燕子还家。春云春水带轻霞。画船人似月，细雨落杨花。

◇又（塞上得家报云秋海棠开矣，赋此）

六曲阑干三夜雨，倩谁护取娇慵？可怜寂莫粉墙东。已分裙衩绿，犹裹泪绡红。
曾记鬓边斜落下，半床凉月惺忪。旧欢如在梦魂中。自然肠欲断，何必更秋风。

◇又（谢饷樱桃）

绿叶成阴春尽也，守宫偏护星星。留将颜色慰多情。分明千点泪，贮作玉壶冰。
独卧文园方病渴，强拈红豆酬卿。感卿珍重报流莺。惜花须自爱，休祇为花疼。

◇又（卢龙大树）

雨打风吹都似此，将军一去谁怜。画图曾见绿阴圆。旧时遗镞地，今日种瓜田。
系马南枝犹在否？萧萧欲下长川。九秋黄叶五更烟。祇应摇落尽，不必问当年。

◇又（寒柳）

飞絮飞花何处是？层冰积雪摧残。疏疏一树五更寒。爱他明月好，憔悴也相关。
最是繁丝摇落后，转教人忆春山。湔裙梦断续应难。西风多少恨，吹不散眉弯。

◇又

夜来带得些儿雪，冻云一树垂垂。东风回首不胜悲。叶干丝未尽，未死祇颦眉。
可忆红泥亭子外，纤腰舞困因谁？如今寂莫待人归。明年依旧绿，知否系斑骓。

◇又（寄严荪友）

别后闲情何所寄？初莺早雁相思。如今憔悴异当时。飘零心事，残月落花知。

生小不知江上路，分明却到梁溪。匆匆刚欲话分携。香消梦冷，窗白一声鸡。

◇又（永平道中）

独客单衾谁念我，晓来凉雨飕飕。缄书欲寄又还休。个侬憔悴，禁得更添愁。

曾记年年三月病，而今病向深秋。卢龙风景白人头。药炉烟里，支枕听河流。

◇又

点滴芭蕉心欲碎，声声催忆当初。欲眠还展旧时书。鸳鸯小字，犹记手生疏。

卷眼乍低绡帙乱，重看一半模糊。幽窗冷雨一灯孤。料应情尽，还道有情无？

◇鬢云松令

枕函香，花径漏。依约相逢，絮语黄昏后。时节薄寒人病酒，划地梨花，彻夜东风瘦。

掩银屏，垂翠袖。何处吹箫，脉脉情微逗。肠断月明红豆蔻。月似当时，人似当时否？

◇又（咏浴）

鬢云松，红玉莹。早月多情，送过梨花影。半饷斜钗慵未整，晕入轻潮，刚爱微风醒。

露华清，人语静。怕被郎窥，移却青鸾镜。罗袜凌波波不定，小扇单衣，可耐星前冷。

◇于中好

独背斜阳上小楼，谁家玉笛韵偏幽？一行白雁遥天暮，几点黄花满地秋。

惊节序，叹沈浮。秣华如梦水东流。人间所事堪惆怅，莫向横塘问旧游。

◇又

雁帖寒云次第飞，向南犹自怨归迟。谁能瘦马关山道，又到西风扑鬓时。

人杳杳，思依依。更无芳树有乌啼。凭将扫黛窗前月，持向今宵照别离。

◇又

别绪如丝睡不成，那堪孤枕梦边城。因听紫塞三更雨，却忆红楼半夜灯。
书郑重，恨分明。天将愁味酿多情。起来恁手封题处，偏到鸳鸯两字冰。

◇又

谁道阴山行路难，风毛雨血万人欢。松梢露点沾鹰细，芦叶溪深没马鞍。
依树歇，映林看。黄羊高宴簇金盘。萧萧一夕霜风紧，却拥貂裘怨早寒。

◇又

小构园林寂不哗，疏篱曲径仿山家。昼长吟罢风流子，忽听楸枰响碧纱。
添竹石，伴烟霞。拟凭尊酒慰年华。休嗟髀里今生肉，努力春来自种花。

◇又（十月初四夜风雨，其明日是亡妇生辰）

尘满疏帘素带飘，真成暗度可怜宵。几回偷拭青衫泪，忽傍犀奁见翠翘。
惟有恨，转无聊。五更依旧落花朝。衰杨叶尽丝难尽，冷雨凄风打画桥。

◇又

冷露无声夜欲阑，栖鸦不定朔风寒。生憎画鼓楼头急，不放征人梦里还。
秋澹澹，月弯弯。无人起向月中看。明朝匹马相思处，如隔千山与万山。

◇又（送梁汾南还为题小影）

握手西风泪不干，年来多在别离间。遥知独听灯前雨，转忆同看雪后山。
凭寄语，劝加餐。桂花时节约重还。分明小像沈香缕，一片伤心欲画难。

◇南乡子（捣衣）

鸳瓦已新霜，欲寄寒衣转自伤。见说征夫容易瘦，端相，梦里回时仔细量。
支枕怯空房，且拭清砧就月光。已是深秋兼独夜，凄凉，月到西南更断肠。

◇又（为亡妇题照）

泪咽却无声，祇向从前悔薄情。凭仗丹青重省识，盈盈，一片伤心画不成。
别语忒分明，午夜鹣鹣梦早醒。卿自早醒侬自梦，更更，泣尽风檐夜雨铃。

◇又

飞絮晚悠飏，斜日波纹映画梁。刺绣女儿楼上立，柔肠，爱看晴丝百尺长。
风定却闻香，吹落残红在绣床。休堕玉钗惊比翼，双双，共唼蘋花绿满塘。

◇又（柳沟晓发）

灯影伴鸣梭，织女依然怨隔河。曙色远连山色起，青螺，回首微茫忆翠蛾。
凄切客中过，料抵秋闺一半多。一世疏狂应为著，横波。作个鸳鸯消得么。

◇又

何处淬吴钩。一片城荒枕碧流。曾是当年龙战地，飏飏，塞草霜风满地秋。
霸业等闲休。跃马横戈总白头。莫把韶华轻换了，封侯。多少英雄只废丘。

◇又（孤舟）

烟暖雨初收。落尽繁花小院幽。摘得一双红豆子，低头。说著分携泪暗流。
人去似春休。卮酒曾将酹石尤。别自有人桃叶渡，扁舟。一种烟波各自愁。

◇踏莎行（秋夜）

月华如水，波纹似练，几簇淡烟衰柳。塞鸿一夜尽南飞，谁与问倚楼人瘦。
韵拈风絮，录成金石，不是舞裙歌袖。从前负尽扫眉才，又担阁镜囊重绣。

◇又

春水鸭头，春衫鹦嘴。烟丝无力风斜倚。百花时节好逢迎，可怜人掩屏山睡。

密语移灯，闲情枕臂。从教酝酿孤眠味。春鸿不解讳相思，映窗书破人人字。

◇又（寄见阳）

倚柳题笺，当花侧帽。赏心应比驱驰好。错教双鬓受东风，看吹绿影成丝早。

金殿寒鸦，五阶春草。就中冷暖和谁道。小楼明月镇长闲，人生何事缁尘老。

◇剪湘云（送友）

险韵慵拈，新声醉倚。尽历遍情场，懊恼曾记。不道当时肠断事，还较而今得意。向西风、约略数年华，旧心情灰矣。

正是冷雨秋槐，鬓丝憔悴。又领略、愁中送客滋味。密约重逢知甚日，看取青衫和泪。梦天涯，绕遍尽由人，只尊前迢递。

◇鹊桥仙（七夕）

乞巧楼空，影娥池冷，佳节只供愁叹。丁甯休曝旧罗衣，忆素手为予缝绽。

莲粉飘红，菱丝翳碧，仰见明星空烂。亲持钿合梦中来，信天上人间非幻|相见}}。

◇御带花（重九夜）

晚秋却胜春天好，情在冷香深处。朱楼六扇小屏山，寂寞几分尘土。虬尾烟销，人梦觉、碎虫零杵。便强说欢娱，总是无寥心绪。

转忆当年，消受尽皓腕红萸，嫣然一顾，如今何事，向禅榻茶烟，怕歌愁舞。玉粟寒生，且领略、月明清露。叹此际凄凉，何必更满城风雨。

◇疏影（芭蕉）

湘帘卷处。甚离披翠影，绕檐遮住。小立吹裾，常伴春慵，掩映绣床金缕。芳心一束浑难展，清泪里、隔年愁聚。更夜深、细听空阶雨滴，梦回无据。

正是秋来寂寞，偏声声点点，助人难绪。缟被初寒，宿酒全醒，搅碎乱蛩双杵。西风落尽庭梧叶，还剩得、绿阴如许。想玉人、和露折来，曾写断肠句。

◇添字采桑子

闲愁似与斜阳约，红点苍苔。蛱蝶飞回。又是梧桐新绿影，上阶来。

天涯望处音尘断，花谢花开。懊恼离怀。空爪钿筐金缕绣，合欢鞋。

◇望江南（宿双林禅院有感）

挑灯坐，坐久忆年时。薄雾笼花娇欲泣，夜深微月下杨枝。催道太眠迟。

憔悴去，此恨有谁知。天上人间俱怅望，经声佛火两凄迷。未梦已先疑。

◇木兰花慢（立秋夜雨，送梁汾南行）

盼银河迢递，惊入夜，转清商。乍西园蝴蝶，轻翻麝粉，暗惹蜂黄。炎凉。等闲瞥眼，甚丝丝、点点搅柔肠。应是登临送客，别离滋味重尝。

疑将。水墨画疏窗。孤影淡潇湘。倩一叶高梧，半条残烛、做尽商量。荷裳。被风暗剪，问今宵、谁与盖鸳鸯。从此羁愁万叠，梦回分付啼螭。

卷九 词四

◇百字令（废园有感）

片红飞减，甚东风不语，祇催漂泊。石上胭脂花上露，谁与画眉商略？碧瓮瓶沈，紫钱钗掩，雀蹋金铃索。韶华如梦，为寻好梦担阁。

又是金粉空梁，定巢燕子，一口香泥落。欲写华笺凭寄与，多少心情难托。梅豆圆时，柳绵飘处，失记当初约。斜阳冉冉，断魂分付残角。

◇又（宿汉儿村）

无情野火，趁西风烧遍，天涯芳草。榆塞重来冰雪里，冷入鬓丝吹老。牧马长嘶，征笳乱动，并入愁怀抱。定知今夕，庾郎瘦损多少？

便是脑满肠肥，尚难消受，此荒烟落照。何况文园憔悴后，非复酒垆风调。回乐峰寒，受降城远，梦向家山绕。茫茫百感，凭高惟有清啸。

◇又

绿杨飞絮，叹沈沈院落，春归何许？尽日缁尘吹绮陌，迷却梦游归路。世事悠悠，生涯未是，醉眼斜阳暮。伤心怕问，断魂何处金鼓。

夜来月色如银，和衣独拥，花影疏窗度。脉脉此情谁得识，又道故人别去。细数落花，更阑未睡，别是闲情绪。闻余长叹，西廊惟有鹦鹉。

◇又

人生能几，总不如休惹，情条恨叶。刚是尊前同一笑，又到别离时节。灯炮挑残，炉烟熬尽，无语空凝咽。一天凉露，芳魂此夜偷接。

怕见人去楼空，柳枝无恙，犹扫窗间月。无分暗香深处住，悔把兰襟亲结。尚暖檀痕，犹寒翠影，触绪添悲切。愁多成病，此愁知向谁说！

◇沁园春（代悼亡）

梦冷蘼芜，却望姗姗，是耶非耶？怅兰膏渍粉，尚留犀合，金泥蹙绣，空掩蝉纱。影弱难持，缘深暂隔，祇当离愁滞海涯。归来也，趁星前月底，魂在梨花。

鸾胶纵续琵琶，问可及当年萼绿华？但无端摧折，恶经风浪，不如零落，判委尘沙。最忆相看，娇讹道字，手剪银灯自泼茶。今已矣，便帐中重见，那似伊家！

◇又

试望阴山，黯然销魂，无言徘徊。见青峰几簇，去天才尺，黄沙一片，匝地无埃。碎叶城荒，拂云堆远，雕外寒烟惨不开。踟蹰久，忽冰崖转石，万壑惊雷。

穷边自足秋怀，又何必平生多恨哉？祇凄凉绝塞，蛾眉遗冢，销沈腐草，骏骨空台。北转河流，南横斗柄，略点微霜鬓早衰。君不信，向西风回首，百事堪哀？

◇又

丁巳重阳前三日，梦亡妇澹妆素服，执手哽咽。语多不复能记，但临别有云：“衔恨愿为天上月，年年犹得向郎圆。”妇素未工诗，不知何以得此也。觉后感赋。

瞬息浮生，薄命如斯，低徊怎忘？记绣榻闲时，并吹红雨，雕阑曲处，同倚斜阳。梦好难留，诗残莫续，赢得更深哭一场。遗容在，祇灵飙一转，未许端详。重寻碧落茫茫，料短发朝来定有霜。便人间天上，尘缘未断，春花秋叶，触绪还伤。欲结绸缪，翻惊摇落，减尽荀衣昨日香。真无奈，倩声声邻笛，谱出回肠。

◇东风齐着力

电急流光，天生薄命，有泪如潮。勉为欢谑，到底总无聊。欲谱频年离恨，言已尽，恨未曾消。凭谁把、一天愁绪，按出琼箫？

往事水迢迢，窗前月、几番空照魂销。旧欢新梦，雁齿小红桥。最是烧灯时候，宜春髻，酒暖蒲萄。凄凉煞、五枝青玉，风雨飘飘。

◇摸鱼儿（送座主德清蔡先生）

问人生、头白京国，算来何事消得？不如罨画清溪上，蓑笠扁舟一只。人不识，且笑煮、鲈鱼趁著莼丝碧。无端酸鼻。向岐路消魂，征轮驿骑，断雁西风急。

英雄辈，事业东西南北，临风因甚成泣？酬知有愿频挥手，零雨凄其此日。休太息，须信道、诸公衮衮皆虚掷。年来踪迹。有多少雄心，几番恶梦，泪点霜华织。

◇又（午日雨眺）

涨痕添、半篙柔绿，蒲梢荇叶无数。台榭空蒙烟柳暗，白鸟衔鱼欲舞。红桥路，正一派、画船箫鼓中流住。呕哑柔橹，又早拂新荷，沿堤忽转，冲破翠钱雨。

蒹葭渚，不减潇湘深处，霏霏漠漠如雾。滴成一片鲛人泪，也似汨罗投赋。愁难谱，祇彩线、香菰脉脉成千古。伤心莫语。记那日旗亭，水嬉散尽，中酒阻风去。

◇相见欢

微云一抹遥峰，冷溶溶。恰与个人清晓画眉同。

红蜡泪，青绡被，水沈浓。却向黄茅野店听西风。

◇锦堂春

帘际一痕轻绿，墙阴几簇低花。夜来微雨西风软，无力任欹斜。

仿佛个人睡起，晕红不著铅华。天寒翠袖添凄楚，愁近欲栖鸦。

◇忆秦娥（龙潭口）

山重叠，悬崖一线天疑裂。天疑裂，断碑题字，古苔横啮。

风声雷动鸣金铁，阴森潭底蛟龙窟。蛟龙窟，兴亡满眼，旧时明月。

◇又

春深浅，一痕摇漾青如剪。青如剪，鹭鸶立处，烟芜平远。

吹开吹谢东风卷，绀桃自惜红颜变，红颜变，兔葵燕麦，重来相见。

◇减字木兰花

烛花摇影，冷透疏衾刚欲醒。待不思量，不许孤眠不断肠。

茫茫碧落，天上人间情一诺。银汉难通，稳耐风波愿始从。

◇又

相逢不语，一朵芙蓉著秋雨。小晕红潮，斜溜鬟心只凤翘。

待将低唤，直为凝情恐人见。欲诉幽怀，转过回阑叩玉钗。

◇又

从教铁石，每见花开成惜惜。泪点难消，滴损苍烟玉一条。

怜伊太冷，添个纸窗疏竹影。记取相思，环佩归来月上时。

◇又

断魂无据，万水千山何处去？没个音书，尽日东风上绿除。

故园春好，寄语落花须自扫。莫更伤春，同是恹恹多病人。

◇又（新月）

晚妆欲罢，更把纤眉临镜画。准待分明，和雨和烟两不胜。

莫教星替，守取团圆终必遂。此夜红楼，天上人间一样愁。

◇海棠春

落红片片浑如雾，不教更觅桃源路。香径晚风寒，月在花飞处。

蔷薇影暗空凝贮，任碧毡轻衫紫住。惊起早栖鸦，飞过秋千去。

◇少年游

算来好景祇如斯，惟许有情知。寻常风月，等闲谈笑，称意即相宜。

十年青鸟音尘断，往事不胜思。一钩残照，半帘飞絮，总是恼人时。

◇大酺（寄梁汾）

祇一炉烟、一窗月，断送朱颜如许。韶光犹在眼，怪无端吹上、几分尘土。手撚残枝，沈吟往事，浑似前生无据。鳞鸿凭谁寄？想天涯只影，凄风苦雨。便研损吴绫，啼沾蜀纸，有谁同赋！

当时不是错，好花月合受天公妒。准拟倩春归燕子，说与从头，争教他会人言语。

万一离魂遇，偏梦被冷香萦住。刚听得，城头鼓，相思何益？待把来生祝取，慧业相同一处。

◇满庭芳（题元人《芦洲聚雁图》）

似有猿啼，更无渔唱，依稀落尽丹枫。湿云影里，点点宿宾鸿。占断沙洲寂莫，寒潮上、一抹烟笼。全不似，半江瑟瑟，相映半江红。

楚天秋欲尽，荻花吹处，竟日冥濛。近黄陵祠庙，莫采芙蓉。我欲行吟去也，应难问、骚客遗踪。湘灵杳，一尊遥酌，还欲认青峰。

◇又

埃雪翻鸦，河冰跃马，惊风吹度龙堆。阴磷夜泣，此景总堪悲。待向中宵起舞，无人处、那有村鸡？祇应是，金笳暗拍，一样泪沾衣。

须知，今古事，棋枰胜负，翻覆如斯。叹纷纷蛮触，回首成非！剩得几行青史，斜阳下、断碣残碑。年华共，混同江水，流去几时回？

◇忆王孙

暗怜双绁郁金香，欲梦天涯思转长，几夜东风昨夜霜。减容光，莫为繁花又断肠。

◇又

西风一夜剪芭蕉，满眼芳菲总寂寥，强把心情付浊醪。读《离骚》，洗尽秋江日夜潮。

◇又

刺桐花底是儿家，已拆秋千未采茶，睡起重寻好梦赊。忆交加，倚著闲窗数落花。

◇卜算子（塞梦）

塞草晚才青，日落箫笳动。戚戚凄凄入夜分，催度星前梦。

小语绿杨烟，怯踏银河冻。行尽关山到白狼，相见惟珍重。

◇又（五日）

村静午鸡啼，绿暗新阴覆。一展轻帘出画墙，道是端阳酒。

早晚夕阳蝉，又噪长堤柳。青鬓长青自古谁，弹指黄花九。

◇又（咏柳）

娇软不胜垂，瘦怯那禁舞？多事年年二月风，剪出鹅黄缕。

一种可怜生，落日和烟雨。苏小门前长短条，即渐迷行处。

◇金人捧露盘（净业寺观莲有怀荪友）

藕风轻，莲露冷，断虹收。正红窗、初上帘钩。田田翠盖，趁斜阳鱼浪香浮。此时画阁，垂杨岸、睡起梳头。

旧游踪，招提路，重到处，满离忧。想芙蓉、湖上悠悠。红衣狼藉，卧看桃叶送兰舟。午风吹断，江南梦、梦里菱讴。

◇青玉案（人日）

东风七日蚕芽软，青一缕，休教剪。梦隔湘烟征雁远。那堪又是，鬓丝吹绿，小胜宜春颤。

绣屏浑不遮愁断，忽忽年华空冷暖。玉骨几随花换。三春醉里，三秋别后，寂莫钗头燕。

◇又（宿乌龙江）

东风卷地飘榆荚，才过了，连天雪。料得香闺香正彻。那知此夜、乌龙江畔，独对初三月。

多情不是偏多别，别为多情设。蝶梦百花花梦蝶。几时相见，西窗剪烛，细把而今说？

◇月上海棠（中元塞外）

原头野火烧残碣，叹英魂才魄暗销歇。终古江山，问东风几番凉热？惊心事，又到中元时节。

凄凉况是愁中别，枉沈吟千里共明月。露冷鸳鸯，最难忘满池荷叶。青鸾杳，碧天云海音绝。

◇雨霖铃（种柳）

横塘如练，日迟帘幕，烟丝斜卷。却从何处移得，章台仿佛，乍舒娇眼？恰带一痕残照，锁黄昏庭院。断肠处又惹相思，碧雾濛濛度双燕。

回阑恰就轻阴转，背风花，不解春深浅。托根幸自天上，曾试把霓裳舞遍。百尺垂垂，早是酒醒莺语如剪。祇休隔梦里红楼，望个人儿见。

◇满江红（茅屋新成却赋）

问我何心，却构此、三楹茅屋。可学得、海鸥无事，闲飞闲宿。百感都随流水去，一身还被浮名束。误东风、迟日杏花天，红牙曲。

尘土梦，蕉中鹿。翻覆手，看棋局。且耽闲酒，消他薄福。雪后谁遮檐角翠？雨余好种墙阴绿。有些些、欲说向寒宵，西窗烛。

◇又

代北燕南，应不隔、月明千里。谁相念、胭脂山下，悲哉秋气。小立乍惊清露湿，孤眠最惜浓香腻。况夜乌、啼绝四更头，边声起。

销不尽，悲歌意。匀不尽，相思泪。想故园今夜，玉阑谁倚？青海不来如意梦，红笺暂写违心字。道别来、浑是不关心，东堂桂。

◇又

为问封姨，何事却、排空卷地？又不是、江南春好，妒花天气。叶尽归鸦栖未得，带垂惊燕飘还起。甚天公、不肯惜愁人，添憔悴。

搅一霎，灯前睡。听半晌，心如醉。倩碧纱遮断，画屏深翠。只影凄清残烛下，离魂缥缈秋空里。总随他、泊粉与飘香，真无谓！

◇诉衷情

冷落绣衾谁与伴，倚香篝？春睡起，斜日照梳头。欲写两眉愁，休休。远山残翠收，莫登楼。

◇水调歌头（题《西山秋爽图》）

空山梵呗静，水月影俱沈。悠然一境人外，都不许尘侵。岁晚忆曾游处，犹记半竿斜照，一抹界疏林。绝顶茅庵里，老衲正孤吟。

云中锡，溪头钓，涧边琴。此生著几两屐，谁识卧游心？准拟乘风归去，错向槐安回首，何日得投簪。布袜青鞋约，但向画图寻。

◇又（题岳阳楼图）

落日与湖水，终古岳阳城。登临半是迁客，历历数题名。欲问遗踪何处，但见微波木叶，几簇打鱼罾。多少别离恨，哀雁下前汀。

忽宜雨，旋宜月，更宜晴。人间无数、金碧未许著空明。澹墨生绡谱就，待倩横拖一笔，带出九疑青。仿佛潇湘夜，鼓瑟旧精灵。

◇天仙子（淶水亭秋夜）

水浴凉蟾风入袂，鱼鳞蹙损金波碎。好天良夜酒盈尊，心自醉，愁难睡，西南月落城乌起。

◇又

梦里蘼芜青一剪，玉郎经岁音书远。暗钟明月不归来，梁上燕，轻罗扇，好风又落桃花片。

◇又

好在软绡红泪积，漏痕斜骨菱丝碧。古钗封寄玉关秋，天咫尺，人南北，不信鸳鸯头不白。

◇浪淘沙

紫玉拨寒灰，心字全非。疏帘犹是隔年垂。半卷夕阳红雨入，燕子来时。

回首碧云西，多少心期，短长亭外短长堤。百尺游丝千里梦，无限凄迷。

◇又

野宿近荒城，砧杵无声。月低霜重莫闲行。过尽征鸿书未寄，梦又难凭。
身世等浮萍，病为愁成，寒宵一片枕前冰。料得绮窗孤睡觉，一倍关情。

◇又（望海）

蜃阙半模糊，踏浪惊呼。任将蠡测笑江湖。沐日光华还浴月，我欲乘桴。
钓得六鳌无？竿拂珊瑚，桑田清浅问麻姑。水汽浮天天接水，那是蓬壶。

◇又

夜雨做成秋，恰上心头。教他珍重护风流。端的为谁添病也，更为谁羞！
密意未曾休，密愿难酬，珠帘四卷月当楼。暗忆欢期真似梦，梦也须留。

◇又

红影湿幽窗，瘦尽春光。雨余花外却斜阳。谁见薄衫低髻子？抱膝思量！
莫道不凄凉，早近持觞，暗思何事断人肠？曾是向他春梦里，瞥遇回廊。

◇又

眉谱待全删，别画秋山。朝云渐入有无间。莫笑生涯浑似梦，好梦原难。
红珠啄花残，独自凭阑，月斜风起袷衣单。消受春风都一例，若个偏寒。

◇又

闷自剔残灯，暗雨空庭。潇潇已是不堪听。那更西风偏着意，做尽秋声？
城柝已三更，欲睡还醒，薄寒中夜掩银屏。曾染戒香消俗念，莫又多情。

◇又

双燕又飞还，好景阑珊。东风那惜小眉弯？芳草绿波吹不尽，祇隔遥山。
花雨忆前番，粉泪偷弹，倚楼谁与话春闲。数到今朝三月二，梦见犹难。

◇又

清镜上朝云，宿篆犹熏。一春双袂尽啼痕。那更夜来山枕侧，又梦归人？

花底病中身，懒约溅裙，待寻闲事度佳辰。绣榻重开添几线，旧谱翻新。

◇南楼令

金液镇心惊，烟丝似不胜。沁蛟绡、湘竹无声。不为香桃怜瘦骨，怕容易，减红情。

将息报飞琼，蛩笺署小名。鉴凄凉、片月三星。待寄芙蓉心上露，且道是，解朝醒。

◇又（塞外重九）

古木向人秋，惊蓬掠鬓稠。是重阳、何处堪愁！记得当年惆怅事，正风雨，下南楼。

断梦几能留，香魂一哭休。怪凉蟾、空满衾稠。霜落乌啼浑不睡，偏想出，旧风流。

◇生查子

短焰剔残花，夜久边声寂。倦舞却闻鸡，暗觉青绡湿。

天水接冥濛，一角西南白。欲渡浣花溪，远梦轻无力。

◇又

惆怅彩云飞，碧落知何许？不见合欢花，空倚相思树。

总是别时情，那待分明语。判得最长宵，数尽厌厌雨。

◇又

东风不解愁，偷展湘裙衩。独夜背纱笼，影著纤腰画。

燕尽水沈烟，露滴鸳鸯瓦。花骨冷宜香，小立樱桃下。

◇又

鞭影落春堤，绿锦障泥卷。脉脉逗菱丝，嫩水吴姬眼。

啮膝带香归，谁整樱桃宴。蜡泪恼东风，旧垒眠新燕。

◇又

散帙坐凝尘，吹气幽兰并。茶名龙凤团，香字鸳鸯饼。

玉局类弹棋，颠倒双栖影。花月不曾闲，莫放相思醒。

◇忆桃源慢

斜倚熏笼，隔帘寒彻，彻夜寒于水。离魂何处，一片月明千里。两地凄凉多少恨，分付药炉烟细。近来情绪，非关病酒，如何拥鼻长如醉。转寻思、不如睡也，看道夜深怎睡。

几年消息浮沈，把朱颜顿成憔悴。纸窗风裂，寒到个人衾被。篆字香消灯地冷，忽听塞鸿嘹唳。加餐千万，寄声珍重，而今始会当时意。早催人，一更更漏，残雪月华满地。

◇青衫湿遍（悼亡）

青衫湿遍，凭伊慰我，忍便相忘。半月前头扶病，剪刀声、犹在银缸。忆生来、小胆怯空房。到而今、独伴梨花影，冷冥冥、尽意凄凉。愿指魂兮识路，教寻梦也回廊。

咫尺玉钩斜路，一般消受，蔓草残阳。判把长眠滴醒，和清泪、搅入椒浆。怕幽泉、还为我神伤。道书生薄命宜将息，再休耽、怨粉愁香。料得重圆密誓，难禁寸裂柔肠。

◇酒泉子

谢却荼蘼。一片月明如水。篆香消，犹未睡。早鸦啼。

嫩寒无赖罗衣薄。休傍阑干角。最愁人，灯欲落。雁还飞。

◇凤皇台上忆吹箫（守岁）

锦瑟何年，香屏此夕，东风吹送相思。记巡檐笑罢，共撚梅枝。还向烛花影里，催教看、燕蜡鸡丝。如今但、一编消夜，冷暖谁知。

当时。欢娱见惯，道岁岁琼筵，玉漏如斯。怅难寻旧约，枉费新词。次第朱幡剪彩，冠儿侧、斗转蛾儿。重验取、卢郎青鬓，未觉春迟。

◇除夕得梁汾闽中信，因赋（辛酉除夕得顾五闽中消息）

荔粉初装，桃符欲换，怀人拟赋然脂。喜螺江双鲤，忽展新词。稠叠频年离恨，匆匆里、一纸难题。分明见，临缄重发，欲寄迟迟。

心知：梅花佳句，待粉郎香令，再结相思（辛稼轩客三山有梅花相思之句。“粉郎香令”，梁汾集中语。）。记画屏今夕，曾共题诗。独客料应无睡，慈恩梦、那值微之。重来日、梧桐夜雨，却话秋池。

◇剪梧桐（自度曲）

新睡觉，正漏尽、乌啼欲晓。任百种思量，都来拥枕，薄衾颠倒。土木形骸，分甘抛掷，只平白占伊怀抱。听萧萧一剪梧桐，此日秋声重到。

若不是忧能伤人，甚青镜、朱颜易老。忆少日清狂，花间马上，软风斜照。端的而今，误因疏起，却懊恼、殢人年少。料应他此际闲眠，一样积愁难扫。

卷十 经解序一

◇《经解》总序

经之有解，自汉儒始，故《戴礼》著《经解》之篇。于时分门讲授，曰《易》有某家，《诗》《书》《三礼》有某家，《春秋》有某家者，某宗师大儒也。传其说者，谓之受某氏学，则终身守其说不敢变。党同抵异，更废迭兴。虽其持论互有得失，要其渊源，皆自圣门诸弟子流分派别，各尊所闻，无敢私创一说者，盖其慎也。东汉之初，颇杂讖纬，然明、章之世，天子留意经学，宣阐大义，诸儒林立，仍各专一家。今谱系之列于《儒林传》者，可考而知也。自唐太宗命诸儒删取诸说为正义，由是专家之学渐废，而其书亦鲜有存矣。至宋二程、朱子出，始刊落群言，覃心阐发，皆圣人之微言奥旨。当时如临川、眉山、象山、龙川、东莱、永嘉、夹漈诸公，其说虽微有不同，然无有各名一家如汉氏者。逮宋末元初，学者尤知尊朱子，理义愈明，讲贯愈熟。其终身研求于是者，各随所得以立言。要其归趋，无非发明先儒之精蕴以羽卫圣经。斯固后世学者之所宜取衷也。惜乎其书流传日久，十不存一二。余向属友人秦对岩、朱竹购诸藏书之家，间有所得，雕版既漫漶断阙不可卒读，钞本讹谬尤多。其间完善无讹者，又十不得一二。间以启于座主徐先生，先生乃尽出其藏本示余小子曰：“是吾三十年心力所择取而校定者。”余且喜且愕，求之先生，钞得一百四十种，自《子夏易传》外，唐人之书仅二三种，其余皆宋元诸儒所撰述。而明人所著，间存一二。请捐贖经始，与同志雕版行世。先生喜曰：“是吾志也。”遂略叙作者大意于各卷之首，而复述其雕刻之意如此。

◇《子夏易传》序

《汉·艺文志》《易》十三家，无所谓子夏传者。隋、唐《志》始有《卜夏传》二卷，云已残缺。今书十一卷，首尾完具。盖后人之书，托言卜商者也。案古《易》上、下二篇，惟文、周之彖、爻，而孔子所系之辞，则别名曰传，谓之《十翼》，各自为书，不相联属。今本彖、爻之下即系以孔子之传，如今所行王弼本，其非古《易》也明矣。陈氏谓李鼎祚、陆德明所引用皆不见是书，则亦岂隋唐所载之旧哉！《崇文总目》虽疑之而未能确指为何人，晁景迂始以为唐张弧作。弧尝著《易王道小疏》，或即此书未可知也。唐人经解存于世者，于《易》惟李鼎祚之《集解》，《诗》成伯瑜之《指说》，《春秋》陆淳之《纂例辨疑微旨》三数种。若长孙无忌之《要义》，则约正义而为之者。其他未见也。然则是书虽近而不笃，又岂可使无传也哉！弧尝官试大理评事，别有《素履子》三卷，见道家。

◇三衢刘氏《易数钩隐图》序

三衢《刘氏易解》，晁氏《读书志》一十五卷，《崇文书目》载《新注》十一卷。今之存者，《易数钩隐图》三卷及《遗论九事》一卷而已。刘氏之《易》，传于范

谔昌。谔昌自谓其学出于李处约、许坚二子，实本于种放者也。其为图采摭天地奇耦之数成之，释其义于下，凡五十有五。李觚删之，止存其三，以为彼五十二皆疣赘，穿凿破碎，鲜可信用。然当庆历初吴秘献之于朝，有诏优奖。当其时，田况序其书，秘之通神。黄黎献之《略例隐诀》，徐庸之《易缊》，皆本刘氏。逮鲜于侁稍辨其非，其后论《易》者交攻之。而以九为河图，十为洛书，宋之群儒恒主其说，自蔡元定之论出，朱子取之，于是人不敢异议。然朱子之言曰：“安在图之不可为书，书之不可为图？”朱子盖未尝胶执己见也。然则刘氏之书，固宜并存焉而不可废者已。

◇同州王氏《易学》序

王氏湜《易学》一卷，《文献通考》载其名，又述晁氏之论，称湜为同州人，而不言生于何世。考书中语，约略在南渡前。其自为之序曰：“予平生喜《易》，晚得邵康节《易学》，喜不自禁。昼夜覃思，未尝暂舍。”又曰：“愚于《观物篇》之所得，既推其所不疑，又存其所可疑，不敢轻其去取故也。”绎其辞，盖研精邵子之学而不欲自异者矣。西山蔡氏以十为河图，九为洛书，称系邵子之说。然邵子第言圆者河图之数，方者洛书之文。以数之体言之，则奇为圆而偶为方也。今王氏之学，一本邵子而主河图九数。又魏华父论精通邵学者数朱子发，亦以九为图而十为书。予未能阐图书之奥义也，序其端以见昔人所以说邵《易》者如此。

◇朱氏《汉上易传》并《易图丛说》序

荆门朱子发以赵元镇之荐，入论《易》殿中，称帝意，除祠部员外郎。及迁秘书少监，告词敷以否泰之义。其后以起居郎兼资善堂替读，则申以山下出泉为喻。集传之作，命尚方给纸札。而林倅上所著《易说》，有诏俾其详问。当时学《易》之醇深，莫有远过之者，故其告词多以《易》为喻。受知于主，不可谓不遇矣。书成日，表上于朝，自言由政和迄绍兴十有八年，造次不舍。上采汉、魏、吴、晋，下逮有唐及今，包括异同，补苴罅漏，盖若是其勤且博也。元袁学士伯长谓《易》以辞象变占为主，王辅嗣出一切理喻，汉学几于绝熄。尧夫、子发始申言之，后八百年而始兴者也。所以推崇子发者，亦至矣乎！今则罕有刊其书以行者，可慨已！高宗之告词曰：“朕惟否、泰二卦论君子、小人消长之理甚明。或谓消长系乎时数，此大不然。上下交而志同，于时为泰，故君子以其汇征。上下不交而天下无邦，于时为否，故君子以俭德避难而已。”观其幸学，讲泰卦，张魏公入朝则书否、泰二卦赐焉，未尝不审于阴阳消长、君子小人进退之机，而反复？绎，顾卒退元镇，俾小人得进，何欤？善乎魏公之言曰：“否、泰之理，起于人君一心之微。一念之正，其画为阳，泰自是而起矣。一念之不正，其画为阴，否自是而起矣。”子发之《传》亦云：“时已泰矣，苟轻人才、忽远事、植朋党、好恶不中，不足厌服人心，天下复入于否。”又云：“天地反复之际，小人必因君子有危惧之心，乘隙而动。”皆切中南渡君臣之病者，吾故表而著之书，以为序。

◇《周易义海撮要》序

宋熙宁间，蜀人房审权集汉郑康成以下至王介甫《易》说凡百家，择取专明人事者，编为百卷，曰《周易义海》。至绍兴中，江都李衡删其重叠冗琐，又益以伊川、东坡《汉上易传》为《撮要》十卷，而以群儒杂论附焉。自汉以来，说经者惟《易》义最多。《隋·经籍志》凡六十九部，《唐志》增至八十八部，《宋志》则二百一十三部，然今之传者盖罕矣。唐李鼎祚合三十五家《易》说为《集解》，遗文坠简，藉之得见指归。而《义海》一编，克能表章百家之说，惜乎全书之不可复睹也。衡字彦平，宣和末入辟雍，乾道中官秘阁修撰，寻除侍御史，改起居郎。时张说以外戚为节度使，给事中莫济不书敕，翰林周必大不草制，衡与右正言王希吕相继论奏，同时去国，士子为《四贤诗》以纪之。其后徙昆山，聚书万卷，号所居曰乐庵。其为学以《论语》为本，盖有得于洛人赵孝孙之说。孝孙之父，受业于伊川者也。李氏《集解》一刻于明宗正灌甫，再刻于海盐胡氏，三刻于常熟毛氏，而是编未有刊行者，乃勘其舛误而镂诸版。

◇赵氏《复斋易说》序

严陵赵子钦，宋宗室子，仕为宁海军节度推官，当时目为复斋先生者也。《易说》六卷，朱子寓书嘉其用意精密，而门人喻仲可传之，郡守许兴裔刊之。兴裔谓其体察也精，推研也审，深窥爻象之变。仲可称其师则曰：“探赜钩深，简严精切，他人千百言不能该者，约以数语。盖卓然可传者也。”子钦尝著《广杂学辨》，朱子每语学者，以为近世未有。至《士冠礼》《昏礼馈食图》，朱子见而作通解。及先生之歿，朱子哭之，恸曰：“赵丈为人，今岂易得。”当日荐先生于朝者，彭忠肃龟年、薛文节叔似、孙献简逢吉，而其平生交最契者，赵忠定汝愚、吕忠公祖俭。观其友，可以信先生之为人。诵其友之言，可以证先生之学术。虽其论《易》间与朱子不同，然可云笃志于道者已。

◇穀水林氏《易裨传》序

朱子门人《易》义有成书者，瓜山潘氏，盘涧董氏，穀水林氏。潘之《集义》，董之《师训》，予皆未之见。所见者，林之《裨传》三篇而已。其言曰：“《易》之道，变通不穷。得其一端，皆足以为说。”是亦善《易》者之言也。独怪鄱阳董季真会通经传，集诸家《易》义，从游朱子者凡七十五人，而林氏顾不与焉，盖有不可解者。迨元至正间，嘉兴路总管刘贞、教授陈泰始刊之于郡学，而曩之雕本今又不可得矣。乃复镂板，以广其传焉。林氏名至，字德久，淳熙中以太学上舍释褐，官秘书省。潘氏名柄，字谦之。董氏名铢，字叔重。

◇吴氏《易图说》序

《古易》一册，附以《易图说》三卷，宋河南吴仁杰斗南父著。《易》上、下二篇，盖伏羲所画之卦，文王所演之彖，周公所系之爻辞而已。孔子《十翼》本自为书，后人欲便学者习读，始分附彖、象传于各卦、爻之下，而古初之经遂乱而不可识。宋之吕微仲、晁以道、吕伯恭及睢阳王氏、九江周氏咸有所更定，亦人各不同。仁杰则以为，《易》上、下经而外，孔子之传卦象者，当曰《彖传》，传大象者，当曰《象传》，传爻辞者，当曰《系辞传》，而今之《系辞》二篇，当总名《说卦》，即汉河内女子所献三篇也。故析为《彖传》《象传》各一篇，《系辞传》上、下二篇，《说卦》上、中、下三篇，《文言》《序卦》《杂卦》各一篇，凡十篇，而古易复完。又以卦必有变，极其变，则每卦可为六十四爻之动者，则占对卦；爻之不动者，则占覆卦。对卦亦谓之变卦。变者用九、六，不变者用七八。又言伏羲所画之“乾”字；“坤”字，他卦皆然，不必更著卦名。与所论乾坤用九、用六之义最精详，具于所订《古易》之后。而《易图说》者，则演之为图以明其旨者也。是二书固相辅而行者与！仁杰《古易》本十二卷，今本止举其略而集诸家所订于后。考张昞《吴中人物志》，仁杰有《集古易》，盖此书也。仁杰本昆山人，其称河南者，举其郡望。登淳熙进士，累官国子学录，尝讲学朱子之门。他所著如《乐舞新书》《盐石新论》《两汉刊误补遗》《离骚草木虫鱼疏》，世多有存者。

◇《周易启蒙通释》序

《周易启蒙通释》二卷，宋婺源梅里胡方平著。方平字师鲁，世所称玉斋先生，而双湖胡一桂庭芳父也。朱子之为《启蒙》，盖发明象数，为读《本义》者设。玉斋之《通释》，则因《启蒙》以发明本义者也。其言曰：“《本义》阐象数理义之原，示开物成务之教。象非卦不立，数非蓍不行。象出于图书而形于卦画，则上足以演太极，而《易》非沦于无体。数衍于蓍策而达于变占，则下足以济生人之事，而《易》非荒于无用。《易》之要领，孰大于是？明乎此，则《本义》一书如指诸掌也。”盖其沈潜反复研精《易》旨者二十余年，始成是书，故其见之精卓若此。其生平《易》学本于介轩董梦程，复师毅斋沈贵瑤。二君皆饶之德兴人，介轩故受《易》于勉斋黄干，又为盘涧董铢之犹子，宜其渊源有自来也。是书新安旧有槧本，今已不可得。此本为元建阳刘泾所梓，有泾及熊禾去非序。泾字楫之，云庄文简公钊后人。

◇《周易玩辞》序

宋江陵项平甫先生，光、宁两朝以直谏著声。庆元中，坐党籍罢官，杜门著书，为《周易玩辞》十六卷，发挥卦爻，抉摘精蕴。其意以为，辞者，象之疏也；玩辞者，读易之法也。不玩其辞而知其象，不知其象而能观变玩占以尽人合天者，未有也。其言苞举天人，兼该理数学者，探索之不尽。其书盛行于宋季，迨元大德中，淮西廉访佥事干玉伦徒常刻于齐安，而马贵与虞伯生为之序。数百年来，传本渐稀。

近得善本于吾师东海先生，因重校而梓之。古今言《易》者，奚啻数百家，然自注疏外，惟程朱《传》《义》为世所传习。平甫自言读程三十年，而又尝问学于朱子，与之往复辩论，故其书独得理要。陈直斋谓程传一于言理，尽略象数，而此书未尝偏废。程氏于小象颇欠发明，而此书爻象尤贯通。又谓其遍考诸家，断以己意，诚精且博，不其然哉！吴草庐为学得力于《易》，自注疏、程、朱外，惟取是书及蔡节斋训解，则是书之宜辅《传》《义》而行也审矣，可不急为传之乎！干玉伦徒者，北庭人。虞伯生称其好古博雅，学道爱人，其人可想见。于以见有元一代缙绅士大夫通经慕古，宋世之风规未尝坠也。

◇东谷郑先生《易翼传》序

《易》之教失而为卜筮之书，以流于阴阳点验之术。王辅嗣曰：“互犹不足，遂及卦变。变又不足，推致五行。一失其原，巧愈弥甚。”故其注《易》，端务明理，自谓有得于言象之表。然其失也，祖述老庄，谓有从无出，理寓于无，《易》以垂教，本备于有，是知有无之截然为两。而不知体用同源，显微无间之原无二致也，于是心迹始判，学术、事功纷然驳杂矣。或者不安于浅近，而徒索之于无。其弊也，不至糟粕《诗》《书》，土苴仁义。不止程氏有忧之作为《易传》，一以玩辞为主。其言曰：得于辞，不达其意者有矣，未有不得于辞而能通其意者也。故不涉于象数，象与占在其中矣。不落于有无，性命幽明之理著，事物情尽而开物成务之道备矣。朱子谓其用意精密，道理平正，尚疑其举三百八十四爻尽属之于人身，于作易之意有所未尽。且其间义理多伊川所自发，与经文隔膜，所以读者难于贯穿。而程子亦自云：“成书旋复修补，期于七十，其书始出。”又曰：“吾于此书，止说得七分，后人更须自体究。”其不取自信如此。此东谷郑氏舜举《翼传》之所以作也。舜举自序其所得于伊川者，由体用显微之旨，而于其中犹不能以无疑。疑斯辨，辨斯明，凡伊川之隐而未发者，莫不尝其窾絜，尽其节目，融会贯通而出之，然后确乎其有以自得也。夫明经者，必博观众家之说，折衷其是，以定一宗，故其理可明而异说不得以惑。则是书之作，虽不足以尽《易》，其有功于《易》也多矣，况于程氏之书也哉！予故特梓之以广其传。

◇《三易备遗》序

《周礼》：太卜掌《三易》之法，一曰《连山》，二曰《归藏》，三曰《周易》。其经卦皆八，其别皆六十有四。杜子春注曰：“《连山》虚戏《归藏》，黄帝合《周易》为三代之书。《连山》首艮，夏用之；《归藏》首坤，商用之；《周易》首乾，周用之。孔子叹杞宋无征，于杞得夏时，于宋得坤乾，康成注以夏时为夏四时之书，其存者有《小正》，坤乾，商阴阳之书，其存者有《归藏》。考班固《艺文志》，《归藏》不著于录，康成何从得之？毋亦张霸《古文尚书》之流乎？《隋志》有薛贞注《归藏》十三卷，至唐已亡。别有司马应注。又有《连山》十卷。宋《崇文总目》独存《归藏》。初，经齐母《本蓍》三篇，间见诸书所引，颇类诸子百

氏之语。愚窃以为太卜之所掌者，《三易》之筮法，人掌《三易》以辨九之名，但有端龟命蓍、吉凶悔吝之兆，原无象、爻所系之辞。孔子所得，或出猷老口授，非有成书，故后世无传。否则秦政禁书，《二易》当以卜筮得存，不应不见于西汉也。宋东嘉朱日华氏精心象数之学，以为天下有亡书，无亡言。因夏时坤乾之言，即河洛先、后天之图，推五行生成，以明五十五图之为洛书，述《连山象数图》以备夏《易》之遗；推五行纳音以明四十五数之为河图，述《归藏象数图》以备商《易》之遗；因先天、后天之体用即象数之合，以证羲文之合；以繇爻象象之辞证互体，演《反对互体图例》，以备周《易》之遗。而首之以河图洛书之辩，凡为书十卷。日华中嘉定辛未武科，官承节郎，差处州、龙泉、遂昌、庆元及建宁、松溪，政和巡检家则堂提刑两浙，见其书，异之。因进于朝，请收之冗散之役，处以校讎之任。时为咸淳八年之夏。未三年，纪元德祐，不及收用，徒录其书于后省，而宋社屋矣。其子士可、士立先后补成，乞序于同邑林千之以传之。父子用心于是书，可谓勤矣。日华名元升，温之平阳人。士可登开庆己未武科。千之字能一，举宝祐癸丑进士，官编修。林霁山赠之以诗，有“《大雅》凋零尚此翁”句，盖宋之遗老也。

◇《丙子学易编》节本序

《丙子学易编》，宋陵阳李心传微之著。本十五卷。此仅一卷，盖元俞琰石涧节本也。微之之父舜臣常著《易本传》三十三卷，洪景卢为之序。微之本父书，并采王弼、张载、程颐、郭雍、朱熹诸家而成是编。阅其序目，大抵以象占为主，尽扫虚无穿凿之缪。盖有功于《易》道者，惜不得见其全也。其书之成，仅二百八十日，是为宋嘉定九年岁在丙子，故曰《丙子学易编》。石涧借全编于书肆而手钞之，自云寒天短晷，老目昏翳，并日而录其可取者。盖时年已七十余，可谓老而好学也矣。

◇赵氏《易叙丛书》序

《周易辑闻》六卷，《易雅》一卷，《筮宗》三卷，合名之曰《易叙丛书》，宋户部侍郎赵汝梅所著。汝梅者，商恭靖王元份七世孙，资政殿大学士、天水郡公善湘之子也。善湘于群经皆有撰述，而于《易》则有《约说》八卷，《或问》四卷，《指要》四卷，《学易读问》八卷，《学易补过》六卷。汝梅自序其书，谓受《易》于父，盖六易稿而传之者。惜乎《丛书》在而善湘之经义无存，父子著书则同而传不传，信有幸不幸也。汝梅以宗室子为宰相史弥远女婿，顾能谦抑自修，研精《易》象，又以余暇引致黄问、黄中、吴仲孚诸人诗篇唱和，其风流儒雅，犹可想见。至晚岁用理财进，虽历肫仕而失士誉。然则善《易》者，必明乎进退得丧之理而审择焉，庶几可以动而无悔也已！

◇《水村易镜》序

《水村易镜》一卷，宋莆田林光世著。光世字逢圣，敕令所删定，林霆曾孙。靖康初，霆叔冲之被命使金，是时霆为乌江丞，三上书请代往，不报，冲之竟执节死，事具《宋史》本传。霆博学深象数，与郑樵为金石交。光世渊源家学，遍览藏书，因《易》十三卦取法乾象者，著为图说，以明圣人仰观之义，名曰《易镜》。淮东漕黄汉章上其书于朝，理宗览而惊异，以为先儒所未发，命有司以礼津遣赴阙，由布衣授史馆检阅，迁校勘，历将作丞，知潮州。数迁，得提举浙东常平茶盐。进《嘉言》二十篇，赐进士出身，召拜司农少卿兼史职。俄而去食祠，复起，知隆兴府。以言者寝新命，遂用朝请大夫，知秘阁归老。林氏世多忠节，冲之子郁官福建茶司，遇乱骂贼死。霆兄震知镇江府，力攻蔡京、卞兄弟有声。崇宁、大观间，霆与秦桧同登进士，不附和议，常责桧曰：“公何忍置二帝万里外博一宰相？”故莆人谓之忠义林氏。光世之擢官也，以趣贾似道进师还朝，被劾而去。岂亦为似道所恶，故不安其位邪？今不得而考矣。所进《嘉言》，理宗比之杨万里《千虑策》，手书“水村”二字赐之。光世因作亭于莆之历亭山，以彰其宠。吁！岂非布衣稽古之至荣欤！

◇《文公易说》序

自《文公本义》出，而《易》道大明，久为天下学士所服习。然而公论《易》之精义微言，见于同时之论难与及门弟子之辨说者，不一而足。又或著为文章，发之歌咏，间有可以阐羲文之秘，扶周孔之奥者，虽《文集》《语录》各有成编，然以简帙重大，学者或未能周览。且丛见杂出，非汇而归于一，亦无由得其要领也。公孙子明绍承家学，取《文集》《语类》汇而葺之，首之以河洛、太极、两仪、四象、八卦、重卦与乾坤之要指，次取论上、下二篇之策与《十翼》之言，而终之以卜筮与蓍卦考误，正郭子和之失者。及凡注疏，欧、苏参同及麻衣心法之类，靡不著其得失，明其归趣，使学者知所从违而不惑于群言之淆乱。信如杨东里所云：“学《易》之士，不可无之书也。”其后董正叔、胡庭芳、董真卿亦缘子明之意而各为附录，纂注诸书，然或不专取朱子之言。若自为一书，且采之博而择之精，惟是书为优。子明名鉴，文公长子塾之子，以荫补迪功郎，官至奉直大夫、湖广总领，居建安紫霞洲。文公子孙居建安者，自子明始。

◇王巽卿《大易缉说》序

《易》之为书，广大悉备，不可以一端尽也。故自汉以至宋，言《易》者凡七百家。有宋而后，为书益伙。朱氏《授经图》、焦氏《经籍志》所载，几备矣。乃巽卿是书，独遗而不录。《文渊阁书目》中亦失之。近始得于藏书之家。其书前为《图说》《论辩》二卷，后为《解说》八卷，而总名之曰《大易缉说》。大旨则分纬河图以溯伏羲画卦之由，错综河洛以定文王位卦之次。而义之最精者，则每卦必论成卦之主。以为：“圣人观象设卦，咸自乾、坤而出。乾、坤二体之变，即成卦之主。文王主之以成卦体，周公主之以取爻义，夫子主之以为彖传。故圣人所系之辞，

无不因六画而来。则昔贤所谓假象以设辞者，非矣。”其言至当。吴草庐称其书平正稳审，盖谓是乎！其于有宋诸儒，独右濂溪之《太极图说》，等之羲、文、周、孔，尊为《六易》。而于康节、晦庵，少有所轻。虽未免或过，要皆出于心解理会，非因仍蹈袭者比也。是书元常德路推官田泽尝请于朝，为之刊行。申子出处详于泽所为《续刊緝说始末》中，兹不赘。泽者，居延人，后官海南海北道廉访司副使，著有《洪范洛书辨》一卷，见《授经图》中。

◇崇仁吴氏《易璇玑》序

《易璇玑》三卷，绍兴中崇仁布衣吴沆所进，当时目为环溪先生者也。先生幼孤，事母孝。政和间，尝献书于朝，不报，乃归隐环溪。其言《易》自象而求之卦，次求之象，次求之爻，为论二十七篇。其文简奥，间以韵语行之，类古繇辞，卓尔成一家之言者也。当其时，高宗留意学《易》，书乾卦赐侍讲秦梓，书否泰卦赐右相张浚，于是以《易》义进者，朱氏震、林氏偁、李氏授之、刘氏翔、郭氏伸、彭氏与、宋氏大明、都氏絜、吴氏适，或令秘省看详，或令有司给札，或与堂除，或补上州文学。先生独高尚不仕，没而祀于郡县学宫。读其书，思其人，镂版传之，益信立言之必本乎德。

◇《合订大易集义粹言》序

宋陈隆山《大易集义》六十四卷，曾种《大易粹言》七十卷。二书摭集宋儒论说凡十八家，而《粹言》所采二程、横渠、龟山、定夫、兼山、白云父子七家，其康节、濂溪、上蔡、和靖、南轩、蓝田、五峰、屏山、汉上、紫阳、东莱十一家之说，皆《集义》上下经所引，《粹言》则未之及也。《粹言》有《系辞》《说卦》《序卦》《杂卦》，《集义》止上、下经。余窃病其未备，因于十一家书中，将讲论《系辞》以下相发明者，一一采集，与《粹言》合而订之，间以臆见考其源委，定其体例，芟其繁苒，补其脱漏，成八十卷。庶使二书之发凡起例，互相吻合，而十八家之精义奥旨，无不网罗毕具。繇是而上求三圣之心于千载之下，和合诸儒之言于一堂之中，虽人自为说，有彼此浅深详略之不同，而会而归之，罔所乖刺。测度摹拟，无有不备。从衡变化，无有不通。理象之粲然者，莫是过矣。自揣固陋，未必有当于《集义》《粹言》所以为书之宗要，或亦陈、曾两公之所不废也。书成请正于座主徐先生，先生曰善，命梓之附诸经解之末。

卷十一 经解序二

◇董氏《周易程朱氏说》序

宋哲宗元符己卯，程伊川先生序《易传》十卷。后七十九年，为孝宗淳熙丁酉，晦庵先生《本义》成。自有两书，而四圣人之精义微旨益著。又八十九年，为咸淳丙寅，实度宗即位之二年，天台董正叔取二先生之书合而一之，为《周易程朱氏说》，盖始终百七十年矣。尝观程先生之《传》主于言理，而朱子《本义》则推本圣人因卜筮教人之意，第明其为卦象、卦变、卦体、卦德而不费于辞说。夫以二先生学之渊源有本，而论《易》若是不同，何也？盖尝征之程先生之言曰：“有理而后有气，有气而后有数，《易》因象以知数，得其义则象在其中。”又曰：“理无形也，因象以明理。理见乎辞者也，则可由辞以观象。”是程先生虽专言理，实兼包乎象数也。朱子曰：“《易》祇是卜筮之书，今人说得来太精了，然隙入粗不得。某之说虽粗，然隙入得精，精义皆在。其中良以卜筮象数原未尝外于义理，盖有此理则有此象、有此数，即卜筮所谓趣吉避凶、惠迪吉、从逆凶者，未尝外义理而得，是理与数岂岐而二之物乎！”正叔有见于此，故辑为成书，依程《传》之文，而录《本义》于后。凡程之《遗书》、朱之《文集》《语类》有裨于《传》《义》者，咸取而附之。《系辞》以后，程子无传，则取程子平日论说补之，而附录如上、下经之例，于以明两夫子之同有功于四圣而非有所异也。其后董真卿之《辑录》《纂注》，与明永乐之《大全》，实权舆于此。正叔之有功于两夫子不亦大乎！正叔名楷，台之临海人。中文天祥榜进士，知洪州，有惠政。后官吏部郎中，从潜室陈器之游，得朱子再传之学者也。

◇题《读易私言》

许文正公以正大之学，当草昧之世，辅翊世祖，建学明伦，其有功于斯道甚大。所著书不多，见行于世者，《鲁斋遗书》而已。《读易私言》者，统论六画大义，简括精当，足以见公学之纯而养之邃也。金源以来，苏、黄之学行于中州。公从江汉先生得闻伊洛之旨，与柳城共倡明之。元儒学之醇，惟公上接有宋。惜世祖用之未尽，终惑于桑哥、王文统之徒，使斯民不获被其泽，岂不惜哉！公又有《大学要略》一卷，盖领成均时以教胄子者。直述常语，俾使通晓，可与并行者也。

◇石涧俞氏《大易集说》序

《大易上下经说》二卷，《象辞说》一卷，《彖传说》二卷，《爻传说》二卷，《文言传说》一卷，《系辞传说》二卷，《说卦说》一卷，《序卦说》一卷，《杂卦说》一卷，合一十三卷，各冠以序，统名曰《大易集说》。而《易图纂要》一卷，《易外别传》一卷附焉。吴人俞琰玉吾叟所著也。叟于宝祐间以词赋称，宋亡隐居不仕，自号石涧道人，又称林屋洞天真逸。其书草创于至元甲申，断手于至大辛亥

，用力可谓勤矣。世之言图书者，类以马毛之旋、龟文之坼，独叟之持论，谓《尚书·顾命》：天球、河图在东序，河图与天球并列，则河图亦玉也，玉之有文者尔。昆仑产玉，河源出昆仑，故河亦有玉。洛水至今有白石洛书，盖石而白有文者。其立说颇异。至其集众说之善，以朱子《本义》为宗，而邵子、程子之学，义理、象数一以贯之，诚有功于《易》者也。考叟之说《易》，尚有《经传考证》《读易须知》《六十四卦图》《古占法》《卦爻象占》《分类易图》《合璧》《连珠》诸书，咸附于集说之后，而今已无存。当日共讲《易》者，则有西蜀苟在川、新安王太古、括苍叶西庄、鄱阳齐节初，其名字官阀亦不复可考矣。呜呼，惜哉！

◇胡一桂《易本义附录纂注》《启蒙翼传》合序

考亭之学一再传后，惟新安尤盛父兄、师友各自名家。若玉斋、双湖父子，其最著也。双湖名一桂，字庭芳，领宋景定甲子乡荐，入元隐居著书。以闽为文公讲学之地，过其乡，访求绪论，复从建安熊禾勿轩游，与之上下讲议者十余年。归则裒集诸家之说，疏朱子之言为《易本义附录纂疏》及《启蒙翼传》二书，论者谓其得朱子源委之正。勿轩尝谓之曰：“更得《诗》《书》《春秋》《周礼》《仪礼》一如《易》书，以复六经之旧，岂非文公所望于吾辈者乎！”惜先生仅成此二书及《书》说《诗》传《附录纂疏》，而他书竟未及为也。尝观汉人经学各有师法，此韦表微有《九经师授谱》、刘餗有《授经图》、李焘亦有《五经传授》著其流派，咸有条理。近代经学至朱子而得其归，若节斋蔡氏、盘涧董氏之于《易》，九峰蔡氏之于《书》，传贻辅氏之于《诗》，清江张氏之于《春秋》，勉斋黄氏、信斋杨氏之于《礼》，皆朱子嫡嗣也。再传而后，怀孟、金华、新安、鄱阳，其传益著，其派益广。苟能为之稽其授受，别其源流，使后之学者知渊源之有自，岂不为明经者之一助乎？今世通经学古之士，必有继而为之者，尤予所望也。

◇《周易本义集成附录》序

朱子《易本义》一书，疏明其义者，有董楷之《正书》，蔡渊之《训解》，胡炳文之《通释》，胡一桂之《附录纂注》，董真卿之《会通》。而熊良辅之《集成》，亦其一也。良辅字季重，别号梅边，南昌人。举元延祐丁巳乡试。早师遥溪熊凯学《易》，复得《易》传于凯之友泉峰龚焕。试礼部不第，归，训徒乡塾，研究《易》旨，乃为是书。采摭诸家之说，与《本义》合者录之，即不合而有得于经旨者，亦备录以相发，末则折衷以己意。盖本朱子之书而不泥焉者也。始朱子《本义》一遵吕成公所订古文为主，以六十四卦象、爻之辞为上、下经，而孔子所释象、象、文言及上下系、说卦、序卦、杂卦为“十翼”，明永乐时编次《大全》，乃以朱子《本义》附程传以行，而初本遂淆。良辅是书，犹仍旧本上下经二卷，谓之《集成》，十翼十卷，谓之附录，总为十二卷，统名之曰《周易本义集成附录》。《授经图》但录《集成》二卷，盖未见全书也。嗟乎！自《周易传义大全》行，而世无知朱子易之为古文也久矣。故科试者往往合周公、孔子之辞以命题，割裂纰缪，良可

怪叹。得是书，庶可一正之乎！良辅所采摭，自唐迄元凡八十四家，中姓氏多不著者。于以见《易》书之多，后世不可得尽见，犹赖是书以传，亦可尚也。

◇鄱阳董氏《周易会通》序

《周易会通》一十四卷，题曰《经传集程朱解附录纂注》，冠以凡例十条、《经传历代因革》一卷，而以《启蒙五赞筮仪附录纂注》终焉，鄱阳董真卿季真父所編集也。金华吴正传驳之，谓朱子之义自与程传体制不同，不当强求其通。而季真自序则云：“自包牺氏作《易》，至于文王、周公，不知几年而后有卦、爻之辞。由文王、周公至于孔子，五百余年而后有《十翼》。由孔子至程、朱子，千五百余年而后有《传》《义》。今距程朱子百有余年，乃敢析合经传，集四圣二贤及历代诸儒之说以备一书。”其亦勇于自任者矣。季真为深山先生之子，盘涧先生之从子，受学于双湖胡氏、勿轩熊氏。胡之学本于其父玉斋，玉斋师毅斋沈氏，沈学于介轩董氏，董学于勉斋黄氏。熊之学本于进斋徐氏，徐学于节斋蔡氏，蔡又为勉斋之友。当时师弟子授受，渊源可考，皆本于程、朱子者也。其曰：“程子主理义，朱子主象占。求朱子象数之《易》得其旨，因朱子以求程子理义之《易》，又于诸家之《易》，理之所聚而不可遗，理之所行而无所碍者，相与发明之。”故虽林黄中、袁机仲之说，双湖诋为惑世诬民者，季真或有取焉。其亦善于言《易》者矣。

◇雷思齐二种《易》序

《易图通变》五卷，《易筮通变》三卷，元临川道士雷思齐著。《易》图世有传本，《易》筮则得之《道藏》中。二书固相为表里，宜并行者也。思齐字齐贤，别号空山，居钟湖观，授玄教讲师，乐与士大夫游。吴文正赠以诗有“钩深十翼象外《易》，罗络三苍篇内文”句，“十翼”即指二书，三苍者，岂思齐于六书之学亦有撰著欤？思齐虽羽流，实当时高士。其游于黄冠，盖亦有托而逃，若梁隆吉、邓牧心辈，非寻常道流比。其所撰，宜吾儒所不摈也。世所传二氏之藏，惟道家最多牵合。举夫名、法、兵、形、医、卜诸家，咸以为出于黄老，遂援而取之，以增广其类。而《易》为三圣人之书，凡言图书象数者亦入焉，至与其所谓符篆、科仪荒谬诞妄者，同汇而藏之。然前人之遗书或藉以传，则亦未可尽罪也。嗟乎！彼二氏虽为吾儒所不道，然为其徒者，犹能世守其所传于琳宫梵宇之中，而儒家者流举所谓淹中、柱下之藏，盖无有也。岂不重可慨也欤！

◇《周易参义》序

新喻梁孟敬先生，元季用荐为集庆路儒学训导。居二载，念亲老，谢归。入明，郡守刘真辟教授临江府。明太祖既定天下，稽古礼文，召名儒修述，定一代之制，于是先生征诣金陵，年已六十矣。时分礼、律、制三局，先生在礼局中，讨论精审，诸儒皆推伏之。书成，不受官，赐金还乡里，筑室蒙山，为书庄以藏所著书，《周

易参义》其一也。是书盖分教集庆时所作，以程、朱《传》《义》，学者所宗，然程主于玩辞，而朱主于观象，一本于理，一尚其占，其说遂殊。《参义》者，融会二家之旨合而一之也。先生于六籍咸有述，当时目为“梁五经”。《春秋》曰《考义》，《书》曰《纂义》，《礼》与《周官》曰《类礼》、曰《考注》，《诗》曰《演义》。《易》《春秋》作于元季，他皆蒙峰退隐后所成。其卒也，在建文二年，年八十有七。嗟乎！当时被召诸儒，如青田、金华、新安、义乌，身非不显，名非不著，而或以谗死，或以身殉，或遭迁谪，或不享年，求如先生优游终老，著作垂于后世，岂非幸哉！先生之论，以言忠信、行笃敬为天德，不伤财、不害民为王道。其言纯以正，《记》称“好学不倦，好礼不变，耄期称道不乱”者，其殆斯人也欤！

◇程泰之《禹贡图论》序

宋新安程泰之尚书，以该洽直谅见知于孝宗。尝侍光宗潜邸讲读。及即位，以吏部尚书进龙图阁学士致仕。公老而得谢于家，著书立言，尽发所蕴。今所传《演繁露》《考古编》《雍录》诸书，辨证古今之讹谬，订正书传之得失，多卓然可观者。《禹贡论》五十二篇，亦公所著，辩江、河、淮、汉、济、黑水、弱水七大川甚悉。凡诸儒舍经泥传注者，一一正之。又专论河、汴二水之患，为《后论》八篇。又为《山川地理图》，因《禹贡》而备论历代山川、郡县名称改易。以唐世地书为正，总为四卷。汪端明应辰见而叹为不可及。淳熙四年，公为刑部侍郎，因进讲黑水，陈其素所辩论，孝宗嘉赏，命进其全书，付秘阁。其后公出知泉州，同年舶使彭椿年始命教授陈应行校而刊之。图本三十有一，今仅存序说，兼有所缺。考归熙甫为跋时，图已不及见，况又百余年乎！夫古今之宇宙，疆域大矣，自非身所亲历，安必其无讹。《经》所纪皆禹随山刊木所身历也，后世为传注者，乃欲以一己见闻举而核之，诚不能无误。公之为是书也，尽屏训传，独取经文而熟复之，于一言一字间有意指可以总括后先者，则主以为据，而后采历世载籍以证之。其用志可谓勤矣。虽其谓鸟鼠同穴为二山，亦拘于一隅之见，然而弘肆淹雅，不诡随传注，固经说之杰也。尝考南宋诸儒称博洽者凡三人，一为鄱阳洪景卢迈，一为四明王伯厚应麟，其一则公。洪之《容斋随笔》博矣而未核，王之《困学纪闻》精且核矣，而援经证史，解驳尽致，则于公是书见之。公复尝考究《书》之历代地理，为谱二十卷，取五十八篇互相发明，篇为一论。周益公称其抉隐正讹，有功学者。嗟乎！安得并传之为快欤！

◇新昌黄氏《尚书说》序

宋新昌黄宣献公经学博通，著《诗说》三十卷，《周礼说》五卷，其《易》传未成而歿，今惟《尚书说》七卷仅存。吴兴陈氏谓公晚年制阆江淮，著述不辍，时得新意，则晨夜叩书塾为友朋道之，盖其穷经老而不倦若是。夫说《书》亦难矣，九峰之《传》，程直方辨之，余芑舒疑之，袁仁砭之，明太祖集诸儒更定之。公之说，

诸儒未有议之者，由其义之纯而辞之约也。惟于《书》终《秦誓》，公以为夫子知其终必得志于天下，推其效，自穆公垂创之为可继，故录其书使与《费誓》自为后先，窃以为不然。周公、鲁公皆周卿士，周公之诰录于《书》，鲁公之誓亦录于《书》，无以异也。夏之书终以《嗣征》，周之书终以《秦誓》无以异也。而谓夫子序《书》，以秦承周，以《秦誓》继典、谟、命，其旨则微，毋乃近于讖纬之说，不若九峰比于《诗》之录《鲁颂》《商颂》犹未害于义也。

◇时氏《增修东莱书说》序

宋乾淳中，东莱吕成公讲道金华，四方从游者千人。公同年进士时铸寿卿与其弟长卿，率其家子弟曰沄、曰澜、曰涇悉从公学。公尝辑《书说》先之《秦誓》《费誓》，上至《洛诰》，凡一十三卷。阅再岁而公歿，澜增修之，成二十二卷，合为三十五卷。于是《书说》乃全。予考成公实受业于林少颖之门，少颖有《拙斋书集解》五十八卷，朱子谓《洛诰》以后非其所解，则亦门人续成之者。夫林氏之书既以《召诰》终，公之书因以《洛诰》始，是公之用意，本以续其师说。而门人莫喻厥旨，恠其书之未就，辄补其余，其用心则勤，而公之意未免因之反晦矣。虽然，澜，公之高弟子也，其所补缀，一本师说，学者取林氏之书暨先生讲论，与澜所增修合而观之，匪独见今古文正摄义蕴之全，而丽泽书院师友之渊源，亦可睹矣。

◇《书集传或问》序

宋东阳陈大猷作《尚书集传》，用朱子释经法吕氏《读诗记》例，采辑群言，附以己意成编。宋季其书盛行，学者多宗之。《集传》而外，复成《或问》二卷，明《集传》去取之意，亦犹紫阳《论孟集说》别为《或问》之旨也。《集传》未及见，而《或问》偶有传本。尝取而读之，其中变难往说，著其从违，使治经者有所依归，无岐途之惑，其便于学者甚巨。惜全编不可得见。然因此以推则其搜辑之博，持择之精，信乎可传也矣。大猷登绍定二年进士，由从仕郎历六部架阁，官不甚显，故《宋史》无传。同时有都昌陈大猷者，号东斋，常师饶双峰，仕为黄州军州判官，亦著《书传会通》，实元陈浩之父，与东阳别为一人。世人往往混而一之，故举而并著之，使校雠四库者有所考焉。

◇王鲁斋《书疑》序

《书疑》九卷，宋金华王文宪公柏所著。书自伏、孔二家传出，于是有今文、古文之别。由唐以前未有疑之者，有宋诸儒始疑古文后出，非尽孔壁之旧，然于今文，固未有拟议也。其并今文而疑之，则自公始。公高明绝识，于群经穿穴钻研，不狃于训诂之旧，故虽以二千年相传口授、壁藏之书，汉唐诸儒所服习者，犹有缺佚脱误之疑。至谓《大诰》：“宁王遗我大宝龟，西土有大艰，人亦不靖”之语，无异于唐德宗奉天之难，委之于定数。圣如姬公，宁肯为此语？《洛诰》复辟之事，谓

成王幼，周公代王为政，成王长，周公归政于王，苏氏所谓归政初无害义，何所嫌而避此名乎？其不苟为同如此。元吴礼部师道言公初见何北山，北山谦抑不敢以弟子视之，公宏论英辩，质疑往复，一事或十数过。公之为此书也，岂有得于北山与？是书之最善者，如订正《皇极》之经传，谓《论语》“咨尔舜”二十二言、《孟子》“劳来匡直”数语，宜补《尧典》缺文，《禹贡》叙一事之终始，《尧典》叙一代之终始，《禹贡》当继《尧典》之后，居三谟之前，皆卓然伟论。即以补伏、孔所未逮，可也。

◇杏溪傅氏《禹贡集解》序

义乌傅寅同叔徙居东阳之杏溪，著《禹贡集解》二卷，乔文惠行简序之。其书先以《山川总会》之图，次《九河》《三江》《九江》之图，次及诸家说断。其言谓禹之治水，皆自下而上。曰治水者，必使其下能容而有余，易泄而无碍，然后可以安受上流，而不至于冲激以生怒。又曰治其最下而速其行，通其傍流而使其其中无停积之患，则河之大体无足忧矣。吾于其言，默有取焉。惜乎是编流传者寡，不见采于董氏之《纂注》，而焦氏《经籍志》、西亭王孙《授经图》或以为说，或以为论，盖未尝见此书而著于录者。是本为吴人王止仲藏书，其后归于都少卿穆。其第一卷阙三十有七版，第二卷又阙其四版。验少卿前后私印，则知当日已非足本。亟刊行之，俟求其完者，嗣补入焉。

◇梅浦王氏《尚书纂传》序

梅浦王氏《尚书纂传》四十六卷，先引汉、唐二孔氏之说，次收诸家传注，而一以晦庵朱子、西山真氏为归，与其乡先生彭翼夫往复考正十五年而后成。大德中，鄞人臧梦解为宪使，以其书上于朝，得授临江路儒学教授。其子振板行之，予所见者，即至大钁本也。吉安自宋季文信公谋兴复不遂，被执以死，其门人宾客咸以忠义自奋，乡曲之士多知自好，恒绝意仕进，潜心经义。于《易》则有龙仁夫之《集传》、刘霖之《太极图解》《易本义》《童子说》，于《诗》则有刘瑾之《通释》，于《礼》则有彭丝之《集说》，于《春秋》则有丝之《辨疑》、李廉之《会通》。《书》自梅浦而外，则耕野王氏，其撰述多有得者。梅浦是书，其钞撮也博，而甄综也简。其心似薄蔡氏而不攻其非，间亦采摭其说，择焉可谓精矣。彭翼夫者，尝仕于宋，为江陵府教授，即丝之父也。

◇《今文尚书纂言》序

《今文尚书纂言》四卷，元草庐先生吴澄所辑。《尚书》既遭秦火，汉初济南伏生以所忆二十八篇教授齐鲁间，即今书是也。其后孔壁书出，增多二十五篇，谓之《古文尚书》，而目伏生所授者为今文。自东汉及魏世，所行者惟伏生之书而已。古文旧藏于官，人不及见，迄东晋始复出。唐孔颖达因安国传而作《正义》，书以盛

行，于是伏生之书遂为其所乱。有宋诸儒始疑其文体不协，朱子亦曰：“孔书至东晋方出，前此诸儒皆未见，可疑之甚。”又曰：“孔传及序不类西京文字。”则疑古文者，非一人矣。至先生序录群经，始分而出之，取伏生之二十八篇序于前，以还其旧，而以孔壁所出之古文别序于后。至为《纂言》，则独有今文。古文置而不释，其见可谓卓矣。而说者或谓先生果于自信，轻于非圣经，余以为非也。孔氏壁书已不可见，至东晋所上之书，出于梅赜一手，其非安国原本明甚。至重华之名，虽见于太史公《本纪》，彼姚方兴者，岂遂不能援以自实其所撰耶？固未可知也。呜呼！圣人之经，灿若日星。甲是乙非，未能遽定。而先生是编考据详博，厘正错简，咸皆确当。学者将以明经祛惑，其于是书必有取尔矣。

◇《尚书通考》序

宋元之际，闽之樵川儒学蔚起，若严粲明卿之于《诗》，黄清老子肃之于《春秋》，黄镇成元镇之于《易》、于《书》，《易》有《通义》，《书》有《通考》，各十卷。予所见者，惟严氏之《诗缉》、黄氏之《尚书通考》而已。《通考》纪《尚书》名物度数，举夫七政、九畴、六宗、五礼、方州之贡赋水土、律吕之长短忽微，皆著其说。说有未尽，复系以图。汇集诸家而衷以己意，详且备矣。夫《书》以载道，二帝三王之大经大法存焉。度数名物，靡非经法之所寓，稍有未晰，则无以措诸事而施于用，何以免不学墙面之讥乎！是编由器而寓夫道，由数以达其义，学者能详考精察，于以定礼乐、设制度有裕如者矣。元镇书成，执政因荐为江西路儒学提举。命下，禄不及而卒，集贤议谥曰贞文处士以旌之。当时如元好问、安熙亦皆以下僚布衣得与易名之典，于以见元节惠之锡，不视爵位为予夺，亦可录也。

◇王鲁斋《诗疑》序

金华王文宪公于六经、四子之书，论说最富。《诗》则有《读诗纪》十卷，《诗可言》二十卷，《诗辨说》二卷，见吴礼部正传节录行实中。今所传《诗疑》，则行实未载，卷帙不分。绎其辞，殆即《诗辨说》。因公于《书》有《书疑》，遂比而同之也。古之说《诗》者，率本大、小《序》。自晦庵朱子去《序》言《诗》，遂以列国之风，多指为男女期会赠答之作。公师事何文定，文定学于黄文肃，文肃受业朱子之门，宜其以郑卫诸诗信为淫奔者所作，且疑三百五篇岂尽夫子之旧容，或有删去之诗存于闾巷之口，汉初诸儒各出所记以补其缺失者。又以二《南》各十有一篇，两两相配，于是削去《野有死麋》一篇，退《何彼秣矣》《甘棠》于《王风》，其自信之坚，过于朱子。此则汉唐以来群儒莫之敢为者也。文定尝语公矣：诸经既经朱子订定，且当谨守，不必又多起疑论，有欲为后学言者，谨之又谨可也。昔贤之善，诲人盖如此。

◇《诗传遗说》序

子明于《易说》外，复取《文集》《语录》论《诗》者为书六卷，一、二卷纲领及序辩，三卷六义与思无邪问答，四、五、六卷论四诗之旨，末附以逸诗、诗乐谱、叶韵，皆《集传》所不载者，名曰《诗传遗说》。时为端平乙未，子明官承议郎权知兴国军事所成也。按公凡三子，长曰塾，字受之，以荫补将仕郎，为子明之父，与弟野皆受业于吕东莱，先文公十年卒，公请陈同父志其墓者也。仲即野，字文之，淳祐间荫补迪功郎，差监德清县户部赡军酒库，后公十一年卒，黄直卿谏之，称其在家之贤。季曰在，字敬之，一字叔敬，亦以荫补官，累至焕章阁待制，知袁州。野之子钜，南康丞，铨知登闻鼓院。在之子铉，两浙转运判官。名皆见黄直卿所为行状中。再传曰溥者，浙西提举；湜，知丹徒县，淮泉州路推官；沂，考亭书院山长。行状不载。盖皆后公卒而生者。若泉州于宋为军州，至元始改为路，岂淮与沂又已入元欤？若鉴之子浚，行状亦不载其名，尝尚宋理宗公主，官两浙转运使兼吏部侍郎。元兵入建宁，浚与公主走福州，知府王刚中以城降于阿剌罕，浚谓公主曰：“君帝室王姬，吾大儒世胄，不可辱人手。”夫妇仰药死，其事尤烈。浚之子林，官甘肃提举。林之子？，延平路照磨；焰，武平簿；耿，邵武路照磨。林弟彬之子炜，济宁路同知。林之孙堂，建宁路照磨；壑，屏山书院山长。壑之子銓，銓之子淞，淞之子挺。明景泰壬申，诏录文公后，得世袭五经博士，主建宁祠祀。其在婺源者，曰稳，于公为十世孙，举明天顺丁丑进士，官福建盐运使，以廉称。弟懋，永年丞；楨，本县训导。正德中，给事中戴铣等请朱氏比孔氏，衢州例增一博士以主婺源祀事，以十一世孙墅为之。嗟乎！我徽国文公著书明道，上继二程、周、张诸子之后，而集其大成。盖孔子后一人也，故其垂裕之泽长且久者如此。而子若孙如鉴者，能采葺公之所著以开示来学。其子浚能执节守义，不愧乃祖。他小说或讥其作书与贾似道称“万拜”，诚诬诋不足道也。鉴父塾之卒，公贻书同父及题其诗卷，有深痛焉在。当理宗朝，请进鲁子为公，崇祀二程及横渠，而黜扬雄、王雱之祀，数者皆有关于人伦世教之大，咸出于公之子若孙，何其多贤哲欤！噫！斯又周、程、张、邵所不逮也夫！

◇《毛诗名物解》序

六经名物之多，无逾于《诗》者。自天文、地里、宫室、器用、山川、草木、鸟兽、鱼虫，靡一不具。学者非多识博闻，则无以通诗人之旨意，而得其比兴之所在。自《尔雅》释《诗》，而后如《博雅》《埤雅》《尔雅翼》诸书，虽主于训诂，要以名物为重。此外复有疏草木鱼虫及门类物性，钞集传名物者，若蔡卞之《毛诗名物解》亦其一也。卞为王介甫婿，其学一以王氏为宗。其书自释天至杂释，类凡十。卞为人固不足道，然为是书，贯穿经义，会通物理，颇有思致。盖熙丰以来之小人如吕惠卿、章惇、曾布及卞兄弟，咸能以文采自见，而亦或传致经义以文其邪说，斯所以能惑世听而自结于人主也。嗟乎！当其诬罔宣仁，窜逐众正之时，吾不知其于兴观美刺之义何居？斯其人所谓投畀豺虎不食，投畀有北不受者，而吾之犹录其书存之者，殆所谓不以人废言之意也欤。

◇朱孟章《诗疑问》序

《诗疑问》七卷，元进士朱倬孟章著。朱氏《授经图》、焦氏《经籍志》皆作六卷，今本七卷，末附南昌赵德《诗辨说》一卷。始予得是书，称盱眙进士朱倬，莫知为何如人。考之《汉书·地理志》，豫章郡下有南城县，注云县有盱水。图经云在县东二百一十步，一名建昌江，亦名盱江。《名胜志》云：县之东境有新城县，立于宋绍兴八年，就黎滩镇置县，因号黎川。然后知倬为建昌新城人。及考近所为《建昌志》，仅于科第中有倬姓名，载其为遂昌尹而已，他无所见也。暇读《新安文献志》，载明初歙人汪睿仲鲁所为《七哀辞》，盖录元季守节服义者七人，而倬与焉。因得据其《辞》而考定之。《辞》言倬以辛巳领江西乡荐，登壬午第。考龚艮《历代甲子编年》，辛巳为顺帝至正元年，壬午其二年。而《志》载倬以至顺元年登第，考至顺为文宗纪元，岁在庚午。仲鲁之交倬，当辛卯、壬辰间。倬自言登第十年，壬午至辛卯恰如其数。则志所云至顺者，误也。岂以顺帝至正二年，遂讹而为至顺邪？《辞》言初授某州同知，以忧家居，服阕，授文林郎、遂安县尹，则已为官矣。而倬之言于仲鲁者，曰“登科十年，未沾寸禄”，仲鲁《哀辞》亦有“十年未禄，奚命之屯”语，殊不可解。岂两任皆试职，故不授禄邪？《哀辞》言壬辰秋，寇由开化趋遂安，吏卒逃散，倬大书于座，有“生为元臣，死为元鬼”语，遂坐公所以待尽，寇焚廨舍，乃赴水死。遂安为严州属邑，壬辰为至正十二年。考《元史》，是年七月，饶、徽贼犯昱岭关，陷杭州路，当是其时。盖蕲、黄余党由衢而至严者也。《哀辞》言后竟无传其事者，岂非以邑小职卑，时方大乱，省臣以失陷郡邑，自饰不遑，遂掩其事而不鸣于朝邪？《哀辞》又称其下车兴学诵诗，民熙化洽。盖倬固当时良吏，不仅以一死自了者。而《元史》既不为之立传，郡人亦不载其行事于《志》，苟非仲鲁是辞，不几与荒磷野蔓同尽哉？诚可哀也矣！《辞》称岁庚寅，倬同考江浙乡试，始识仲鲁于葛元哲家，因见仲鲁《诗》义而惜其不遇。盖倬以同经阅卷，则其著是书无疑。其为是书也，当在未为县尹之前。其论经义，大抵发朱子《集传》之蕴，往往微启其端而不竟其说。盖欲使学者心思自得，不欲遽告以微辞妙义也。赵者，故宋宗室，举进士。入元不仕，隐居豫章东湖，于诸经皆有辩说，《诗》其一耳。嗟嗟！倬以义烈著德，以高隐称，虽无经学，皆可表见，况著述章章若是乎？是不可以无传也已。

◇雪山王氏《诗总闻》序

雪山王氏《诗总闻》二十卷，每章说其大义，复有闻音、闻训、闻章、闻句、闻字、闻物、闻用、闻迹、闻事、闻人凡十门。每篇为总闻，又有闻风、闻雅、闻颂冠于四始之首。自汉以来说《诗》者，率依《小序》，莫之敢违。废《序》言《诗》，实自王氏始。既而朱子《集传》出，尽删《诗序》，后之儒者咸宗之，而王氏之书晦而未显。其自诩谓研精覃思几三十年，而吴兴陈日强称其自成一家，能寤寐诗人之意于千载之上。要之虽近穿凿，而可以解人颐者多矣。王氏名质，字景文，汝阳人，过江侨居兴国，中绍兴庚辰进士。

卷十二 经解序三

◇孙泰山《春秋尊王发微》序

宋晋州孙明复先生庆历间隐居泰山，学《春秋》，著《尊王发微》十二篇，以教授弟子。范文正、富文忠两公言先生道德经术宜在朝廷，召拜校书郎、国子监直讲，后官至殿中丞而卒。方先生卧病时，天子从韩忠献之言，命其门人祖无择就家录其书，藏于秘阁。案唐以前诸为《春秋》说者，多本三《传》，至陆淳始别出新义。柳子厚所谓明章大中，发露公器者也。先生之书，因淳意而多与先儒异。故当时杨安国谓其说戾先儒，而常秩亦言其失之刻石。林叶氏谓其不达经例，又不深《礼》学，议者殊纷纭。虽然群言异同，必质诸大儒而论定。欧阳子言先生治《春秋》，“不惑传注，不为曲说以乱经，其言简易，于诸侯大夫功罪以考时之盛衰，而推见王道之治乱，得经之义为多。”而朱子亦谓：“近时言《春秋》者，如陆淳孙明复，推言治道，凛凛可畏，终是得圣人意。”绎二子之言以读先生是书，则《春秋》大义，诸家所不及者，先生独得之，又岂可以说之异同而妄议之也哉！

◇《春秋皇纲论》序

《宋·艺文志》：《春秋》之书凡二百四十部、二千七百九十九卷。余所见者，仅三十余部，为卷数百。王《皇纲论》，其一也。不知何如人，自称为太原王，陈直斋《书录解题》亦但言其官太常博士，至和间人而已，不能详其生平也。《直斋解题》于著书之人，往往举其立身大概，使后世读其书者，虽不获亲见其人，犹稍稍得其本末，以为论世知人之据。乃于独否，岂其人在直斋当时已不可得而论定邪？然直斋所录，《皇纲论》外尚有《明例隐括图》，又云《馆阁目》有《通义》十二卷。而王伯厚又云《通义》之外，别有《异义》十二卷。《通义》据三《传》注疏及啖赵之学，其说通者附经文之下，缺者以己意释之。则所著二义者，正其解经之本书，兹论则总括立言大旨以成编者也。《论》特弘伟卓犖，则二《义》亦必有足观，惜乎不得而见也。嗟乎！古人辛勤著书将以求知于后世，而世顾不得而知之，即其书幸而传矣，又不能尽传也，岂不重可叹也欤！《论》凡五卷，二十有三篇。

◇刘公是《春秋》序

石林叶氏谓庆历间欧阳文忠公以文章擅天下，世莫敢抗衡。刘原父虽出其后，以通经博学自许，文忠亦以是推之，作《五代史》《新唐书》凡例，多问《春秋》于原父。又曰：“原父为《春秋》，知经而不废传，亦不尽泥传，据义考例以折衷之，经传更相发明。虽间有未然，而渊源已正。今学者治经不精，而苏、孙之学近而易明，故皆信之。而刘以难入，或诋以为用意太过，出于穿凿。彼盖不知经，无怪其然也。”石林所谓苏、孙，盖指子由、莘老也。晁公武谓刘氏《传》如桓无王、季友卒、胥命用郊之类，皆古人所未言。诸公之推伏原父者若此。今观《权衡》之作

，折衷三家，傍引曲证以析经义，真有权之无失轻重，衡之得其平者。《传》十五卷，集众说而断以己见，文类《公》、《谷》。独《意林》一篇，元吴莱谓多遗缺，疑未脱稿之书。然究而论之，皆经学名书也。宋四明史有之刊《权衡》《意林》于清江，其本犹有传者。《传》则出于录本，人或以以为非真。观其文义与二书合，疑非贗鼎，故并刊之以传示学者。

◇龙学孙公《春秋经解》序

宋熙宁以前，荆、舒未用，《春秋》犹立于学官。以是经名者，有两孙先生，一为泰山孙明复，一为璧社孙莘老。两人俱有著书传世。明复以师道与胡安定并称，石介辈至尊之如孔子。然石林叶氏谓其书不尽达于经例，又不深礼学，故其言多自抵忤，有甚害于经者。莘老则早从安定游，有声经社。中患诸儒解经之凿，蠹蚀遗经，乃摭其所得而为之解。谓《穀梁》最饶精义，故多从之而参以《左氏》《公羊》及汉唐诸家之说。义有未安，则补以所闻于安定者。晁公武称其论议精严，良然也。王介甫？其不能胜之也，因举圣人笔削之经，而废之且为断烂朝报。其始不过忤刻，而终于无忌惮若此。龟山乃言当时三《传》异同无所是正，于他经为难知，故不列于学官，非废而不用。殆曲护之而为之言欤？是书宋南渡已不常见，故海陵周之麟有学士大夫罕知之叹。至绍熙癸丑，阳羨邵辑始得之而刊于璧社。其后庆元乙卯李张栻、嘉定丙子新安汪纲皆增为序跋。三君皆官于其地，争与表章先贤经术，可谓知所先务矣。先生别有《春秋经社》六卷，晁氏言其亦本啖、赵，凡四十门，惜乎不可复得而并行于世也。

◇涪陵崔氏《春秋本例》序

以例说《春秋》，著于录者，郑众、刘寔之《牒例》，何休之《谥例》，颖容杜预之《释例》，荀爽、刘陶、崔灵恩之《条例》，方范之《经例》，范宁之《传例》，吴略之《诡例》，刘献之之《略例》，韩滉、陆希声、胡安国之《通例》，啖助、丁副之《统例》，陆淳之《纂例》，韦表微、成元、孙明复、叶梦得、吴澂之《总例》，李瑾之《凡例》，刘敞之《说例》，冯正符之《志例》，刘熙之《演例》，赵瞻之《义例》，张思伯之《刊例》，王之《明例》，陈德宁之《新例》，王炫之《门例》，李氏之《异同例》，程迥之《显微例》，石公孺之《类例》，家铉翁之《序例》。而梁之简文帝、齐晋安王子懋皆有《例苑》，刁氏有《例序》，张大亨有《例宗》。杜氏之言曰：“为例之情有五，推此以寻经传，王道之正、人伦之纪备矣。”而说《公羊》者则有五始、三科、九旨、七等、六辅、二类、七缺之义，毋乃过于纷纶与？涪陵崔彦直尝与苏、黄诸君子游，知滁州日，曾子开曾为作记，刻石醉翁亭侧。其说《春秋》有《经解》十二卷，《本例》二十卷。建炎中，江端友请下湖州，取彦直所著《春秋》传藏秘书省，于是其孙若上之于朝。今其《经解》不可得见，而《本例》独存。其说以为圣人之书，编年以为体，举时以为名，著日月以为例，《春秋》固有例也，而日月之例盖其本。乃列一十六门，而皆以日

月时例之，其义约而该，其辞简而要，可谓善学《春秋》者也。题曰西畴居士者，殆书成于晚年罢官之日与？

◇《春秋经筌》序

《春秋》之传五，邹氏无师，夹氏未有书，列于学官者三焉。《汉志》二十三家，《隋志》九十七部，《唐志》六十六家，未有舍三《传》而别自为传者。自啖助、赵匡稍有去取折衷，至宋诸儒各自为传，或不取传注，专以经解经，或以传为案，以经为断，或以传有乖谬则弃而信经，往往用意太过，不能得是非之公。呜呼！圣人之志不明于后世久矣。盖尝读黄氏日钞，见所采木讷赵氏之说，恒有契于心焉。既得《经筌》定本，乃镂版传之。善哉！木讷子之言乎！善学《春秋》者，当先平吾心，以经明经，而无惑于异端，则褒贬自见。盖《春秋》公天下之书，学者当以公天下之心求之。斯言也，庶几得是非之公，而圣人之志可以勿晦焉已。

◇叶石林《春秋传》序

宋吴郡叶少蕴当绍兴中著《春秋传》《考》《讫》三书凡七十卷，又为《指要总例》二卷，《例论》五十九篇。开熙中，公孙筠守延平，刊于郡斋。历世既久，其书不可尽见。所见者，《传》二十卷而已。少蕴之言曰《春秋》非为当世而作，为天下后世而作也。后世言《春秋》者不外三家，左氏传事不传义，是以详于史而事未必实，以其不知经也。《公》、《谷》传义不传事，是以详于经而义未必当，以其不知史也。乃酌三家，求史与经其不得于事者，则考于义；不得于义者，则考于事，更相发明，以作是《传》，辩定考究，最称精详。直斋陈振孙言其学视诸儒为精，则是书岂非有志《春秋》者所当研究者欤！其为《讫》也，即《啖赵辩疑》《刘氏权衡》而正其误，补其疏略。自序《春秋考》曰：“自吾所为《讫》推之，知吾之所正为不妄也，而后可以观吾《考》。自其《考》推之，知吾之所择为不诬也，而后可以观吾《传》。”是三书者，阙一则无以见少蕴之用心，而惜乎今之不得见其全也。虽然，即《传》所取之义以求其所舍择，纵全书未能尽窥，亦可得其大概矣。况四海之大，好事之儒、藏书之老宁无秘而传之者？安知不因是书之行而亟出欤？少蕴名梦得，官至参知政事，生平具见《宋史》，居吴兴弁山，为园亭，奇石森列，故用《楚词·天问》语自号云。

◇清江张氏《春秋集注》序

清江张元德游朱子之门，为白鹿书院长，终著作佐郎。迨除直宝章阁，而元德已歿矣。其于《春秋》，有《集传》《集注》《地理沿革表》三书，端平中进于朝，宣付秘阁。朱子尝报元德书矣，曰：“《春秋》某所未学，不敢强为之说。”而于《尚书》则谓有老师宿儒所未晓者。夫学至朱子，智足以知圣人矣，而于《尚书》《春秋》无传，非不暇为，亦慎之至也。明洪武初颁《五经》《四书》于学官，传注

多宗朱子，惟《易》则兼用程、朱《传》《义》，《春秋》则胡氏传、张氏注，并存久之。习《易》者舍程《传》而专宗朱子，习《春秋》者，胡传单行而《集注》流传日鲜矣。余诵其书，集诸家之长而折衷归于至当，无胡氏牵合之弊，允宜颁之学官者也。昔明太祖不主蔡仲默七政左旋之说，乃命学士刘三吾率儒臣二十六人更定《书》传，曰《书传会选》，今其书渐废而仍行蔡《传》。顾元德是书，昔之所颁行者，反不得与蔡氏并书之，取舍兴废盖亦有幸不幸焉，可感也已！

◇《春秋五论》序

《春秋论》五篇，共一卷。一曰《论夫子作春秋》，二曰《辩日月褒贬之例》，三曰《特笔》，四曰《论三传所长所短》，五曰《世变》，宋吏部侍郎知兴化军武荣吕大圭圭叔所著也。五论闳肆而严正，《春秋》大旨具是矣。圭叔登淳祐七年进士，授潮州教授，改赣州提举司干官，秩满，调袁州、福州通判，升朝散大夫，行尚书吏部员外郎，兼国子编修、实录检讨官，兼崇政殿说《书》，出知兴化军。常以俸钱代中下户输税。德祐初元转知漳州军，节制左翼屯戍军马，未行。属元兵至沿海，都制置蒲寿庚举全州降，令圭叔署降笈，圭叔不肯，将杀之。会圭叔门弟子有为管军总管者，掖之出。圭叔变服遁岛上。寿庚将逼以官，遣追之，问其姓名，不答，被害。先是圭叔緘其著书于一室，至是毁焉。五论与《读易管见》《论语孟子解》以传在学者得存。然《管见》诸书皆不可见，见者又仅此而已。惜哉！圭叔少嗜学，师事乡先生潜轩王昭。昭为北溪陈淳弟子，淳受业晦庵称高足。渊源之来，人称温陵截派。呜呼！当时诋訾道学者，往往谓其迂疏无济。然宋社既屋，人争北向，圭叔独不为诡随，甘走海岛，不憚以身膏斧钺，大节何凛凛也。以是观之，道学又何负于人国乎？良可叹也矣！武荣即今泉州之南安县，唐嗣圣中尝以县为武荣州，故名。圭叔居县之朴兜乡大丰山下，学者因号为朴乡先生。

◇《春秋经传类对赋》题辞

《春秋》其事二百四十年，其文一万八千言尔，视诸经为最简。左氏作传，而事与文详矣，学者不能殫记也。宋皇祐中，徐秘书以韵语包括之，计一万五千言，而其义大备。《记》曰：“属辞比事，《春秋》教也。”属辞比事而不乱，则深于《春秋》者也。诵秘书之赋，其比事之切，非深于《春秋》者能然欤？《春秋赋》见《宋·艺文志》，有崔升、裴光辅、尹玉羽、李象诸家，而晁氏《读书志》又有杨筠《分门属类赋》十篇，独不载是书。朱氏《授经图》、焦氏《国史·经籍志》亦无之。则诸君子皆未之见者。古人之书往往不尽传于后世，或并其姓氏失之。若秘书《赋》寥寥数简，以藏书家所未及见者，幸得传于今日，此予所为輶然而喜也。

◇程积斋《春秋》序

元四明程积斋先生，尝慨《春秋》在诸经中独未有归一之说，遍索前代说《春秋》

者凡百三十家，沉潜？绎者二十余年，著《春秋本义》三十卷、《三传辩疑》二十卷、《或问》十卷，经筵申请下有司钁板于集庆路儒学，南海黄佐《南雍志》录其书，而别有《纲领》一卷，明著书大义。大旨以程、朱二氏之论，考正三《传》及胡氏之得失，作《本义》以发圣人之经旨，《辩疑》以订三《传》之疑似，《或问》以校诸儒之异同。其书世有传本，然余所见，则《本义》《或问》而已，《辩疑》缺佚不完。今刻二书，而《辩疑》姑俟焉。始四明之学多宗象山，惟黄震史蒙卿实为朱子之学。先生与其兄畏斋师事蒙卿，尽得朱子明体达用之指。二难自为师友，方严刚正，时人以二程目之。畏斋发明朱子读书之法，作《读书工程》，国子监尝取其书颁示校官以式学者。先生为是书，一本伊川、晦庵之意，遍览传说，折衷同异，欧阳圭斋言其精神心术萃在是书，朝夕改订，寝食为废。盖二先生学本紫阳，故其道问学之功，精专若是也。先生名端学，字时叔，举进士第二人，为国子助教，改翰林、国史院编修官，出为筠州幕，有循良称。畏斋名端礼，字敬叔，以荐为台州路儒学教授，《元史》有传。今著其略，俾读是书者，有以论其世焉。

◇赵氏《春秋集传》序

东山赵子常先生，元季师事九江黄楚望，传《春秋》之学，著《属辞》《补注》《师说》三书。为三《传》之学者，尊称之先生。复有《集传》十五卷，则先《属辞》而成者。自序言：“策书之例十有五，而笔削之义有八。”迨后《属辞》成，以《集传》义例微有未合，更须讨论，至正壬寅，先生再著其书，至昭公二十七年以病辍笔。门人倪尚谊授先生之义续成之，即今书也。先生常谓《属辞》特推笔削之权，而《集传》大明经世之志，必二书相表里，而后《春秋》之旨方完。则是书宜与《属辞》并行也，明矣。予得千顷堂藏本，因论次焉。窃观宋元之际，新安沐浴紫阳之泽，老师宿儒，多出其间。若云峰、双湖两胡氏，定宇陈氏，仲弘倪氏，见心程氏，皆能著书推明朱子之学。其与先生同时，又有环谷、蓉峰两汪氏，凤林朱氏，与先生辅翊开代，修明礼乐，为世儒宗。其纂辑群言，羽翼往说，如环谷之纂疏者，亦有其人。然未有迥然特出，能得知我罪我之义如先生者。先生蚤见楚望，即告以穷经之要在乎致思，于是深悟夫鲁史有一定之书法，圣经有笔削之大旨，鲁史亡而圣人所书遂莫能辨，独幸左氏《传》尚存遗法。杜预注左，于史例推之颇详。公、谷二氏多举书不书见义。其后止斋陈氏因《公》、《谷》所举之书法，以考正《左传》笔削大义，最为有征。故先生为《集传》，本之二家，而兼采众说，要使学者即策书之例，以求笔削之旨，则知圣经不可以虚词立异，破碎牵合以为说，而后圣人之经明矣。故朱凤林一见其书辄曰前无古人，其推服之如此，岂同时诸儒所可及哉！先生卒后，门人辑成藏弃，故人不识。嘉靖中，东阿刘隅始得其书于先生乡人汪元锡，而属教谕夏鏊传之。噫！后之学者知三《传》之不可废，不仅抱遗经以究终始者，岂必赖是书也夫！

◇清全斋《读春秋编》序

宋元之际，吴中多老师宿儒。若俞石涧琰、陈清全深、俞邦亮元燮、汤思言弥昌、王子英元杰，皆精究群经，咸有撰著。石涧之《大易会通》至一百三十卷，又为《集说》十卷，而他如经传考证、读《易》须知、卦爻象占分类不与焉。清全于《易》、于《诗》、于《春秋》皆有编，自宋社既屋，即谢去举业，沈潜问学，淹贯遗经，闭门教授。郑元祐称其年登耄耋，生识先辈著书立言咸造底蕴，良有然矣。《读春秋编》十二卷，原本左胡采摭诸说深有益于学者，偶获元槧本，为加校勘而属之梓。先生字子微，世为吴人，元天历间奎章阁臣，以能书荐，匿不肯出，别号宁极。所著诗文名《宁极斋稿》。子直，字叔方，有孝行，能继父业，以“慎独”名其斋。盖父子皆吴隐君子也。

◇张翠屏《春秋“春王正月”考》序

《春秋》，纪事之书也。纪事者，必有岁时月日，此经所以有“春王正月”之笔也。春者，周之春；正月者，周之子月。此鲁史册书之旧也。曰春王正月者，吾夫子之特笔也。后世不知册书之义，于是有夏时冠周月之说，而夫子从周之志荒矣。翠屏张志道先生始采摭群书以考订之，本之以《语》《孟》之言，而归宿于紫阳晚年之定论，别引《三传》与他经及史传以证之。其说之庞者，则为辩疑以折其误。凡为书二卷。嗟乎！六经之旨未易窥也，学者治经必先明其大者，则其余可得而通矣。《易·乾》之“四德”、《诗·二南》之《关雎》《书》之二《典》，《春秋》之“春王正月”，皆经旨之大者。于此无定论焉，则微言精意将有不能究者矣。先生是书剖析精当，于开章之大义井如，学者诚有得于此，则于全经之旨不有如振裘而挈领者哉！先生举元泰定丁卯进士，累官翰林、侍讲学士，入明仍故官。洪武二年，奉使册封安南国王。是书安南寓舍所著，书成而卒。宣德中，先生嗣孙隆始取手泽而梓之。

◇《春秋集传释义大成》序

《春秋》之义明，而传之真伪自辩。《春秋》何义乎？尊周明法、黜霸崇王、彰善代恶而已。王者之治天下，先之以教化，继之以法令，申之以赏罚。三者行则王政举、人心正，而《春秋》可以不作。周之东也，教化既衰，法令赏罚不行于天下，于是诸侯并吞，仁义道息，不有圣人出而正之，则乾坤不几息乎？故曰：“迹息诗亡，然后《春秋》作。”又曰：“《春秋》成而乱臣贼子惧。”此春秋之义也。夫举其纲而未及其目，断其义而未详其案，三《传》之作可少哉！乃有传而事之湮没者虽少，义之隐晦者滋多。盖以传闻异辞，各以意见为言，而理有未合。汉儒又各执一家之说以相传习，遂使后世因传以误经，觉经之立法多不明，赏罚多不当，而尊王立教之本义亦遂失矣。程子曰：“读《春秋》者，当以传考经之事迹，以经别传之真伪。”朱子曰：“孔子非有意以一字为褒贬，但直书其事，而善恶了然。”元新安俞氏著《春秋集传释义》，一以程、朱为断，参以啖、赵诸家而折衷以己意，于是经义明而传之真伪是非判如黑白。噫！汉、唐诸儒但知释传，不知明经，胡

氏虽明经义，而时事激发，又多附会，较之程、朱无事穿凿而自得圣人之意者，大有径庭。俞氏之书出，可以救胡氏之偏而发程、朱所未尽。二百四十二年之间，其治乱兴衰之故，仁义诈力之异，贤不肖之用舍，行政出令之得失，足为人鉴戒者，何可胜数？特经义不明，而学术之害有不可胜言者。夫以圣人垂训之经，反致有贻误后学之弊，此俞氏之书所以不可不亟为表彰于天下也。

◇河南聂氏《三礼图》序

九经《礼》居其三，其文繁，其器博，其制度今古殊，学者求其辞不得，必为图以象之，而其义始显。即书以求之，不若索象于图之易也。《礼》之有图自郑康成始，而汉侍中阮湛受《礼》于綦母君，取其说为图，又有梁正、夏侯伏明、张镒三家，而今皆无传矣。周世宗厘正典礼，洛阳聂崇义以国子司业兼太常博士，凡山陵禘祫、郊庙器玉之制度，悉从其讨论。乃考正《三礼》旧图，绩素而申释之，篇叙其凡，参以古今沿革之说，至宋建隆三年表上于朝。诏太子詹事尹拙集儒学之士重加参议，拙所驳正，崇义复引经释之。当书成时，太祖嘉其刊正疑讹，既被紫绶犀带白金纁帛之赐，颁其书学宫，又以其图绘国子监宣圣殿后北轩之壁。逮至道初，旧壁颓落，命易以版，改作于论堂之上。咸平中，天子幸学，亲览观焉。《宋史》列诸儒林之首，可谓极儒生稽古之荣矣。其后陆佃撰《礼象》，陈祥道作《太常礼书》，正聂氏之失而补其阙，于是贾安宅、王普交言崇义未尝亲见古器，出于臆度，有诏毁学宫旧画两壁图。然绎窋学士俨序聂氏书，称其博采旧图，凡得六本，则实原于梁、郑、阮、张、夏侯诸家之言，而非出于臆说。《礼》图之近乎古者，莫是书若也。惟是尹拙依旧图画釜，聂氏去釜画镬，两人异同，当日下中书省集议，张昭谓釜不可去，而《周官》《仪礼》皆有镬，因请两存之，图镬于鼎下。而今流传雕本有釜无镬，则有不可解者，请以质深思博学之君子。

◇卫氏《礼记集说》序

高堂生传《士礼》十七篇，五传而得戴德、戴圣。德因河间献王所得《记》百三十一篇及《明堂阴阳记》三十三篇，删其繁重为八十五篇，号《大戴礼记》。圣复删次德书为四十六篇，号《小戴礼记》。其后马融传小戴之学，增入《月令》《明堂位》《乐记》三篇，合四十九篇，今列在学官者是。郑注、孔疏而外，宋之李格非、吕大临、陆佃、马希孟、方悫皆有解，世不尽传。宋昆山卫湜集诸家解，为《说》百六十卷，各著其姓氏，理宗宝庆二年表上于朝，得寓直中秘，盖嘉其用心之勤也。尝慨是经虽列学官，而士子所习，惟元东汇陈浩之《集说》与永乐时所辑《大全》而已。浩书陋略不足观，《大全》主浩而无所阐发，又成于胡广辈之手，其与《易》《春秋》诸经之剿袭先儒成书者等耳。正叔网罗采辑，无所不周。即他书杂录有所论及，亦摭入之，使先王立纲陈纪之道，为经为曲之详，灿然明著，岂非是经之大全也欤！是书钞帙颇有缺佚，然不碍其可传。因从东海夫子请归，校而授梓焉。湜字正叔，卫文节公泾弟，累官朝散大夫，知袁州，学者称栢斋先生。兄弟三

世同居，理宗名其堂曰友顺，实夫子邑先正也。

◇东岩《周礼订义》序

东岩《周礼订义》八十卷，载《宋史·艺文志》。宋之群儒经义最富，独诠释《周礼》者寡，见于《志》者，仅二十有二家而已。盖自王安石当国，变常平为青苗，借口《周官·泉府》之遗，作新经义，以所创新法尽傅著之。又废《春秋》，不立学官。于是与王氏异者，多说《春秋》而罢言《周礼》。若颖滨苏氏、五峰胡氏，殆攻王氏而并及于《周礼》者与！昔之言《周礼》者，郑康成信为周公致太平之迹，陆雉谓为群经源本，王仲淹美其经制大备，朱子亦称其广大精密，非圣人不能作，则为先秦古书无可疑焉者。东岩之说，谓周公将整齐六典以为宅洛计，不幸歿，而成王不果迁，规模不获。究其说，本郑氏注而畅发之。至云冬官未尝亡，错见于五官中，则与临川俞寿翁合。其編集诸家之说，宋儒自刘仲原父以下凡四十五家，可谓详且博矣。东岩姓王氏，名与之，字次点，乐清人。从松溪陈氏学，传六典要旨。其书淳祐初郡守赵汝腾进于朝，付秘书省，特补一官，授宾州文学，终通判泗州，卒年九十有七。

◇《仪礼集说》序

鲁高堂生传《士礼》十七篇，即今《仪礼》也。生之传既不存，而王肃、袁准、孔伦、陈铨、蔡超宗、田僧绍诸家注亦未流传于世。今自注疏而外，他无闻焉。岂非昌黎所言：文既奇奥，且沿袭不同，复之无由，学者不好，故亦不之传说邪？夫亦周公之著作、三代之仪文，学者有志稽古礼文之事，乃以其词之难习，遂无以通其义，非有志于学者之所为也。元大德中，长乐敖继公以康成旧注疵多醇少，辄为删定，取贾疏及先儒之说补其阙，又未足，则附以己见，名曰《集说》，盖不以其艰词奥义自委者已。宋相马廷鸾生五十八年始读《仪礼》，称其奇词奥旨中有精义妙道焉，纤悉曲折中有明辨等级焉。观于继公是书，不信然欤！继公字君善，闽人而家于吴兴，居小楼，日从事经史，吴士多从之游，赵孟其弟子也。以江浙平章高彦敬荐，为信州教授。

◇永嘉蔡氏《论语集说》序

《论语集说》二十卷，宋朝散郎、试太府卿、兼枢密副都承旨、永嘉蔡节编，淳祐五年表进于朝。今作十卷，盖当日刊于湖泮本已然也。是书《宋·艺文志》不载，诸家藏书目俱未收。予乃购得之，幸矣。永嘉自伊洛诸儒未作，王景山出，发明经蕴，述儒志一编，其后则有刘安节元承、鲍若雨商霖、谢天申用休、潘旻子文、周行己恭叔、陈经正贵一暨弟经邦贵叙，其姓名皆入《伊洛渊源录》中。而著群经说者，若陈鹏飞少南、薛季宣士龙、张淳忠甫、叶适正则、戴溪肖望、陈傅良君举、叶味道知道、钱文子文季、黄仲炎若晦、汤建达可、陈埴潜室、王与之次点皆有成

书著录。谚曰温居瀛壖，理学之渊，不信然与？顾诸君子之书或存或亡，不可尽得，予序蔡氏《集说》而附及之，盖将以求所未见焉。

◇建安蔡氏《孟子集疏》序

牧堂老人蔡发仲与朱子称：其教子不于利禄，而开之以圣贤之学，非世人所及。其子元定、季通，孙渊伯静、沉仲默，曾孙模仲觉、抗仲节，皆隐居著书。既而仲觉任建安书院席长，以谢方叔、汤恢荐，补迪功郎，添差本州教授。而仲节旋中进士，为诸王教授，累迁端明殿学士，参知政事。蔡氏撰述，季通《律吕新书》，仲默《书传》最著。而伯静《易训解》，鄱阳董氏载入《诸儒沿革》中。仲觉则有《易传集解》《大学衍》《论语、孟子集疏》《河洛探赜》《续近思录》诸书。予所见者，仅《孟子集疏》十四卷而已。仲节为之后序，称其参《或问》以见同异，采《集义》以备阙遗，洵有功于《集注》者矣。仲觉被荐，尝疏言敬义为万世帝王心学之本，而《大雅》“价人维藩”六语，为国家守邦要道。又请以白鹿洞学规颁诸天下。盖无愧牧堂老人之教，而其家学诚非世人所能几及也。

◇经解书后（附）

◇书成氏《毛诗指说》后

右《毛诗指说》四篇，一兴述，二解说，三传受，四文体，合为一卷，唐成伯瑜撰。后有建安熊子复跋尾，盖乾道中尝刊于京口者。唐以诗取士，而《三百篇》者，诗之源也，宜一代论说之多。乃见于《艺文志》者，自《毛诗正义》而外，惟成氏二书及许叔牙《纂义》而已。成氏《断章》二卷，许氏《纂义》十卷，今俱无存，惟是编在耳，不可不广其传也。

◇书张文潜《诗说》后

文潜《诗说》一卷，杂论雅、颂之旨，仅十二条已，载《宛丘集》中，后人钞出别行者。观所论土宇反章一则，其有感于熙宁开边斥境之举而为之也欤？《宛丘集》今不甚传，此亦经学一种，因校而梓之。

卷十三 序、记、书

◇序

◇《名家绝句钞》序

夫圓流千顷，鸡犀划而中分；灵岳三成，厝开而独擘。吴淞之水，并剪双裁；昆岫之瑶，昆刀缕切。只袜溅杨家之泪，自尔温戏；半鬟窥徐后之妆，居然掠削。团？三五，乍看新月宜人；烂熳千行，时或残英照眼。靡不宝文螭之单翼，珍赤鲤之片鳞。物既有之，并以偏隅擅胜；文亦宜尔，自应断句专长也。然则阳春渌水，缔构差同；子夜前溪，体裁相类。较之《易水》两言之制，《大风》三叠之章，机上、盘中，回旋隐互，焦卿、秦女，飒逌纵横，似犹鳧鹤之异短长，不啻马牛之殊逆顺。而乃同收乐府，狎处词坛，泾渭可以不分，涪汉于焉相混。盖古人言以足志，声律不以为程；情见乎辞，字句非其所限。流泉呜咽，行止随时；天籁噫嘘，洪纤应节。无律体之可称，何绝句之能准乎！自夫沈宋连镳，斫雕破朴；高岑继轨，毁瓦为方，则有沈香倾妃子之杯，画壁下女伶之拜。仲初新体，并咏宫中；少伯悲吟，都由塞上。柘枝蛮舞鼓腰，魂断流官；杨柳妍词笏面，神飞节使。恼鄜州之从事，何物红儿？悲蜀国之夫人，当年白帝。固不独义山咏史，讽托情深；抑岂惟杜牧闲愁，风流调逸！迩来作者代不乏人。始则蒐讨于洪公，继复校雠于赵氏。观斯止矣，可略言焉。独有明起元宋之衰，昭代际唐虞之盛，洪河岱岳，既釭洞而惊神；拳石偃松，亦留连而动目。短章片什，可喜可观。至乃鹤裘客妇，裂长笛于五湖；乌犍佯狂，垫角巾于三泖。四杰之争芳兰蕙，月死珠伤；七子之互有薰蕕，水清石见。谢山人邺下琵琶，徐博士扬州烟月，昆仑兀冪，不减白蓑青笠之游；蒙叟幽忧，可怜红豆碧梧之句。尧峰山麓踏歌，旧有汪伦；历下亭隅觞咏，夙推王令。并可以发挥雅颂，领袖风骚。迷谷之华四照，炜炜欲浮；版桐之圃九层，峣峣直上。

顾以简编杂遫，载重牛腰；后学模糊，情惊鼠吓。于是杜陵蒋诩（宣虎），扫径余闲；吴郡顾荣（茂伦），挥扇多暇。适逢吴札乍返延州（汉槎），遂相与研露晨书，然糠暝写，撷两朝之芳润，掇数氏之菁英，凡若干篇，都为一集。按新词于菊部，磊磊敲珠；奏丽曲于芍阑，声声戛玉。若彼文犀翠羽，拣自金盘；因而合组纂纂，织成璇锦。藏之秘帙，顿令更得异书；悬彼国门，定是难增一字。

某技鬼雕虫，识惭窥豹。入贾胡之肆，目炫琳琅；游广乐之庭，梦迷闾阖。惊看妙选悬冰，鉴而呈形；快睹雅裁衔烛，阴而照夜。自此南山望雪，何妨意尽终篇；抑令东海熬波，不惮应声成韵。循环在手，似获灵珠；吟讽忘疲，如探束锦。爰题简首，载以芜词，拟玄晏先生之笔，非所敢居；诵昭明太子之编，实缘多幸尔。

◇《渌水亭宴集诗》序

清川华薄，恒寄兴于名流；彩笔瑶笺，每留情于胜赏。是以庄周旷达，多濠濮之寓言；宋玉风流，游江湘而托讽。文选楼中揽秀，无非鲍谢珠玑；孝王园内拏芳，悉属邹枚黼黻。予家象近魁三，天临尺五。墙依绣堞，云影周遭；门俯银塘，烟波滢漾。蛟潭雾尽，晴分太液池光；鹤渚秋清，翠写景山峰色。云兴霞蔚，芙蓉映碧叶田田；雁宿凫栖，粳稻动香风冉冉。设有乘槎使至，还同河汉之皋；傥闻鼓枻歌来，便是沧浪之澳。若使坐对亭前，绿水俱生泛宅之思；闲观槛外，清涟自动浮家之想。何况仆本恨人，我心匪石者乎！

间尝纵览芸编，每叹石家庭树不见珊瑚，赵氏楼台难寻玳瑁。又疑此地田栽白璧，何以人称击筑之乡？台起黄金，奚为尽说悲歌之地！偶听玉泉呜咽，非无旧日之声；时看妆阁凄凉，不似当年之色。此浮生若梦，昔贤于以兴怀；胜地不常，曩哲因而增感。王将军兰亭修禊，悲陈迹于俯仰，今古同情；李供奉琼筵坐花，慨过客之光阴，后先一辙。但逢有酒开尊，何须北海偶遇？良辰雅集，即是西园矣。且今日芝兰满座，客尽凌云；竹叶飞觞，才皆梦雨。当为刻烛，请各赋诗。宁拘五字七言，不论长篇短制。无取铺张学海，所期抒写性情云尔。

◇贺人婚序

桥填乌鹊，停梭传天上双星；门列鸳鸯，挟瑟艳人间三妇。荧荧碧月，玉镜临台；扰扰绿云，珠帘动幌。谱秦箫于岭上，岂有他欤？解郑佩于江皋，方斯盛矣！东家某子，芙蓉秋藻，杨柳春姿。临琪树于崔生，照玉山于裴叔。纪瑜逸藻，青镂投怀；江令高情，彩毫入梦。才擅枯珠之岸，缘成种玉之田。青锁窥窗，香染尚书之宅；红绡系幔，丝牵宰相之楼。觅杵臼于玄霜，得灵犀于彩翼。于是雀屏夜启，鸳帐晨开。旭日初升，方当奠贄；晓霞未烂，早赋催妆。争紫潘岳之车，轻飏弱袂；顾盼王濛之镜，重整新冠。百子催铺，七香待驾。路焚石叶，携来红泪之壶；台照环榴，看挂火齐之钏。流苏四角，垂锦带于中心；罗绣双缠，系朱丝于上腕。正安抹额，反插搔头。繁休伯之定情，相于永结；贾公闾之联句，叹息应知。莞蕸横陈，丽三星于洞户；葳蕤浅闭，对满月于高楼。况复七日初还，五云方现？纹添弱线，可知缘结今生；漏永银壶，幸值筹长此夜。凤皇应律，自识阳回；鹧鸪销声，无忧天曙。仆燕贺未能，凤占有庆。美人公子，宁代董生却扇之词；名士倾城，庶同曹植感婚之赋。聊疏短引，用佐美谈云尔。

◇记

◇石鼓记

予每过成均，徘徊石鼓间，辄竦然起敬曰：此三代法物之仅存者。远方儒生，或未多见。身在辇毂，时时摩挲其下，岂非至幸？惜其至唐始显，而遂致疑议之纷纷也。《元和志》云：石鼓在凤翔府天兴县南二十里，其数盈十，盖纪周宣王田于岐阳

之事。而字用大篆，则史籀之所为作也。自正观中苏勉始志其事，而虞永兴、褚河南、欧阳率更、李嗣真、张怀瓘、韦苏州、韩昌黎诸公，并称其古妙无异议者。迨欧阳文忠则疑自周宣至宋垂二千年，理难独存。夫岫嵎之字，岳麓之碑，年代更远，尚在人间，此不足疑一也。程大昌则疑为成王之物，因《左传》成有岐阳之搜，而宣王未必远狩丰西。今搜岐遗鼓，既无经传明文，而帝王辙迹可西可东，此不足疑二也。至温彦威、马定国、刘仁本皆疑为后周文帝所作，盖因史“大统十一年西狩岐阳”之语故尔。按古来能书如斯、冰、邕、瑗无不著名，岂有能书若此而不名乎！况其词尤非后周人口语。苏、李、虞、褚、欧阳近在唐初，亦不遽尔昧昧，此不足疑三也。至郑夹漈、王顺伯皆疑五季之后鼓亡其一，虽经补入，未知真伪。然向傅师早有跋云：数内第十鼓不类，访之民间，得一鼓，字半缺者，较验甚真，乃易置以足其数，此不足疑四也。郑复疑靖康之变，未知何在。王复疑世传北去，弃之济河。尝考虞伯生尝有记云：金人徙鼓而北，藏于王宣抚宅，迨集言于时宰，乃得移置国学，此不足疑五也。予是以断然从《元和志》之说，而并以幸其俱存无伪焉。尝叹三代文字，经秦火后至数千百年，虽尊彝鼎敦之器出于山岩屋壁陇亩墟墓之间，苟有款识文字，学者尚当宝惜而稽考之。况石鼓为帝王之文，列胶庠之内，岂仅如一器一物供耳目奇异之玩者哉！谨记其由，来以告夫世之嗜古者。

◇书

◇书上座主徐健先生书

某以诎才末学，年未弱冠，出应科举之试，不意获受知于钜公大人，厕名贤书。榜发之日，随诸生后，端拜堂下，仰瞻风采，心神肃然。既而屡赐延接，引之函丈之侧，温温乎其貌，谆谆乎其训词，又如日坐春风，令人神悸。由是入而告于亲曰：吾幸得师矣；出而告于友曰：吾幸得师矣。即梦寐之间，欣欣私喜曰：吾真得师矣。

夫师岂易言哉？古人重在三之谊，并之于君亲，言亲生之，师成之，君用而行之，其恩义一也。然某窃谓师道至今日亦稍杂矣。古之患，患人不知有师。今之患，患人知有师而究不知有师。夫师者，以学术为吾师也，以文章为吾师也，以道德为吾师也。今之人谩曰：师耳，师耳。于塾则有师，于郡县长吏则有师，于乡试之举主则有师，于省试之举主则有师，甚而权势禄位之所在则亦有师。进而问所谓学术也、文章也、道德也，弟子固不以是求之师，师亦不以是求之弟子。然则师之为师，将仅仅在奉羔、贄雁、纳履、执杖之文也哉？洙泗以上无论已。唐必有昌黎，而后李翱、皇甫湜辈肯事之为师。宋必有程、朱，而后杨时、游酢、黄干辈肯事之为师。夫学术、文章、道德罕有能兼之者，得其一已可以为师。今先生不止得其一也，文章不逊于昌黎，学术道德必本于洛、闽，固兼举其三矣。而又为某乡试之举主，是为师之道无乎不备，而某能不沾沾自喜乎？

先生每进诸弟子于庭，示之以六经之微旨，润之以诸子百家之芬芳，且勉以立身行己之谊。一日进海某曰：为臣贵有勿欺之忠。某退而自思，以为少年新进，未有官守，勿欺在心，何裨于用，先生何乃以责某也？及退而读史，宋寇准年十九登第，时崇尚老成，罢遣年少者。或教之增年，准不肯曰：“吾初进取，何敢欺君？”又晏殊童年召试，见试题曰：“臣曾有作，乞别命题。”虽易构文，不敢欺君。然后知所谓勿欺者，随地可以自尽。先生固因某之少年新进而亲切海之也。某即愚不肖，敢不厚自砥砺奋发，以庶几无负大君子之教育哉！

承示宋元诸家经解，俱时师所未见，某当晓夜穷研，以副明训。其余诸书，尚望次第以授，俾得卒業焉。

◇与顾梁汾书

扈跸遄征，远离知己，君留北阙，仆逐南云，似蛰蛰之初分，如圭璋之乍判。柳青青于客舍，魂恻恻于河梁。缱绻之情，兄固有之，弟亦何能不尔也。

惟是登封大典，旷代希逢。趣马微劳，臣职已定。老父艾年尚勤于役，渺予小子，敢惮前驱？况复王道荡平，非同九折，天清气朗，时值三秋，风伯驱尘，雨师洒路，千乘万骑，驰骤风飙，豹纛旌，蔽亏日月，云门宛转，与雁唳而俱闻，铙吹悠扬，随渔歌以互答，黄华分翠凤之香，紫蓼映红云之丽？仆手携湘管，身佩吴刀，随昌宇以侍衣，偕方明而夹毂，日睹龙颜之近，时亲天语之温，臣子光荣，于斯至矣。虽霜花点鬓，时冒朝寒，星影入怀，长栖暮草，然但觉其欢欣，亦竟忘其劳也。

若夫登岱宗之绝顶，齐鲁皆青；涉河济之波涛，鱼龙可狎。金泥玉检，秦篆依然；瓠子宣房，汉歌不远。指匹练而吴趋在望，乘枯槎而银汉可通。此亦宇宙之神皋，河山之奥室也。虽无才藻，颇有赋心。既而自念身在属车豹尾之中，名属缀衣虎贲之列，尚敢与文学侍从铺《羽猎》而叙《长杨》也乎！至于铁锁横江，金焦矗日，倚妙高之台畔，访瘞鹤之遗踪，瓜步雄风，神鸦社鼓；扬州逸兴，坐月吹箫。听六代之钟声，半沈流水；望三山之云影，时动褰裳。此亦可以兴吊古之思，发游仙之梦者矣。更有鹤林旧刹，甘露精蓝，近海岳之幽偏，多老颠之遗墨，零缣断素，虽不可求；薜碣牛磨，时有可问。此又仆所徘徊慨慕而不自己者也。

及夫楚树连云，吴舫泊岸，牙樯锦缆，觉鱼鸟之亲人；青幃碧油，喜风花之媚客。梁溪几曲，无异鉴湖；虎阜一拳，依稀灵岫。千章嘉树，户户平泉。一领绿蓑，行行西塞。品名泉于萧寺，听鸟语于花溪。昔人所云茂林修竹，清流激湍者，向于图牒见之，今以耳目亲之矣。且其土壤之美，风俗之醇，季札遗风，人多揖让；言偃故里，士尽风流。稻蟹莼鲈，颇堪悦口；渚茶野酿，实足销忧。而况林屋龙峰，布帆不断；金阊锡岭，兰楫可通？侍绛帐于昆冈，结芳邻于吾子。平生师友，尽在兹邦。左挹洪厓，右拍浮丘。此仆来生之夙愿，昔梦之常依者也。

夫苏轼忘归，思买田于阳羨；舜钦沦放，得筑室于沧浪。人各有情，不能相强。使得为清时之贺监，放浪江湖；亦何必学汉室之东方，浮沉金马乎？傥异日者脱屣宦涂，拂衣委巷，渔庄蟹舍，足我生涯，药臼茶铛，销兹岁月。皋桥作客，石屋称农，恒抱影于林泉，遂忘情于轩冕。是吾愿也，然而不敢必也。悠悠此心，惟子知之，故为子言之。北风多厉，千万眠食自爱。

◇与韩元少书

仆幼习科举业，即时窃喜为古文词，然不敢令师友见也。今幸出大匠之门，且与足下为同年友。当古学振兴之日，人思自奋，仆亦妄希著述以正有道。而作者林林浩乎渊海，才单力弱，绠短汲深，尚同彭祖之观井，惴惴惟恐失坠。而足下遽欲引之于十洲三岛之间，以问五城十二楼之胜，其可得哉？惶恐惶恐！

至所商明文选，仆颇得其梗概，敢为足下陈之。明之为代，近接宋元，则明之为学，亦直承宋元诸儒之学。三百年间，追踪大家者，约略得数人焉。宋潜溪经学醇正，故文有根柢，春容大雅，无蹶张叫嚣之气，自成清庙明堂之音。虽梵宇琳宫多其碑碣，竺书道笈无所不收，偶或牵率应酬，尚少持择，然不足为之病也。方逊志如黄河天落，直泻万里，而风激湍回，正复沦涟绮澱，是子瞻之后身也。至其不磨之气节涌现行墨间，又与文山、叠山颀颀矣。杨东里平澹之中饶有妙味，朱弦疏越，一唱三叹，簞簞乎多古意也。当时仁宗最喜永叔文字，而东里似之。主臣一德，仿佛可见。王伯安以天纵之奇才，加心学之独得，故其为文如昆刀之切玉，快马之斫阵，为天地间第一种快文。即其论学有偏，然而文自单行，功斯不朽矣。王遵岩学南丰，经术之气溢于楮墨，宁迂而不径，宁拙而不巧，如入宗庙庠序所见，无非瑚璉簠簋也。归震川之文，源本性灵，取材经史，淘汰之功，良为心苦。柳宗元云：本之太史以著其洁，似足当之。虽斤斤绳尺，而当其得意时，正复汪洋洸恣，故不得病其尺幅之狭耳。唐荆川如大鹏培风，游龙戏海，力量气魄，迥异寻常，世间无物可以夭阏之者。至其文多偶比，是学昌黎《原道》《原毁》之文而尚少变化。钱牧斋腹笥既富，文笔又长，援古证今，每发一端便如瓶水泻地，迸注分流。惟深锢于朋党之见，或有失实。而其为榼祸诸君子志传之文，淋漓感慨，足裨史乘，然亦病其杂矣。大抵弘、正以前，皆无意为古文者也，以其学问之余，溢为鸿章巨制。嘉、隆以来有意为古文者也，波澜驰骋，远逼古人，而未免有规摹之迹。他如刘青田、王子充之雅洁，李崕峒之雄古，罗圭峰之僻涩，罗念庵之醇茂，赵浚谷之苍莽，王弇州之瑰奇，虽非大家嫡系，亦文坛之雄霸也。自此以外，桧后无讥焉。愚见如此，足下以为然否？幸进而教我。

◇与梁药亭书

仆少知操觚，即爱《花间》致语，以其言情入微，且音调铿锵，自然协律。唐诗非不整齐工丽，然置之红牙银拨间，未免病其版筑矣。从来苦无善选，惟《花间》与

《中兴绝妙词》差能蕴藉。自《草堂》《词统》诸选出，为世脍炙，便陈陈相因。不意铜仙金掌中，竟有尘羹涂饭，而俗人动以当行本色诮之，能不齿冷哉？

近得朱锡鬯《词综》一选，可称善本。闻锡鬯所收词集，凡百六十余种。网罗之博，鉴别之精，真不易及。然愚意以为，吾人选书，不必务博，专取精诣杰出之彦，尽其所长，使其精神风致涌现于楮墨之间。每选一家，虽多取至什至伯无厌。其余诸家，不妨竟以黄茅白苇概从芟。青琐绿疏间，粉黛三千，然得飞燕、玉环，其余颜色如土矣。天下惟物之尤者，断不可放过耳。江瑶柱入口而复咀嚼，鲍鱼、马肝有何味哉！

仆意欲有选如北宋之周清真、苏子瞻、晏叔原、张子野、柳耆卿、秦少游、贺方回，南宋之姜尧章、辛幼安、史邦卿、高宾王、程钜夫、陆务观、吴君持、王圣与、张叔夏诸人，多取其词汇为一集，余则取其词之至妙者附之，不必人人有见也。不知足下乐与我同事否？有暇及此否？处雀喧鸠闹之场，而肯为此冷澹生活，亦韵事也。望之望之！

◇与某上人书

昨见过，时天气甚佳，茗碗熏炉，清谈竟日，颇以为乐，今便不可得已。承示万法归一，一归何处，令仆参取时即下一转语曰：万法归一，一仍归万，此仆实有所见，非口头禅也。上人心有不契，不复作答，仆亦畏丰干饶舌，默默而退。既而思韩昌黎性喜辟佛，然而凡为诸上人作序，必告之以吾儒之理。亦以竺氏之教虽非，而其徒皆吾万物一体中人也，何忍竟摈而不与之言！仆何人哉？敢与昌黎比？然而既与上人交，则极欲上人之共知此理。犹如人得美饮食，而不与一父之子同享之，岂情也哉！自有天地以来，有理即有数。数起于一，一与一对而为二，二积而成万。凡二便可见，一便不可见，故乾坤也，阴阳也，寒暑也，昼夜也，呼噏也，皆可见者也。一者何？太极也。欲指一物以为太极，即伏羲、文王、周公、孔子之圣亦有所不能。故周子曰：无极而太极。此无上妙谛也。吾儒太极之理在物物之中，则知一之为一，即在万法之中。竺氏亦知有所为太极者，彼误认太极为一物，而其教又主于空诸所有，故并欲举太极而空之，所以有一归何处之语，不知物物具一太极，一即在万法中。竺氏求空而反滞于有，不如吾道之物物皆实，而声臭俱冥，仍不碍于空也。黄面瞿昙，定不河汉，吾言上人，亦能再下一语否？

卷十四 杂文

◇万年一统颂（有序）

恭惟皇帝陛下神凝得一，学懋通三，建八柱于天枢，张四维于地络，固已德隆宙始，功焕千金者矣。至如敬天深钦若之心，法祖大配京之烈，龙骧奋武，绍智勇于商汤；虎观仇经，接心源于羲《易》。圣孝之侍膳，问安无间；皇慈之训储，毓德尤勤。莫非万善咸该，一中独运，故能万邦和协而四海永清者也。犹恐精一危微，史册有难详之粹美圣神。文武廷臣，多未悉之载颺。臣日侍螭坳，亲依黼座，游街衢而鼓腹，比葵藿以倾心。白鸟栖周囿之中，饮和既久；青藜托尧阶之上，沾泽惟多。扈从之余，见闻无非至理；趋锵之下，纪述已积名言。敢为击壤之歌，用伸天保之祝。识同萤爚，宁有见于曦舒；才极涓埃，曾何加于海岳？第枵马恋主，自知盈缶之诚；而梧凤鸣时，聊卜过历之瑞云尔。颂曰：

巍巍惟天，穆穆惟皇。帝力何有？有此万方。有风有雨，有日月光。休兹皞皞，澹然以忘。万年一统，世跻羲黄。天祚有清，万方颂圣。譬彼观天，在衡齐政。譬彼测海，蠡智私逞。

康衢之谣，轩无斲。臣师其意，对扬休命。天眷在帝，帝益虔虔。陶匏稿秸，匪直郊坛。亦临亦保，举念皆天。怀柔百神，爰及竺干。面稽昭格，灵贶殷闾。猗与那与，世有浚哲。

绍庭上下，无竞维烈。开创守成，同涂合辙。万物作睹，纘承不辍。昭克配功，万世是揭。念典于学，逊志时敏。乐此不疲，广览博引。理学洙泗，异端无蹊。勤若儒生，五夜功准。

况天纵资，一览而尽？问夜辨色，寒暑视朝。天颜龙表，云日则尧。委裘垂策，政简科条。惟廉与法，以肃百僚。无汉杂霸，迈周诵钊。勤政之后，孝奉两宫。问安侍膳，尊养必躬。

天子而孝，其德弥弘。而又斋遯以时，谒陵六飞。屡驾感慕，遗弓重兹。国本元良，庆衍毓德。少阳承华，乃践慎简。名臣谕道以善，鲍鱼必除，邪蒿弗荐。

礼乐诗书，圣训不倦，鲸鲵横海，猋猋载涂。不思报德，恣其呼啸。爰飞金矢，张我天弧。皇威所暨，拉朽摧枯。山无伏莽，海不扬波。加以文治，临雍讲学。辟水环桥，陈经扬榷。

绝域从师，虎贲磨琢。四海弦歌，九州礼乐。一道同风，群归祓濯。忧劳万姓，罔或宴安。翠华所至，亲问闾阎。民依軫念，知悉艰难。撙节爱养，财货无殫。九年

之蓄，式是《周官》。

于铄放勋，昭兹万世。声教四敷，下蟠上际。民时雍哉，尧曰治未？小臣何幸，亦是悠憩。沐泽沾渥，臣节自励。何以事君？曰忠与爱。暨清慎勤，以效感戴。踊跃欢欣，颂其梗概。

帝德如天，治隆三代。寿祚悠长，万有千载。

◇忠孝二箴（有序）

窃惟含齿戴发之伦，罔不知有君亲。而生成高厚，在某更有不同者。肉食锦衣，朱轮华毂，出自襁褓，至于弱壮，承恩席宠，溢分逾涯。而悠悠岁月，罔知报称，朝夜兴思，忧惕靡安。夫苍穹之高，非虫豸所能感；春晖之煦，非寸草所能答。然而犬马之诚，乌鸟之私，有不能自己者。敬赋二箴，书之座右，庶几出入观览云。

济济群工，盈盈朝列。独臣卑微，瞻天近日。缀衣趣马，俾之供职。长杨五柞，豹尾龙脊。晷刻无离，时呼在侧。尔发尔肤，咸帝之德。尔食尔衣，咸帝之泽。恩之渥矣，真同罔极。

葵思倾阳，马思竭力。曾是有知，不共朝夕？肱踵可捐，敬勤无忒。右忠箴高门悬薄，孰不有亲？藐予小子，独异等伦。

有怙有恃，玉叶金茎。鞠我育我，早被华缨。程母画荻，韦相传经。延师就塾，望尔有成。箕裘之业，庶几克承。婉兮变兮，突弁如星。有玉勿琢，恐坠家声。先师垂训，显亲扬名。

敢不黾勉，无忝所生？

右孝箴

◇《易》九六爻大衍数辨

《易》言理也，而数有不通，则无以明理。何先儒亦似有味于数以昧于理者乎？他不具论，即如每卦六爻，必分冠之曰九、曰六，先儒曰九为老阳，六为老阴，君子欲抑阴而扶阳，故阳用极数，阴用中数。是说也，予窃疑之。夫阴阳天道，岂徒用数而能抑之、扶之哉！尝深思而得之曰：此无他，天地之正数，不过一二三四五之正数。至六七八九十之成数，则各有所配，非正数矣。作《易》者每用正数，故孔子曰：参天两地而倚数。其参天不过一也、三也、五也，而一与三、与五非九乎？其两地不过二也、四也，而二与四非六乎？此九、六为天地正数，故可分冠于各爻

。若曰扶阳抑阴，于分爻之义无取，其昧于数者一也。又如大衍之数五十，其用四十有九。先儒曰数所赖者五十，又曰非数而数以之成。是说也，予犹疑之。夫数贵一定，而曰所赖五十，非数而数，不大诞缪哉！尝深思而断之曰：此脱文也。天一、地二，天三、地四，天五、地六，天七、地八，天九、地十，数正五十有五，故乾、坤之策，始终此数。《系辞》明曰：天数二十有五，地数三十。五十有五，岂不显然？而何独于此减其五数以另为起例哉？至于所用之数，或曰除六虚言之，引揲蓍为证，亦非也。盖数始于一，终于五，天道每秘其始终以神其消长，故虚一与五以退藏于密，则其用四十有九而已，此后世遁甲之术所由出也。若曰除六虚于始终之义未明，其昧于数者二也。虽然，亦谓其理当如是耳。有不信者，试为焚香静坐以深探之。

◇《诗》名物驹虞辨

身为大儒，则毋务为新奇之论。如《诗》驹虞之为仁兽，其说旧矣。独贾谊《新书》本《韩诗章句》，谓驹为文王之囿，名虞，乃司兽之官，后儒竟无有从之者。欧阳文忠学博才鸿，常力诋先儒穿凿附会之非，其立论不诋，固粹然大儒也，乃独于《新书》有取焉。谓毛、郑未出之前，说者不闻以驹虞为兽，汉人侈称祥瑞，亦无有以为言。不知其何物也，于是直断以无此义。噫！误矣。按《山海经》云：林氏国有珍兽，大若虎，五彩毕具，名曰驹牙，即《诗》所谓驹虞也。《太公六韬》《淮南鸿烈》皆云散宜生曾得驹虞以献纣，相如《封禅书》曰：“囿驹虞之珍禽，徼麋鹿之怪兽。”又一见于《瑞应图》，一见于《王会图》，皆是物也。张平子《东京赋》则曰：“囿林氏之驹虞。”何平叔《景福殿赋》则曰：“驹虞承兽，素质仁形。”晋安帝时，新野有驹虞见。又罗愿《尔雅翼》以为似马，王伯厚以为驹吾、驹牙、驹虞，一物也。然则确证甚多，安得谓无是物乎？其他纵不可信，而太公在毛、郑之前，淮南、相如、《山海经》与毛同时，比郑为先，尚亦不足信乎？乃知毛、郑之说不为无据，而欧公此论特未之详考耳。吁！是《诗》词旨与序义相合，较更明白，似无待辨。而吾独惜文忠大儒，乃有此误也，或亦其好新奇之过与？

◇赋论

《诗》有六义，赋居其一。《记》曰：登高能赋，可为大夫。诗一变而为骚，骚一变而为赋。屈原作赋二十五篇，其原皆出于诗，故《离骚》名经，以其所出之本同也。于时景差、唐勒、宋玉之徒相继而作，而原之同时大儒荀卿亦始著赋五篇。原激乎忠爱，故其辞缠绵而悱恻；卿纯乎道德，故其辞简洁而朴茂。要之皆以羽翼乎经，而与《三百篇》相为表里者也。汉之兴也，名儒则有董仲舒、贾谊、祇宽、司马迁、萧望之、扬雄、刘向、歆父子，东京则有班固、崔骃、崔寔、张衡、蔡邕之徒，多者至数十篇，少者亦数篇。而其最著者曰司马相如。相如之词，虽称侈丽闳衍，失讽谕之义，然考之佚传，相如尝受经于胡安，蜀人多传其业，其功至与文翁等，故曰：“文翁倡其教，相如为之师。”（《地理志》语）后世以俳优目相如之

词者，非也。班固书称枚皋善为赋，特以皋不通经术，为赋颂好嫚戏，以故得媒黜贵幸仅比东方朔、郭舍人。而皋亦自言为赋不如相如。由此观之，则知相如之赋之所以独工于千古者，以其能本于经术故也。其言曰：“赋家之心，包括宇宙，总览人物，斯乃得之于内，不可得而传。”推相如之意，盖真有所谓不可传者哉？其可传者，侈丽闳衍之词，而不可传者，其赋之心也。若能原本经术，以上溯其所为不传之赋之心，则所可传者出矣。

经术之要，莫过于《三百篇》，以《三百篇》为赋者，屈原、荀卿而下，至于相如之徒是也。以《三百篇》为诗者，苏、李而下，至于晋、魏、六朝、三唐以及于今之作者皆是也。《艺文志》曰：“自孝武立乐府而采歌谣，于是有代、赵之讴，秦、楚之风，皆感于哀乐，缘事而发。亦可以观风俗，知厚薄云。”则乐府者，又赋之变也。诗变而为骚，骚变而为赋，赋变而乐府，乐府之流漫漫淫而为词曲，而其变穷矣。穷则必复之于经，故能以六经持万世文章之变，即诗赋一道犹可以见贤人君子之用心。若遂薄之为雕虫末技，吾未见扬雄之《法言》《太玄》谓可直驾《离骚》而上之。天下万世可无《法言》《太玄》，决不可无《离骚》。《法言》《太玄》或有时可泯没，《离骚》决不可泯没也。愚按赋之心本一原，而其体制递换亦可缕数：骚一也，两京之浑融博奥一也。黄初以还，及乎晋、宋之初，潘、陆、孙、许以隽雅为宗。南北朝以降，颜、鲍、三谢以繁丽为主。萧氏之君臣，争工月露。徐庾之排调，竞美宫阙。至唐例用试士，而骈四俪六之习，风、雅之道于斯尽丧。中世杜牧之辈始推陈出新，更为奇肆，实以开宋人恣漫无纪极之风，而赋之体又穷矣。本赋之心，正赋之体，吾谓非尽出于《三百篇》不可也。

◇原诗

世道江河，动成积习。风雅之道，而有高髻广额之忧。十年前之诗人，皆唐之诗人也，必嗤点夫宋。近年来之诗人，皆宋之诗人也，必嗤点夫唐。万户同声，千车一辙，其始亦因一二聪明才智之士深恶积习，欲辟新机，意见孤行，排众独出。而一时附和之家吠声四起，善者为新丰之鸡犬，不善者为鲍老之衣冠。向之意见孤行、排众独出者，又成积习矣。盖俗学无基，迎风欲仆，随踵而立，故其于诗也，如矮子观场，随人喜怒，而不知自有之面目，宁不悲哉！有客问诗于予者曰：学唐优乎，学宋优乎？予曰：子无问唐也、宋也，亦问子之诗安在耳。《书》曰：“诗言志。”虞挚曰：“诗发乎情，止乎礼义。”此为诗之本也，未闻有临摹仿效之习也。古诗称陶、谢，而陶自有陶之诗，谢自有谢之诗。唐诗称李、杜，而李自有李之诗，杜自有杜之诗。人必有好奇黈险、伐出通道之事，而后有谢诗。人必有北窗高卧、不肯折腰乡里小儿之意，而后有陶诗。人必有流离道路、每饭不忘君之心，而后有杜诗。人必有放浪江湖、骑鲸捉月之气，而后有李诗。近时龙眠钱饮光以能诗称，有人誉其诗为剑南，饮光怒。复誉之为香山，饮光愈怒。人知其意不慊，竟誉之为浣花，饮光更大怒。曰：“我自为钱饮光之诗耳，何浣花为？”此虽狂言，然不可谓不知诗之理也。客曰：然则诗可无师承乎？曰：何可无也。杜老不云乎：“别

裁伪体亲风雅，转益多师是汝师。”凡骚、雅以来，皆汝师也。今之为唐、为宋者，皆伪体也。能别裁之而勿为所误，则师承得矣。作诗原。

◇原书

予笃好书，每谓书有天分，而非尽关乎仿效；书有兴会，而不必出乎矜持。《传》云：人心不同，有如其面。桓温欲似刘琨，而琨婢以为甚似而非。予谓惟书亦然。聚千百能书之人于此，其笔迹无一同。聚千百不能书之人于此，其笔迹亦无一同。使必出于同，则千古书法，止一右军足矣。即如右军学卫夫人，而究之卫自卫、王自王。临兰亭者，亦各自见笔意也。若铢而较，寸而合，岂复有真面目耶！王绍宗曰：“我书每精心空思，率意而成。闻虞世南不临摹，但被中书肚，我亦如之。”坡公云：“我书意造本无法，盖古人绝技，必有神明所寓，兴会所触，动与天随而不自知。予每当笔砚精良时，或无意中有所得意之笔。否则不但掣肘迫书，即稍一勉强，而愈作愈不佳。”程子所云作字须敬，此亦儒者持心语，而书法岂关此哉！古之能书者，或观剑器，或听江声，或见蛇斗，此岂有书之事哉！然而会心有在矣。予尝谓熟读蒙庄，即可悟作书之理。悠悠千古，解吾语者谁也？予恐书家之涉仿效矜持者，有鹦哥骄秦吉了之诮，故作书原。

◇拟设东宫官属谢表

康熙十五年月日，臣等恭遇皇上册立东宫，特设詹事府、左右春坊、司经局等官以资辅导，臣等谨奉表称谢者。伏以宫悬银榜，长男题青石之书；门启铜扉，元良居白鹤之禁。正重离之位，玉册金文；命洵震之官，银章紫绶。爰求博望之多才，允入瀛洲之妙选，庆流宗祏，欢洽舆图。窃惟冢嫡所以系人心，储闈所以贰宸极。是以帝王大典，豫教为先；辅导得人，宫僚为重。承华斯建，必资羽翼之功；崇贤既开，即勤师傅之任。不登嗜鲍，引礼惟严；旋赋钧鰲，绳愆特峻。晋重贺循之儒宗，亲受太子之拜；汉尚桓荣之稽古，群看博士之尊。温峤上侍臣补益之箴，伯药献赞导嬉游之讽。未有九旗初建，四友即宾；五胜夙娴，三长咸集如今日者也。

陛下太室呈祥，尧门启瑞。幼敏等于汉幄，孝德迈于周门。胥臣之答文公，端俟贤良之赞；贾生之规汉帝，快瞻有道之长。将君我而齿让之，惟先自长世而慈保之无尽。亦有山涛作傅，小辇称荣；刘寔为师，行高致誉。于是斟酌隋唐之制，增设辅导之员，一宫弹肃，答于王璿之书；一时才贤，让诸王恭之表。萧傅风高于杜曲，殊宠攸加；窦婴戚重于西京，清秩斯显。遂使龙楼应制，瞻驰道而从容；凤阁登英，向苍旗而赓拜。五礼六乐，无非毓性之方；三德九功，并是储精之具。岂直处瑶山而作咏，见诸山海之经；吹铜律以迎和，得之太师之户？臣等愧家丞之秋实，鲜庶子之春华，藻思难窥，本乏卞兰泉涌之赞；盛德靡际，惟矢乐人海润之歌。伏愿天姿玉裕，茂德川沈，得保傅若二疏，有宾客如四皓。问安视膳，克尽两宫之欢；继体重轮，大慰兆民之望。则千年少海之波，光浮若镜；五色前星之曜，气蔚成珠。

矣。

◇拟《御制大德景福颂》贺表

康熙十六年月日，臣等恭遇皇上御制《大德景福颂》，恭祝太皇太后万寿，臣等谨奉表称贺者。伏以瑶池高宴，白云飞长乐之宫；骞树清歌，玉霞映濯龙之殿。青瞳白发，下金母于西池；琼佩仙琚，联婺光于南极。集九重之庆，君子惟祺；进万年之觞，天颜有喜。窃惟大电绕斗，统辟寿丘；瑶光贯虹，庆流华渚。吞神珠而诞禹，晕璧月而生汤。仰圣哲之降祥，实隆慈之载育。他若汉皇提三尺剑，瑞后昭灵；唐宗成一统功，美钟神武。各本让善于天之义，以展事亲如帝之思。然上和熹圣德之颂，著述徒出史官；尊文明崇化之宫；徽号空加文母。未有兼禄位寿名之德，致显扬祝嘏之休，焕彩兰宫，增华桂殿如今日者也。

陛下仁孝性成，尊养备至。两宫定省，奉太任太姒之欢；一德趋承，竭文子文孙之力。钦惟太皇太后福懋三朝，恩昭九有。诚周方甸，非止崇曳练之风；机协圆灵，不仅恃观图之识。诒谋恭俭，上掩汉京；缔造艰难，争光郅室。犹念非景福咸备，曷瞻四海之母仪；惟大德在躬，斯表九重之弗禄。维时当阳春布泽之辰，正宝婺腾辉之日，玉舆随侍，翟服齐班。八千岁为春秋，孰比大椿之遐算；三千年一花实，谁似蟠桃之植根？亲制卿云晨露之词，恭上南山万寿之颂。奏霓裳于大内，如聆侍女之笙；庆长宁之永年，应送上元之酒。乌飞可祝，引彼虎贲之弓；鸽放未央，纪以金笼之数。岂止奚斯颂鲁，燕喜来寿母之诗；文考歌风，思媚及周姜之妇。臣等内则粗窥，阴教未谙，学惭博物，诂进张华《女史》之箴；才谢天人，敢效陈思姜原之颂。伏愿道洽彤庭，范垂椒寝。后贤后圣，龙栋盘于亿龄；母地母天，燕玺宝于百世。法宋家圣后，号尧舜于女中；追汉代贤妃，习经典为博士。不须泰山进长生之枕，授术神仙；新垣刻延寿之杯，迓休人主矣。

◇书《昌谷集》后

尝读吕汲公《杜诗年谱》，少陵诗首见于《冬日雒城谒老子庙》，时为开元辛巳，杜年已三十，盖晚成者也。李长吉未及三十，已应玉楼之召。若比少陵，则毕生无一诗矣。然破锦囊中，石破天惊，卒与少陵同寿。千百年大名之垂，彭殤一也。优昙之华，刹那一现，灵椿之树，八千岁为春秋，岂计修短哉。

◇题米元章《方圆庵碑》

探河源者于星宿，寻地脉者于昆仑。书家之有钟、王，诗家之有李、杜，其昆仑、星宿也。书至南宫，而书之能事毕矣，然南宫书从钟、王来。诗至东坡，而诗之能事毕矣，然东坡诗从李、杜出。山谷云：“老杜之诗，昌黎之文，无一字无来历处。”书犹是矣。见近时学苏诗米字者，不知其来历而径学苏、米，且并不见苏、米

而学。夫学苏、米者之点画与唇吻，每况愈下，久而弥失，其真吁可慨也！近有人自龙井得米元章《方圆庵碑》初拓示予，其笔法瘦劲，全学《圣教序》，与俗所摹痴肥一种迥异。学米者见之，当知老颠来历，必不专专为《天马赋》伎俩矣。

◇题董文敏《秋林书屋图》

世之目文敏者，动于巨然北苑内求之，非是辄云伪。此如画竹林诸贤，必写其沉湎潦倒、科头袒胸之状，而不知山公启事，叔夜挥弦，彼自有正笏端绅，目送飞鸿时也。此卷红树绿莎，朱阑石砌，颇极雅丽。是文敏少年得意之笔，以为贗者，乃见橐驼谓马肿背也，识者辨之。

◇题文与可《墨竹》

读东坡《筼筻谷记》，便如有兔跼蛇腹之干凌霄汉而出，以为与可之竹在是也。观与可之竹，亦如见掀髯扪腹、兔起鹘落之笔拂拂在丛？间。两者俱有神遇，知笔墨外别有事在矣。京师苦无竹，得此幅挂壁，恍身在潇湘淇澳间也。王子猷曰：何可一日无此君？知言哉！

◇元旦帖子

黍穀阳回，葭灰气动。车迎三素，斗转七星。晓莺传第一新声，早识上林树色；江鲤破千层冻浪，遥连太液波光。句芒始届东郊，青帝旋居左个。销沈寒漏，胥归爆竹声中；绽泄春光，先到梅花影里。于时青袍朝士，金谷名流，并簇辛盘，争烧甲煎。举尊前柏叶，夸盛事于年年；传胜里金花，览物华于处处。达夫常侍怀故乡客鬓之篇，摩诘词臣赋元旦早朝之什。莫不惊心岁腊，属望书云。至于鸟卜年丰，蚕烧岁稔，燕裁双尾，鸡画重睛，当门并贴桃符，委巷竞称椒颂。尔乃对景物之更新，伤华年之易逝。醉屠苏而耳热，拨商陆而心寒。噫嘻！庭除拥彗，漫陈崔寔之书；旃厦横经，空梦戴凭之席。傥化工假我以岁月，花鸟助我以文章，庶几日丽嚶鸣，即待寸珠之照。当此冰开鱼曝，可无尺素之移？

◇端午帖子

节自天中，时当夏仲。五花施帐，争歌长命之词；重碧盈尊，叠和延年之颂。钗名玉燕，两两斜飞；臂绕朱丝，双双并结。捕鸂鶒而作供，惜鸛鸽之能言。草是宜男，共斗五时之胜；镜呼天子，相传百炼之金。团扇鲛绡，画凤文而绕户；赤符神印，穿金缕以垂门。采术浴兰，俗传万井；觴蒲簪艾，胜极千秋。水跃丹鱼，广泽鼓青龙之舰；风高黄雀，灵飙回彩干之帆。哭曹女于婆娑，吊屈平于湘汉。既望古而增慨，遂即事以兴怀。于是接景光，睹云物，可以处台榭而居高，相与升山陵而眺远，翩跹羽扇，挹清芄以俱来；缥缈仙舟，泛绿波而竟去。我之怀矣，眷言念之。

嗟乎！胜事常存，良辰难再。孟尝不作，空余木梗之悲；胡广既生，乃有葫芦之弃。回思往昔之陈陈，勿使今兹之寂寂。情有同乎？乐可知矣。

◇祭吴汉槎文

呜呼！我与子昔爰居爰处，谁料倏忽死生异路？自我别子，子病虽遽，款款话言，历历衷素。初谓奄旬尚可聚首，俄然物化。杨生左肘，青溪落月；台城衰柳，哀讞惊闻。未知是否畴昔之夜，元冕垂纓，呼我永别？号痛就醒，非子也耶？仿佛精灵，我归不闻子笑语声，子信死矣，传言是矣。帷堂而哭，寡妻弱子、七十之母远在故里，返何日？倚闾何俟！嗟嗟！苍天何厚其才而嗇其遇？亦孔艰哉。弱龄克赋，左马右枚。未题雁塔，先泣龙堆。中郎朔方，亭伯辽海。萧萧寒吹，荒荒破垒。子穷过此，二十四载凌云欲奏；狗监安在？自我昔年邂逅梁溪。子有死友，非此而谁？金缕一章，声与泣随。我誓返子，实由此词：

皇恩荡荡，磅礴无垠。皂帽归来，呜咽沾巾。我喜得子，如骖之靳。花间草堂，月夕霜辰。未几思母，翩然南棹。凭舢发咏，临流垂钓。舟还巨壑，鹤归华表。朋旧全非，容颜乍老。

中得子讯，卧疴累月。数寄尺书，趣子遄发。授馆甫尔，遂苦下泄。两月之间，便成永诀。自古才人，易夭而贫。黄金突兀，白玉嶙峋。以彼一日，易我千春。知子不愿，卓哉斯文。

子志未竟，子劳已息。有子与女，块然苦席。

言念交期，慰尔营魄。灵兮鉴之，无嗟远客。尚飨。

◇募建普同塔引

盖闻惠必旁敷，史著泽枯之德；慈当下逮，礼垂掩骼之文。烟横古冢，骚人以此徘徊；月隐北邙，词客缘斯愀怆。讵必过桥公之墓，始解回车？奚须上董相之坟，方图渍酒！蛇犹思报，愿酬魏颗于他年；蚁尚衔恩，敢让宋郊于异日。因尘不谬，果报非虚。

旧有普同塔者，屡经缔构，多历岁年。敛万骨以同埋，聚千骸而并坎。人天共鉴，庶免荒榛。蔓草之悲，魂魄咸依，可无怪雨盲风之恨？然而运逢历劫，积蛻何多；人比恒沙，陈根不少。叹瓶罍之已满，舍此安之；嗟泉壤以难容，逝将不免。纵使付咸阳之烈焰，灰烬堪怜；假令投白马之洪流，漂浮足惜。爰有沙门弘斯善愿，拟买松楸之隙地，充彼牛眠；欲求虞芮之闲田，封兹马鬣。然而画饼奚裨，望梅曷补。定藉檀施之乐助，共成震旦之良因。不揣刍蕘，为之乘韦。

嗟乎！丹丘不到，人间少换骨之方；绿字无名，海上乏返魂之术。嬴政之鲍鱼空载，园寝同归；茂陵之鹤驾终荒，輶辒共尽。茫茫绝壑，难禁幽独之宵啼；窅窅穷尘，忍听黎丘之夜哭。但获少施涓滴，千秋郁原氏之阡；第令共损锱铢，万鬼安滕公之室。敢邀花雨，仰庇慈云。

卷十五 渌水亭杂识一

癸丑病起，披读经史，偶有管见，书之别简，或良朋莅止，传述异闻，客去，辄录而藏焉。逾三四年，遂成卷，曰《渌水亭杂识》，以备说家之浏览云尔。

燕山窦十郎故居，或云在城西，或云在昌平，或云在涿州，或云在蓟州。当时冯瀛王道赠诗有“灵椿一株老”之句，今北城有灵椿坊，疑是十郎旧里，此灵椿所以名坊也。

元时，海子岸有万春园，进士登第，恩荣宴后，会同年于此。宋显夫诗所云：“临水亭台似曲江”也。今失所在。元有甄氏访山亭，在城西，今莫详其处矣。

李长沙赐第在西长安门西，俗呼李阁老胡同是也。其别业在北安门北，集中《西涯十二咏》，程篁墩学士和之，有桔槔亭、杨柳湾、稻田、菜园、莲池，而响闸、钟鼓楼、慈恩寺、广福观皆在十二咏中。今其遗址不可问，当在越桥相近。盖响闸即越桥下闸，而钟鼓楼则园中可遥望尔。

红螺山《大明寺碑》，元昭文馆大学士、太史院使、领司天监事樊从义撰文，宣文阁监书博士兼经筵译文官王与书，称寺始于唐，金世宗大定间，召佛觉禅师于真定之弘济，来住兹山。元仁宗时，诏云山禅师以荣禄大夫、大司空、佩一品银章，主大圣安寺，内侍、大司徒王伯顺以大明为圣安宗派，请太皇太后发帑五万为修寺之资。至正中，云山从圣安归老于此，尽捐前后所赐金帛重修焉。盖沙门检校司空，在辽时已然，金、元循之不改也。碑又云：两红螺死为双浮图，瘞之寺中，今寺南一池，曰红螺池，三面皆果园，花时游览，颇胜。殿西有竹一亩。寺东南二里许，为明怀宁侯孙武敏公墓，有两碑，一李贤撰，一彭时撰。中一碑刻谕祭文。

呼奴山白云观有元大德八年集贤学士宋渤碑。千佛寺建于明万历初，中有长沙杨守鲁安《阳乔》《应春》二碑，皆镇阳林潮书。潮以鸿胪寺主簿，直文华殿中书，《应春碑》称：诸天阿罗汉，皆太监杨用所铸。刘同人《帝京景物略》乃谓为朝鲜国王所贡，当以碑为实也。

药王庙，天启中魏忠贤所建，落成时，帝加奖谕，赐赉甚厚。当年必有丰碑。今无片石，盖为人所踏矣。龙华寺明碑二，其一播阳释道深撰，广陵起昂书，抚宁侯朱永篆额。其一金陵朱之蕃撰，高阳孙承宗篆额，永春李开藻书，文辞甚俚，不足观。

资福寺明正统间鲁圆升建，至嘉靖初尚膳监太监马潮修之。中有山西按察司僉事督理宣府边储四明钱俊民碑，书之者，礼部左侍郎任丘李时也。殿前梵塔上勒片石，有壬寅三月三日字，未知何时所建。明正德癸酉，司礼监太监张雄建寺于宛平县香

山乡畏吾村，赐额曰大慧，并护敕勒于碑。寺有大悲殿，重檐架之，中范铜为佛像，高五丈，土人遂呼为大佛寺。嘉靖中，太监麦某提督东厂，于其左增盖祐圣观，于是合寺观计之，殿宇凡一百八十三楹，拓地四百二十一亩。盖是时世宗方信道士而厌缁流，内官惟恐寺刹之毁，故建道观于其旁。而寺后之山，又有真武祠，借此以存寺也。寺之始建，大学士茶陵李东阳为碑，工部尚书汤阴李鏊书之，新宁伯谭祐篆额。其增置佑圣观也，大学士余姚李本撰文，礼部尚书高安吴山书之，成国公朱希忠篆额。其后万历壬辰重修，则太子太保、礼部尚书太仓王锡爵撰记。

功德寺有木球使者，其事近于怪。按宋张世南《游宦纪闻》载：雪峰寺僧义存，于唐懿宗咸通十一年开山创寺。乾符二年，赐号真觉禅师。寺有木球，相传受真觉役使，呼仆延客，球皆自往来。嘉泰间，寺灾，球忽滚入池中，得不坏。然则以木球为使，浮屠固有其术，盖有先版庵而役之者矣。

五台山僧侈言娑罗树灵异，至画图镂版。然如巴陵、淮阴、安西、伊洛、临安、白下、峨嵋山在处有之。闻广州南海神庙四本特高，今京师卧佛寺二株亦有干霄之势，顾或著或不著，草木亦有幸不幸也。怀柔城极坚整，西南在平地，东北则因山为之，其南瓮城可盘马，丽譙片石，记万历九年增修丈尺，末云：并用纯灰铺底，灌抵全完，以垂永久。宜其历百年尚如新筑也。

钓鱼台在怀柔县西三里，山水殊胜。涧流至此，广丈余。横版桥以渡，东南一望，渚烟村树，仿佛江乡。琼华岛土取自塞外，《辍耕录》《西轩客谭》可稽也。石移自艮岳，明宣宗《广寒记》可证也。

西山有君子口，疑即《寰宇记》所云君子城讹为箕子城者也。驾到口在西山，其曰驾到，不知何年事。

斋堂村在西山之北百余里，产画眉石处也。元豫章熊自得偕崇真张真人往居，撰《燕京志》。欧阳元功、张仲举皆有诗送之。元功诗云：“先生去隐斋堂村，境趣佳处如桃源。西出都门二百里，山之整屋水浩。一重一掩一聚落，一溪十渡深而浑。羊肠险径挂山腹，蜂房小屋粘云根。立当厄塞若关隘，视入衍沃同川原。市朝甚迩俗尘远，土产虽少人烟繁。锄耨艺陆宜麦菽，树栅作圈收鸡豚。园蔬地美夏不燥，煤炭价贱冬常温。前年熊郎入卖药，施贫者药人感恩。熊君携笈今就子，绕舍木叶书缤纷。崇真真人又继往，况是仁屋侄之子孙？紫箫夜吹辽鹤至，林响谷应松风喧。登高东望直沽口，海日涌出黄金盆。应怜曼倩恋象阙，坐美庞公归鹿门。”仲举诗云：“燕垂赵际中有村，正在西湖之上源。源头落花每流出，亦有浴凫时在。隐君葺茅据幽胜，仿佛小庄如陆浑。环之苍松数十树，拔出太古虚无根。攒峰叠壁何盘盘，地多硗确少平原。先生生计虽苦薄，最喜静无人事繁。黄精本肥术苗脆，疆场有瓜牢有豚。吟诗作画百不理，一家笑语常春温。功名祇遣世涂累，饱暖已荷皇天恩。近闻《京志》将脱稿，贯穿百氏手自翻。朱黄堆案墨满砚，钞写况有能书

孙？云晴辄辱羽客去，谷熟方来山鸟喧。土床炕暖石{穴羔}炭，黍酒香注田家盆。要知精舍白鹿洞，不待公车金马门。”元之《大一统志》卷帙繁富，考证亦綦详矣。而自得复撰《燕京志》，仲举谓其贯穿百氏，必有出于《大一统志》之表者，惜乎其书之不传也。

圣朝建都燕山，民物日富，八九十岁翁敦茂庞硕，朝廷优之，徭役弗事，岁时得升殿上，上皇帝寿。百官衣朝服鞠躬以进，视班次惟谨，毋敢越尺寸。而诸耆老高幘博褐，从容暇豫，以齿后先，门者不敢谁何。视百官退，乃陟峻陛，承清光，归而娱戏井陌，或骑或步，更过饮食，和气粹如。大驾出则庞眉黄发，序勾陈环卫间，见者咸曰：乐哉，太平之民也。此元王士熙《张进中墓表》。进中居京师，亦耆老之一也。进中字子正，善为笔，管以坚竹，毫以鼬鼠，淇上王仲谋、上党宋齐彦、吴兴赵子昂皆与之游。以一笔工而数得持笔以入禁中。观元盛时尊养耆老之典，亦庶几上庠之风矣。

明初有玉鸽十二，从南方来，飞集燕山。识者谓北平当王，盖兆燕山十二陵也。

都中遗老述万历间西山戒坛四月游女之盛，钿车不绝，茶棚酒肆相接于路，至有挟妓入寺者。一无名子嘲以诗云：“高下山头起佛龕，往来米汁杂鱼盐。不因说法坚持戒，那得观音处处参？”

项羽徙齐王田市为胶东王，徐广曰：“都即墨。”又立齐将田都为齐王，都临淄。又立故秦所灭齐王建孙田安为济北王，都博阳。《正义》曰：“在济北，是为三齐。”后田荣自立为齐王，并王三齐之地。正义《三齐记》云：“右即墨，中临菑，左平陆，谓之三齐。”

句吴，按《史记》：泰伯奔荆蛮，荆蛮义之从而归者千余家，号曰句吴。《正义》引《世本》注云：“泰伯始所居地名。”许慎《淮南子注》云：“吴人语不正，言吴而加以句。”颜师古云：“句，夷俗发声，亦犹越为于越。”《正义》又云：“泰伯居梅里，在常州无锡县东南六十里，至十九世孙寿梦居之，号句吴。”《吴越春秋》：“泰伯号句吴，越在城西北隅，名曰故吴。”注：“泰伯所都，谓之吴城，在梅里平墟，今无锡县境。”其后楚封春申君黄歇为相，以吴故墟为都邑，即此也。

吴有数称，《汉书·项羽传》：举吴中兵，曰“吴中”，《汉书·灌婴传》：渡江破吴郡长吴下，按：吴县本平地，概言之犹言稷下、敖下云，见叶氏《过庭录》，曰吴下，今人多称平江为吴门。按李德裕文指润州为吴之门户。又王充《论衡》云：孔子与颜渊上泰山，东望吴阊门外，白马如练。充谓人目所见，不过十里，鲁去吴千有余里，使离朱望之，终不能见。他书作吴门而此云阊门者，误也。此吴门即冀郭门也。冀与鲁为邻，非今阊门明矣。又见《汉·五行志》。洪州亦有吴门镇曰

吴门，又吴县有大吴乡曰大吴，沈休文《安陆王碑文》：“鸿濩旧吴。”李善注：刘琨《劝进表》“奄有旧吴”，曰旧吴。梁简文帝《浮海石像铭》云：“长处全吴。”今昆山有全吴乡。又长洲县上元乡全吴里是也。梁同光二年，升苏州为中吴军节度。吴越时称中吴府，亦曰东吴。

吴会，世多称平江为吴会，意谓吴为东南一都会也。自唐以来如此。今郡中有吴会亭，府治前有吴会坊，皆承其误。按《史》《汉》等书所载，皆以吴会为吴越。《汉·吴王濞传》：“上患吴会轻悍。”此时未分会稽为吴郡，盖指吴会稽之地耳。至吴郡既立之后，若曹子建诗云：“行行至吴会，吴会非吾乡。”诸葛孔明论荆州形势云：“东连吴会。”东汉《蔡邕传》云：“寄命江海，远迹吴会。”谢承《后汉书·施延传》云：吴会未分，吴张谓收兵吴会，则荆扬可一。王羲之为会稽内史，时朝廷赋役繁重，吴会尤甚。石崇论伐吴之功曰“吴会僭逆”，则斥言孙氏。《庄子释文》：浙江今在余杭郡，后汉以为吴会分界，今在会稽钱塘，已上皆指二浙之地。又按《吴·孙贲传》云：“策已平吴、会二郡。”《朱桓传》云：“使部伍吴、会二郡。”宋褚伯玉，吴郡钱塘人，隐居剡山，齐太祖即位，手诏吴、会二郡以礼迎遣。六朝亦有下吴、会两郡造船若干者。此类甚多，证据尤切。或谓为会稽二字可独称会乎？按宋元嘉时，以扬州浙西属司隶校尉，而分浙东五郡立会州，以隋王诞为刺史。晋、宋间亦以会稽为会土，故谢灵运有《会行吟》，此独称会之征也。

苏台，《青箱杂记》云：苏州有姑苏台，故谓苏台。相州有铜雀台，滑州有测景台，故亦称相台滑台（又见《古迹考》）。

三楚，《史记·货殖传》：“淮南为西楚，彭城以东、东海、吴广陵为东楚，衡山、九江、江南、豫章、长沙为南楚。”孟康曰：“旧名江陵为南楚，吴为东楚，彭城为西楚。”

水乡，陆士衡《答张士然诗》云：“余固水乡士。”注：“吴地也（当时水势弥漫，流亦湍急。自后人筑堤立塘，村市错置，水稍平减，流渐宽缓）。 ”

三吴之说，互有不同。《十道四蕃志》以吴郡、丹阳、吴兴为三吴（《通典》及《元和郡国图志》并同）。又以义兴、吴郡、吴兴为三吴（《郡国志》同）。酈道元注《水经》云：永建中，阳羡周嘉上书，以县远赴会至难，求得分置，遂以浙江西为吴，东为会稽，后分为三，号三吴，即吴兴、吴郡、会稽也。按《晋书》，咸和三年，苏峻反，吴兴太守虞潭与庾冰、王舒等起义兵于三吴。时冰为吴郡、舒为会稽，则是吴郡、吴兴、会稽为三吴矣。安帝隆安三年，孙恩陷会稽，刘牢之遣将桓宝率师救三吴。及陶回为吴兴太守，时大饥，谷贵，三吴尤甚。回开仓赈之，不待诏，及割府库军资以救乏绝，一境获全。诏会稽、吴郡依回赈恤。据此则与《水经》合矣。又《虞潭传》：苏峻反，潭为吴兴太守，诏加潭督三吴、晋陵、宣城、义

兴五郡事。孝武帝宁康二年，太后诏曰：“三吴奥壤，水旱并臻，宜时拯恤。三吴、义兴、晋陵及会稽遭水之县，全除一年租。”以此两事考之，则义兴固在三吴之外，而太后之诏亦不在三吴之数。岂一时称谓，初无定说？抑史传各有详简差互耶？或云虞潭所督，三吴、晋陵、宣城、义兴计六郡，而称五郡，潭自为吴兴，增督五郡，盖丹阳其一也。桓宝救三吴者，以孙恩既陷会稽，遂逼吴中，故云。今当以《十道四蕃志》及《郡国志》别说为正。

《吴地记》以金陵为中吴，鄂州为南吴，武昌为下吴，即三吴也。《地理指掌图》：三吴，今苏、润、湖州，亦据吴、丹阳、吴兴三郡而言也。

虎丘山，在吴县西北九里，唐避讳曰武丘。先名海涌山，高一百三十尺，周二百十丈（山在郡城西北五里。《吴地记》云：去吴县西九里二百步）。遥望平田中一小丘，比入山，则泉石奇诡，应接不暇。《吴越春秋》：“阖闾葬此三日，金精为白虎踞其上，因名虎丘。”《郡县志》云：“秦皇凿山以求珍异，孙权穿之亦无所得，其凿处遂成深涧。今剑池两崖划开，中涵石泉，深不可测，为吴中绝景。王元之、张敬夫皆有铭。”晋王旬《虎丘铭》曰：“虎丘先名海涌山，山大势四面周回，岭南则是山径，两面壁立，交林上合，蹊路下通，升降窈窕，亦不卒至。”王僧虔《吴地记》云：“虎丘山绝岩耸壑，茂林深篁，为江左丘壑之表。吴兴太守褚渊昔尝述职，路经吴境，淹留数日，登览不足。乃叹曰：‘今之所称，多过其实。今睹虎丘，逾于所闻。’斯言得之矣。”顾野王《虎丘山序》云：“高不抗云，深无藏影。卑非培塿，浅异棘林。路若绝而复通，石将断而更缀。抑巨丽之名山，信大吴之胜壤也。”御史中丞沈初明等游山赋诗，并书屋壁。梁郡守谢举有《虎丘山赋》，宋何求及二弟点、胤，陈顾越、唐史德义并隐此山。绍兴中，洛人尹焞避地山中，书堂存焉。旧有东西二寺，即王旬别馆，皆在山下。山半大石盘陀数亩，高下如刻削，因神僧竺道生于此说法，号千人坐石，他山所无。白莲池、虎跑泉亦生公遗迹。陆羽泉，即藏殿侧石井。试剑石，因大石中裂，故名。及望海楼、真娘墓，皆有古人赋咏。

旧称虎丘为王旬宅，未审所据。王劭《诸州舍利感应记》：虎丘山寺，其地是晋司徒王旬琴台是矣。

三江，《史记正义》曰：“在苏州东南三十里，名三江口（下文于分处号三江口，此三十里太近）。一江西南上七十里至太湖，名曰松江，古笠泽江。一江东南上七十里白蚬湖，名曰上江，亦曰东江。一江东北下三百余里入海，名曰下江，亦曰娄江（三百里当云二百余里）。于其分处号三江口。”顾夷《吴地记》云（顾野王《地里志》同）：“松江东北行七十里得三江口，东北入海为娄江，东南入海为东江，并松江为三。”《水经》云：“松江自太湖东北流径七十里，江水奇分，谓之三江口。”《吴越春秋》称范蠡去越，乘舟出三江之口，入五湖之中，此亦别为三江五湖。庾仲初《扬都赋》注：“太湖东注为松江，下七十里有水口，流东北入海为

娄江，东南入海为东江，与松江而三也。”古迹如此，先儒蔡仲默取以证《禹贡》之说。

吴王阖闾十九年伐越，越王句践迎击之，吴败于李。《左传》谓阖庐伤将指，卒于陞。《史记》乃谓败之姑苏，自是夫差败处。《史记正义》谓姑苏、李相去百里，疑太史公误。又吴王夫差二年，悉兵伐越，败之夫椒，报姑苏也。此语亦当云报李矣。

姑胥台，台因山名，合作胥。今作苏者，盖吴音声重，凡胥、须字皆转而为苏，故后人直曰姑苏。隋平陈，乃承其讹，改苏州。以《吴越春秋》《越绝》二书考之，一作姑胥，一作姑苏，则胥、苏二字，其来远矣。

山得水而景物奇变，泰山在平地，不及匡庐之多态。澎浪为彭郎，小孤为小姑，诗人借景作情，不宜坚索故实。

牡丹近数曹、亳，北地则大房山僧多种之，其色有夭红浅绿，江南所无也。

白樱桃生京师西山中，微酸，不及朱樱之甘硕。福建、江西、广东深山中有畚民，同于猺獠，不与平民相接。有作工于民家者，食之阶石，不以人礼待之。其人射鸟兽，种麦，此山住一二年，移至别山，官府不能制。有数种姓，自相婚配。

今之黑鬼可人可鱼，晋时谓之昆仑，即蛋民也。海船用以守缆，恐为鱼蟹所伤。

高丽、日本之间，海中有釜山，为往来之中顿。海道无程，而顺风行，一日夜可得千里。贸易者曾有顺风行五日至长岐岛者，故知其国去宁波五千里。日本海中有鱼，与人无异，而秃首有尾，通番者谓之海和尚。

日本至中国，海面五千里。而禽鸟有来去者，望见海船即来息力于樯篷，倦不能动。或施之以米，或掇而食之。

日本之外有一国，彼人谓之东京。其间有夜海，白日昏黑，得见天星。海水有一处高起二三丈，如槛然。凡有东京贩者，而日本人为狙佞，则中国货贵，若日本居货以待东京人之来，则贱也。日本入操场练兵必以夜，盖灯火整乱易见也。其教艺处不令中国人见之。

日本唐时始有人往彼，而留居者谓之大唐街，今且长十里矣。

日本之东北有食人者，倭亦畏甚，因山作关以拒之。倭人精于刀，且不畏死，登岸则难敌，而舟甚小，故汤和立法，于海中以大船冲沉其船。

卷十六 淶水亭杂识二

唐肃宗撤西北边兵，平内贼，代德遂以京师为边镇。明弃三卫亦然。

明于金陵、关中、洛阳无不可都。本朝惟都燕足以兼制南北，而明预建宫殿于三百年前，天也。

陆广微《吴地记》云：宋时苏州田租三十万。王圻《续文献通考》云：南宋江南水田每亩租六升。明洪武年，凡淮张之文武、亲戚及籍没富民之田，皆为官田。《宣德实录》载太守况钟疏云：苏田以十六分计之，十五分为官田，一分为民田。所以洪武加租至二百二十万也。建文曾减之。燕王篡位，悉复洪武之制，后又渐次增之至二百七十万。苏之田租虽重，其逋负时有蠲赦。民谣曰：“朝廷贪多，百姓贪拖。”万历末年，上司恐州县横征，揭榜令民纳至八分，不许复纳。

宋之漕法，积于半途，次年至京。遇有凶馑处，转运使得以转移其间，民以不困。蔡京改为直达，以济徽宗之妄费，而漕法始变。

明之军卫，仿唐府军之法，其后官存而军丁渐消，遂无实用，召募起焉。既有召募之兵，而军卫之屯田如故，徒为不肖卫官所衣食，亦困民之一端也。明都于燕，海运最为便利。《元史》载海运之逋负，少者每石不及三合，多者不及三升，然须选近海为官丁乃可。陆地之人，谈海色变，不足与言。

捕勒鱼处，当兗、济之东，海运之半道也，何独于北半道而难之？

铸钱有二弊，钱轻则盗铸者多，法不能禁，徒滋烦扰。重则奸民销钱为器。然红铜可点为黄铜，黄铜不可复为红铜。若立法令民间许用红铜，惟以黄铜铸重钱，一时少有烦扰，而钱法定矣。

禁银用钱，洪永年大行之，收利权于上耳。以求赢利，则失治国之大体。

中国天官家俱言天河是积气，天主教人于万历年间至，始言气无千古不动者。以望远镜窥之，皆小星也，历历分明。

西人云：望远镜窥金星，亦有弦望。夫月借日光以有光，故有弦望。金星自有光，不仗日光，不知何以有弦望？

武侯木牛流马，古有言是小车者，西人有自行车，前轮绝小，后轮绝大，则有以高临下之势，故平地亦得自行，或即木牛流马乎？而坎曲折，大费人力也。

西人测五星，谓近地二十度，虽晴时亦有清濛气，星体为此气浮而上登，不得其真数。须于此气以上测之，又须有次第乃正。如木、水、金前后相次而行，欲测金星，先测木星在何处，俟其西行至某度，乃于其度测水星，又于水星上测金星，乃不受清濛之混，诚良法也。

西人历法实出郭守敬之上，中国曾未有也。

西人医道与中国异，有黄液、白液等名。其用药，虽人参，亦以烧酒法蒸露而饮之。

西人之字，因人之语声而作之，其书名曰耳、目、资、唯，谐声一门，非六书也。

西人长于象数而短于义理，有书名《七克》，亦教人作善者也。尊其天主为至极，而谤佛，又全不知佛道。

后世言历者必宗《元史》，以历书为郭守敬所作，高出古人故也。明朝郑世子之于乐亦然。余尝谓作《明史》，乐书宜以冷谦所作用于朝庙者为上卷，刺聚、郑世子乐书之精义为下卷。后世言乐者，亦必宗之同郭守敬矣。

世子于古人惟取管仲、子长之说，而极轻班固、荀勖以下不论也。自汉至宋，能历历详举其故，可谓异人。世子外祖何塘，谓黄钟之体本是一尺，乃度尺也。以度尺分为九寸，名为律尺，非有二也。此论既出，孟坚以下之醉梦皆醒矣。世子之学，自何公开之？

世子谓汉人以度尺之九寸为黄钟，律短故乐高，最为有据。且出自世子，谁敢有疑？窃谓乐声之高，不始于汉也。男外阳而内阴，力壮而声下；女外阴而内阳，力弱而声高，故女之歌声高于男者二律，倚之箫而可证也。夏桀作女倡乐，声之高殆始于此。古之箫即律管也，三十六律管长短作一排，形如凤翅。故《楚词》曰：“吹参差兮谁思”也。然管多而一人吹之，何以高下曲折绎如今之箫，乃古之龠，名异而体同。王褒有《洞箫赋》，不言其状，未知洞箫即龠否？

王子晋之笙，其制象凤形，亦如参差竹。《九歌》“吹参差兮谁思”，王元长《曲水序》“发参差于王子”，皆言笙，李善注则谓洞箫。

五音有二义，一者高下，二者类聚。高下者，宫、商、角、变征、征、羽、变宫也。类聚，宫大而浊，商清而冽，角径而直，征文而繁，羽细而碎，此之谓类聚。其类以成调，故曰类聚。竹声唯有高下，丝声兼备二义。

今世以琴之第一弦为宫，非也。乃太律之征，林钟也。第二弦为太律之羽，无射也。

。第三弦乃为正律黄钟宫。故《国语》曰：声莫大于征，非谓正律征也。

唯作八音而无人之歌声，谓之徒奏。唯人声而无八音，谓之徒歌。徒歌曰谣，谓此，非谓民谣也。旋宫至姑洗、仲吕则声高极，非人声所能倚，故有徒奏。而徒歌则兴到者，随便为之耳。

明代之乐，冷启敬所作，声下而浊，其黄钟乃太律之无射，下于正律，黄钟二律。朝天宫道士云：凡用于郊庙者，以启敬之大簇为宫。若如启敬之法，声如梵呗矣。作者无过习者之门，道士所用适是。古之黄钟，所以房庶为伶人所侮而不觉。

革薄则声亮，厚则声雌。木、金、石薄则声下，厚则声高。议乐须学士与伶工共成之。学士知古不知今，言理不言器；伶工知今不知古，言器不言理，彼此相讥。在虚心者，则彼此可以相成也。人之虚心者鲜，则成偏见。郑世子博极群书，又甚习伶工之器，所以特绝。

乐者，声也。凡以算数言乐者，多拘泥，参差不合于律。郑世子二艺俱精，以算算乐，妙有神解。河南久被兵火，未知书版不散失否。世子文笔稍芜，书繁，难于翻刻，得健笔径省其辞，存三分之一，庶可易传。

《考工》云：鱼胶粘。凡粘之类，不能方。不能方，谓易翻也。而今世之弓，必以海中石首鱼之膘为之，未有用鼠胶者也。《考工》弓体又上檠而下竹，今弓胎多用竹，激矢能远，木胎者不及也。

宋人歌词而唐人歌诗之法废，元曲起而词废，南曲起而北曲又废。今世之歌，《鹿鸣》尘饭涂羹也。

獫狁盛于元世（读獠），而梁时大云之乐作，一老翁演述西域神仙变化之事，獫狁实始于此。宋时士大夫犹有起舞以劝酒者，自獫狁作而舞遂废。

今所啖之烟草，孙光宪已言之，载于《太平广记》，有僧云：世尊曾言，山中有草，然烟啖之，可以解倦。则西域之啖烟，三千余载矣。

《史记》：乌氏裸用谷量牛马，秦始皇令比封君，与朝请。巴寡妇用财自卫，为筑女怀清台。此用礼安富遗意，亦秦致富强之本教也。后世动破坏富家，诡云强干弱枝之计者，亦暴秦之不如矣（高欢问尔朱荣“闻公有马十二谷”云云，以谷量马，乃边陲旧俗也）。

高允伯恭以昔岁同征，零落将尽，感逝怀人，作《征士颂》，合三十四人。其颂末曰：“昔因朝命，与之克谐。披襟散想，解带舒怀，此欣犹昨。存亡奄乖，静言思

之，中心犹摧。”亦后世敦厚同年之意也（东汉同举者谓之同岁生，见《李固传》）。

周李孝轨封奇章公，隋牛弘封奇章公。齐氏胄子以通经入仕者，唯博陵崔子发、广陵宋游卿而已。

隋秦孝王妃生男，文帝大喜，颁赐群官。李文博云：“王妃生男，于群官何事？乃妄受赏。”此与晋元帝所云“此事岂容卿等有勋”正可相合。

宋文帝欲犯河南，行人曰：“云云大武。”帝闻而大笑曰：“龟鳖小竖，自顾不暇，何能为也。”宋时有龙虎大王，亦佳对也。

唐昭宗欲伐李克用、李茂贞，无可将者。而朱温、杨行密辈其下智勇如林，盖朝廷用卢、王铎之流，其所举者，李系、宋威耳。智力勇艺者壅于下，悉为强藩所用。

永嘉时事大坏，唯有南迁而已。王衍卖车牛以安众心。不久，随司马越径去，弃其君于贼手。《世说》载之以为美谈，刘临川非有识者也。

宋文帝时，员外散骑侍郎孔熙先与范晔谋逆，事露，付廷尉。熙先望风吐款，辞气不挠，上奇其才，遣人慰勉之曰：“以卿之才而滞于集书省，理应有异志。此乃我负卿也。”又责前吏部尚书何尚之曰：“使孔熙先三十年作散骑郎，那不作贼？”此与唐武后之见骆宾王讨己檄文，曰：“有才如此，而使之沦落不偶，宰相之过也。”皆绰有帝王之度，足令才士心死。若梁元欲赦王伟，却不可同年而语。

沈庆之议北伐曰：“今欲伐国而与白面书生谋之，事何由济？”后颜峻曰：“今举大事而黄头小儿皆得参预，何得不败？”白面黄头，恰可相对。

刘歆自以朝政多失，作《遂初赋》以叹往事而寄己意。其乱曰：“处幽潜德，含圣神兮。抱奇内光，自得真兮。宠幸浮寄，奇无常兮。寄之去留，亦可伤兮。大人之度，品物齐兮。舍位之过，忽若遗兮。求位得位，固其常兮。守信保己，比老彭兮。”其言颇似旷达，而为莽佐命，终致夷灭，视孙绰之赋义正桓温，相去何啻霄壤。

宋真宗时，知制诰周起患贡举之弊，建议糊名以革之。糊名之制始此。中晚唐立君必由寺人，南宋立君必由权相，其国可知。刘琨经略远不及祖逖，东晋人绝重之，寻名不责实之故习。

陶侃勤于职业，虚浮之士不敢议之，功名显著故也。何敬容亦勤于职业，虚浮之士即大讥之。敬容能早知侯景之反梁，人不能及。后世亦颇忽其人，甚矣，邪说之害

正也。

汉陈蕃曰：“期月之间不见黄生，则鄙吝之萌复存于心。”唐陆象先谓人曰：“贺季真清谈风流，吾一日不见则鄙吝生矣。”是学蕃语。

骐驎得伯乐而后脱盐车，青萍、结绿得薛卞而后长价。然则伯乐、薛卞有功于良马、宝剑也多矣。二子名亦以是不朽，则良马、宝剑亦有功于二子矣。北宫纯，凉州所遣以卫京师者也。于汉兵恣横时，累挫其锋。陆氏不负晋，纯亦不负陆氏矣。

白敏中以李赞皇荐，得入翰林，及为相，诋赞皇者甚力。吕惠卿以王荆公汲引，得预政，所以摧害荆公者，无所不至。三代以还，似此者指不胜屈，是可叹也。

黄雀、白龟、蛇、鱼之类，犹知衔恩图报，况人乎？彼怀私罔上、负恩蔑礼者，曾虫、鱼之不如矣。

灌夫不负窦婴于摈弃之时，任安不负卫青于衰落之日。徐晦越乡而别临贺，后山出境以见东坡。刘元诚事司马公，在朝不通书问，闲居则问无虚月。巢谷徒步访颖滨于漳海之南。今无复若人矣。

韩退之自其远祖麒麟以文名于北朝，文业不绝。数世后至其父仲卿、兄会，文誉益甚。传至退之，遂为一代醇儒。其子昶符与诸孙皆举进士，而昶子襄复状元及第，韩氏流泽可谓长矣。

汉晁错议削七国，其父曰：“刘氏安，晁氏危矣。”南齐徐文景方贵盛，其父深忧之曰：“我正当扫墓待丧耳。”唐路严屡迁要地，其父寄书曰：“闻汝已判户部，是吾必死之年。又闻欲求仆射，是我必死之日也。”彼皆不学无术，而识见若此。严延年之母为其子扫墓地，李络秀知其子周嵩、周匡俱不得善终。二人女子耳，而有识见尤难得。

李益文名与李贺相埒，每一篇出，乐工争以贿求之，被声歌供奉天子，天下施之图绘。与太子庶子李益同在朝，世称文章李益以别之。大历十才子，韩翃之名独重。时又有刺史韩翃，德宗命知制诰曰：“与诗人韩翃。”

汉高帝素恨雍齿，比沙中偶语，张良劝帝封之以厌众心，偶语果息。曰：“雍齿且侯，吾属无患。”晋文公出亡，里鳧须盗其资而去。文公饥饿不能行，介之推刲股以食，然后能行。文公返国，国人多不附，乃赦里鳧须之罪，使之驂乘，游于国中。见者皆曰：“里鳧须且不诛，吾何惧也。”晋国大宁。良策殆本诸此。蔡京当国，刻党籍碑，凡忠臣名士一网俱尽。然其中亦有本非君子，而偶以一事不合京意，亦指为党，平生过愆顾反得洗雪。如曾布、曾肇、王觴、章惇辈，不可枚举。宦竖

亦近三十人。汉皇甫规深以不与党人为耻，数子碌碌，乃获附骥尾，士固有幸不幸耶？

汉颜驷对武帝曰：“文帝好文而臣好武，景帝好美而臣貌丑，陛下好少而臣已老。”唐卢照邻著《五悲文》，自以高宗尚吏而已独儒，武后尚法而已独黄老，后封嵩山，屡聘贤士而已已废。噫！士之不遇如二子者亦多矣，悲夫！

泰陵金井内水孔如巨杯，水仰喷不止，杨名父子器亲见之，归而疏诸朝，请易地。事下工部，汤阴李司空鏐怒其多言害成功，阴令人塞其孔，谓诽谤狂妄，奏命锦衣官校枷杻押赴陵所验看。名父《亲三木朝辞候驾诗》曰：“禁鼓无声曙色迟，午门西畔立多时。楚人抱璞云何泣，杞国忧天竟是痴。群议已公须首实，众言不发但心知。殷勤为问山陵使，谁与朝廷决大疑。”孝庙竟葬此中。

苻坚锐意伐晋，曰：“以吾之众，投鞭于江，足断其流。”及登晋阳城，望晋兵部阵严整，怵然而惧曰：“此亦劲敌，何谓弱也。”五代慕容彦超谓汉隐帝曰：“臣视北军，犹蟻蠓耳。”退问兵数及将校姓名，颇惧曰：“此亦剧贼，未易轻也。”兵甫合，辄先遁。二事如出一辙。

耿弇为张步所攻，光武自往救之。或谓剧贼兵盛，宜闭营休士以须上来。弇曰：“乘輿且到，臣子当击牛酺酒以待，百官反欲以贼遗君父耶？”李道宗将四千骑击高丽，皆以为众寡悬绝，宜深沟高垒以俟车驾之至。道宗曰：“吾属为前军，当清道以待乘輿，乃更以贼遗君父乎！”二子武夫也，其所见乃有儒生不及者。人臣当以此为法。

尚书令左雄荐冀州刺史周举为尚书，又荐故冀州刺史冯直任将帅。直尝坐赃受罪，举并以劾雄。雄曰：“诏书使我选武猛，不使我选清高。”举曰：“诏书使君选武猛，不使君选贪污。”雄曰：“进君适所以自伐。”举曰：“昔赵宣子任韩厥为司马，厥以军法戮宣子仆。宣子谓诸大夫曰：‘可贺我矣，吾选厥也任其事。’今君不以举之不才误升诸朝，不敢阿君以为君羞。不寤君之意，与宣子殊也。”雄悦，谢曰：“吾尝事冯直之父，又与直善。今宣光以此奏吾，乃是韩厥之举也。”（宣光，周举字也。）天下益以此贤之。梁冀跋扈，带剑入省，尚书张陵叱令出，敕虎贲、羽林夺剑。冀跪谢陵，不应，劾奏冀，请廷尉论罪，诏罚一岁俸。百官肃然。冀弟不疑为河南尹，尝举陵孝廉，谓陵曰：“昔举君，适所以自罚也。”陵曰：“明府不以陵不肖，误见擢序，今申公宪以报私恩。”不疑有愧色。二事乃相类。

黄门监魏知古本起小吏，因姚崇引荐，以至同为相。崇意轻之，请摄吏部尚书，知东都选，知古憾焉。时崇二子分司东都，恃其父有德于知古，颇招权请托。知古归，悉以闻。他日，帝召崇曰：“卿子才乎？皆安在？”崇揣知帝意，曰：“臣二子分司东都，其为人多欲而寡慎，是必尝以事干魏知古。”帝始以崇必为其子隐，及

闻崇奏，乃大喜。问：“安从得之？”对曰：“知古微时，臣卵而翼之。臣子愚以为知古必德臣，容其为非，故敢干之耳。”帝于是爱崇不私而薄知古，欲斥之。崇曰：“臣子无状，挠陛下法，而逐知古，外必谓陛下私臣。”乃止。然卒罢为工部尚书。《新唐书》载此事，谓姚崇巧于料事，而知古薄待所知，至动人主之疑，终身不复用。可见伦理一也，交友不能信者，事君必不忠。

《钱徽传》：长庆元年，徽为礼部侍郎，时宰相段文昌出镇蜀川，故刑部侍郎杨凭子浑之求进，尽以家藏书画献文昌，求致进士第。文昌将发，面托徽，继以私书保荐，翰林学士李绅亦托举子周汉宾于徽。及榜出，浑之、汉宾皆罢。李宗闵与元稹有隙，宗闵子婿苏巢及杨汝士季弟殷士俱及第，文昌、绅大怒。文昌赴镇辞日，内殿面奏，言徽所放进士皆子弟，艺薄不当在选中。穆宗访于学士元稹、李绅，二人对与文昌同。遂命中书舍人王起、主客郎中知制诰白居易重试，内出题目《孤竹管赋》《鸟散余花落》诗，而十人不中选。寻贬徽为江州刺史，中书舍人李宗闵、剑州刺史右补阙杨汝士开江令。初议贬，徽宗闵汝士，令徽以文昌、绅私书进呈，上必开悟。徽曰：“不然，苟无愧心，得丧一致。修身慎行，安可以私书相证耶？”令子弟焚之。呜呼！如徽居心行事，休休有容，大臣器量也。

王勃“落霞与孤鹜齐飞，秋水共长天一色”，当时以为奇绝。然亦有所本，庾信《马射赋》：“落花与翠盖齐飞，杨柳共青旗一色。”隋《长寿寺碑》：“浮云共岭松张盖，明月与岩桂分丛。”然勃则青出于蓝也。

考《唐书》文庙下不言筵豆之数，《明宪宗实录》：成化十二年七月，祭酒周弘谟请增筵豆、舞佾，言唐玄宗既正孔子南面之位，服以衮冕。宋徽宗考正孔子冠服，加十二旒。金世宗加孔子冠十二旒，服十二章。今圣朝尊崇孔子，既用天子之礼，而筵豆则非天子之制，乞敕礼部会议，增十筵十豆各为十二，从之。是成化以前至唐宋用十筵十豆，逮宪宗始用十二筵十二豆，后张璁更定祀典，复用十筵十豆也。其略如此。

李焘《续资治通鉴长编》：一孝宗隆兴元年癸未，进太祖建隆至开宝十七年事；一孝宗乾道四年戊子，进太祖建隆元年至英宗治平四年闰三月五朝事迹；一孝宗淳熙元年甲午，进熙、丰、祐、圣、符、靖、崇、观、和、康六十年事；一孝宗淳熙九年壬寅，合写长编重进，又进《续资治通鉴长编举要》六十八卷，今祇存五朝事迹。

明制，父兄官三品大寮，子弟不得居言路。考之前代不然。《唐书·三郑列传》：郑余庆，宪宗立，复拜同中书门下平章事。子浣，本名涵，第进士，累迁右补阙，敢言无所讳。宪宗谓余庆曰：“涵卿令子，而朕直臣也。更可相贺。”郑覃，文宗太和九年拜同中书门下平章事。弟朗由山南幕府入迁右拾遗。郑，宪宗即位，拜中书侍郎、同中书门下平章事。余庆从父，是浣为从孙，时正官右补阙。祇以《三

郑列传》证之，唐父子、兄弟、从祖孙不相避明矣。惟《杜佑列传》佑子从郁，元和初为左补阙，崔群等以宰相子为嫌，再徙秘书丞，然不过嫌之云尔，初未尝如明制必相避者也。

韩魏公三守乡郡，每谒先茔，辄有诗自矜其荣遇。如曰：“至日郊原拥节旄，先茔躬得奉牲醪。霜威压野寒方重，山色凌虚气自高。衣锦不来夸富贵，报亲惟切念劬劳。”又曰：“昼锦三来治邺城，古人无似此公荣。首过先茔心先慰，一见家山眼自明。”又曰：“风入旌旗撼晓光，两茔亲展喜非常。浓阴蔽野瞻乔木，逸势横天认太行。自叹重茵宁及养，纵垂三组敢夸乡。路人或指荣虽甚，明哲何如汉子房。”又曰：“暂趋先茔弭旌旄，因恤吾民穡事劳。田舍罕逢车骑过，聚门村妇拥儿曹。”又曰：“两飨先坟已致诚，却严轩从指东茔。鸿惊去旆参差起，马避柔桑诘曲行。”又曰：“乡守三逢禁火天，每驱旌纛扫松轩。衰残岂足酬恩遇，光宠徒知及祖先。”如此者不一而足。孟郊云：“春风得意马蹄疾，一日看遍长安花。”王禹玉云：“出门四塞如黄雾，始觉身从天上归。”论者咸议其器量，二人者虽不可与公同语，然比之向时刺客取首，延颈以授，吏碎玉盞，笑而抚之，若两人矣。

辽曲宴宋使，酒一行，觥筹起歌。酒三行，手伎入。酒四行，琵琶独弹。然后食入，杂剧进。继以吹笙、弹箏、歌、击架乐、角抵，王介甫诗：“涿州沙上饮盘桓，看舞春风小契丹。”盖纪其事也。至范致能北使，有《鹧鸪天》词亦云：“休舞银貂小契丹，满堂宾客尽关山。”则金源燕宾，或袭为故事，未可定耳。

玉堂赏花会，赋诗者四十人。学士则南阳李贤、安成彭时、李吕原、莆田林文、安成李绍、永新刘定之、钱塘倪谦、东吴钱溥，侍读则金城黄谏，詹事则庐陵陈文、长洲刘铉，侍讲则眉山万安、渔阳李泰，中允则古杞孙贤，赞善则范阳牛纶，修撰则吴中陈鉴、博野刘吉、钱塘童缘、华容黎淳，编修则西蜀李本、毗陵王仁与、余姚戚澜、宜兴徐溥、琼山丘浚、泰和尹直、安成彭华、雪川陈秉中、临川徐琼、四明杨守陈、临江吴汇，检讨则严州傅宗、安成张业、河东邢让，翰林五经博士则天台鲍相，典籍则西蜀李鉴、泰和陈谷，侍书则浙江谢昭其，二人则礼部员外郎临淮凌耀宗、中书舍人江东曹冕。诗成，李贤序之，彭时作后序。

妇人匀面，古惟施朱傅粉而已。至六朝，乃兼尚黄。《幽怪录》：“神女智琼额黄。”梁简文帝诗：“同安鬓里拨，异作额间黄。”唐温庭筠诗：“额黄无限夕阳山。”又黄印：“额山轻为尘。”又词：“蕊黄无限当山额。”牛峤词：“额黄侵腻发。”此额妆也。北周静帝令宫人黄眉墨妆，温诗：“柳风吹尽眉间黄。”张泌词：“依约残眉理旧黄。”此眉妆也。段氏《酉阳杂俎》所载有“黄星靨”。辽时俗，妇人有颜色者，目为细娘。面涂黄，谓为佛妆。温词：“脸上金霞细。”又：“粉心黄蕊花靨。”宋彭汝砺诗有：“女夭夭，称细娘，真珠络髻面涂黄。”此则面妆也。

泽州李俊民用章举承安五年进士第一，金亡后，其同年三十三人，惟高平赵楠仅存，又挈家之燕京。俊民感旧游，以诗题《登科记》后云：“试将小录问同年，风采依稀堕目前。三十一人今鬼录，与君虽在各华颠。”又云：“君还携幼去幽燕，我向荒山学种田。千里暮鸿行断处，碧云容易作愁天。”录中张孺卿介甫、晁李中宝臣、任德维公理、孔天昭文安、王毅知刚、赵铎敬之皆中都大兴府人。

元裕之寄书耶律中书，荐当时士大夫在河朔者：固安李天翼、渔阳赵铸、燕人张舜俞、曹居一、王铸，且曰：“凡此诸人，虽其学业操行参差不齐，要皆天民之秀，有用于世者也。”按虞文靖《学古录》有《田氏先友翰墨序》，称彰德田师孟辑其先友手翰，中有刘百熙字善甫、曹居一字通甫、赵著字光祖，俱燕人。其称著曰大侠。按元集作铸者，字才卿，别是一人也。

唐设九科，童子居其一，员半千、杨炯、吴通元、裴耀卿、李泌、刘晏皆由是举。宋则杨亿、宋绶、晏殊、李淑均以童子出身。然汉有童子郎，梁有童子奉车郎，以童子拜官者多矣。元童子科见于《选举志》者一十六人，仁宗延祐七年举陈聿，则大兴人也。

明弘治壬戌状元康德涵海、榜眼孙直卿清，皆以不拘小节被劾去国。然二君实才雄一代。德涵词锋如云，直卿劲气毅然不可夺。论者谓二君为是科冠冕，以忌嫉者多老于摈斥，可惜。

萧道成既篡宋，光禄大夫王琨在晋世已为郎中，攀废帝车恸哭曰：“人以寿为欢，老臣以寿为戚。不能先驱蝼蚁，乃复频见此事。”西涯李阁老《咏田颿乐府》曰：“谁云死速不如迟，幸未淮南语泄时。”语意本诸此。

庾子嵩目和峤曰：“森森如千丈松。”卞壶目叔向曰：“朗朗如百间屋。”乃成一佳对。汉人目李元礼曰：“谡谡如松下风。”此等标榜语，亦是当时习气。

郑锐、郭仙舟献诗不切时事，惟崇道德，玄宗皆令罢官为道士。萧瑀好奉佛，亦令出家为僧。孔武仲曰：“如使佞佛者为僧，谄道者为道士，则士夫为异论者息矣。”

官制五品以上者为大夫，六品以下者为郎官，皆散官也。然各置于官衔之上，如曰光禄大夫、太保、承德郎、某部主事之类。惟翰林则置于官衔之下，如曰翰林院学士、奉政大夫、翰林院检讨、从仕郎之类。盖史官尊重，不欲以散官压之，自明时重翰林始。

明时朝贵，三品则乘轿荫子，封及三代，俸入优厚，例以隶执长柄大扇拥护。四品以下，祇于马上用翼扇遮日而已。自九卿外，三品者多在闲散地，如太常、太仆、

光禄卿、京兆尹之类。弘治间，多升金都御史，威权虽重，然金都系四品阶，仪制反减削矣。至末年，金都御史出城即乘轿。至今金都为巡抚者，肩舆用八人，假用三品仪从也。国子祭酒则自灯市以北改用大轿，故祭酒、金都与府尹皆曰半城轿。府尹本三品，不知于何处骑马。

明朝翰林官五品，多借三品服色，讲官破格有赐斗牛服者。毛公纪《归田杂识》云：“当孝宗朝，东宫出阁选侍讲、读，是时礼重宫僚，特赐予或亲御春坊面赐温谕。坊局官即用孔雀金带服色。及奉朝省亲，便用仙鹤服色，犀带。”又云：“故事，每岁亲郊庆成，赐文武大臣宴于奉天殿，上御宝座，尚膳进饌，传旨官人满饮，教坊九奏乐具如仪。余自为翰林院学士，即得如例升殿，以五品官坐于四品之上、三品后，盖屡预焉。我朝大臣赐坐，仅见此与耕藉、幸学，而此为尤重。”又言：“春秋二丁祭文庙，遣大学士一人行礼。前一日御殿，百官朝服侍班传制，廷试天下贡士。上御文华殿，内阁率诸臣以第一甲三卷面奏，上亲批定名次。明日早，先御华盖殿，内阁复于黼座前拆卷奏名，中书填黄榜，然后御奉天殿传胪。丘文庄公谓谨身读卷，即华盖也。华盖读卷，外朝臣无由而至，是日惟内阁得入殿内，而九卿以下皆在闕限之外。”此亦一代典故。

建置官署必立土谷祠，翰林院所祠则昌黎伯韩子也。古称乡先生歿而祭于社，夫以土谷名祠，亦祭社之义，宜以乡先生主之。京师燕地，窃谓祀昌黎伯，不若易以常山太傅婴也。

《大兴县题名记》，光禄少卿新安尹校书，隆庆四年立。《顺天府尹丞题名记》，工部尚书丰城雷礼文也，嘉靖三十九年立。《寮佐题名碑记》二，一为礼部左侍郎铅山费采撰，嘉靖二十二年立；一为顺天府通判晋江张问仁撰，万历十三年立。

《宛平县题名记》，翰林院检讨郭撰，嘉靖二十八年立。

古葬宫人之所，谓之宫人斜，京城阜成门外五里许有静乐堂，砖、甃二井，屋以塔，南通方尺，门谨闭之。井前结石为洞，四方通风。宫人有病非有名称者，例不赐墓，则出之禁城后顺贞门，傍右门承以敛具，舁出元武门，经北上门、北中门达安乐堂授其守者，召本堂土工移北安门外，易以朱棺，礼送之静乐堂，火葬塔井中。凡宫人故，必请旨。凡出，必以铜符合符乃遣。嘉靖末，有贵嫔捐贖易民地数亩，其焚烬不愿井者，悉内地中。

卢沟河畔元有苻氏雅集亭，蒲道源诗：“卢沟石桥天下雄，正当京师往来冲。苻家介侧敞亭构，坐对奇趣供醇醲。”又有野亭，见贡仲章《云林诗集》，今一望礪砾，并民居亦寥寥也。

懿安皇后张氏，性贤明。魏榼诛戮朝士，后闻杨、左诸君子死，色不豫者累月。李

自成入犯思陵，将殉社稷，传旨后宫，令自裁。时周皇后及贵妃宫嫔之承宠者，皆遵旨毕命。独长公主年尚幼，未奉诏。帝怒，拔刃斫其臂，公主仆地，而宫监王永寿方从懿安皇后宫至，白帝曰：懿安皇后业缢死宫中矣。帝乃走煤山自经。当魏忠贤柄国时，有养女任氏美而狡，进之熹宗，立为贵妃。及贼入宫，任诡曰：我天启皇帝后也，贼不敢犯。既而流转民间，或送于官，永寿从旁窃窥之曰：此任贵妃也。贵妃睨永寿面发，旋闭目如不闻见者，永寿终亦不敢置讦也。永寿事熹宗，不入魏党，甲申寇乱后削发为僧，往来西山间。谈及故宫事，辄语人云。

卷十七 渌水亭杂识三

今人多云设虚位禘其祖之所自出，如杨志仁复议论者，仅嘉靖十年举行一次，后不复行。适考之《实录》，嘉靖十年辛卯举行，诏以后丙辛年行之。十五年丙申四月，仍行大禘礼，二十年辛丑四月，九庙火，诏暂罢，遂永停矣。其实行大禘凡两次。

《洪范》：五福六极无贵贱，盖古无不肖而贵，亦无有德而贱者。贵则禄及之而富矣，故富可以概贵。贱则禄弗及而贫矣，故贫可以概贱。《周礼》：八柄驭群臣，二曰禄以驭其富，六曰夺以驭其贫是也。

“望其穀欲其掣尔而纤也”注：郑司农云读为纷容掣参之掣，疏：先郑云此盖有文，今检未得。此句本见《上林赋》：“纷溶掣簪，猗猗从风。”前注：迤崇于轸，读为倚移从风之移。疏：司马长卿《上林赋》云：从风倚移，此二句连文，而复云检未得，未知何意。

兑为口舌，其于人也，但可以为臣为妾而已。以言说人，岂非妾妇之道乎？

凡人于交友之间，口惠而实不至，则其出而事君，必至于静言庸违。故舜之御臣也，敷奏以言，明试以功。而孔子之于门人，亦尝听其言而观其行。

《淮南子·汜论训》：直躬其父攘羊而子证之，尾生与妇人期而死之，是径以直躬为人名矣。然此说本于《吕氏春秋》。

《吕子》：昔者禹一沐而三握发，一食而三起，以礼有道之士。周公吐握之说，见于《荀子》，人罕称禹也。

齐武帝云：学士辈不堪经国，唯大读书耳，经国一刘系宗足矣。沈约、王融数百人于事何用？此“大”字是多字义。

《艺士传》：徐之才常与朝士出游，遥望群犬竞走，诸人请令试目之，之才即应声云：“为是宋鹊，为是韩卢，为逐李斯东走，为负帝女南徂。”此段复见之《序传》，是温子升与李神俊语，当时传闻之讹，亦失于检正。

宋人有嫁子者云云，其子窃而藏之。君公知其盗也，逐而去之。君公，其舅之称欤？故妇人谓夫之兄曰兄公。

郭况族姊为皇祖考夫人，谒见光武，大喜曰：乃今得大舅乎？按大舅称舅公。

董征迁安州刺史，因述职，路次过家，置酒高会，乃言曰：“腰龟返国，昔人称荣。仗节还家，云胡不乐？”诫子弟曰：“此之富贵，非是天降，乃勤学所致耳。”与桓荣稽古之荣，皆老生陋态，遗嗤千古。

李绅《周员外席上观柘枝诗》：“画鼓拖环锦臂攘。”今京师迎年鼓制施两铜环，以手擎之高下，环声相间，疑即其遗制也。宋湜字持正，名、字与皇甫俱同。诗笺：“湜湜，正持也。”

杜子美《昔游》诗：“幽燕夙用武，供给亦劳哉。吴门持粟帛，泛海凌蓬莱。”《后出塞》云：“渔阳豪侠地，击鼓吹笙竽。云帆转辽海，粳稻来东吴。”按《唐会要》：“开元二十七年，李适为幽州节度，河北海运使。”《唐书》：“姜师度穿平鹵渠，以避海难。”盖元之海运自崇明抵直沽，唐时海运则自登州转而平州，以达于蓟，故子美云然也。

天、地、人谓之三才，轮人以毂、辐、牙为三才，弓人胶、漆、丝为三才，然其所谓三才者亦眇矣。

史记韩世忠江上事云：金山有红袍者堕马，腾而跨之驰去。今则未见有驰处，史言诬乎？古今地异乎？

《周礼注疏》疏糝食：菜餽蒸，若今煮菜也。按今俗蒸饼用菜为馅，此类是矣。《易·鼎·九四》：“鼎折足，覆公餽。”郑注云：糝谓之餽，震为竹之萌曰笋，笋者餽之为菜也，是八珍之食。按周亦以笋为珍味，故其诗曰：“维笋及蒲，馈食之笱”，亦有笋俎。

廩法有数名，《春秋》：御廩灾。天子亦有御廩。单言廩，则平常掌米之廩。《明堂位》：鲁有米廩。有虞氏之学，以有虞氏尚孝，合藏粢盛之委，故名学为米廩，非廩禄也。诗亦有高廩，以其万亿及秭，非藏米之数，故以藏穗言之，与常廩、御廩又异。

《周礼注》：堂涂，谓阶前，若今令甃甃也。疏：汉时名堂涂，为令甃甃。令甃则今之砖也，甃则砖道也。令音零，甃音阶。

《羊车》注：羊善也。羊车，若今定张车。疏亦未知定张车何所用，但知在宫内所用，故差小为之，谓之羊车也。愚按定张车与果下马俱宫内所用。

服虔曰：持高帝衣冠，月旦以游于众庙，已而复之。按月旦，谓月出时也。

傅介子年十四，好学书，尝弃觚而叹曰：“丈夫当立功绝域，何能坐事散儒？”弃

觚与班生投笔相类。

《春秋》书星孛，有言其所起者，有言其所入者。文公十四年秋，“有星孛，入于北斗”，不言所起，重在北斗也。昭公十七年有星孛于大辰，西及汉，不言及汉，重不在汉也。

按《宋史》祈报礼曰：凡旱、蝗、水潦、无雪，皆崇祷焉。故《本纪》：太祖乾德元年十二月甲寅，命近臣祈雪。开宝五年十二月乙酉朔，祈雪。乙卯，大雨雪。六年十二月壬午，命近臣祈雪。七年十二月辛亥，命近臣祈雪。太宗雍熙二年十一月戊子，祷雪。十二月癸卯，南康军言雪降三尺。三年十一月丙戌，幸建隆观、相国寺祈雪。十二月乙未朔，大雨雪，宴群臣玉华殿。四年十二月壬寅，幸建隆观、相国寺祈雪，丁巳大雨雪。淳化二年十一月己酉，幸建隆观、相国寺祈雪。至道二年十二月，命宰相以下百官诣诸寺观祷雪，甲寅，雨雪，大有年。仁宗天圣九年十一月己丑，祈雪于会灵观。神宗熙宁元年十一月癸未，命宰臣祷雪。十二月己亥朔，命宰臣祷雪。癸丑，祷雪于郊庙社稷。哲宗元祐七年十二月庚午，祈雪。绍圣元年十二月庚辰，命诸路祈雪。终北宋之世，祈雪凡十有五见。或曰：此礼古乎？愚曰：考之《周礼》未见，而《左传·昭公元年》子产曰：山川之神则水旱疠疫之灾，于是乎之；日月星辰之神则雪霜风雨之不时，于是乎之。此非祈雪之明证乎？或曰：雪风雨之不时当矣，而霜则何为？愚曰：《诗》：“正月繁霜。”正月，建巳之月也。《春秋》：“冬十月，陨霜杀菽。”十月，建酉之月也。于此二月而霜，非灾变之尤者乎？遇灾而惧，故亦为之祷焉。

《文献通考》止有祈雨、祈晴，并无祈雪。愚尝谓《通考》虽千古奇书，而多未备，兹其一端乎。又考《唐书·礼乐志》并祈雨、祈晴亦缺，疏矣。祈雪礼实昉于宋。

《晋书·贾谧传》：谧为秘书监，掌国史。先是，朝廷议立《晋书》限断，中书监荀勖谓宜以魏正始起年，著作郎王瓚欲行嘉平以下朝臣尽入晋史，于时依违未有所决。惠帝立，更使议之。谧上议请从泰始为断，于是下三府。司徒王戎、司空张华、领军将军王衍、侍中乐广、黄门侍郎嵇绍、国子博士谢衡皆从谧议，骑都尉济北侯荀勖、侍中荀藩、黄门侍郎华混以为宜用正始开元，博士荀熙、刁协谓宜嘉平起年。谧重执奏戎华之议，事遂始行。《潘岳传》：谧《晋书》限断亦岳之辞也。按正始，魏主曹芳年号，始庚申，终戊辰，凡九年。嘉平则芳在位之第十年己巳，司马懿杀曹爽自为丞相时也。又后十六年方为泰始元年乙酉，司马炎篡魏自立矣。窃以贾谧限断请自泰始，虽圣人亦不能废其言。

《吕氏春秋·尊师》云：子张，鲁之鄙家也，颜涿聚，梁父之大盗也，学于孔子。段干木，晋国之大驂也，学于子夏。高何县、子石，齐国之暴者也，指于乡曲，学于子墨。子索卢参，东方之巨狡也，学于禽滑黎。此六人者，刑戮死辱之人也，今

非徒免于刑戮死辱也，由此为天下名士，显人以终其寿，王公大人从而礼之，此得之于学也。

《史记·李斯列传》：秦王乃拜斯为长史，听其计，阴遣谋士赍持金玉以游说诸侯，诸侯名士可下以财者，厚遗结之；不肯者，利剑刺之。离其君臣之计。又《张耳陈余列传》：秦灭魏数岁已，闻此两人，魏之名士也。

或问名士之称何昉乎？曰：见于经则《月令》“聘名士”，见于史则《李斯传》“诸侯名士”，《张耳陈余传》“此两人，魏之名士”，见于子则子张、颜涿聚、段干木、高何县、子石、子索卢参，此六人为天下名士，显人是也。大抵名士之称，权舆于六国之末，而极盛于东汉之世。

张天如史论有云：桓帝之世，有宦官，有名士，天子为宦官而驱除名士。灵帝之世，有宦官，无名士，宦官不复畏名士而专制天子。

北齐济南王立为皇太子，初学反语，于迹字下注云：自反。侍者未达其故，太子曰：迹字足旁亦，岂非自反耶？以足亦反为迹也。

《魏书》：安同父屈，仕慕容颙为殿中郎将。同长子亦名屈，典太仓事盗粳米者也。孙竟与祖同名。

魏黄门王遵业风仪清秀，从容恬素，若处丘园，尝著穿角履，好事者多毁履以学之，可与郭泰折角巾作对。

世传宣炉由炼铜十二火，故有光彩。而云南丽江之铜甚精，曝以日光，即有光彩。安知宣炉非此铜所铸？宣炉世所重者，如鳃耳、鱼耳，雅式者也。亦有至怪之式，如波斯马槽者，而实出宣朝所作。

宋砚大抵不发墨，近年竭江以取下岩之石曰蕉叶白者，发墨如泛油，则知传世宋砚本非良材。砚取发墨，非止易浓，亦以作字有宝光耳。

宋之团茶，末之而加以香药，失茶之本味，极为可笑。而墨则必贵香冰，麝之值倍烟值。

造墨用独草取烟，独草则烟细，而烟非桐油不黑。墨工在徽、歙，而烟则产于楚地，彼处产桐子故也。

文衡山曾见一纸，广二丈，赵文敏不敢作字，题记而已。此必王家之物，不知纸工以何器成之。

墨之善者不独在烟，亦在于杵。墨料同而蒸碓多百日者，则倍胜，更多更胜。李廷圭墨可以刮舌，殆亦以此。

墨用鹿角胶，非良法也。墨忌者卤气，鹿生深山中，其角犹有卤气，生海滨者更甚。但用黄牛之革，天泉漂之，至卤气去，煎之成胶，即以入烟，最善。若寒凝之后更溶化而为之，即不尽美。故曰胶新杵到。

古之车战，以一车统百人，万人祇须百车，统之法甚简易。废车用步，法不得不密，密则烦矣。

古兵法祇用车，驾车以马，故《周礼》夏官称司马。国大则马多，故问国君之富，数马以对。

獠獠兵器，每洞各习一种。其习标枪者，铁刃重二斤，把围之木一臂，而开发无不中。狼兵则专习筌，田州岑氏则习双刃，皆绝技也。邻洞莫非世仇，其精兵留以自卫，应调乃次等者。

西人风车藉风力以转动，可省人力。此器扬州自有之，而不及彼之便易。西人取井水以灌溉，有恒升车，其理即中国之风箱也。

中国用桔槔，大费人力。西人有龙尾车，妙绝。其制用一木柱，径六七寸，分八分，橘囊如螺旋者围于柱外，斜置水中而转之，水被诱则上行而登田。又以风车转之，则数百亩田之水，一人足以致之，大有益于农事。苟得百金鸠工庀材，必相仿效，通行天下，为利无穷。

中国鸟铳，利器也。倭人来，始得其式。倭人鸟铳之底不焊，焊者有失，作螺旋铁砧塞之，不炸，又可水涤也。近处有照星，铳端有照星。照星、照门与所击之物相应，发无不中。矢又去远，远胜弓矢。

宋之神臂弓，本弩也。名为弓者有故：弓弦必刮弩臂而行，弓力不尽于矢，神臂于臂之行矢处，削而下之，弦得空行，力得尽于矢也。

龙蛰而起，其破墙屋，穴如碗许大，无风雷，无云水。蛟蜃则乘风雷，作大水，出而伤物甚多，龙故称为神也。《释典》言龙有蛇形、马形、虾蟆形者。又言天帝宫殿在空中，乃龙持之。又言龙能变人形，唯生时、死时、睡时、淫时、嗔时不能变本形。又言龙有热沙著身、烈风坏衣之苦，有金翅鸟吞啖之苦。

天龙为贵，海龙次之，江湖之龙又次之，井潭之龙下矣。

龙喜睡，数百年一觉，甚至积沙其身成村落，觉即脱神弃身而去，不伤于物。神龙行雨以利物，毒龙为恶风以害物。

海中夏、秋间，时有取水之龙。云断处如悬一带，裊裊而动。海运之道，每当龙宫而过，舟师识之。其水湛然，人不敢作语声。不知者发铙，则惊跃而破舟矣。

定海有龙夜归，目如双炬，指挥万姓者不知，以为寇，警发矢射之，伤一目，风涛大作，舟击撞而破者甚众。其后龙出，止见一炬。龙于淫时不能变形，则非人所能匹。《柳毅》传亦不读《释典》者所作。

《释典》言：毒龙目光及人，其人即死。又言以龙心念力故，水即沛然，则不在乎取水以成雨也。

龙以石为食，攫所及，石即如粉。夏禹凿三峡门、龙门，必是役龙为之，非人力所及也，故曰神禹。陈宠曰：萧何草律俱避立春之月，而不计天地之正。三王之春，实颇有违，此亦三王改月并改时之一证也。

上巳祓除谓之戒浴，见《祓除疏》。拏虞、束之对皆失引，或贾氏是唐人语。

明弘治六年奏准每科一选，不拘地方，不限年岁，待进士分拨办事之后，行令有志学古者，各录其平日所作古文十五篇以上，限一月以里投送礼部，礼部阅试讫，编号分送翰林院考订，文理可取者，按号行取吏部。该司仍将各人试卷记号名送内阁，照例考选。每科取选不过二十人，留不过三五人。

卷十八 渌水亭杂识四

古人咏史，叙事无意，史也，非诗矣。唐人实胜古人，如“江流石不转，遗恨失吞吴”，“武帝自知身不死，教修玉殿号长生”，“东风不假周郎便，铜雀春深锁二乔”，“此日六军同驻马，当时七夕笑牵牛”，诸有意而不落议论，故佳。若落议论，史评也，非诗矣。宋已后多患此病。愚谓唐诗宗旨断绝五百余年，此亦一端。

咏史祇可用本事中事，用他事中事，须宾主历然。若祇作古事用之，便不当行。如“太平天子朝元日，五色云车驾六龙”，元者，玄元皇帝老子也。唐世奉为始祖，事固诬诞，天子五色车用汉武甲乙日青车、丙丁日赤车事，周伯强引杜预《左传序》语，谓之具文见意，以其意在文中，更不出意也，乃为高手。今世之大为诗害者，莫过于作步韵诗。唐人中、晚稍有之，宋乃大盛。故元人作《韵府群玉》，今世非步韵无诗，岂非怪事？诗既不敌前人，而又自缚手臂，以临敌失计极矣。愚曾与友人言此，渠曰：今人止是做韵，谁曾做诗。此言利害，不可不畏。若人不戒绝此病，必无好诗。

诗乃心声，性情中事也。发乎情，止乎礼义，故谓之性。亦须有才乃能挥拓，有学乃不虚薄杜撰。才学之用于诗者，如是而已。昌黎逞才，子瞻逞学，便与性情隔绝。

《雅》《颂》多赋，《国风》多比、兴，《楚词》从《国风》而出，纯是比兴，赋义绝少。唐人诗宗风骚，多比、兴，宋诗比、兴已少。明人诗皆赋也，便觉版腐少味。

山谷《猩猩》《毛笔》诗不失唐人丰致，反自题为戏作，失正眼矣。

唐人诗意不在题中，亦有不在诗中者，故高远有味。虽作咏物诗，亦必意有寄托，不作死句。老杜《黑白鹰》、曹唐《病马》、韩偓《落花》可证。今人论诗，唯恐一字走却题目，时文也，非诗也。

自五代兵革，中原文献凋落，诗道失传，而小词大盛。宋人专意于词，实为精绝，诗其尘饭涂羹，故远不及唐人。

人情好新，今日忽尚宋诗。举业欲干禄，人操其柄，不得不随人转步。

诗取自适，何以随人！诗之学古，如孩提不能无乳姆也。必自立而后成诗，犹之能自立而后成人也。明之学老杜、学盛唐者，皆一生在乳姆胸前过日。

庾子山句句用字，固不灵动。六一禁绝之，一事不用，故遂至于澹薄空疏，了无意

味。唐人有寄托，故使事灵。后人无寄托，故使事版。

刘禹锡云：“阁上掩书刘向去，门前修刺孔融来”，借古以叙时事，则灵动。武元衡云：“刘琨长啸风生坐，谢朓题诗月满楼”，实用古事而无寄托，便成死句。建安无偶句，西晋颇有之，日盛月加，至梁、陈谓之格诗，有排偶而无粘沈。宋又加剪裁，遂成五言。唐律《长庆集》中尚有半格体。

七言，汉人犹未成体，至魏文帝之《燕歌行》而成体，至梁人渐近于律，至初唐而遂成七言律诗。

七言歌行始于六朝，其间有长短句，有换韵，音节低昂，声势稳密，居然近体，非古诗也。

《北史·卢思道传》曰：周武帝平齐，授思道仪同三司，追赴长安。与同辈杨休之等数人作《听鸣蝉篇》，思道所为词意清切，为时人所重。新野庾信遍览诸同作者而叹美之。今读其词，居然初唐王、杨诸子。隋炀帝《江都宫乐歌》七言律体已具，律诗亦不始于唐。

五、七言绝句，唐人加以粘缀，声病耳，其体未变于古也。

五言律诗，其气脉犹与古诗相近。至于七言律诗，则别一世界矣。

六朝人凡两句谓之联，凡四句谓之绝，非必以四句一篇者为绝句。

休文八病，宋人已不能辨。大约有声病守粘缀无叠韵，不口吃者，八病俱离。

口吃诗即翻也，叠韵诗即切也。古今贵经教，口吃也，屋、北、鹿、独、宿叠韵也。口吃亦名双声。

“独树临江夜泊船”，或本作“独戍”。愚谓大江中有戍兵处，可泊船，以“独戍”为是。后读《宋史·王明传》，见其地有独树口，不觉自失。

唐人以韵字之少者，与他部合之为通用。哈当与佳通，以隔一部故，遂与灰通，以致字声乱极。韵本休文小学之书以为诗韵已误，今人又作词韵，谬之谬也。

人之作诗必宗《三百篇》，而用韵反不宗之，岂非颠倒？

东翻登，冬翻丁，声固不同，而非不可同押者也。休文诸公强作解事，分为二部，后人以是唐人所遵，不敢相异。

赵文敏诗不独在元人为翹楚，在宋可比晏同叔。而本传云：以书画掩其文章，以文章掩其经济。元世祖开国之君，所用当不谬也。

杨铁崖乐府，别是一种奇特之文，谓之乐府则不可。李宾之亦然。

汉人乐府多浓譎，十九首皆高澹。而《文选注》亦有引入乐府者，不知何故。

乐府，汉武所立之官名，非诗体也。后人以为诗体。古人乐府词有切题者，有不切题者，其故不可解。少陵自作新题乐府，固是千古杰入。

大抵古人诗有专为乐歌而作者，谓之乐府。亦有文人偶作，乐工收而歌之者，亦名乐府。

乐府题今人多不能解，则不必强作，李于鳞攫孟衣冠，徒为人笑。

《焦仲卿妻》又是乐府中之别体，意者如后之《数落山坡羊》，一人弹唱者乎？

曲起而词废，词起而诗废，唐体起而古诗废。作诗欲以言情耳，生乎今之世，近体足以言情矣。好古之士本无其情，而强效其体以作古乐府，殊觉无谓。

律诗，近体也。其开承转合与时文相似，唯无破承起讲耳。古诗则欧、苏之文，千变万化者也。作时文者，多不敢擅作古文。而作律诗者，无不竟作古诗，可乎哉？

古诗汉枚乘所作有在十九首中者，然亦不殊于建安，但举建安之名以为宗极可也。

阮公《咏怀》，不下建安人作，自此而后，西晋已变建安体，绝于阮公。

西晋之《白寔舞词》不言何人作，那得下于汉人。东晋竟无诗，至陶、谢而复振。

康乐矜贵之极，不知者反以为才短幅狭，将为东坡如搓黄麻绳千百尺乎？诗至明远而绚丽已极，虽不似建安，而别立门户不肯相下也。

昌黎作王仲舒碑，又作志。作刘统军志，又作碑。东坡作司马公行状，又作碑。其事虽同，而文词句律乃无一字相似者。蔡中郎为陈太丘、胡广作碑，及为二公作祠铭，同者乃十七八。

韩退之作《博士李君墓志》，通无一语及其家世、宦迹、才行，直谓其误服方士柳泌药下血以死，且援引数人同以是死者，自李虚中、孟简、卢坦而下六七人。其文甚奇。公刻意而作，意欲后世永为鉴戒，然古今碑志无此体也。虞伯生作《晏氏家

谱序》，亦历数宋窦俨、贾昌期而下数十人之子孙隆替，当亦效昌黎而作。然于晏氏亦有感激称颂语，不似昌黎之漠然于李氏也。

欧阳公《谢赐衣带马表》，东坡幼时，老泉命拟作，语意甚工。明成化丙午，场屋出此题以试士，所刻程文则益该博精切。至弘治壬子，复出魏徵《谢黄金厩马》，则益工矣。余意谓宋人尚四六，丙午刻者不失为宋表。壬子所刻，唐人则无是语也。后见常衮集中有《谢绯衣银牙笏玉带表》云：“臣学鬼聚萤，才非倚马，典坟未博，谬膺良史之官；词翰不工，叨辱侍臣之列。惟知待罪，敢望殊私？银章雪明，朱黻电映；鱼须在手，虹玉横腰。祇奉宠荣，顿忘惊惕！蜉蝣之咏，恐刺国风；蝼蚁之诚，难酬天造。”然则唐世已有此体矣。

唐之诗人惟陈子昂、张说、高适集中间有幽州之作，此外游宦于兹土者寡。宋则非奉使不至，故题咏亦无多。王之涣《九日送别诗》云：“蓟庭萧瑟故人稀，何处登高且送归？今日暂同芳菊酒，明朝应作断蓬飞。”窦巩《蓟门诗》云：“自从身属富人侯，蝉噪槐花已四秋。今日一茎新白发，懒骑官马到幽州。”马戴诗云：“荆卿西去不复返，易水东流无尽期。日暮萧条蓟城北，黄沙白草任风吹。”张耒诗云：“十月北风燕草黄，燕人马饱风力强。虎皮裁鞍雕羽箭，射杀阴山双白狼。”四诗辞俱工。其余杂见于出塞、送行之作，如“屡战桥恒断，长冰堑不流”，徐陵诗。“塞禽惟有雁，关树但生榆”，王褒诗也。“万里寒光生积雪，三边曙色动危旌”，祖咏诗也。“日生方见树，风定始无沙”，裴说诗也。“沙河流不定，春草冻难青”，王贞白诗也。“风折旗竿曲，沙埋树杪平”，马戴诗也。“黄云战后积，白草暮来看”，释皎然诗也。“塞馆皆无簟，儒装亦有弓；已行难避雪，何处合逢花”，项斯诗也。“戍楼承落日，沙塞碍征蓬”，张鹭诗也。“有雪常经夏，无花空到春；下营云外火，驱马月中尘”，于鹄诗也。“野烧枯蓬旋，沙风匹马冲”，黄滔诗也。“儿童能走马，妇女亦弯弓”，欧阳修诗也。“边日照人如月色，野风吹草作泉声”，范镇诗也。皆善状燕中风景者。

李群玉《湘妃庙》诗：“相约杏花坛上去，画阑红紫斗揶揄。”范摅《云溪友议》曰：“群玉题庙，见二女曰：‘二年当与君为云雨之游。’段成式戏之曰：‘不意足下是虞舜之辟阳诗人。’轻薄至此，比于周秦行纪甚矣。”按舜升遐已一百十岁，三十征庸，帝妻二女，度其年已及笄，至此时亦是七八十岁老嫗。后人纷纷摹拟，湘筠染泪，比迹巫山，非独褻慢圣人，亦且有乖事实。

唐李益《赠卢纶》诗曰：“世故中年别，余生此会同。却将悲与病，独对朗陵翁。”卢和云：“戚戚一西东，十年今始同。可怜风雨夜，相对两衰翁。”句律凄惋，如出一口。

张继《在临川寄皇甫冉》诗曰：“京口情人别久，扬州估客来疏。潮到浔阳回去，相思何处通书。”以上三句见下一句，别是一体。然其声调，亦不愧盛唐。冉答之

云：“望望南徐登北固，迢迢西塞望东关。落日临川问音信，寒潮惟带夕阳还。”不但格律与之相埒，而一时相与之情亦可想见也。

王建《宫词》：“太仪前日暖房来，嘱向昭阳乞药栽。敕赐一科红踯躅，谢恩未了奏花开。”今人有迁居或新筑室，朋侪醵金往贺，曰暖房，盖自唐人已有之矣。

《兰亭记》“丝竹管弦”之词，诚为重复。然不特右军言之，西汉《张禹传》：“后堂理丝竹管弦”，则汉初已有此语矣。

《六一诗》云：“徐福行时书未焚，逸书百篇今尚存。令严不敢传中国，举世无由识古文。”谓日本国有逸书，历问之贸易往来，不然。昔又传闻彼国无《易经》，舟中有此经即波浪不得过，亦不然。

元遗山编《唐诗鼓吹》，以柳子厚《登柳州城楼》诗置之篇首。此诗果足以压卷乎？且其中许浑诗入选最多，今人脍炙不厌，无怪乎诗格日卑。

丁鹤年，西域人。洪武初，回回人禁例甚严，行止皆不得自由。丁尝有诗云：“行踪不定泉东徙，心事惟随雁北飞。”刘伯温《家居危疑九日诗》云：“薏苡明珠千古恨，却嫌黄菊似金钱。”其意皆可伤也。

《花间》之词，如古玉器，贵重而不适用。宋词适用而少贵重。李后主兼有其美，更饶烟水迷离之致。

词虽苏、辛并称，而辛实胜苏。苏诗伤学，词伤才，宋人好推誉本朝人物，以六一比子长，犹十得五六，以放翁比太白，十不得三四。

昔人好取华丽字以名类事之书，如编珠、合璧、雕金、玉英、玉屑、金钥、金匱、宝海、宝车、龙筋、凤髓、麟角、天机锦、五色线、万花谷、青囊、锦带、玉连环、紫香囊、珊瑚木、金盞香蕊、碧玉芳林之属，未能悉数。闻国学镂版，向有《玉浮图》，不知何书，当亦属类家也。又有孟四元赋，孟名宗献，字友之，自号虚静居士，金时冠于乡、于府、于省、于御前，故号四元。其律赋为学者法。然《金史》不入文苑之列，惟见于刘京叔《归潜志》。

三教中皆有义理，皆有实用，皆有人物。能尽知之，犹恐所见未当古人心事，不能伏人。若不读其书，不知其道，唯恃一家之说，冲口乱骂，祇自见其孤陋耳。昌黎文名高出千古，元晦道统自继孔孟，人犹笑之，何况余人？大抵一家人相聚，祇说得一家话。自许英杰，不自知孤陋也。读书贵多贵细，学问贵广贵实。开口捉笔，驷马不及，非易事也。

儒道在汉为讖纬所杂，在宋为二氏所杂。杂讖纬者，粗而易破。袭二氏者，细而难知。苟不深穷二氏之说，则昔人所杂者，必受其瞒，开口被笑。

《楞严》云：以世界轮回取颠倒，故人、畜、仙其类充塞。世之学仙者，守清静而间阴阳，非色界。天无女人，但有色身，故名色界。欲念消尽者生于此。玉帝犹在欲界第二天，其上更有四层，皆有女人，有女则有欲，但以次轻微而上耳。神仙统于玉帝，事可知矣。人世事《释典》无不言之，谓有力者从修罗虎象中来。

唐太宗命三藏法师取经，既至西域，有老僧年已七百，谓之曰：此间经籍甚多，人命短促，能读几何？须服我延年药，庶可读少分。藏师以帝命有定期而辞之。

《楞严》翻译在武后时，千年以来皆被台家拉去，作一心三观。万历中年，僧交光始发明根性宗趣，暗室一灯矣。钱牧斋研究之工，远过钟伯敬。钟于《楞严》知有根性，钱竟不知也。生天牧斋必在伯敬前，成佛当在伯敬后。

人不可强所不知以为知。唐荆川博极群书，其作《稗编》，门类、议论无不精确，唯所列释氏之徒，宗教不分，为人所议。

万松老人耶律，文正王之师也。其语文正王曰：“以儒治国，以佛治心。”王亟称之，谓“云门之宗，悟者得之于紧峭，迷者失之识情。临济之宗，明者得之于峻拔，昧者失之卤莽。曹洞之宗，智者得之于绵密，愚者失之廉纤。独万松老人全曹洞之血脉，具云门之善巧，备临济之机锋，诚宗门之大匠，四海之所式范。”其倾心至矣。老人有《万寿语录》《释氏新闻》，又善抚琴。尝从文正王索琴，王以承华殿《春雷》及种玉翁《悲风谱》赠之，见《湛然居士集》。且作诗寄老人，有“一曲悲风对谱传”之句。又尝寄孔雀便面，附以诗云：“风流彩扇出西州，寄与白莲老社头。遮日招风都不碍，休从侍者索犀牛。”传之法门，亦佳话也。

元人事佛最可笑者，游皇城一事。作史者乃载入《祭祀志》，甚无识见。

明慈圣太后生于灊县之永乐店，事佛甚谨，宫中称为九莲菩萨。每岁十一月十九日为其诞辰，百官率于午门前称贺，长安百姓妇孺俱与佛寺前焚香祝釐，享天子奉养四十三年。古今太后称全福者所未有也。

火葬倡于释氏，末俗因之。焚尸之惨，行路且不忍见，况人孤人弟乎？燕京土俗以清明日聚无主之柩，堆若丘陵。又剖童子之棺，敛而未化者，裸而置之高处，剪纸为旗，缚之于臂，此尤不仁之甚矣。或谓火化俗始自元代，然世祖至元十五年曾严焚尸之禁，且载《大元典章》，论世者未之考尔。

史籍极斥五斗米道，而今世真人实其裔孙，以符篆治妖有实效。自云其祖道陵与葛

玄、许旌阳、萨守坚为上帝四相，其言无稽，而符篆之效不可没也。故庄子曰：“六合之内，圣人论而不议；六合之外，圣人存而不论。”

少所见多所怪，见骆驼谓马肿背，《楞严》言十二类生甚详，而谭景升《化书》举之以为异事，人安可不学乎！

《释典》多言六道，唯《楞严》合神仙而言七趣。神仙在天下之人之上，虽是长年，实有死时，故又言寿终仙再活为色阴魔也。道士每言历劫不死，夫众生以四大为身，神仙又以四大之精华为身，故得长年。至劫坏则四大亦坏，身于何有而可言历劫？旅次一食可以疗饥，一宿可以适体，谓之到家可乎？以一药遍治众病之谓道，以众药合治一病之谓医。医术始于轩辕、岐伯二公，皆神仙也，故医术为道之绪余。

《楞严》所言十种仙，唯坚固变化是西域外道，余九种东土皆有之，而魏张人元、旌阳地元、丘长春天元为最盛。取药于人之精血者，为人元。取药于地之金石者，谓之地元。取药于天之日精月华者，谓之天元。而餐松食柏如木客毛女辈者，名为草仙，非所贵也。地元、人元有治病接命之术，天元无之。明惠安伯张庆臻患痼疾，伏床七年，涿州冯相国请道师梁西台治之，吸真气二三口，再阅日，庆臻设宴请道师，能自行宾主之礼，京师人所共知者。劳山、青城、大白、武当诸深山，人迹不至之地，有宋元以来不死之人，皮著于骨，见者返走，皆草仙也。既入此途，则与三元永绝，故平叔云：“未炼还丹莫入山，山中内外尽非铅”也。然唯绝于人元，而地元、天元则可作。

《楞严》所谓坚固动止而不休息，即华陀之五禽戏法。庄子所谓熊经鸟伸也，以之治病亦有效，成仙则未闻也。

《什师维摩经注》有云：天人以山中灵药置大海中，波涛日夜冲激，遂成仙药。又在《楞严》十种之外，以非人所能为故也。

兽中唯狐最灵，猿次之。狐多成仙，服役于上帝，如宫奴阉者然。猿，地仙耳。

金华人家忌畜纯白猫，能夜蹲瓦顶，盗取月光，则成精为患也。兽亦知天元哉？

鹿仙，非鹿成仙也。山中道士知人元之法者，以鹿代人，取药物以有成者之名也。

人之得药者，有洗心之工，丹房器皿，弃之而去，故得成仙。不弃去，祇成接命者。异类类为孽，无不击于雷神，淫致祸也。乍能变为人形，以为稀事奇味，耽溺不舍，以致丧命，非药之咎也。《楞严》又有云：日月薄蚀，精气流注，著物成妖，亦天元之意也。古人有不修而得仙者，其偶遇此精气乎？

魏伯阳以六十四卦譬喻丹道之药物火候，后人遂引《易》成仙家之书。

仙书唯《参同契》《入药镜》《悟真篇》是真书，其外《钟吕问答》《仙佛同源》等皆伪。

谚语云：剑法不传。有王老人云：非不传也。剑以槩比之，锋锷如槩刃，而以身为之柄。徽州目连獾人之身法，轻如猿鸟，即剑法也。

唐人小说所言剑仙，似乎寓言，而钱牧斋于明末有客谒之，方巾青布袍，钱以下客畜之。数日后，造钱之友冯班，谓曰：古有剑术，予即其人也。闻牧斋名，故来见之，乃俗流不我识也。班问其术，答曰：亦服药，亦祭。炼术成，遇大风即蓦然起行，不觉已乘空矣。后则微风初起而为之，又后则见旭日之光即为之，久久无不如意矣。言别，送至门外，相揖，班揖起，已失其人。

由吾道荣善洞视，萧轨之败言之如目见，盖即道家之所谓出神也。

中行说难，汉使曰：且礼义之敝，上下交怨，而室屋之极，生力屈焉，此老氏之旨。当时文帝尚黄老，故其一时相习成风如此。

张紫阳之丹法，阴阳清静兼用之。不得其全者，互相攻诋，终无效也。唯治病则偏者亦有效，接命则偏者不可矣。

人唯种禾以取米，则糠自得，本无种糠之法。地元之用金石亦然，而世之种糠者甚多。

涿州冯相国之长子名源淮，作元戎于楚时，追取银魂，每两一分，存者散碎为铜铁，天主教之法也。其人来中国，携银甚多，以追取其魂，故行囊不重滞，名老子藏金法。

以药汁蒸取黄金之汗以治火病，其效如神。明末宿将曾有之尝以示客，状如麻油，自云攻南方时，有大将被铳伤垂死者，与二匙即愈。铅汗亦可用。噎隔者，进之，直下无阻。呕吐之甚者，大肠中粪秽从而出，立刻命尽，非得金石重药无以治之。草木药轻浮，随呕而出也。故地元家谓草木经火则灰，经水则烂，不可为丹药。金则水火不能伤，故能养命。《抱朴子》中有服金银法，王涯置金沙于井，而饮其水。甘露之变受刑，肉色如金。

以药汁浸珠，自成粉，能治危病，又能救记性，不健忘。

《相如传》言在梁著《子虚赋》，天子读而善之。相如曰：“此诸侯之事，未足观

，请为天子游猎之赋。”上令尚书给笔札，相如以子虚，虚言也。为楚称乌有先生者，乌有此事也。为齐难亡是公者，亡是人也。欲明天子之义，故虚借此三人为辞。其为子虚也，既立此三人名为上林之地矣。后《上林赋》亡是公语与乌有先生齐难紧接，无从分段，不知缘何有先后篇之别。岂著《上林》时始改刳前赋而为之耶？不然则前赋为不了语矣。

卷十九 附录上

◇通议大夫一等侍卫进士纳兰君墓志铭（徐乾学）

呜呼！始容若之丧而余哭之恸也。今其弃余也数月矣，余每一念至，未尝不悲来填膺也。呜呼！岂直师友之情乎哉？余阅世将老矣，从我游者亦众矣，如容若之天姿之纯粹，识见之高明，学问之淹通，才力之强敏，殆有过之者也。天不假之年，余固抱丧予之痛，而闻其丧者，识与不识皆哀而出涕也，又何以得此于人哉？太傅公失其爱子，至今每退朝，望子舍必哭。哭已，皇皇焉如冀其复者，亦岂寻常父子之情也！

至尊每为太傅劝节哀，太傅愈益悲不自胜。余间过相慰，则执余手而泣曰：惟君知我子，惠邀君言以掩诸幽，使我子虽死犹生也。余奚忍以不文为辞？顾余之知容若，自壬子秋榜后始，迄今十三四年耳。后容若入侍中，禁廷严密，其言论梗概有非外臣所得而知者，太傅属痛悼，未能殚述，则是余之所得而言者，其于容若之生平，又不过什之二三而已。呜呼！是重可悲也。

容若姓纳兰氏，初名成德，后避东宫嫌名，改曰性德。年十七补诸生，贡入太学。余弟立斋为祭酒，深器重之，谓余曰：司马公贤子，非常人也。明年举顺天乡试，余忝主司宴于京兆府，偕诸举人青袍拜堂下，举止闲雅，越三日，谒余邸舍，谈经史源委及文体正变，老师宿儒有所不及。明年会试中式，将廷对，患寒疾。太傅曰：吾子年少，其少俟之。于是益肆力经济之学，熟读《通鉴》及古人文辞，三年而学大成。岁丙辰，应殿试，条对凯切，书法遒逸，读卷执事各官咸叹异焉。名在二甲，赐进士出身。闭门扫轨，萧然若寒素，客或诣者，辄避匿，拥书数千卷，弹琴咏诗自娱悦而已。未几，太傅入秉钧，容若选授三等侍卫，出入扈从，服劳惟谨，上眷注异于他侍卫。久之，晋二等，寻晋一等。

上之幸海子沙河及西山汤泉，及畿辅五台口外盛京乌刺，及登东岳，幸阙里，省江南，未尝不从先后，赐金牌、彩缎、上尊御饌、袍帽、鞍马、弧矢、字帖、佩刀、香扇之属甚夥。是岁万寿节，上亲书唐贾至《早朝》七言律赐之。月余，令赋《乾清门应制诗》，译《御制松赋》，皆称旨，于是外庭佥言。

上知其有文武才，非久，且迁擢矣。呜呼！孰意其七日不汗死也。容若既得疾，上使中官、侍卫及御医日数辈络绎至第诊治，于是上将出关避暑，命以疾增减报，日再三。疾亟，亲处方药赐之，未及进而歿，上为之震悼。中使赐奠，恤典有加焉。容若尝奉使觐梭龙诸羌，其歿后旬日，适诸羌输款，上于行在遣宫使拊其几筵哭而告之，以其尝有劳于是役也。于此亦足以知上所以属任之者，非一日矣。呜呼！容若之当官任职，其事可得而纪者，止于是矣。余滋以其孝友忠顺之性，殷勤固结，书所不能尽之言，言所不能传之意，虽若可仿佛其一二，而终莫能而悉也，为可惜

也。容若性至孝，太傅尝偶恙，日侍左右，衣不解带，颜色黝黑，及愈乃复。初，太傅及夫人加餐，辄色喜以告所亲。友爱幼弟，弟或出，必遣亲近僮仆护之，反必往视，以为常。其在上前，进反曲折有常度，性耐劳苦，严寒执热直庐，顿次不敢乞休沐自逸，类非绮襦纨屨者所能堪也。自幼聪敏，读书一再过即不忘。善为诗，在童子已句出惊人，久之益上，得开元、大历间丰格。尤喜为词，自唐、五代以来诸名家词皆有选本，以洪武韵改并联系《名词韵正略》。所著《侧帽集》，后更名《饮水集》者，皆词也。好观北宋之作，不喜南渡诸家。而清新秀隽，自然超逸，海内名为词者皆归之。他论著尚多。其书法摹褚河南《临本禊帖》，间出入于《黄庭内景经》。当入对殿廷，数千言立就，点画落纸，无一笔非古人者。荐绅以不得上第入词馆为容若叹息，及被恩命引而置之珥貂之行，而后知上之所以造就之者，别有在也。容若数岁即善骑射，自在环卫，益便习，发无不中。其扈蹕时，雕弓书卷错杂左右，日则校猎，夜必读书，书声与他人鼾声相和。间以意制器，多巧，俚所不能。于书画评鉴最精。其料事屡中，不肯轻为人谋，谋必竭其肺腑。尝读赵松雪《自写照诗》有感，即绘小像仿其衣冠。坐客或期许过当，弗应也。余谓之曰：尔何酷类王逸少？容若心独喜。所论古时人物，尝言王茂弦阌阌阌，心术难问。娄师德唾面自干，大无廉耻。其识见多此类。间尝与之言往圣昔贤修身立行及于民物之大端，前代兴亡理乱所在，未尝不慨然以思读书。至古今家国之故，忧危、明盛、持盈、守谦、格人，先正之遗戒有动于中，未尝不形于色也。呜呼！岂非《大雅》之所谓亦世克生者耶！而竟止于斯也，夫岂徒吾党之不幸哉！

君之先世有叶赫之地，自明初内附中国。讳星悬达尔汉君，始祖也。六传至讳养汲弩君，高祖考也。有子三人，第三子讳金台什君，曾祖考也。女弟谓太祖高皇帝后，生太宗文皇帝。太祖高皇帝举大事，而叶赫为明外捍，数遣使谕，不听，因加兵，克叶赫，金台什死焉，卒以旧恩存其世祀。其次子即今太傅公之考，讳倪迓韩君，祖考也。君太傅之长子，母觉罗氏，一品夫人，渊源令绪本崇积厚，发闻滋大，若不可圉。配卢氏，两广总督、兵部尚书、都察院右副都御史兴祖之女，赠淑人，先君卒。继室官氏，某官某之女，封淑人。男子子二人，福哥，女子子一人，皆幼。君生于顺治十一年十二月，卒于康熙二十四年五月己丑，年三十有一。君所交游，皆一时俊异，于世所称落落难合者，若无锡严绳孙、顾贞观、秦松龄、宜兴陈维嵩、慈溪姜宸英，尤所契厚。吴江吴兆骞久徙绝塞，君闻其才名，赎而还之。坎轲失职之士走京师，生馆死殡，于赀财无所计惜。以故君之丧，哭之者皆出涕。为哀挽之词者数十百人，有生平未识面者。其于余绸缪笃摯，数年之中，殆日以余之休戚为休戚也。故余之痛尤深，既为诗以哭之，应太傅之命，而又为之铭其葬，盖未有日也。铭曰：

天实生才，蕴崇胚胎。将象贤而奕世也，而靳与之年，谓之何哉！使功绪不显于旗常，德泽不究于黎庶，岂其有物，焉为之灾？惟其所树立，亦足以不死矣，而亦又奚哀！

◇通议大夫一等侍卫进士纳兰君神道碑文（徐乾学）

侍卫纳兰君容若之既，葬太傅公复泣而谓余曰：“吾子之丧，君既铭而掩诸幽矣，余犹惧吾子之名传之弗远也。揭而表诸道，庶其不磨，然非君无与属者。”余固辞不可。在昔蔡中郎为人作志铭复为之庙碑者，不一而足。韩退之于王常侍弘中厚也，既志其墓，又为其隧道之碑，情至无已也，况余于容若师友谊尤笃？是于法为得碑，于古为无戾。乃更撰次其辞，以复于太傅。

惟纳兰氏旧著姓，为金三十一姓之一。望载图史，代产英隽。君始祖讳星忸达尔汉，据有叶赫之地二百余年，中国所谓北关者也。数传至高祖考讳养汲努，曾祖考讳金台什，女弟作嫔太祖高皇帝，实生太宗文皇帝，而叶赫世附中国。当国家之兴，东事方殷，甘与俱烬，太宗悯焉。乃厚植我宗，俾续其世祀。以及其次子讳倪迓韩者，则太傅之父而君之祖考也。太傅娶觉罗氏，一品夫人，生君于京师钟灵储祉，既丰且固。君自髫髻，性异恒儿。背讽经史，常若夙习。十七补诸生，贡太学，有声。十八登贤书，十九举礼部试。越三年，廷对，敷事析理，谙熟出老宿儒上，结字端劲合古法，诸公嗟叹，天子用嘉，成二甲进士。未几，授以三等侍卫之职。盖欲置诸左右，成就其器而用之。而上所巡幸南北数千里外，登岱幸鲁，君常佩刀随从。虔恭祗栗，每导行在上前，骑前却视，恒不失尺寸，遇事劳苦，必以身先，不避艰险退缩，上心怜之。其前后赉予重叠，视他侍卫特过渥。已，进一等侍卫。值万寿节，上亲御笔书唐贾至《早朝诗》赐之。后月余，令赋诗献，又令译《御制松赋》，皆称善久之。然君自以蒙恩侍从，无所展效，辄欲得一官自试。会上亦有意将大用之，人皆为君喜。忽以去年五月晦得寒疾卒，卒之日，人皆哀君，而又以才不竟用死，为君深惜云。

君自少无子弟过天性孝友。黎明起，趋太傅、夫人所问安否，朝退复然。友爱二幼弟，与之嬉游，同其嗜好，怡怡庭闱间，日以至夜。暇则扫地读书，执友四五人考订经史，谈说古今，吟咏继作。精工乐府，时谓远轶秦、柳。所刻《饮水》《侧帽词》，传写遍于村校邮壁，海内文士竞所摹仿，然君不以为意。客来上谒，非其愿交，屏不肯一覲面，尤不喜接软热人。所相知，心款款，吐肺腑，倒困囊，与为酬酢不厌。或问以世事则不答，间杂以他语。人谓其慎密，不知其襟怀雅旷固如是也。

当君始得疾，上命医数辈来。及卒，上在行宫，闻之震悼。后梭龙诸羌降，命宫使就几筵哭告之，以君前年奉使功故。君有文武才，每从猎射，鸟兽必命中。卒有成功于西方，亦不为无所表见。歿时年仅三十有一，余既序而又系之以辞曰：

绵绵祚氏，著于上京。巍巍封国，叶赫是营。惟叶赫之祀，施于孙子，既绝复完。天子之恩，笃生相国，补袞是职，蓄久而丰。发为文章，宜其黼黻，为帝衣裳。帝谓汝才，爰置左右，出入陪从，刀笔区。匪朝伊夕。自天子所。亦文亦武，惟天子

是使。生于膏腴，不有厥家。被服儒士，古也吾徒，何才之盛，而德之静。我勒其封，谁曰不永！

◇通议大夫一等侍卫进士纳兰君神道碑铭（韩）

维天笃我勛相之臣，神灵和气，萃于厥家。常开哲嗣，趾美前人。自厥初才子罔不世济，若伊之有陟，巫之有贤，嬖于功宗，登于策书。后之名公卿子，发闻能益人家国者，亦往往间出。其或年之有永有不永，斯造物者之不齐。虽休光美实，显有令闻，足以自寿无穷，而存亡之系，在于有邦有家，则当吾世而尤痛我纳兰君。

君氏纳兰，讳成德，后改性德，字容若。惟君世远有代序，常据有叶赫之地，明初内附，为君始祖星忒达尔汉。六传至君高祖，讳养汲弩，女为高皇后，生太宗文皇帝。曾祖讳金台什，祖讳倪迈韩，父今大学士太傅公也。母觉罗氏，封一品夫人。太傅公勋高望钜，为时柱石，而庭训以义方。君胚胎前光，重休袭嘉，自少小已杰然见头角。喜读书，有堂构志。人皆曰：太傅有子，年十八九，联举京兆礼部试。又三年而当丙辰廷对，劲直切劘，累累数千言，一时惊叹。

今上知君材，欲引以自近，以二甲久次选授三等侍卫，再迁至一等。盖上方厉精思治，大正于群仆侍御之臣，欲罔非正人以旦夕承弼，其惟君吉士以重此选也。君日侍上所，所巡幸无远近必从。从久不懈，益谨。上马驰猎，拓弓作霹雳声，无不中。或据鞍占诗，应诏立就。白金、文绮、中衣、佩刀、名马、香扇、上尊御饌之赐相属也。康熙二十一年秋，奉使觐唃龙羌，道险远，君间行疾抵其界，劳苦万状，卒得其要领还报。后唃龙输款而君已歿，上时出关，遣宫使拊其几筵哭而告之，重悯其劳也。君既以敬慎勤密当上意，而上益稔其有文武才。且久，更明习可属任，尝亲书唐贾至《早朝诗》赐之。又令赋《乾清门应制诗》，译《御制松赋》，上皆称善。中外咸谓君将不久于宿卫行。付以政事，以展其中之所欲施，君亦自感厉思竭所以报者。而不幸遽病，病七日，遂不起。时上日遣中官、侍卫及御医问所苦，命以其状日再三报，亲处方药赐之，未及进而绝。上震悼，遣使赐奠，恩恤有加，屡慰谕太傅公母过悲，然上弥思之弗置也。呜呼！君其竟死矣，而君之志未一竟也。

君性至孝，未闾明入直，必之太傅、夫人所问安否，归晚亦如之。燠寒之节，寝膳之宜，日候视以为常。而其志尤在于守身不辱，保家亢宗，不仅以承颜色、娱口体为孝也。侍禁闼数年，进止有常度，不失尺寸。盛寒暑，必自强，不敢辄乞浣沐。其从行于南海子、西苑、沙河西山汤泉，尤数尝西登五台，北陟医巫闾山，出关临乌喇，东南上泰岱，过阙里，度江淮，至姑苏，揽取其山川风物，以自宽广资博闻，而上有指挥，未尝不在侧，无几微毫发过。性周防，不与外庭一事，而于往古治乱政事、沿革兴坏、民情苦乐、吏治清浊、人才风俗盛衰消长之际，能指数其所以然，而亦不敢易言之。窥其志，岂无意当世者？惟其惓惓忠爱之忱蕴蓄，其不言之

，积以俟异日之见庸，为我有邦于万斯年之计，而家亦与其福也。君虽履盛处丰，抑然不自多于世。无所芬华，若戚戚于富贵，而以贫贱为可安者。身在高门广厦，常有山泽鱼鸟之思。达官贵人相接如平常，而结分义，输情愫，率单寒，羁孤侘傺因郁，守志不肯悦俗之士，其翕热趋和者，辄谢弗为通。或未一造门而闻声相思，必致之乃已。以故海内风雅知名之士，乐得君为归，藉君以起者甚众。而吴江吴孝廉兆騫，以隼才久戍绝塞，君力赎以还而馆之，歿复为之完其丧，世尤高君义也。读书机速过人，辄能举其要。著诗若干卷，有开、天丰格。颇好为词，盖爱作长短句，跌宕流连以写其所难言。尝辑《全唐诗选》《词韵正略》，而君有集名《侧帽》《饮水》者，皆词也。工书，妙得拨镫法，临摹飞动。晚乃笃意于经史，且欲窥寻性命之学。将尽裒辑宋元以来诸儒说经之书以行世，其志盖日进而未止也。嗟夫！君于地则亲臣，即他日之世臣也。使假之年而充斯志也，以竟其用，譬若登高顺风，不疾声速。与夫疏逖新进之臣，较其难易，夫岂可同日而语？昊天不吊百年之乔木，其坏也忽诸斯。海内之知与不知者，无不摧伤，而余独尤为邦家致惜者也。

君卒于康熙乙丑夏五月，距其生年三十有一。娶卢氏，赠淑人，两广总督、尚书兴祖之女。继官氏，封淑人，某官某之女。子二，长曰福哥，次曰某，女二，俱幼。始君与余同出学士东海先生之门，君之学皆从指授，先生亟叹其才佳，其器识之远，歿而哭之恸，既为文以志其藏。而顾舍人贞观、姜征君宸英雅善君，复状而表之矣。太傅公以君之常道余不置也，属以文其隧上之碑。余方悼斯世之失君，而非徒哭吾私，其敢以荒落辞辄论次君志之大者如此，而系之以铭。铭曰：

凤觜麟角绝世稀，渥洼籀云种权奇。家之令器邦之基，弱年文史贯珠玑。胸罗星斗翼天垂，拜献昌言白玉墀。致身端不藉门资，雀弁峨峨吉士宜。

帝简厥良汝予为，周庐陞栝中矩规。郎曹窃视足不移，手挽繁弱仰月支。错杂帐帘书与诗，奉使绝徼穷羌氏。冰雪皴瘃不宿驰，山川厄塞抵掌知。

卒降其王若鞭笞，帝方用嘉足指麾。将试以政工允釐，岁星执戟亦暂期。阿鸿摩天竟长辞，正人元气身不訾。平生菀结何所思，要扶羲和浴咸池。

明良常见唐虞时，千秋万世此志赍。埋玉黄泉当语谁，泰山毫芒一见之。琳琅金薤散为词，我今特书表其微。

荒郊白烟冢离离，独君不朽征君碑。

◇进士纳兰君哀词

◇张玉书

侍卫成君容若以疾卒于位，时天子将驾銮辂遵皇衢历畿辅，避暑于塞外迤北之地，君之尊人相国先生方被命扈从。比君讣上闻，朝廷动色震悼，旋遣近臣致奠于几筵，而特诏相国辍行，所以降旨慰谕甚悉。呜呼，哀哉！何天不吊而夺君之速也。

君幼秉异姿，丰标卓跖。怀瑜握瑾，被服儒雅。年甫弱冠，即以制举艺策名春官，一时振奇。摘藻之士争颂君文，以为贾、董醇深，韩、欧典则兼而有之。而君色下气温，规言矩步。乍与君接者，不知为荫藉高门，且以鸿文雄跨宇内也。岁丙辰，以对策登上第，天子雅重君才，不欲烦以庶职，特擢宿卫，给事禁中。君禀相国义方之教，衣金貂，曳赐履，入侍殿廷，出骖羽骑，一心匪懈，夙夜在公。天子察君忠勤，倚任惓切。信所谓韦氏之有元成，许国之有廷硕者矣！而君倬直稍暇，留精问学，缥緲插架，丹黄满家。其入翹材之馆，而分文宴之席者，辄有人尽江、萧，座皆庾、鲍之目。惟君对客抽毫，停觞掷句，即新词、小令，亦直追渭南、稼轩之遗。宾从过而咨嗟，词宿为之叹绝，岂非天授逸才，身兼数器，十乘蔚称国宝，而千里美为家驹者乎！夫何偶抱微疴，浹旬增剧，年仅及壮，顿捐馆舍？呜呼痛哉！玉书备官禁林，与君时接履。家弟仕可自举京兆及对大廷，皆附名君后，得称世讲。昨岁冬，君扈蹕抵广陵，某适罹先人之戚，星奔南下，揖于河干，问慰而别。距今甫半载，而凶问忽至，恻可知已。礼闻朋友丧，则为位而哭。余兄弟既哭君于位矣，死生契阔，无以为怀，谨寓诸不文之词，以写余二人之哀辞。曰：

我闻天道兮，履顺遇丰。植仁树义兮，福萃厥躬。菀枯贸理兮，清浊暗瞢。俯仰抑塞兮，欲诉苍穹。繄惟我君兮，阅阅崇隆。贵而好修兮，折节磨巘。

世家侨兮，执德弥冲。在帝左右兮，翼卫瑶宫。六龙时迈兮，靡御弗从。边城塞草兮，铁驷雕弓。心膂是寄兮，匪懈益恭。性耽图史兮，退食自公。

延接才俊兮，扬英飞琼。盘敦主盟兮，玉应金春。繄余昆季兮，行合趣同。踪迹间阔兮，道义交融。衔恤南返兮，时惟仲冬。迎銮江浒兮，复覲光容。

还轡几何兮，遽遭鞠凶。哀音上彻兮，诏出丹枫。芬是荐兮，式酬乃庸。元臣戚子兮，帝为心恫。倚庐逖听兮，忧怀忡忡。追惟畴昔兮，悲思安穷。

燕云江树兮，酹酒遥空。絃词千里兮，陨涕秋风。

◇杜臻

容若君以疾卒于邸第，天子闻而轸悼，赐金以敛。自公卿而下至于僚友，以及韦布单寒之士，莫不嗟伤陨涕。君为长白巨族，今相国太傅公之冢子，贵矣，乃能折节读书，延引素士，为布衣交，相与砥磨千秋之业。诗词清丽，专门所不及。居家孝友，与人处一于诚挚，振起困约，解推靡倦。以故知与不知，咸以得一见君为幸。

于其亡也，亦感慕有加云。君以康熙壬子举于乡，癸丑捷南宫，丙辰廷对，高第，方且陟清华，领著作矣。天子以君勋戚之贤，简任心膂。欲君常在左右，遂复补珥貂贵秩，率环卫，侍禁近焉。比年以来，车驾躬诣盛京，展谒陵寝已，复避暑口北，又南巡齐鲁，登泰山，涉江淮，至于吴会，君皆从。虽都成之奉车、富平之扈跸不能拟其亲幸。盖君忠爱恳惻结于方寸，后先疏附，恭谨罔懈，故能特荷主知。非独河东三篋暗记靡遗，出入禁闼，视瞻端审而已也。忆往岁太傅公正位秉钧，余以菲薄承乏佐铨，亡何，遂婴先子之戚，太傅公笃念寮？，锡之奠赙。惟时君实銜太傅之命，以觐临于几筵，披帷奠俎，执礼甚恭。感此隆厚，至今靡忘也。迨余赴补入都，则见君年龄益茂，宸眷益深，以軼群绝伦之才，而日近至尊，亲承辟咎之海。天子实重爱君雅，欲君习勤劳，练繁剧，然后畀以政事大用，行有日矣。而太傅公亦乐得有君以承弓冶之业，乃不图君竟奄然而长逝也。呜呼！天胡不佑善人？其能无梦梦之叹哉？余忝旧谊，且惜君以终贾之年，而早赴玉楼之召也，爰作长言以哀之。曰：

繫艮方之灵岳兮，峙概日之穹标。蟠丰镐之丕基兮，复钟萧而毓曹。诞才子之笃诚兮，珥戚里之丰貂。搢杏苑之琼葩兮，自弱冠而登朝。

夫既有此华蒐兮，又申之以练要。佩青萍而被宝璐兮，握荃兰而纫桂椒。袭渊云之藻采兮，揽屈贾之流飙。惟含章而不曜兮，斯履盛而无骄。

辟东阁以邀宾兮，效南皮之燕友。将安吉于缁衣兮，托殷勤于佩玖。来泌水之高贤兮，致梁园之皓叟。藉坟索以穷年兮，慕伤生之屈首。

忘朱门之华胄兮，期立德于不朽。惟大钧之爱物兮，神裁成于汜护。试申屠于都尉兮，习兰成于典午。荫格泽之虹旂兮，蹶钩陈之象辂。

御二龙于璇台兮，追八骏于悬圃。蒙曦景之垂晖兮，邀九天之咳唾。沐卷阿之休风兮，裊蓼萧之湛露。稟渊猷于密勿兮，庶盐梅之接武。

陋汉室之韦平兮，乃遂为丁公与禽父。夫何昊天之不吊兮，悴玉树以秋霜。痛西日之难回兮，悼修夜之不阳。闻鸣驴于荒草兮，跼孤鸱于白杨。

著犀尘而凭棺兮，摧瑶琴而下堂。嗟灵魂之永逝兮，般裔裔其徜徉。贯列缺而乘罔象兮，排浮云而轶猖狂。惟平生之素好兮，空踟躅而增伤。

虽惋叹其何及兮，泪流裾之浪浪。

◇严绳孙

吾友成子容若以疾卒于京邸，时余方奉假南归，病暑淹于途次，不获一遂寝门之哭，且中情恫恍，未忍信其遽然。及还里门，有仆归自京师，骤诘其语，乃知吾友之亡信矣。

呜呼，哀哉！始余以文字交于容若时，容若方举礼部，为应时之文。丙辰以后，旁览百氏，习歌诗乐府。既官于朝，不能时时读书，然尝所涉览，辄契古作者之意。于前人书法，皆得之形体结撰之外，故不类俗学比。喜小词，每好为之。当其合作，宋诸名家不能过也。或感触风景，扈从山川，时复有作。及以相质，欣赏其长而剔抉其所短，莫不厘然各当于心焉。初，容若年甚少，于世无所措意。既而论文之暇，闲语天下事，无所隐讳。比岁以来，究物情之变态，辄卓然有所见于其中。或经时之别，一再接其绪论，未尝使人不爽然而自失也。盖其警敏如此。使更假以年，吾安知其所极哉！夫容若为吾师相国子，师方朝夕纶扉，以身系天下之望。容若起科目，寻擢侍殿陛，益密迹天子左右，人以为贵近臣无如容若者。夫以警敏如彼而贵近若此，此其夙夜寅畏，视凡人臣之情，必有百倍而不敢即安者，人不得而知也。岁四月，余以将归入辞，容若时坐，无余人，相与叙生平之聚散，究人事之终始，语有所及，怆然伤怀。久之，别去，又送我于路，亦终无所复语。然观其意，若有所甚不释者。颇怪前此之别，未尝有是。余因自惟衰飒之年，恐一旦溘先朝露，以负我良友。又念余即未遽北返，容若且从属车南幸，当相见于九峰二泉之间。是时冀哀飒者，尚无恙也。呜呼！岂谓容若之强且少，而先我长逝哉？向使知其如此少迟，吾行犹得凭棺一恸。虽复老疾交迫，当不以故土之恋，易此须臾矣。唐李德裕以宰相子继登台辅，深习典故，用能勋业烂焉光于史册。容若夙奉庭训，顷且益被主知。兹其歿也，天子所以哀而恤之者，皆出于异数，足知上之任用之意未有量。乃竟不得一展其才，而徒以乐府小道自托于金荃兰畹之遗，使后世缀文之士，抚卷而三叹也。呜呼，岂非家国之均痛哉！爰为文以哀之。辞曰：

仰崇山之郁嶂兮，薄青云以上浮。羌置身于其巔兮，情坎壈以怀忧。蹶高步于昭昭兮，秉小心之翼翼。入余登于螭头兮，出望鸡翘以云集。

谓华蒐其足乐兮，夫焉察君之中情。竭惓款以展采兮，用无忝于所生。抗《侧帽》之高唱兮，聊以导夫郁积。假玩物以永日兮，其肯以吾心而为役？

灿金题与玉躔兮，错钟彝之虫篆。曾何金石之可保兮，矧云烟之过眼。君既洞烛乎人世兮，又何怀乎故宇。眷亲闱之罔极兮，亮百生而莫补。

在瞿昙之往说兮，或有托以去来。岂诚前因之不可昧兮，歟遗迹乎尘埃。嗟余生之颺落兮，蹇纡郁其谁语。托末契于忘年兮，率中怀以相许。

历一纪以及兹兮，山川犹其间之。保离会于百年兮，忽中道而长辞。余不乐乎秋风兮，吹归心以南堕。纷饮泣以狐疑兮，冀道闻之未果。

胡昊天之不吊兮，人琴忽其俱捐。从此望玉河之门馆兮，首燕路而不前。泣白雪于遗编兮，袞银钩于故牋。苟斯人其可作兮，何百身之莫赎。

梦余登于君之堂兮，易缥緲以帷。飘风撼其入户兮，落叶依于重闺。惟西河之永痛兮，欲寄慰其何言。戒素车其犹未达兮，心怅结而烦冤。

浮生惘其伤逝兮，顾崦嵫之已迫。

指九壤以为期兮，庶永托乎晨夕。

◇徐倬

盖闻牙期叶听，故辍响于朱弦；庄惠同心，因罢谈于清濮。闻山阳之短笛，自尔销魂；过黄公之旧垆，能无流涕？况夫英年飞？，才子修文？人之云亡，情何能已。同年容若先生望推尹陟，世系韦平。手弄金环，天生凤慧。庭罗宝树，品越恒流。揖客而早对杨梅，把酒而立成《鹦鹉》。读书则五行俱下，挥毫则万斛惊飞。先超紫燕之群，真无空阔；继啖红绫之饼，独擅风流。因豹尾之须才，特留禁籞；为虎贲之得士，竟夺花砖。身惹御香，在杨柳春旗之内；时承天语，当落英芝盖之前。才挽雕弓，吟猿落雁；便提湘管，垂露悬针。洞野钧天，尽助雄文之丽；甘泉卤簿，胥收掌故之中。而且陆贾赐佗，相如谕蜀，驰驱不惮乎万里，要荒特重其片言。此殆吉甫再来，文武有兼收之用；曹公复出，书猎有迭举之能者也。若夫高怀天授，逸韵生成，产金张许史之家，偏亲韦布；擅卢骆王杨之制，还喜《香奁》。绝妙好辞，双鬟按拍；流传乐府，孺子知名。辋水营丘，看烟云之过眼；明窗棐几，存丘壑于此中。云情半寄酒边，霞想直驰天外。至于缠绵友谊，悱恻朋情，入座尽是王裴，清言无非支许。红荷香里，常留砚北之人；渌水亭间，竟作道南之宅。张琪死日，妻子惟托朱晖；刘尹端居，风月专思元度。是又伐木陈诗以后，谷风兴刺以来，未有方兹古道，伧厖久要者矣。奈何桂蠹兰萎，人亡琴在，露未零而陨叶，壶方漏而闻钟？玉树一枝，长埋黄土；龙文三尺，竟跃沧波。续断无弱水之胶，回生乏祖洲之草。九重且兴不之叹，中郎行书有道之碑。岂止师友朋徒，寝门聚哭已哉？倬热不随，人傲常弃。世贫虽见怜于鲍叔，懒斯自绝于山涛。刺在袖而莫投，足望门而屡却。词惭兰畹，聊寄相思。约在竹林，将期款曲。感恩之义未报于生前，知己之言忽传于身后。用抒情愫，敬述哀辞：

望崦嵫之戴斗兮，惊芒角之食煤。仰文昌之黯澹兮，失云汉之昭回。命天孙使持节兮，敕鸛鸟为行媒。召才人于金阙兮，攄菁藻于瑶台。

玉楼峩其耸峙兮，闾阖飏而荡开。霓旌纷以往来兮，苍虬肃驾于兰陔。遂御风以上征兮，已越身于尘埃。云容容而在下兮，山隐隐而驱雷。

疑天帝之好奇兮，欲与圣主而争才。舍阆苑之松乔兮，攫金马之邹枚。落灵芝于初旭兮，枯芳兰于始蒔。收麒麟于房驷兮，留朽骨于燕台。

瞻银潢之奕奕兮，乘箕尾而徘徊。惟龙文在终古兮，时照耀于帝魁。

庶真爽之不昧兮，永鉴格于岑苔。

◇翁叔元

康熙二十四年五月晦，己丑，我容若年世兄先生捐馆舍，叔元往哭于其第。既殡，往哭于其位次。越三日，再往阍人辞焉。又十日，偕同馆之士五人，旅拜于几筵，哭如初。又八日，以天子命出殡于郊外，又往送之郊。呜呼！容若其自是长与余别矣。余与君定交，自壬子同举京兆始也。方是时，君未弱冠，遵庭训，闭户读诵，不妄交人，故同举之士百二十有六人，相与契合者，数人而已。明年成进士，余落第。君时过从，执手相慰藉，欲延余共晨夕。

余时应蔡氏之聘，不果就。是岁冬，谓余曰：“子久客，不一归省坟墓，知子以贫故艰于行，吾为子治行。”于是余作客十五年，至是始得归拜先人丘垄，僦数椽居妻子，君之赐也。迨余丙辰幸登第，留都门，往来逾密。君益肆力于诗歌、古文辞，时出以相示，邀余和，余愧不能也。亡何，君入为侍卫，旦夕丞弼，出入起居多在上侧，以是相见稀少。然时时读君诗及所与友朋往还笔墨，知君兴益豪，风流俊迈追古作者，非复往时之所造矣。退朝之暇，婆娑古人法书名画，焚香评赏，翛然自得。真草书与晋唐人相上下，淋漓泼墨，极飞动之致，视富贵名誉泊如也。属四海荡定，兵戈偃息，圣天子勤学好古，早朝晏罢，我师相国赞理密勿，谋谟庙堂，泽润生民，功在竹帛。君荫藉高华，海内有承平王孙之目。而其所处，乃如幽人名士，其高致雅量不可及如此。呜呼！如君者而何以死也。岂天地菁华之气，发越既至而随以尽耶？抑欲脱去尘网而与造物者游耶？不然，则志有所未尽展，才有所不得施，乃遗恨而入地耶？呜呼！容若何以死也。余无文，不能状君之生平以传于后。于运车之出也，姑为相挽之词以饯之。其词曰：

地纁顿兮天网张，虞门辟兮红云光。策紫骝兮宴曲江，有才子兮美清扬。挟云汉兮扶天章，给笔札兮侍帝旁。从羽猎兮赋《长杨》，捧日毂兮指扶桑。

视寝膳兮中书堂，比苏颞兮在有唐。善书法兮继钟王，罗锦绣兮为心肠。探二酉兮贮书仓，奴风骚兮仆齐梁。三峡流兮词源长，染柔翰兮飞羽觞。

骨香艳兮格老苍，彼辛苏兮面目佺。敦气谊兮重伦常，附谱牒兮共门墙。念师恩兮意彷徨，灯夜露兮马早霜。茹荼蓼兮形神伤，夺劳臣兮修文郎。

排云雾兮叫帝阍，亘斗极兮吐角芒。目耿耿兮泪承眶，惟在三兮死不忘。如斯人兮今则亡，仰视天兮徒茫茫。焚兰蕙兮铄凤皇，修胡彭兮短胡殇。

呜呼哀哉兮，帝命孔彰。辍朝震悼兮，黄鸟三良。老亲肠断兮，血染绣裳。麻衣如雪兮，幼子扶床。英灵被发兮，下大荒。丹飞飞兮，返北邙。白杨萧萧兮，松风悲凉。陈芜词兮，奠椒浆。

身骑箕尾兮，八表翱翔。默佑皇图兮，姬历永昌。

◇吴兆宜

呜呼，哀哉！茫茫苍昊，八舍陨贤人之星；浩浩皇舆，千牛摧智氏之石。台倾稷下，寒士之广厦无依；弦绝匣中，素交之知音奚托！楚老致芳兰之泣，哲人滋坏木之悲。呜呼，哀哉！公之歿也，较之荀令，则之拥旆已三周，星次比潘安仁之斑鬓。尚一欠瓜期，而桐君之药录靡征，孤城之相术罔验尔。其穷泉斯闭，有去无归；长夜云遥，终古莫晓。睹生存之华屋，悲零落于山丘。嵇叔夜之闲庭衰杨徒在，王子猷之旧径种竹空存。东门旷达之怀，竟抱招魂之痛；西汉翺材之所，翻为思子之宫。呜呼，哀哉！

宜兄兆騫少与梁汾友善，公耽志友朋，娱情竹素，以梁汾言，怜騫才而拯之。王孙甲第，穷鸟入怀；公子华池，涸鱼出水。于是徒中安国，死灰复然；绝域班超，皓首生入。廿年沙漠，雪窖而冰天；三载宾筵，锦衣而鼎食。侵晨弄墨，笔彩潜飞；半夜弹棋，灯花碎落。解骖赎石父之罪，而岂徒哉？设醴尊穆生之贤，良有以也！呜呼！生平素昧，激发初由一言；意气相孚，风期永堪千古。父生而母鞠，惟公得成之焉。马角而乌头，非公孰急之焉。既而苏韶入梦，温序思归。牖北只鸡，怅回车之三步；日南送雁，载焦麦之一舟。夫皆我公之赐也欤！

呜呼！其好义也如彼，其深仁也如此，固宜五福备至，三寿作朋也。而乃宿草未生，撤琴斯及。床惊斗蚁，灾降乃肱乃股之臣；室进巢耽，祸钟允文允武之佐。呜呼，哀哉！

公出入侍从，则羽猎陪游；师旅劬劳，则兰池奏对。闺门肃穆，表万石之淳风；著作裔皇，垂千秋之鸿业。是以绩列太常之纪，名传史馆之文。七日歌虞，文士上中郎铭勒之制；百年谏行，公卿进兰成碑版之词。兆宜则何敢知焉。不才如宜，复蒙公置之宾馆，华山五千，终缺公恩之重；溟池九万，莫逾公泽之深。敬述哀辞，聊当痛哭云尔：

蔚矣成公，人伦之宗。摘华帝室，博济人穷。词藻翩翩，并驱牧马。雅尚孤标，阮嵇上下。兄騫塞表，二十三年。胥靡蒙脱，尽室南旋。管宁归魏，郭隗在燕。匪朝

伊夕，谈论经史。

花间草堂，击钵倾水。岁月不居，忽焉三祀。薨死公哭，云遇梁溪。《金缕》一章，声与泣随。我誓返子，实由此词。相去半载，公遽长逝。玉树言埋，人琴交瘁。呜呼！我公而竟死耶？

天高地厚，公恩莫加。山颓木坏，我痛无涯。侍医视疾，大官致吊。眇焉燕雀，胡然啁噍。

追念哲人，饮恨吞声。如真可赎，人百其身。

◇谏词董訥

呜呼！自古名才秉英杰之姿，擅文章之誉，有盛名于时者，每为造物所忌，故干将多缺折而山栢享修龄。茫茫天道，不可问也。居恒读书，废卷浩叹，亦以兹为遗恨焉。侍卫容若公，为吾师相夫子冢嗣。二十年前，余在编翰，受知夫子。夫子以余为迂疏，不惟不过督，且从而礼貌之，敦吐握之风，宽简澹之士。时公方成童舞象，固已嶷崎不群。相与纵谈，汉魏不以东海之士为孤僻而略之也。数载之间，沉酣六艺，囊括百家。汲古博综，下帷不辍。兼之一目数行，聪敏绝世，凡诸天文象纬、舆地山川、宝笈琅函、虫鱼草木，靡不穷搜广采，考核精详。遂以子丑联镳为名进士。余方与同馆诸公拱手庆快，为玉堂得人贺已，而天子以侍卫禁严之地，需才品卓犖之员，特简吾公秩居首列。盖谓扈从蹕警，疏附后先，非此莫胜其任也。而公亦克殚斐忱，格鬼神而矢天日。每銮旗攸向，无不在帝左右。迄今将十余载矣。凌晨则佩剑趋跄，逮夕则焚膏披咏，曾无倦色。而临池泼墨，对客挥毫，顷刻数纸，字追米、蔡，词抗苏、黄，诗则拾遗、王、孟之间，罔不各臻其妙。著作弘多，鸡林争售，匪独海内时髦，脍炙齿颊而已。呜呼，惜哉！忆余往昔立雪程门，宫墙数仞，夫子以经纬之才首陟兵枢，再登冢宰。既而四字肃清，百僚矜式；金瓯协吉，仰赞一人。调燮阴阳，赓飏典诰。虽心力俱瘁，而天下称和焉。至于鲤庭稟训，诗礼承家，诲之以谦冲，励之以勤敏，公亦孝友惟谨，率履罔愆。且更罗致才俊之儒，与之濯磨讨论，皆啧啧推公，以为英迈绝伦，不可及也。呜呼，惜哉！

今岁夏杪，奄以小疾，遽挟飞仙，入芙蓉之城，赋玉楼之句。闻讣惊恸，莫知所云。天道茫茫，诚不可问矣。将陈絮酒，申厥楚些。而夫子峻拒，敬述鄙陋之词，写之卷轴；莫罄招魂之泪，灵其鉴旃。爰附之谏而哭之曰：

呜呼！公今舍余，遽云逝矣。哲人其萎，梁木其坏矣。当兹之世，不复觐斯人矣。犹忆曩岁交公之始，器宇嶙峋，胸罗经史。伟构如椽，眼光透纸。文逼先秦，墨花散绮。磊落雄奇，推倒一世。折节读书，虚怀下士。尊卣鼎彝，青帘乌几。入雅出风，得其遗旨。耻蹈齐梁，直追正始。公之为学，务求其实。极深研綏，芸缙秘帙

。拔萃之姿，揆天之笔。踌躇满志，淋漓而出。丰沛诸贤，罕见其匹。帝顷北巡，卜期朔日。交龙和鸾，方推扈跸。何期曦驭，蒙汜奄即？遽作修文，永辞金阙。举朝公卿，金为呜咽。帝亦俯悼，叹惋不辍。维余夫子，元嗣云亡。西河抱痛，凄焉以怆。泉台寂寂，漆灯未荒。余也与公，交情最久。世讲之谊，如足如手。惊闻皋呼，擗膺疾首。慰我夫子，语难以口，云云载驾，泪滴絮酒。在天之灵，其亦知否？

◇祭文

◇严绳孙秦松龄

嗟乎！我兄高阁钟英，神皋毓秀。风格鸿骞，才华虎绣。早擢巍科，在帝左右。主眷正渥，士论方崇。共期柄用，接迹元功。何为遭疾，遽及于凶？呜呼，伤哉！

兄之文学，江河屈注。对策万言，不袭常故。玉溪玮词，金荃丽句。寄托所之，前贤却步。兄之力学，强诵博闻。网罗故实，穿穴《典》《坟》。巾箱细字，玉轴高文。随身砚匣，到处香芸。兄之书法，神姿秀整。文敏《法华》，隐居《内景》。心慕手追，别出锋颖。兄于朋友，非世间情。人或谓狂，兄爱其真。人或谓冷，兄赏其清。兄处贵盛，门庭简飭。辨色趋朝，日暮下直。一二故人，明灯散帙。征逐者流，见而走匿。嗟余两人，先后缔交。绳孙客燕，辱兄相招。下榻高斋，情同漆胶。迨今十年，不忘久要。松龄客楚，惠问良厚。谓严君言，子才可取。虽未识面，与子为友。无何相见，遂同故旧。去年冬暮，今岁春残。绳也奉假，龄则去官。握手言别，此别最难。后会何期，当筵鲜欢。别来无几，思我实深。两奉兄书，见兄素心。尺书在怀，重比南金。含情未答，闻兄讣音。初得凶问，谓传者妄。诎此哲人，忽至沦丧？亲故贻书，知兄病状。云无所苦，笑谈属纆。兄来有因，兄去有向。莲花西土，玉楼天上。嗟余两人，徒怀旧恩。山堂为位，聊赋《招魂》。木叶夜落，空庭昼昏。追数平昔，忆兄绪言；十忘八九，取意所存。兄善倚声，世称绝唱。周柳香柔，辛苏激亢。每言诗词，同古所尚。古诗长短，即词之创。南唐北宋，波澜特壮。亦犹诗律，至唐而畅。屈为诗余，斯论未当。昨年扈从，兄到吴门。归与吾言，里俗何喧。前人所夸，举不足论。吾意有适，扁舟水村。又到君里，山中汲泉。落盏冰洁，下咽玃圆。地脉灵秀，应生高贤。若云林生，庶几似焉。

嗟乎！吾兄意趣莫俦文章，山水乃志所留。今我哭兄，烟水孤舟。兄灵不亡，当与我游。二泉清冷，不改其流。痛兄不饮，长卧荒丘。《侧帽》《饮水》，兄集我收。歌兄新词，兄尚知不？呜呼，哀哉！人孰无死，兄年太少。以才以德，俱宜寿考。兄少尚亡，况余辈老，及其未死，莫负良友，传兄文章，图兄不朽。寝门未哭，执紼谁某？重趼不能，一介何有。悲恻陈词，歆此絮酒。

◇徐乾学

呜呼！造物之桢，扶舆之灵，胚胎前光，间气笃生。孰夭其年，不究其用？宣圣有言，夫人为恻。呜呼！容若思皇亦世，洼水丹山，难方所自。孝友之性，允也天至。才舞象勺，已通六艺。往年锁院，吾徒相继。秋赋献书，春卿擢桂。金谓之子，宜郤诜第。事有不然，殆难意计。金张珥貂，简在惟帝。

呜呼！容若出入承恩，帷幄骖駟，左右至尊。远猷秘议，外庭罕闻。以其余闲，工为诗文。凡诸翰墨，靡不究论。师资之义，契话殷勤。古风云邈，子也实敦。子之求友，缟弗援。于子乎馆，如归永叹。崔綽将老，生入玉门。丧纪孤稚，还复恤存。呜呼！此道于今难言，海内相期。韦平重代，帝心所属，公望斯在。子之不禄，吁咄可怪。七日不汗，悠悠茫昧。此日几筵，前日嘉会。百年之身，罔不敝坏。宜贞而脆，问天莫对。适然者命，已知犹慨。

呜呼！容若顿隔重泉，遗言靡私，益钦子贤。圣情震悼，中使来宣。子之严亲，痛毒涕涟。朋游惘惘，回肠内煎。虽未识子，如久周旋。子之诗文，清新鲜妍。花间草堂，尤多可传。都为一集，使就雕镌。吾徒之责，子无憎焉。尊酒平生，帐何悬。一歌哀些，泪洒终篇。尚飨。

◇韩

呜呼！玉美易埋，兰生早凋。香熏辄烬，膏明忽销。洵美惟君，韵绝神超。濯濯尘，亭亭孤标。掉首阶缘，凌云独豪。千秋亦足，奈何一朝？瑶琴弦断，雅曲寂寥。仿佛平生，魂兮可招。自君之生，相君有子。长白松花，祥灵所启。慧过童乌，清逾叔宝。门是乌衣，业唯青史。联翩中隼，一鸣千里。彤墀大对，直言亶。如谊如蕢，古人所韪。一时汁颜，屈于及第。方倚鸚鵡，而冠鵷鷺。文通武达，雅志差池。拓弓霹雳，带剑荣鹄。宿庐余暇，肆为歌诗。兰畹金荃，妙绝一时。美人缱绻，香草旖旎。昨蒙召试，彩笔惊飞。墨落犹湿，溘焉长辞。呜呼，痛哉！人恶俊异，世疵文雅。造物好恶，得无同者？叹君孤诣，于世少可。谁其知之，调高谐寡。羽林十二，尺五魁三。闲时逸兴，剩水残山。麟趾褭蹄，翡翠琅玕。偏其探讨，孔鼎汤盘。流水游龙，过从朝夕。独共风雨，骚人羁客。胁肩语耳，翕热趋走。独出肺肝，端士益友。以兹济美，足媲伊巫。悄悄心劳，皇告仆夫。伫日丝纶，同称苏许。往往篇章，抑塞无语。人间敝屣，修促何求。君亲罔极，中道曷酬。知含而视，恨不少留。无穷忠爱，零落山丘。忝同师，东海之门。古有四友，攸兼于君。后先御侮，风义具存。最拙愚，亦蒙齿论。恻哭何及，收拾遗文。琳琅千万，摄取六丁。呜呼！一时作者，他年外孙。芙蓉城主，楞伽山人。尚飨。

◇朱彝尊

呜呼！曩岁癸丑，我客潞河。君年最少，登进士科。伐木求友，心期切磋。投我素书，懿好实多。改岁月正，积雪初霁。踵履布衣，访君于第。君时欢剧，款以酒剂。

。命我题扇，炙砚而睇。是时多暇，暇辄填词。我按乐章，缀以歌诗。剪绡补衲，他人则嗤。君为绝倒，百过诵之。迨我通籍，簪笔朵殿。君侍羽林，蛟函雉扇。或从豫游，或陪曲宴。虽则同朝，无几相见。我官既谪，我性转迁。老雪添鬓，新霜在须。君见而愕，谓我太臞。执手相勸，易忧以愉。言不在多，感心倾耳。自我交君，今逾一纪。领契披襟，敷文析理。若苔在岑，若兰在沚。君于儒术，繁学博通。文咏书法，靡有不工。康里夔夔，字术鲁翀。泊萨都刺，未知孰雄。君之勇略，侍帝左右。骑则籊云，射必碎柳。出师绝漠，不憚虎口。乃眷帝心，倚毗良厚。当其奋武，不知善文。及为文词，不知能军。允矣君子，才实逸群。随陆绛灌，异于前闻。和气婉容，承颜以孝。友于兄弟，古昔是效。谦谦者守，温温者貌。逆之勿恚，顺之无傲。花间草堂，淶水之亭。有文有史，有图有经。炎炎者进，或键而扃。缝掖之来，君眼则青。浮醪于觚，盛仓以笔。夜合惺松，花散笠帙。连吟比调，曾未旬日。诗朋尚在，忽焉辍瑟。彝尊月朔，谓君尚生。问疾而至，入巷心忤。复者在屋，升自东荣。魂招不来，踟躕屏营。寝门既哭，容车将骋。大泉一枚，蜡烛一挺。侑以荒词，泣下如绠。灵兮有知，痛无不省。尚飨。

◇翁叔元曹禾乔莱胡士著蔡升元

呜呼！琢火之喻，曩哲之所。感怀逝川之伤，前人于焉永叹。又况处为家宝，出作国桢，誉望斯归，朝野共仰者乎！先生履孝资忠，怀文抱质。早年座上倚琼林之一枝，弱岁毫端吐琅玕之六寸。三条桦烛，彪炳国华，五韵金茎，咨嗟时匠。领南宫之风月，搜东观之图书。会简庸亲，入侍帷幄。遂阶才地，直上云霄。适当半千之期，正预一双之选。攀龙鳞而排闾阖，横豹尾而护星辰。柳侍书之春衣多吟苑里，冯东阳之瑞锦半赐禁中。寄股肱耳目之司，负文采风流之望。盖自覆量尺寸，精讨锱铢。溯学海之源流，践词场之奥突。裴称武库，纵横于五兵；李号书楼，网罗于百氏。而又性成好士，生本怜才。值国家无事之时，正海宇承平之日。邺中上客，争游宴于南皮；江左人文，尽流连于西邸。鸾回鹄顾，惊犀管之遥分；雾结烟霏，看蛮笺之竞擘。每当早莺初雁，残月晓风，一闻白雪之音，抗乎青云之上，至于行成楷模，身为羽仪。绵邈清标，每合乎简册；中和至性，不假于弦韦。余事逮夫多能，一时传为博物。校雠金石，褚河南之辨古书；刻画丹青，王右丞之根夙世。美难称述，词绝名言。职继丝纶，方待韦平之拜；事留台阁，仍看燕许之封。何期君子之惟宜，翻讶哲人之不禄。崔岐叔之，好学空有五千；刘真长之，无年才逾三十。数至于此，伤如之何！驻白马而风哀，望素旗而雨泣。尊前共坐，谁复类于中郎；地下论交，必追思于武子。肃将薄奠，唯冀来歆。

◇王鸿绪翁叔元徐倬韩李国亮蒋兴芭高瑄

呜呼！吾侪同年几人，盖十二三年来离合聚散，亦间会哭于寝门，不图今日而来会哭君。呜呼！三十拥旄立年公辅，君之人地宜其尔也。吾不知星岳之降精英于斯人者，何意竟乃玉折而芝焚。元恺则辛阳才子，忠孝则金张奕世。君为相国之冢嗣，

名王之贵胄，乃与吾侪著麻衣、将脂炬、入锁院以自致于青云。穷经论史，研京炼都，旁及于书法绘事，皆臻其绝。而殆庶之哲，见微藏密，深衷远识，无所不到，而尤笃于君亲。人第见其爱贤好士，致海内之笔精墨妙，对床风雨，竟夕忘疲，而不知夫相于之雅，相别数稔，相隔数千里，而不替其相存。人第见夫延陵之入关，高邮之去国，交期生死，可以愧《谷风》之所刺，而不知夫虚怀契托，早已闻其声而交以神。而吾侪之所尤叹仰者，敦在三之节，备四友之谊。盖后先御侮于吾师之门，因推以及于吾侪也，不以其迹之数与疏而为故与新。呜呼！君之信于朋友如是也，天下后世亦可即是而知其为子与臣。然则君之存歿所系者，其重矣，而岂止于一身。君之疾既亟，有问疾者，语不及他，赋诗言志，惟匡济之殷殷。君之自许者固已感会于至尊。向者将老其才以大用也，而岂意夫昔人之言而不可信者：“仁者寿”，“恭则寿”之云。惟君入侍帷幄，出参扈从，从容秘议云霄之上，苍生有阴受其福而不知者，又宜其余祉之未有艾也。而与善之理，难问之于上帝之九阍。至尊以君之病，使院医数辈守视，令日以其病之增减报。既而为处方药赐之，而君已不能下咽矣。闻讣震悼。中使携潼酪致奠，恩数优渥。相国以中年哭壮子，不胜惨恻，见者为之流涕潺湲。而海内风雅之士，尤咨嗟懊丧，痛珠盘玉敦之失主盟。呜呼！吾侪同年之情所可得尽者，惟有生刍之束，哀些之陈。而言之无次，不足以当君之一。顾殊有负于安仁之作诔，宋玉之招魂。尚飨。

◇姜宸英

呜呼！国之璠玕，家之骐驎，曷不少延，而厄其至？自兄之死，无知不知，而骤闻之，鲜不涕洟。况我于兄，其能不悲？我始见兄，岁在癸丑。时才弱冠，叩无不有。马赋董策，弹丸脱手。拔帜南宫，掩芒北斗。兄一见我，怪我落落。转亦以此，赏我标格。人事多乖，分袂南还。旋复合并，于午未间。我蹶而穷，百忧萃止。是时归兄，馆我萧寺。人之狺狺，笑侮多方。兄不谓然，待我弥庄。俯循弱植，恃兄而强。继余忧归，涕泣弥弥。所以腆膺，怜余不子。非直兄然，太傅则尔。趋庭之言，今犹在耳。何图白首，复遄斯行。削牍怀槩，著作之庭。梵筵栖止，其室不远。纵谈晨夕，枕席书卷。余来京师，刺字漫灭。举头触讳，动足遭跌。见辄怡然，忘其颠蹶。数兄知我，其端非一。我常箕踞，对客欠伸。兄不余傲，知我任真。我时嫚骂，无问高爵。兄不余狂，知余疾恶。激昂论事，眼瞪舌拈。兄为抵掌，助之叫号。有时对酒，雪涕悲歌。谓余矢志，孤愤则那。彼何人斯？实应且憎。余色拒之，兄门固扃。充兄之志，期于古人。非貌其形，直肖其神。在贵不骄，处富能贫。宜其胸中，无所厌欣。忽然而夭，岂亦有云。病之畴昔，信促余往。商略文选，感怀凄怆。梁吴与顾，三子实来。夜合之诗，分咏同裁。诗墨未干，花犹烂开。七日之间，玉折兰摧，呜呼已矣，宛其死矣。我将安适，行倚徙矣。世无兄者，谁则容我？为去为留，无一而可。兄今不幸，所欠者年。其不亡者，乐府百篇。诗词蕴藉，书体精研。吾党论次，以待剞劂。生而克才，为天子使。歿而名垂，以百世俟。茫茫大造，几人如此？魂之有知，永以无伤。嗟二三子，是亦难忘。

◇顾贞观

呜呼！吾哥其敬我也，不啻如兄。其爱我也，不啻如弟。而今舍我去耶？吾哥此去，长往何日？重逢何处？不招我一别，订我一晤耶？且擗且号，且疑且愕。日晦晦而遽沉，天苍苍而忽暮。肠惨惨而欲裂，目昏昏而如瞽。其去耶？其未去耶？去不去尚在梦中，而吾两人俱未寤耶？吾哥去而堂上之两亲何以为怀？膝前之弱子何以为怙？辇下之亲知僚友何以相资益？海内之文人才子，或幸而遇，或不遇而失路无门者，又何以得相援而相煦也！欲状吾哥之生平，既声泪俱发而不忍为。追惟欲述吾两人之交情，更声泪俱竭而莫能为。浹缕盖屈指丙辰以迄今兹，十年之中，聚而散，散而复聚，无一日不相忆，无一事不相体，无一念不相注。第举其大者言之：吾母太孺人之丧，三千里奔讣，而吾哥助之以麦舟。吾友吴兆骞之厄，二十年求救，而吾哥返之于戍所。每戇言之数进，在总角之交，尚且触忌于转喉，而吾哥必曲为容纳。洎谗口之见攻，虽毛里之戚，未免致疑于投杼，而吾哥必阴为调护。此其知我之独深，亦为我之最苦。岂兄弟之不如友？生至今日，而竟非虚语。又若尔汝形忘，晨夕心数，语惟文史，不及世务。或子衾而我覆，或我觴而子举。君赏余《弹指》之词，我服君《饮水》之句。歌与哭总不能自言，而旁观者更莫解其何故。又若风期激发，慷慨披露，重以久要申其积素。吾哥既引我为一人，我亦望吾哥以千古。他日执令嗣之手而谓余曰：此长兄之犹子。复执余之手而谓令嗣曰：此孺子之伯父也。呜呼！此意敢以冥冥而相负耶！总之吾哥胸中浩浩落落，其于世味也甚澹，直视勋名如糟粕，势利如尘埃。其于道谊也甚真，特以风雅为性命，朋友为肺腑。人见其掇科名，擅文誉，少长华阀，出入禁籞，无俟从容政事之堂、翱翔著作之署，固已气振夫寒儒，抑且身膺夫异数矣。而安知吾哥所欲试之才，百不一展；所欲建之业，百不一副；所欲遂之愿，百不一酬；所欲言之情，百不一吐？实造物之有靳乎斯人，而并无由毕达之于君父者也。犹忆吾哥见赠之词有曰：“一日心期千劫在，后身缘恐结，他生里。”又曰：“惟愿把来生，祝取慧业，同生一处。”呜呼！又岂偶然之言而他人所得预者耶！吾哥示疾前一日，集南北之名流，咏中庭之双树，余诗最后出，读之铿然，喜见眉宇，若惟恐不肖观之，落人后者。已矣，伯牙之琴，盖自是终身不复鼓矣。何身可赎，何天可禋？音容旗然，泣涕如澍。再世天亲，誓言心许。魂兮归来，鉴此惊悰。

◇梁佩兰

呜呼！我离京师，距今四年。此来见公，欢倍于前。留我朱邸，以风以雅。更筑闲馆，淶水之下。仲夏五月，朱荷绕门。西山飞来，青翠满轩。我念室家，南北万里。不能即归，暂焉依止。公为相慰，至于再三。谓我明春，同出江南。公昨乞假，恩许休沐。静披图史，间聆丝竹。顷复入侍，上临乾清。谕以奏赋，振笔立成。上嘉曰才，惟尔进士。金钟大镛，庙堂之器。四方名士，鳞集一时。埏籥迭唱，公为总持。良宵皓月，更赋夜合。或陈素纸，或倚木榻。陶觞抒咏，其乐洋洋。诂传公来，颠倒在床。始犹狐疑，少焉而信。已而奄然，天不可问。

呜呼！公生相门，官列貂珥。当世通显，谁与比量。才合文武，实天赋畀。不尽其用，亦因时尔。万仞壁立，以置其身。大块囊括，不遗一尘。其志广渊，其气磅礴。自树丰骨，有廉有锷。与人相接，琅然玉琴。泊乎论交，断然坚金。不尚贵游，而好蓬荜。微言彻心，长啸抚膝。英爽俊健，朋辈无前。霜落之林，苍鹰摩天。黄金如土，惟义是赴。见才必怜，见贤必慕。生平至性，结于君亲。举以待人，无事不真。所为诗词，绪幽以远。落叶哀蝉，动人凄怨。

呜呼！四时之气，秋为最悲。公本春人，而多秋思。大化冥冥，默运终始。公之不长，谅或此理。天耶？人耶？是耶非耶？在朝在野，何人不嗟。斯文之哀，吾道之丧。公既如此，吾属何望。呜呼！天有倾回，地有缺陷。草木黄萎，金石销烂。阴阳阖辟，出入之门。鬼神往来，生死之根。譬之冰雪，其初为水。水固非一，冰雪非二。当其为水，居然峨峨。当其为雪，色映玉珂。返乎其初，冰亦无有。谓之太虚，谁测先后。公在世间，其心皤然。兹抗云表，谅鉴余言。尚飨。

卷二十 附录下

◇挽诗（徐元文）

有仪者鸾，何翮斯颓？有祥者麟，何角斯摧？

兰芝晨陨，楸瑀暮开。万化奄尽，怆矣其哀。

◇又

之子国彦，夙章芳问。请业虎闾，礼举义振。

展策璇墀，金相玉润。心乎爱矣，古训用竞。

◇又

帝曰尔才，简卫左右。入侍细旃，出奉车后。

信著阙廷，才轶伦耦。退沐有时，念结师友。

◇又

子之亲师，服善不倦。子之求友，照古有烂。

寒暑则移，金石无变。非俗是循，絜义是恋。

◇又

灼其春华，诂曰非实？殷其菟仕，诂曰非嗇？

奋于高阁，儒素是飭。言有慨慷，情无矫饰。

◇又

子兮能孝，乃弃晨昏。子兮能忠，不究君恩。

飘零翰简，寂莫琴尊。陈迹终往，朗誉长存。

◇又

玉树土埋，昔贤所痛。曾是斯人，而能不恸？

黯然风回，悲哉日暮。欲歌难终，惟情之壅。

◇彭孙遹

茂陵遗草尚如新，寂莫空堂撤瑟辰。

花拂茵帘偏易萎，玉埋丘陇竟何因？

郑庄驿舍生秋草，荀令香炉裊暗尘。

多少龙门旧宾从，筵前渍酒各沾巾。

◇严我斯

经年出入傍宸居，潇洒襟期物外疏。

马蹋花香金蹕褭，砚承仙露玉蟾蜍。

趋朝秘殿垂清佩，退直闲窗看道书。

叹息文园多病后，祇今谁似汉相如？

◇又

小筑花间旧草堂，芙蓉为帐墨为庄。

交游座上多缝掖，检点诗篇爱晚唐。

缟岭吹笙人独往，山阳闻笛自神伤。

可怜尘世元如梦，好辘轳轮出大荒。

◇又

花落空阶月到轩，每从佳日忆西园。

种来仙草难蠲忿，烧尽名香不返魂。

赋惇可堪悲贾傅，买丝真欲绣平原。

悬知慧业生天上，人世蜉蝣且莫论。

◇又

通志堂前胜事多，好春时节一曾过。

兴来欲跨仙人鲤，客到还携道士鹅。

感旧故交惟有泪，伤心市上不闻歌。

池塘一带频回首，秋雨潇潇落芰荷。

◇孙在丰

最忆东堂日，芙蓉镜有君。

绛纱吾岂敢，玄草尔多闻。

抗节凌千古，登坛树一军。

犹余十年梦，风雨泣斯文。

◇又

落落君怀抱，交情澹始真。

世人成卤莽，吾道历荆榛。

自觉盟心在，谁论会面频？

三年两见汝，今日黯伤神。

◇王又旦

家承公辅贵，班列近臣高。

闲气标千古，清声彻九皋。

玉楼飞藻缋，仙乐奏云敖。

何遽观齐物，丁年自解骹。

◇又

于今推大雅，能不念修文？

泛爱无遗物，高怀自轶群。

绿尊空玉露，缥帙散香云。

竟掩宣尼袂，伤心处处闻。

◇又

宇宙堪长啸，雄才更有谁？

星精原久照，石火相移。

甲第荣三策，勋名迈贰师。

独来宾馆客，想像动余悲。

◇又

夙昔频相许，神交托此心。

春风迷紫陌，夜月杳青岑。

旧榻琴声冷，新松剑气阴。

凄凉蒿里饯，援笔有哀吟。

◇乔莱

每插金貂谒紫宸，十年帷幄最亲臣。

祇今三殿星班里，无复朱衣上直人。

◇又

弯弓下笔事难兼，天授奇才赋予偏。

七萃横行霄汉路，承恩独自奏《甘泉》。

◇又

遗文金石半销亡，好古冥搜雅擅场。

他日若为人物志，好将名姓继前杨。

◇又

文采风流剧梦思，寂寥吟院冷书池。

时无晕碧裁红手，一曲犹传乐府词。

◇又

时开宾馆倒芳尊，爱士情同挾纁温。

华屋山丘三叹息，不堪骑马过州门。

◇又

长埋玉树嗟何及，遽掩金刀痛莫追。

一恸寝门人歇绝，山阳诗酒更何时？

◇秦松龄

卧病空山暑未阑，奉君书札劝加餐。

含情欲报闻君死，尺素重开雪涕看。

◇又

争说新恩宠赉频，八年宿卫一亲臣。

朋游聚散寻常事，端为朝廷惜此人。

◇又

家世由来近斗魁，螭头橐笔美多才。

春风马上诗成早，知是甘泉侍宴回。

◇又

乌丝阑纸薄如罗，破体书成小令多。

南国空传《红豆》曲，画堂谁赋《雪儿》歌？

◇又

奉使龙沙路几千，归来身在属车边。

平堤夜试桃花马，明日君王幸玉泉。

◇又

容易秋笳绝塞回，千金不惜为怜才。

可怜季子前年死，墓上今谁挂剑来？

◇又

去年扈从到吴门，祇爱扁舟泊水村。

今日哭君何处是？枫桥秋雨又黄昏。

◇又

淶水亭幽选地偏，稻香荷气扑尊前。

夜阑怕犯金吾禁，几度同君对榻眠。

◇又

顾生老友客平原，姜子相知比弟昆。

自怜白发江湖外，不得同渠哭寝门。

◇又

黄菊还开旧日丛，花间难与故人同。

秋灯共下伤心泪，祇有桐江一钓翁。

◇徐秉义

珥貂随彩仗，簪笔侍长杨。

盛业须钟鼎，升朝倚栋梁。

临池追小晋，掞藻逼中唐，

箕尾身骑去，名留天壤长。

◇又

好文常下士，别馆傍平津。

囊著千秋业，尊开四座春。

斑衣娱尚父，彩笔骇词臣。

扈从曾相遇，谁知永诀人。

◇又

音容殊未杳，万古隔同游。

浩气还闾阖，悲思动冕旒。

玉珂槐里月，素绋槿原秋。

欲报心知意，河源作泪流。

◇朱彝尊

骤听黄鸡唱，惊随白马来。

百年嗟辍瑟，五夜尚衔杯。

泉下知安往，人间信可哀。

退朝怜相国，封篋忍重开？

◇又

通籍题毡笔，承恩换骏冠。

射乌连矢发，走马万夫看。

禁直昏钟入，廊餐午箭残。

伤心倚闾望，东第少归鞍。

◇又

出塞同都护，论功过贰师。

华堂属纆日，绝域受降时。

凄惻传天语，艰难定月支。

敛魂犹未散，消息九京知。

◇又

屈指论交地，星终十二年。

斯人不可作，知己更谁怜。

翠渐深门柳，红仍腻渚莲。

旧游存没半，凄断小亭前。

◇又

主客披图得，云烟过眼谙。

吟花成绝笔，听雨罢深潭。

画里韶颜在，尊前丽语耽。

凭将肠断句，流转到江南。

◇又

别悔从前易，途伤此日穷。

回肠歌哭外，搔首寂寥中。

迹扫孤生竹，枝摧半死桐。

自今观物化，不诋释门空。

◇姜宸英

去去终难问，人间有逝波。

未酬前夕话，已失醉中歌。

万事一朝尽，千秋遗恨多。

平生知己意，惟有泪悬河。

◇又

自遣秦和至，方知二竖牵。

禁方亲赐与，天语更缠绵。

祇欲酬明义，何关恃少年。

他时无限恨，凄恻少人传。

◇又

侍从张安世，名家晏小山。

承恩惟宿卫，适意在花间。

客至同开卷，朝回祇闭关。

心期如有托，寂莫去尘寰。

◇又

意气嗟如昨，亭台本自幽。

非无感慨士，不少老苍流。

坐对殊方哭，生悬万古愁。

竹林哀自响，为尔起悲秋。

◇又

奉使属当年，提戈绝域边。

射生供宿膳，凿地出山泉。

宛马终来汉，星槎直到天。

俄闻中使告，惨淡素帷前。

◇董闾

所思人已往，怅望逐流波。

略结生前识，空悲死后歌。

报君明义重，爱士感恩多。

应有枯鱼泪，相过也泣河。

◇又

曲径风悲竹，高门云过山。

修文入天上，慧业出人间。

尘满书连幌，琴虚月映关。

惟余乐府意，潇洒寄区寰。

◇梁佩兰

侍卫身名贵，朝端礼数优。

鹖冠随豹尾，鸡舌傍螭头。

气足雄三辅，人言似列侯。

还闻奏词赋，官欲上瀛洲。

◇又

宴会犹前日，韶华已早朝。

忍留丞相府，不见侍臣貂。

风雅真沦丧，乾坤半寂寥。

戟门丹旆影，一片冷萧萧。

◇又

少小矜才思，同时叹绝伦。

五云瞻日月，三策对天人。

掣笔香垂露，看花鸟弄春。

于今那得见，天上作星辰。

◇又

几榻交新网，图书黯旧纱。

尚巢红幕燕，谁护锦堂花？

亲泪深沾血，皇恩特祭茶。

北城当日幕，凄切更闻笳。

◇又

仗节唆龙日，关前柳正黄。

去驰千里马，行逐六骡王。

沙碛围毡帐，山川画虎囊。

功成人不见，地下报君王。

◇又

不死灵娥药，无人奉一盘。

竟骑蝴蝶去，谁作马蹄看？

绣服蒙金骨，银灯照玉棺。

素车千万乘，殡日送雕鞍。

◇又

佛说楞伽好，年来自署名。

几曾忘夙慧，早已悟他生。

舍利浮金掌，毗耶出化城。

赏吟风月在，一碧万峰明。

◇又

日有贫交在，缘君昔共亲。
樽前兰渚客，花下藕溪人。
检集翻千遍，登山哭万巡。
不堪肠断处，坟种白杨新。

◇又

轩冕曾无意，逢人说马曹。
太行知势险，北斗按心高。
笔墨留缣素，云霄想羽毛。
精灵如不散，一为降旌旄。

◇又

岭外遗书札，论交阅有年。
极知余薜荔，相劝客幽燕。
气谊无千古，胸怀实大贤。
岂期观物化，新冢象祁连？

◇又

饮水题诗卷，行边展画图。
一为云雨散，几处友朋孤。
泪作天河落，心将塞草枯。
平生无此哭，不是为穷途。

◇又

生死原无著，枯荣却自分。

楼台看落日，车盖叹浮云。

鸟影当前过，钟声昨夜闻。

芙蓉朝萎谢，零露更纷纷。

◇徐鉉

共羡金安上，韶年拜奉车。

如何奇木对，翻作茂陵书？

诗思花铃寂，君恩药裹余。

应知谢太傅，不忍顾阶除。

◇又

新原俄宿草，笳韵咽槐风。

犀尘沈泉壤，金貂感侍中。

剑莲秋匣断，香穗晚篝空。

愁杀登床日，冰丝暗绿桐。

◇徐嘉炎

剑花沈处笔花枯，白玉楼成事有无。

妖梦琅邪亡长豫，伤心郾县育童乌。

频年宿卫天关迥，万里驱驰绝塞孤。

风雨奉车谁得似，秦松鲁桧昨秋途。

◇又

兰畹金荃早擅场，曾开银榜舞霓裳。

篇章好续《尊前集》，丹药难逢《肘后方》。

可有甜波来白海？空传鲛泪泣黄肠。

堪嗟北斗阑干候，结束飞尘入建章。

◇又

萧斋天际想真人，形影曾忘赠答频。

每读新词标侧帽，惊闻遗讣忽沾巾。

孤鸾舞罢方缠恨，别鹤弦摧更怆神。

玉树临风埋著土，不堪蒿里独生春。

◇又

乐府花间著作林，南朝宫体识余音。

玉笙吹彻含愁句，锦瑟传将惜别心。

三变遗声销柳七，九原同调得陈琳（谓迦陵）。

填词妙手今岑寂，中散当年痛抚琴。

◇周清原

嘉树生朝阳（陆机），式瞻在国桢（任昉）。

上凌青云霓（司马彪），承露概太清（曹植）。

何意回飙举（曹植）？恍惚似朝荣（鲍昭）。

落英陨林趾（潘岳），黄鸟为悲鸣（陆机）。

杳杳落日晩（潘岳），昭昭素月明（王粲）。

有怀谁能已（颜延年），寤言涕交纓（陆云）。

◇又

眷言怀君子（谢灵运），凄怆伤我心（阮籍）。

弱冠参多士（鲍昭），邦彦应运兴（陆机）。

既通金闺籍（谢朓），怀抱观古今（谢灵运）。

诗书敦夙好（陶潜），翰墨久谣吟（王僧达）。

蔚若朝霞烂（陆机），清如玉壶冰（鲍昭）。

形影忽不见（曹植），思君徽与音（阮籍）。

◇又

世胄躋高位（左思），十载朝云陛（谢朓）。

托身承华侧（陆机），列侍紫宫里（左思）。

夕息旋直庐（陆机），晨趋朝建礼（沈约）。

延纳厕群英（谢灵运），贤达不可纪（谢灵运）。

舒文广国华（颜延年），清机发妙理（曹摅）。

赋诗连篇章（刘桢），遗音犹在耳（潘岳）。

◇又

振衣独长想（陆机），徙倚怀感伤（十九首）。

翰墨有余迹（潘岳），茵帟张故房（潘岳）。

宾友仰徽容（陆机），清埃播无疆（谢瞻）。

千载垂令名（江淹），一绝如流光（傅咸）。

碧树先秋落（江淹），零泪沾衣裳（谢灵运）。

惨怆发哀吟（张绪），长叹不成章（谢灵运）

◇李澄中

素族青门去，良朋白马来。

修文终地下，射虎果雄才。

寂寂归幽室，冥冥闭夜台。

平生游览处，触境总堪哀。

◇又

应待螭头笔，翻依豹尾旗。

枫宸名久著，薤露世堪悲。

山雨侵灵几，秋风冷總帷。

格心怜属国，温语九泉知。

◇徐树谷

终贾龄方茂，文星遽掩芒。

凤怜毛忽陨，麟惜趾偏伤。

扈輶恩何渥？传经泽未忘。

如今總帷处，前夜读书堂。

◇又

花满春江曲，凌云遇最先。

清词繁《玉露》，彩笔丽《金荃》。

磨盾才原敏，临池法更妍。

斯人今不起，大雅复谁传？

◇又

器本青云秀，情逾白玉温。

嗜书留秘帙，执礼到夷门。

瞑带辞亲泪，行迷恋阙魂。

只余芳宴地，冷月下西园。

◇又

每出平津馆，常来杜曲车。

论心双迹外，投分十年初。

宁忍闻邻笛？空怜检篋书。

迢迢天上路，望绝玉楼居。

◇徐炯

惨淡郊原色，槐风咽暮笳。

土中埋玉树，天上别灵槎。

古道通门旧，高文举世夸。

言寻读书处，涕泪洒青霞。

◇又

昌宇曾骖乘，申屠试蹶张。

应知从细柳，时复献《长杨》。

万里金□□，三河绣□裆。

□叉留白羽，还忆落双□。

◇又

市骏能怜骨，雕龙解作鳞。

临邛邀倦客，堂阜脱羈臣。

梦断香莲幕，心摧宿草轮。

平原如可绣，花簇赵州春。

◇又

龙螭三台札，繁华四姓侯。

城南推韦杜，江左擅风流。

竟谢乌皮几，空怀紫绮裘。

芙蓉城畔路，应与曼卿游。

◇王九龄

射策当年上□娑，久瞻才望郁嵯峨。

文章梦吐扬雄凤，挥洒书笼逸少鹅。

流水朱弦能和寡，倾身白屋感恩多。

长埋玉树真堪恨，叹息惟应唤奈何！

◇陆肯堂

相国生才子，传家实象贤。

盛名嗟歿后，余事忆从前。
凤穴千寻起，龙门百尺悬。
致身由甲第，□藻正丁年。
赤管辉煌日，青云指顾边。
既来香案吏，应作玉堂仙。
命岂文章厄，官仍禁近联。
独蒙恩眷注，常与帝周旋。
暂出烦骖乘，归来侍御筵。
风前看侧帽，花外听鸣鞭。
单骑巡边去，双旌报命还。
乞降言果验，劳使旨曾宣。
世尽夸腾蹕，公犹感伏銓。
读书弥折节，下士或随肩。
东阁时方启，西园客屡延。
岁输千匹绢，月俸一囊钱。
有誉皆邀赏，无才不受怜。
例从《文选》起，语自《衍波》传。
手著都成集，分仇每绝编。
时时开《玉笥》，一一志《金荃》。
真觉才难尽，从知嗜独专。

门风资济美，物望倚陶甄。
荣悴宁关数？苍茫欲问天。
百身余悼惋，一病竟沈绵。
私痛惊飞鹢，余哀咽乱蝉。
风流今已矣，勋业卜终焉。
泽被皇仁厚，天教至性全。
治丧优诏许，宅兆故侯迁。
落日山阳笛，秋风中散弦。
执鞭空有愿，接席永无缘。
脉脉愁孤剑，沈沈奈九泉。
异时看史策，画像在凌烟。

◇吴自肃

不尽酬知意，兰阶脉脉通。
联床思夜雨，怀刺忆春风。
忽促斯人驾，应怜吾道穷。
伤心歌楚些，无处问苍穹。

◇又

人方推国士，天竟妒奇才。
遗稿留神护，招魂动鬼哀。
花间堂尚在，枕畔梦还来。

珍重西河泪，无劳洒夜台。

◇邹显吉

风雅应千载，知交仅几人。

一编遗《侧帽》，再读倍沾巾。

投分忘车笠，伤心慰贱贫。

从兹兰蕙气，香散不堪纫。

◇又

不觉衡门里，飘零泪暗倾。

死难忘帝眷，生不愧朋情。

晓箭听青琐，寒宵话白萍。

回思当日事，怅望暮云横。

◇杨辉

忽得骑虬信，怆然欲断魂。

盛名犹在世，大雅竟谁论？

风雨怀前哲，存亡感旧恩。

天心不可问，清泪泣黄昏。

◇吴雯

频年京洛感衣尘，本自横汾旧隐沦。

忽以海南题柱客，浪传河上纬萧人。

感因道德交方古，气为文章意益真。

许尔千秋是知己，伤心便作九原身。

◇又

片语端能订久要，合欢花下和吹箫。

琴尊笑语违三日，裙屐风流隔六朝。

岂敢再过丞相府，惟应常梦侍中貂。

夜台先有阿蒙在，且省茫茫怨寂寥。

◇又

早年声誉重瑶林，中岁承恩紫禁深。

安世诗书尊扈跸，元成阀阅竞冠簪。

文章颇厌当时望，事业终悬薄海心。

哀乐随人从不敢，为君特地一沾襟。

◇又

十载曾闻幼妇辞，愿将银管写乌丝。

愁当鹦鹉争传处，痛在玲珑再唱时。

旧谱漫教虫网遍，闲情空有笛人知。

从今锦字休零落，一认弓衣也泪垂。

◇邵锦标

桀戟仍排户，图书已锁门。

凄凉看白旆，容易哭黄昏。

高垄栽新柏，前山出断猿。

巫阳不可问，何处欲招魂？

◇刘雷恒

修短偏难问碧虚，哀音忽寄北来书。

清门有种承台席，仙牒无情泣奉车。

◇又

輶路相逢眼倍青，寒庐抱影叹伶仃。

客愁日暮迷云树，不道秋风堕岁星。

◇又

赠言挥手托风轮，怀袖相依便面亲。

难禁秋来开什袞，墨痕黯澹泪痕新。

◇又

唾珠咳玉积千函，《侧帽》新词恣美谈。

若鉴幽思悬冀北，夜台须唱《望江南》。

◇宋大业

英贤分岳秀，才子稟星精。

尺五家声远，奎三气象横。

文章推小许，经术重元成。

射策登先甲，七华擅两京。

银钩书劲美，铜钵句铿锵。

好学心逾切，撝谦志不盈。

八叉新咏就，三影丽词清。

下士常延誉，怜才有鉴衡。

解衣欣赠帔，置腹感推诚。

公望谐时论，畴咨系圣情。

方看朝旭曜，俄叹夕阳倾。

玉树埋何痛，金徽黯不鸣。

人间逝水急，天上赋楼迎。

雨冷书销蠹，魂迷梦泣琼。

孤寒摧广厦，寰宇失连城。

世讲关情重，衔哀荐一觥。

◇挽词

◇蔡升元（满江红）

年少翩翩早曾到、曲江筵上。

春堤畔、金鞭玉勒桃花初涨。

射策旧看飞上苑，承恩特赐趋仙仗。

记星班、常在御屏风香烟傍。

供奉曲，清平唱。

校猎赋，《长杨》壮。

羨风流文采雕翎虎鬣。

骖乘却陪梁父禅，乘槎直溯天河浪。

叹从今、三殿少朱衣空惆怅。

◇又

珠履三千浑不数、雕龙绣虎。

曾几日、分题刻烛移商换羽。

一片玉河桥畔水，数声金井梧桐雨。

最凄清、闻笛向山阳人何处。

座上士，松枝尘。

尊中酒，花间度。

剩荒烟蔓草销魂难赋。

绿水亭边宾从散，乌衣巷口衰杨舞。

纵蛮笺、十样写新词何情绪！

◇又

跃马弯弓偏彩笔、能工绮语。

都付与、雪儿檀拍异才天赋。

坐上朱弦清悄韵，曲中红豆相思句。

正柔肠、谱到断肠词春无主。

山月暗，乌啼曙。

银烛地，风吹露。

叹晨曦易夕人琴已去。

燕子楼头红粉泪，杜鹃声里黄昏雨。

只兔葵、一片对刘郎悲前度。

◇沈朝初（满江红）

搔首青天问底事、偏嫌才子？休比似、彩云易散琉璃多脆。

璞玉浑金人卓犖，裁云缝月词清丽。

想岁星、不耐住黄尘人间世。

斑虬管，文鸾翳。

蓉城主，瑰楼记。

逐群仙上下大荒游戏。

哀笛斜阳愁客听，孤琴流水为君碎。

忍埋将、瑶树向青山情何已！

◇又

兰筠家声传朱户、荣同伊陟。

记早岁、五云庐唱郗林射策。

凤诏挥毫螭陛下，龙津侍宴鸡翘侧。

掌期门、三十侍中郎承恩泽。

桃花骑，蜃珂勒。

莲花锏，鲛鱼室。

羨禁中颇牧烽消沙碛。

玉塞功名追定远，金城方略思充国。

待他年、铁面画麒麟生颜色。

◇又

内殿春晴给笔札、金门奏赋。

凌云气、至尊亲赏文场独步。

紫凤天吴光璀璨，珊瑚宝树枝回互。

问年来、待诏满公车谁堪伍？

颂酒德，歌琴绪。

冠柳集，生花句。

更墨池笔冢跳龙卧虎。

岂羨毫从江令足，还期袞待樊侯补。

任苍生、望绝士林悲摧天柱。

◇又

骏马台边更别筑、翹林高馆。

勤吐握、孔融坐上宾朋常满。

寄远争投青玉案，分题竞涤红丝砚。

算兰亭、梓泽旧风流今从见。

南皮会，西园宴。

张融尘，袁宏扇。

笑臣饥索米几同游衍。

鱼鸟无依山海竭，芝兰空叹泉台掩。

筮巫咸、楚些漫招魂归来晚。

◇高翥（江城子）

日餐沆瀣饮金茎。

擅科名上蓬瀛。

却为多才侍从拥霓旌。

桂殿芝房曾出入俄不见总伤情。

羲和飞辔几时停？夜台扃杳冥冥。

忆昔边疆万里请长缨。

待到归降人已歿宣诏谕九泉听。

◇华鲲（满江红）

生死悲欢总莫向、先生浪语。

只应是、禅关悟错未圆初地。

宿世多闻余慧业，回光一念谐尘趣。

问匆匆、三十一年中声何誉？

完业果，王侯第。

偿情债君亲谊。

也随他、功名诗酒等闲游戏。

著处因缘都舍却，本来面目今犹记。

认茅菴、未冷旧蒲团还归去。

◇俞兆曾（洞仙歌）

灵祇何意？送谪仙归去。

寻遍蓬莱旧时侣。

叹飘飏高举后假翼难登凝云散，何自要回天路？

依然阑槛外柳碧花香，帘锁清阴镇如许。

问新来倚床选梦《侧帽》，征歌凄凉付一霎西窗风雨。

已壁毁柯摧涕沾襟忍想到山前白杨零语。

◇又

英英灼灼美敷华ㄟ藻。

珥笔登朝德星耀。

记蕊宫珠榜列林店沾红吟情在暖日浓烟芳草。

君恩称异数珍重还留御案边傍把书校。

算随他、闲依玉署卧老花砖何如是侍从长杨春晓。

每抵得东华曙光寒对落月疏星句成清悄。

◇又

秋来校猎向千山飞箭。

一发云中堕双雁。

遇太平天子日塞北江南巡游地长在龙旌前面。

银鞍珠络马繁弱初弯蹄触金飙疾于电。

视沙堤、兽肥草浅木脱霜浓鹰隼细呼上臂鞬声健。

便蹶屣摧丛晚来归还觅到、填词碧琉璃砚。

◇又

天涯倦旅忆长安巷陌。

藕荡渔人眼青白。

却阮囊羞涩候荡子心情偷声谱制就木兰花阙。

东皇舒霁色赌酒分题小院熏炉篆香爇。

任才人、挥毫展彩拂尘雄谈移情问江上暮春三月。

经几度蛮笺写乌丝浑不似、彤墀珥金貂客。

◇又

梅梢烘破恰烧灯庭院。

绝塞羁人乍相见。

更曲阑香径外一笑掀髯而今数多作玉楼吟伴。

三年重到处浣罢征尘旋续南皮向时宴。

怪归帆、芙蓉湖外才了莺花浓阴际懊恼将离开遍。

刚卸却荷衣逐群芳又梦断、金华子规啼怨。

◇又

红云送燠报鸾舆初驾。

整顿飞黄已多暇。

喜合欢含蕊早占取幽芬桃花纸写到闲情夜夜。

堪悲能几日冷逼虚堂星陨山颓闭长夏。

纵天家、神方屡赐中省频来难留住梦逐夕阳西下。

但检取遗编再三看空望绝、瑶池羽衣多化。